

JESUCRISTO PIA PEXEINYA DIWESI JUME TATSI MATEO PETINAE DIWESI

Meje yabara pomonae Jesucristo pia pamo susatopiwi tatsi
(Lc 3.23-38)

1 ¹Meje barapo diwese Jesucristo pia pamo susatopiwi tatsi yabara. Jesucristo pon Nacom itoroba itaboco wetsica xua jiwi pecapanenebiyaenexatsi. Bapon Abraham pia pemomoxi susato jiwana pin tatsi. Barapon Abraham pon bayatha caena tupa, pon copiya naebopa po cae pin nacuatha xua israelmonae pomonae judi monaexae beya pinmonae tsoponae. Matautano Jesucristo David pia pemomoxi susato jiwana pin tatsi. Barapon David pon bayatha caena tupa, pon caena bayatha Israel nacuapiwi itorobiya pia pepa peewatsinchi.

²Abraham Isaac paxa tatsi. Bapon Isaac Jacob paxa tatsi. Bapon Jacob, Judá paxa tatsi yawa Judá peweicho jiwi, bapontha cae axaba. ³Bapon Judá Fares iru Zara paxa tatsi. Tamar Fares pena tatsi iru Zara pena tatsi. Bapon Fares Esrom paxa tatsi. Bapon Esrom Aram paxa tatsi. ⁴Bapon Aram Aminadab paxa tatsi. Bapon Aminadab Naasón paxa tatsi. Bapon Naasón Salmón paxa tatsi. ⁵Bapon Salmón Booz paxa tatsi. Booz pena tatsi pewun Rahab. Bapon Booz Obed paxa tatsi. Obed pena tatsi pewun Rut. Bapon Obed Isaí paxa tatsi. ⁶Bapon Isaí David paxa tatsi, po David caena bayatha Israel nacuamonae itorobiya pia pepa peewatsinchi. Matautano David pexanto tatsi pewun Salomón. Bapon Salomón pena tatsi pewun Betsabé, powa copiya bayatha Urías xeina.

⁷Bapon Salomón Roboam paxa tatsi. Bapon Roboam Abías paxa tatsi. Bapon Abías Asa paxa tatsi. ⁸Bapon Asa Josafat paxa tatsi. Bapon Josafat Joram paxa tatsi. Bapon Joram Uzías paxa tatsi. ⁹Bapon Uzías Jotam paxa tatsi. Bapon Jotam Acaz paxa tatsi. Bapon Acaz Ezequías paxa tatsi.

¹⁰Bapon Ezequías Manasés paxa tatsi. Bapon Manasés Amón paxa tatsi. Bapon Amón Josías paxa tatsi. ¹¹Bapon Josías Jeconías paxa tatsi, iru Jeconías peweicho jiwí bapontha cae axaba. Bapon Jeconías poxonae israelmonae teicaeya capoinchi Babilonia nacua beya, barapo jinaebotha Jeconías naexana epatotha.

¹²Bapoxonae pirapae Jeconías tanaexanatsi pexanto Babilonia nacuatha. Jeconías Salatiel paxa tatsi. Bapon Salatiel Zorobabel paxa tatsi. ¹³Bapon Zorobabel Abiud paxa tatsi. Bapon Abiud Eliaquim paxa tatsi. Bapon Eliaquim Azor paxa tatsi. ¹⁴Bapon Azor Sadoc paxa tatsi. Bapon Sadoc Aquim paxa tatsi. Bapon Aquim Eliud paxa tatsi. ¹⁵Bapon Eliud Eleazar paxa tatsi. Bapon Eleazar Matán paxa tatsi. Bapon Matán Jacob paxa tatsi. ¹⁶Bapon Jacob José paxa tatsi. Bapon José piowa tatsi pewun María. Barapowa María Jesús pena tatsi. Bapon Jesús icha wun wun dutatsi, po wun “Mesías”, jei, po wun xua jei: “Pon Nacom itoroba itaboco wetsica xua jiwí pecapanenebiyaenexa tsainchi”, jei.

¹⁷Abraham pia xainya weya tatsi trece poyobe pebiwi naexana xua Abraham muxunano daxota daxita catorce poyobe naexana, beya pu ducua poxonae David naexana. Bapon iru Salomón pia xainya weya tatsi trece poyobe pebiwi naexana xua Salomón muxunano daxota daxita catorce poyobe pebiwi naexana beya pu ducua poxonae Israel nacuamonae teicaeya capoinchi Babilonia nacua beya, beya pu ducua poxonae Jeconías naexana. Salatiel pia xainya weya tatsi trece poyobe pebiwi naexanapona xua Jeconías muxunano. Daxota daxita catorce poyobe naexana, beya pu ducua poxonae Mesías naexana.

**Meje yabara poxonae Jesucristo nowaeuncua
pebin wuto barapo cae pin nacuathe
(Lc 2.1-7)**

¹⁸Poxonae Jesucristo naexana bara iche: María Jesucristo pena tatsi, poxonae bapowa muxu pepichi pecotsiwa pon pewun José, poxonae abu cataunxuae jopa peru nacoyabiyo, bapoxonae María pexuyo bupana taecatsi. Barapo pexuyo Nacom pia Pejumope tunaxu tatsi María tsiperu weeca exanatsi. Barapo pexuyo pewun Jesús. ¹⁹José, María pia pebin tatsi tsane, poxonae pichina pon pejuntu coyene xanepanaein. Daxota bapon José, María jopa beyabara paebichi xua catsa pexuyo pecapoponaexae xua bupana taecatsi xua María aura peexanaenexa tsainchi jiwí peitutha tatsi. Bapoxonae José namicha moyiya najuntu cui coyene baraxuba xua jopa pepichiwa tsane, xua jiwí jopa cataunxuae pecui yabara yaputaenexa. ²⁰Poxonae came cataunxuae baxua yabara nanta xeina, José maituncuataba. Bapoxonae José amachinae tsita naitutatsi matatsunpin po matatsunpin Nacom itoroba. Matatsunpin namchiya jeye: “José, David pia pemomoxi susato jiwana pin tatsim,

jopa junuwinde xua nepichiwa tsane María xua jinseuri neexanaewa tsane. Tsipei barapo pexuyo, po pexuyo naexanaena, apara Nacom pia Pejumope tunaxu tatsi pia pexuyo tatsi. ²¹ Bapowa tanaexanaeinchi pexanto. Bapon wun dutsiname, po wun ‘Jesús’, jei. Barapo wun, wun dutsiname tsipei bapon pijimona capanepaena xua abe pia peexanae cuiru coyenein weya tatsi, xua daxota Nacom jopa petsitanexatsi xua barapomona pexeinaewa penatsicuentisiwa”, jei matatsunpin.

²² Daxita baraxua exana penacui yabara jume wetsinexa pocotsiwa bayatha Nacom pia peitorobi jume pepaebin caena bayatha yabara tsiwuna muxu duta Nacom nexa, xua jeye:

²³ “Matha taema, yabayo pexuyo bapana taecatsi
powa jopa peru nacoyabiyo pebin.

Yawa tanaexanatsi pexanto, po pexuyo wun
dutatsi, po wun ‘Emanuel’, jei”,

jei Nacom pia peitorobi jume pepaebin.

(Barapo wun jei: “Nacom naca baru popona”, jei.)

²⁴ Poxonae José nacosataxuba, bapon exana pocotsiwa matatsunpin itoroba po matatsunpin Nacom itoroba. José María pitatsi. ²⁵ Bequein cae botha nabaru poponabe daichitha jopa came imoxoyo naperu cuicuinaeyobe beya poxonae pexanto tanaexanatsi. José pexuyo wun duta, po wun “Jesús”, jei.

**Meje yabara poxonae pomonae opitei pecayabara wuna
yaputaewi barapomona Jesús siwa poinchi xua petaenexatsi**

2 ¹ Jesús naexana Belén tomaratha, Judea nacuatha. Barapoxonaeru Herodes pon Judea nacuapiwi pia peyanacua ewatsinchi popona barapo Judea nacuatha. Poxonae Jesús naexana pebiwi pata Jerusalén tomaratha. Barapomona opitei pecayabara wuna yaputaewi.

Barapomona pia tomara taju taenatsi ichaxota pocotsiwa xometo weecoina. ² Barapomona ichawa beya yayainyaba tsiniya, jeye:

—¿Exota naexana pexuyo, po pexuyo judiomona itorobiya pia pepa peewatsinchi exanaeinchi poxonae pinyo tsane? Paxan payaputan xua bapon naexana xote tsipei bapon pia opiteito tatsi panaitomatsiya punaenaponan pata nacua werena, po nacuatha ichaxota pocotsiwa xometo weecoina. Papatan xua pata wuna jainchiwa tsane barapo pexuyo, jei.

³ Herodes, pon Judea nacuapiwi pia peyanacua ewatsinchi poxonae bapon yabara jume tane xua ichun naexana pon jiwi itorobiya pia pepa peewatsinchi, bapoxonae bapon bichocono unthuthu deideije Iruru Jerusalén tomarapiwino daxita bichocono unthuthu deideije pejume taexae baxua. ⁴ Nexata Herodes waba sacerdotemona pia pentacaponae tatsi xua pia petanacaetutsinexa tsainchi pia botha.

Matautano wabano pomonae jiwi pecuidubiwi Moisés pia peitorobi coyenewa tatsi. Daxita barapomonaetha Herodes yainyaba, jeye:

—¿Exota naexanaena Mesías, pon bepa pinae Nacom itorobei? jei Herodes.

⁵Barapomonaе jume nota, jeye:

—Bapon naexanaena Belén tomaratha, po tomara Judea nacuatha eca. Bapon naexanaena barapo tomaratha, tsipei Nacom pia peitorobi jume pepaebin caena bayatha tsiwunaeya yabara muxu dutsiya tina xua Mesías yabara, Nacom nexa. Nacom jeye:

⁶‘Belén tomara bequein po tomariyo tsiqui tomariyo jiwana tomara xua Judea nacuatha, daichitha Judea nacua pentacaponae wi yabara nanta xeinaena xua Belén tomara peainya cui tomariyo tsane. Baxua nanta xeinaena tsipei barapo tomariyotha naexanaena, pon jiwi pia Pecanamataxeinaeinchi tatsi. Xan Nacom bapon itorobin tamonaetha, pomonae Israel nacuapiwixae, xua bapon barapo israelmonae itorobiya pia pepa Peewatsinchi tsainchi’, jei Nacom, xua Nacom tatinatsi pon Nacom peitorobi jume pepaebin, jei sacerdotemonaе iru pomonae jiwi pecuidubiwi Moisés pia peitorobi coyenewa tatsi.

⁷Nexata Herodes namicha moyiya waba pomonae opitei pecayabara wunaе yaputaewi. Herodes yainyaba barapomonaetha: “¿Eta poxonae yatsicaewa barapo opiteito paca tsita naituta?” jei bapon. ⁸Poxonae barapomonaе jume nota bapontha bapoxonae Herodes itoroba barapo pebiwi Belén tomara beya. Herodes jeye barapomonaetha:

—Paponare Belén tomara beya. Beta xanepanaya pajeire barapo pexuyo. Poxonae pataebiname barapo pexuyo, nexata pana netsipaebare, tsipei xan iru ponaein wunaе tajainchinexa tsaneru barapo pexuyo, jei Herodes.

⁹Poxonae Herodes najume weta, barapo pebiwi bara ponarucpa, pomonae opitei pecayabara wunaе yaputaewi. Bapoxonae po opiteito bayatha tane pia nacuatha, barapo opiteito jemeicha caewa naitutaba. Yawa barapomonaе matabapoinchi. Barapo opiteito ducupona beya matapainya matatsun ducuatavica ichaxota barapo pexuyo boca.

¹⁰Poxonae barapo pebiwi tane barapo opiteito, barapo pebiwi bichocono juntu coyene weiweina. ¹¹Barapomonaе bo jojoniya ichaxota tane barapo pexuyo xua pena baru ecatsi, barapowa María. Bapoxonae barapo pebiwi pentabocotontha ena xua barapo pexuyo wunaе pejainchinexa tsainchi, tsipei barapoyo pon Pecanamataxeinaein peexanaexae tsainchi

poxonae pinyo tsane. Bapoxonae barapomonae piawan coibo isacapenta xua cajijinca. Barapo pexuyo catsibatsi xuan pocotsiwa pewun oro nain. Catsibatsino xua pocotsiwa pewun incienso xua pocotsiwa tuxusi tuxuei benata poxonae tauta exana. Matautano muxuna catsibatsi icha petuxueiwa pocotsiwa pewun mirra xua pocotsiwa anaincuito. ¹²Bapoxonae pirapae barapo pebiwi maitumenaeya amachinae xua jopa bewa equeicha patsi tsane ichaxota Herodes eca. Daxota barapomonae pia nacua be-iyiya, icha namto iyiya.

Meje yabara poxonae Jesusbaru panenebiya Egipto nacua beya

¹³Poxonae barapo pebiwi ponarucupa bapoxonae Nacom itoroba matatsunpin Josetha. Matatsunpin tsita naituta poxonae José amachinae. Matatsunpin José baraichi, jeye: “Asiya uncuare. Pexuyo pire yawa coxiwano. Egipto nacua bebaru naetsiriwiyama. Ecare barapo nacuatha, beya abũ poxonae equeicha catsipaebinchi baxota. Tsipei Herodes pexuyo jeitsina pebexubinexa tsainchi pexuyo”, jeichichi José matatsunpin.

¹⁴Poxonae cataunxuae merawi, José nacosataxuba. José pexuyo pita, yawano José pita yabũyo María xua pexuyo pena tatsi. Daxita barapoyobe warapa Egipto nacua beya poxonae cataunxuae quirei tsuncuae. ¹⁵Barapo nacuatha, Egipto nacuatha, barapoyobe ecabe beya poxonae juinya Herodes tupa. Baxua José cana exanatsi xua bayatha Nacom pia peitorobi jume pepaebin petsiwũnae yabara paebixae Nacom nexa xua jeye: “Waban Taxanto Egipto nacua weya”, jei Nacom pon pia peitorobi jume pepaebin Nacom nexa pon jiwi Pecanamataxeinaeinchi.

Meje yabara poxonae Herodes itoroba, ichamonae itorobatsi xua pejutebinexatsi pexui

¹⁶Poxonae Herodes yaputane xua pomonae opitei pecayabara wũnae yaputaewi muxujainyabiya tsipaeba bapontha xua itara patapaeba, bapoxonae Herodes anaya bichocono anaepana. Nexata bapon itoroba, ichamonae itorobatsi xua pejutebinexatsi daxita pexui pebiwi wũtixi, po pexui cataunxuae pencuetixi, po pencuetixi cataunxuae jopa yapu othopaeyo dos po weibe, irũ po pexui xua bayatha yapu othopa dos po weibe. Barapon Herodes itoroba xua pejutebinexatsi barapo pexui pebiwi wũtixi daxita poxi Belén tomara cuariya beya. Herodes baxua exana yaitama bayatha pomonae opitei pecayabara wũnae yaputaewi yopita xua pinae tane pexuyo pia opiteito tatsi barapo dos po weibetha poxonae peputha taponã, opiteito peputha tatsi xua jinaebotha, poxonae Judea nacua beya pona. ¹⁷Baxua Herodes cana cui wetsiya exanatsi, xua bayatha Jeremías pon Nacom pia peitorobi jume pepaebin petsiwũnae yabara paebixae, xua jeye:

¹⁸“Jume tan xua wecoyeyi Ramá tomaratha,

po tomara eca imoxoyo Belén tomaratha.
 Powa xua wecoyei, bapowa Raquel,
 powa bayatha tupa.
 Bapowa Raquel pia pemomoxi susatopiwi siwa
 wecoyei, tsipei daxita tajutebatsi.
 Barapowa jopa naitawanae copatsiyo tsipei
 pexui bayatha werapa bequein ichamonaе jume
 matawenta”, jei Jeremías.

¹⁹Herodes bapoxonaе pirapae tupa. Bapoxonaе matatsunpin pon Nacom itoroba, José tsita naitutatsi poxonaе José amachinae Egipto nacuatha. Matatsunpin jeye Josetha: ²⁰“Natsixitabare. Pire barapo pexuyo yawa coxiwa María, pexuyo pena tatsi. Israel nacua beya caibe nawiya. Tsipei bayatha werapa pomonaе ichichipa xua barapo pexuyo pebexubiwatsi”, jei matatsunpin.

²¹Bapoxonaе José natsixitaba. José pita pexuyo yawa coxiwa. Israel nacua beya caibe nawiya. ²²José jume tane xua juinya pinae Arquelao naexana Judea nacuapiwi pia peyanacua ewatsin tatsi. Arquelao Herodes pexanto tatsi. Arquelao xuya peyanacua ewatsin naexana ichaxota bayatha coxiyan peyanacua ewatsin naexana bapon Herodes. Tsipei Arquelao eca Judea nacuatha daxota José junuwa xua peponaewa barapo nacuatha. Daxota José pona Galilea nacua beya, tsipei poxonaе amachinae matatsunpin itoroba xua bewa pinae ponaena barapo nacuatha. ²³Poxonaе José patopa barapo nacuatha, bapoxonaе popona po tomaratha, po tomara pewun Nazaret tomara. Baxua José cana cui wetsiya exanatsi, xua bayatha Nacom pia peitorobi jume pepaеbiwi Jesús cayabara tsiwunaе muxu dutsiya jeye: “Bapon wun dutinchi po wun jei: ‘Nazaret tomarapin’, jei”, jei barapo Nacom pia peitorobi jume pepaеbiwi.

**Meje yabara poxonaе Juan, pon Pebautisabin jiji,
 cuiduba ira xuepana susato tsurucuae nacuatha
 (Mr 1.1-8; Lc 3.1-9, 15-17; Jn 1.19-28)**

3 ¹Pirapae poxonaе ainya wei yapucaewa, poxonaе abu cataunxuae Jesús eca Nazaret tomaratha, bapoxonaе Juan pon jiji Pebautisabin patopa ira xuepana susato tsurucuae nacua beya xua Judea nacuatha. Bapon Juan Nacom Pejume Diwesi paeba ducuaеbiya. ²Juan namchi: “iIcha juntu coyene paxeinare Nacomtha painya neauraxae xua abe paexaname! Tsipei Nacom paca waba painya nenaexanaenexa piamonaе tatsi jiwana pomonaе Nacom itorobiya peewatsixae”, jei Juan.

³Barapo Juan apara bapon pon caena bayatha peyabara tinaeаetsi. Isaías pon Nacom pia peitorobi jume pepaеbin, bapon caena bayatha yabara jume wunaeya tina, xua caena bayatha Juan yabara jume wunaeya tinatsi. Isaías jeye:

“Jume tan pon wawai ira xuepana
 susato tsurucuae nacuatha.
 Bapon wawaya jeye: ‘Patsi najuntũ cui
 coyene wũaere pon jiwi pia pepa
 Pecanamataxeinaeinchi pia pepatopae wũaeya tsane’,
 jei pon wawai”, jei Isaías petinae diwesitha.

⁴Juan jumaina duwein nabocoto, po duwein pewun camello. Coreinya bocoto maraina. Juan xane pocotsiwan yapupuna, pocotsiwan be sure, matautano bana daebano. ⁵Jiwi pata Jerusalén tomara weya, irũrũ pata xua daxita tomaranpiwi xua Judea nacia weya, irũrũ pata po tomaranpiwi xua imoxoyo Jordán mene weya. Barapomona pata Juan pejume taenexatsi. ⁶Poxonae barapomona nayopita Nacomtha xua bepa pinae Nacom tsita auratsi, xua abe peexanaexae, barapoxonae Juan bautisaba barapomona Jordán mentha.

⁷Ichitha poxonae Juan tane xua nawita pata fariseomona jiwana irũrũ xua saduceomona jiwana pata ichaxota Juan bautisaba, Juan jeye barapomonaetha: “iPaxam pomona pemuxitorobi jiwi pam! iPaxam be bara jomomona pam, tsipei jomo ba cuitaya dũcupa nawa! Bara paichim anoxuae, paichichipame Nacom pacuitaya dũcupame xua abe paca exanaeyainwa. Jopa papanenebiyaem tsane bequein bara paca bautisabinchi tsipei jopa pajuntũ coyene xanepanaem Nacomtha. ⁸⁻⁹Xaniwaicha pajinompare xain ichamona paca cui tane, xua icha juntũ coyene painya nexainaewa Nacomtha xua painya neauraxae xua abe paexaname. Tsipei bequein paxam pajam: ‘Waxainchi Abraham pia pemomoxi susato jiwichixaetsi Nacom naca capanenebiya exanaena’, pajam, daichitha paxam jopa xaniwaicha pajume cowũntsim Nacom. Daxota Nacom itacũpatsi xua paca cui matawenta pia jopa paca nepaca capanenebiyaenexa tsane. Matautano barichino Nacom itacũpatsi xua jiwi forotsinchi barapo ibotixi weya, po ibotixi xote Jordán mene itapatha bobena. Barapo jiwi naexanaena, po jiwi yatsicaewa Abraham pia pemomoxi susato jiwi tatsi, pomona pejume cowũntsiwixaetsi Nacom. ¹⁰Poxonae pebin naein ũba sipari ba canacui wũaeta xua pecaucubobinexa po naein jopa nacoichiyo. Poxonae barapo naein ucuboba nantatsun eta xua petautsinexa isototha. Paxam bara paca jũta ichiya paca cana exanaena. Nacom paca yabara nacui wũaeta xua paca bebai tsane isototha, ichaxota po isototha jopa cuinaya itacounayiyo tsipei Nacom jopa xanepanaya pata exanaem. ¹¹Xan xaniwaicha paca bautisabatsi meratha painya neauraxae xua abe paexaname xua daxota icha juntũ coyene painya nexainaewa tsane Nacomtha. Paca bautisabatsi meratha, ichitha nama pon tsiwanaya patopan, apara bapon Mesías. Bapon paca bautisabina Nacom pia Pejumope tũnaxũtha tatsi poxonae Nacom paca najumope catsibina. Bapon paca jiwana cui copatsinchi xua

atene tsane Cristo pejume cowuntsixaetsi xua ichamonae atene exanaena. Bapon bichocono peayapusu itorobi coyenewa xeina beyacaincha xan. Bapon pon jiwí pia Pecanamataxeinaeinchi. Daxota bapon bichocono tsita pin ura xeinan xua tataxu mu isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponae wi poxonae baru cui itura jina pia pentacaponae wichi. ¹²Bapon pon patopaena bapon bayatha tsinacobenata po paparato xua trigo xu nexa. Bapon trigo xu tsanaya seicaya matapepe jehebapona. Trigo xu jehebapona trigo xu matabohta. Matapepe jehebapona petautsinexa isototha, ichaxota po isoto jopa cuinaya itacounayiyó. Bapon bara juta cana ichi tsane jiwítha icha trigo xu cana ichiya ichi. Jiwi Nacom tsana nobina pomonae pejume cowuntsixaetsi pia nacuatha nexa. Ichamonae tsana nobinchi pomonae jopa pejume cowuntsiwichi, petautsinexa isototha ichaxota xua jopa itacounayiyó”, jei Juan.

Meje yabara poxonae Jesús bautisabatsi

(Mr 1.9-11; Lc 3.21-22)

¹³Nexata Jesús patopa ichaxota Juan uncua Jordán mentha xua Galilea nacuatha. Jesús patopa xua Juan pebautisabinexa tsane. ¹⁴Copiya Juan juntucuru jume matawenta xua Jesús pebautisabiwatsi tsainchi tsipei anacuicaura. Juan jeye Jesthath:

—Xan apara pon xua tanantawenonaewa xua xam bewa jame tana nebautisabiwam tsane. Nama xan jopa bewa cabautisabi tsainchi, jei Juan.

¹⁵Ichitha Jesús jume nota:

—Anoxuae bara ‘je’ jande pocotsiwa xua xanepana, pocotsiwa ichichipan pocotsiwa xua xanepanaya exanatsi pocotsiwa xua Nacom naca itoroba, jei Jesús.

Bapoxonae Juan jume jejei xua Jesús bautisabatsi. ¹⁶Nexata poxonae Jesús bautisabatsi, Jesús nainya mene wejuina. Bapoxonae nainya peitaboco nayausanaxuba. Jesús tane xua Nacom pia Pejumope tñaxu tatsi Jesús tapatopeicatsi, be topiboto yaruneica. ¹⁷Bapoxonae Jesús jume tane pocotsiwa peitaboco wetsipaebicatsi, jechichi: “Bapon apara Taxanto, pon bichocono antobein pon itapetan. Bapon nejuntu coyene weiweina exana”, jei Nacom.

Meje yabara poxonae Jesús juntu coyene jujutatsi caurimonae pia pentacaponaein tatsi xua Jesús abe coyeneya petaexanaenexa tsane

(Mr 1.12-13; Lc 4.1-13)

4 ¹Nexata Nacom pia Pejumope tñaxu tatsi Jesús matacayatsi ira xuepana susato tsurucuae nacua beya. Baxotiya caurimonae pia pentacaponaein tatsi Jesús piraichi juntu coyene jujutatsi xua Jesús abe coyeneya petaexanaenexa tsane.

²Jesús jopa nabanaeyo baraxotiya cuarenta po matacabibetha matautano cuarenta po merawibetha. Poxonae barapo matacabin yapucaewaba bapoxonae Jesús bichocono jainpa. ³Caurimonae pia pentacaponaein tatsi imoxoyo patopa Jesustha. Bapon Jesús piraichi jüntu coyene jujütatsi xua Jesús abe coyeneya petaxanaenexa tsane. Bapon Jesús baraichi:

—Icha xam yatsicaya Nacom Pexantom, netsita itüre. Barapo iboton itorobare xain pan naexanapenta, jei caurimonae pia pentacaponaein tatsi.

⁴Ichitha Jesús jume nota:

—Nacom Pejume Diwesitha namchi: ‘Jopa metha bepa meisa jiwi betiya una jinompaetsipae pan. Bara iru yawano Nacom Pejume Diwesi jiwi betiya yajüntu cui coyeneya jüntemiya jinompa’, jei Nacom Pejume Diwesitha, jei Jesús.

⁵Nexata caurimonae pia pentacaponaein tatsi Jesús matacapoinchi Jerusalén tomara beya. Baxotiya Jesús Nacom pin pia botha pentatupa beicha capoinchi. ⁶Caurimonae pia pentacaponaein tatsi Jesús baraichi, jeye:

—Icha bara xaniwaicha Nacom Pexanto tatsim, wenaxoreinque. Yaitama tsipei Nacom Pejume Diwesitha namchi, jeye:

‘Nacom itorobina pia matatsunpiwi
necayanabinexa.

Barapo matatsunpiwi asiya cawaetaboutsina
pecobetha, xua jopa necataxu tsaquituncuaenexa
tsane ibototha, poxonae wenaxorecame’,
jei Nacom Pejume Diwesitha,
jei caurimonae pia pentacaponaein tatsi.

⁷Jesús jume nota, jeye:

—Barichi Nacom Pejume Diwesitha namchi, jeye: ‘Jopa jüntu coyene jujütsiya wucaeinde Nacom pon jinya Necanamataxeinaein, xua necajume jejeiwa tsane xua necayawenaewa tsane poxonae jopa xapain exanaem’, jei Nacom Pejume Diwesitha, jei Jesús.

⁸Equeicha caurimonae pia pentacaponaein tatsi Jesús matacapoinchi ichaxota po demxuwa bichocono atororo. Baraxotiya Jesús tsita itütatsi daxita nacuan xua barapo cae pin nacuathe. Matautano Jesús tsita itütatsi daxita nacuan pia peitüpanae coyenewan. ⁹Caurimonae pia pentacaponaein tatsi Jesús baraichi, jeye:

—Ichaunxuae nentabocototha uncuaename taitabaratha, xua matautano ichaunxuae newüne jaintsiname xua nenanta xeinaewaxae xua xan jinya tacacanamataxeinaeinchi. Bapoxonae barapo nacuan yawa muxuna nacuan pia peitüpanae coyenewan, baxuan cacatsinchi xua jinya necanamataxeinaenexa barapo nacuan, jei caurimonae pia pentacaponaein tatsi.

¹⁰Nexata Jesús jume nota:

—Xam pon caurimonae pia pentacaponae, bara nexubiriware. Yaitama Nacom Pejume Diwesitha namchi, jeye: ‘Meisa wūnae jainde jinya Necanamataxeinaein Nacom. Meisa bapon yatsicaewa taexande pocotsiwa caitoroba’, jei Nacom Pejume Diwesitha, jei Jesús.

¹¹Bapoxonae caurimonae pia pentacaponaein tatsi Jesús pia xainya weya tatsi napitaba. Matatsunpiwi pata Jesththa xua Jesús pecui matateicaenexa tsainchi, matautano xua peapatsinexa tsainchi.

**Meje yabara poxonae Jesús tamropata
pitaba pia penacuichiwa Galilea nacuatha**
(Mr 1.14-15; Lc 4.14-15)

¹²Poxonae Jesús jume tane xua Juan jiwi pecubi botha eca, bapoxonae Jesús pona Galilea nacua beya. ¹³Ichitha Jesús jopa ecaeyo Nazaret tomaratha, jame saya pona Capernaum tomara beya xua baxotiya pepoponaenexa. Barapo tomara eca, Galilea pucua itapatha ichaxota ainya nacuabe nacaquita ecabe po nacuiyo pewun Zabulón nacuiyo, yawa po nacuiyo iru pewun Neftalí nacuiyo. ¹⁴Pocotsiwa Jesús exana poxonae Capernaum tomaratha popona, baxua Jesús yabara nacui wetatsi xua caena bayatha Nacom pia peitorobi jume pepaebin, pon Isaías, pecayabara cui wūnae tsiwūnaeya tinaexae poxonae jeye:

¹⁵ “Po ainya nacuabe pewun Zabulón nacuiyo matautano Neftalí nacuiyo, barapo nacuabe ecabe ichaxota po namtotha pucua imoxoyo caquita ducuiya.
Barapo nacuabe ecabe ichaxota po pin nacua, pewun Galilea nacua.
Barapo Galilea nacua icha muxunenetha eca xua Jordán mentha.
Barapo Galilea nacua weya jinompa pomonae jopa judiomonae naexanaeyo.

¹⁶ Barapomonae caena bayatha jopa yaputaeyo Nacom, matautano caena bayatha jopa nayabara yaputaeyo xua muxu bara nama pewerapaeba abe peexanaexae. Daxita barapomonae be pocotsi jiwimonae poxonae pona pequireiwatha xua poxonae matautano jopa xeinaeyo xua penatsiwana itiyobiwa. Daichitha daxita barapomonae nama jume cowuntsina, xua jume cowuntsinchi pon Nacom itoroba.
Bapon barapomonae juntu cui coyene babatsiya xanepanaya jinompaeya exanaeinchi ichi be jiwi

ichi xua poxonae pin pecoichatha jinompa”,
 jei Isaías, pon Nacom pia peitorobi jume pepaebin.

¹⁷Bapoxonae Capernaum tomaratha Jesús tamropata pitaba xua jiwi cuidubatsi. Jesús namchi, jeye: “Icha juntu coyene paxeinare Nacomtha, painya neauraxae xua abe paexaname. Tsipei Nacom paca waba painya nenaexanaenexa piamonae tatsi pomonae Nacom itorobiya peewatsixae”, jei Jesús.

**Meje yabara poxonae Jesús waba cuatro poyobe pebiwi,
 pomonae duwei peyamaewi**
(Mr 1.16-20; Lc 5.1-11)

¹⁸Jesús pona Galilea pucua itapatha. Jesús tane ponbe ainya caepipeweichobe. Ichun pewun Simón pon icha wunno Pedro. Ichun pewun Andrés. Baponbe duwei peyamaeinbe. Baponbe mentha yamonauyabe duwei pocotsiwatha xua peyamaewa. ¹⁹Nexata Jesús baraibe baponbe, jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonae payawenaenamebe xua barapomonae pejume cowuntsiwa tsane Nacom icha bayatha paichimbe poxonae payamonamebe duwei nawita, jei Jesús.

²⁰Nainya caena baraponbe peyamaewan xubotabe. Napuna ponabe Jesustha.

²¹Bapoxonae pirapae Jesús tane ichunbe, ponbe ainya caepipeweichobe. Ichun pewun Santiago. Ichun pewun Juan. Baponbe Zebedeo pexantobe tatsi. Baponbe jeratha paxa baru ecabe. Baponbe peyamaewan wunaetauyabe. Jesús waba, baponbe wabatsibe. ²²Caena nainya jera xubotabe matautano paxa cuenta ponabe. Baponbe Jesús puna poinchibe.

Meje yabara poxonae Jesús pin bicheitomonae cuiduba
(Lc 6.17-19)

²³Jesús popona ducuaeta daxita Galilea nacua beya. Bapon cuiduba ducuaeta daxita judiomonae pia penacaetutsi bontha tatsi. Jesús paeba ducuaeta Nacom pia pexeinya jume diwesi tatsi, po diwesi yabara xua Nacom waba jiwi, petanaexanaenexatsi piamonae pomonae Nacom juntu coyene itorobiya ewata. Matautano Jesús axaibi exana jiwi xua daxita carepaya xoxi atene barapomonae yawa xua faefaena peatenexae. ²⁴Pin bicheitomonae jiwi jume tane xua juinya Jesús exana daxita carepaya Siria nacuatha. Barapomonae pomonae pejume taexae xua Jesús exana, barapomonae capona daxita pomonae domaebatsi, yawa pomonae peatenexae, matautano pomonae caurimonae xeina, matautano pomonae amameibatsi, matautano pomonae mubatsi. Jesús axaibi exana daxita

barapomonaē. ²⁵Pin bicheitomonaē jiwī Jesús puna poinchi pomonaē Galilea nacua weya pona. Irurū Jesús puna poinchi pomonaē Decápolis nacua tomaran weya pona, irurū pomonaē Jerusalén tomara weya pona, irurū pomonaē Judea nacua weya pona. Irurū Jesús puna poinchi pomonaē jinompa ichaxota po nacua eca imoxoyo Jordán mentha xua icha muxunenetha xua tajūthiya.

Meje yabara poxonaē Jesús cuiduba jiwī demxuwatheicha

5 ¹Poxonaē Jesús tane barapo pin bicheitomonaē, bapoxonaē Jesús pona demxuwatheicha. Matautano Jesús baxoteicha eca. Bapoxonaē Jesús pijimonaē matawacaicha nacaetutarucupatsi pomonaē pia pepuna ponaewichi. ²Jesús tamropata pitaba xua diwesi cuiduba barapo pin bicheitomonaē.

Meje poxonaē Jesús yabara cuiduba pomonaē pejuntū coyene weiweinaē jiwī (Lc 6.20-23)

³Jesús barai barapo pin bicheitomonaē pomonaē pijimonaēxae tatsi, jeye: “Maisa bichocono juntū coyene weiweina pomonaē yaputane xua Nacom pecanantawenonaewatsi xua xanepanaya pejinompaewa tsane. Tsipei barapomonaē naexanaena Nacom piamonaē pomonaē Nacom juntū coyene itorobiya ewata.

⁴“Maisa bichocono juntū coyene weiweina pomonaē bequein anthuthurewe xua siwa wecoyei petaxae xua ichamonaē abe cana exana jiwitha. Daichitha barapomonaē Nacom cui matateicaena, barapomonaē cui matateicaeinchi xua anthuthurewe, xua ichamonaē siwa wecoyeichi.

⁵“Maisa bichocono juntū coyene weiweina pomonaē Nacom bichocono pebaru cui itura jinaewatsi xua jopa Nacom yabara ajuntūcoyēnetsacatsi. Barapomonaē nama patsina pena iratha po ira Nacom bayatha yabara paeba.

⁶“Maisa bichocono juntū coyene weiweina pomonaē ichichipa nawita xua exaneiba xua Nacom ichichipa, pexeinaenexa tsane pejuntū coyene xanepanaewa Nacomtha xua Nacom jopa petsitanexatsi xua barapomonaē pexeinaewa penatsicuentsiwa xua abe peexanaexae bapontha. Barapomonaē yawenatsi, Nacom yawena xua barapomonaē pexeinaenexa tsane barapo coyene.

⁷“Maisa bichocono juntū coyene weiweina pomonaē nantanuweya pecayabara cui cananta xeinaewi xua ichamonaē peyawenaenexatsi. Barapomonaē xuya Nacom nantanuweya cayabara cui nanta xeinaena xua peyawenaenexa tsane.

⁸“Maisa bichocono juntū coyene weiweina pomonaē pejuntū xeicaē jiwī xua pomonaē jopa pecayabara nanta xeinaexae abe peexanaē cuiru coyene. Barapomonaē Nacom necotsinchi.

⁹“Maisa bichocono jũntũ coyene weiweina pomonae jũntema pejinompaexae xua peyawenaexae xua irũ ichamonae jũntema jinompa peexanaexaetsi pomonae copiya abe nata exaneiba. Barapomonae pomonae jũntema pejinompaexae Nacom unuta ‘Tapexui’, jei Nacom.

¹⁰“Maisa bichocono jũntũ coyene weiweina pomonae bequein bara aperũtane exainchi mataũtano bequein bara anthũthũtane exainchi, xua amsiya xaniwaicha peexanaexae pocotsiwa Nacom itoroba. Barapomonae nama Nacom pijimonae tatsi naexanaena pomonae Nacom jũntũ coyene itorobiya ewata.

¹¹“Maisa bichocono pajũntũ coyene weiweiname poxonae bequein bara ichamonae abeya paca yabara pæba, poxonae bequeinno abe pacata exana, mataũtano poxonae bequeinno canaerabiya paca yabara pæba tapaneantobemxaem. ¹²Pajũntũ coyene weiweinare. Mataũtano jũntema painompare tsipei Nacom paca catsina pia pexeinya peitũpanaewan pocotsiwan Nacom paca jũntana jeba pia nacuatheicha. Icha ichamonae abe pacata exana payabara nanta xeinare, matha caena barichi poxonae ichamonae abe exana pomonaetha pomonae Nacom pia peitorobi jume pepaebiwi. Barapomonae caena bayatha jinompa poxonae paxam cataunxuae jopa pajinompaem”, jei Jesús.

**Meje yabara poxonae Jesús diwesi pæba xua sare
yabara yawa xua pecoicha yabarano
(Mr 9.50; Lc 14.34-35)**

¹³Equeicha Jesús barai barapo pin bicheitomona, pomonae pijimonaexae tatsi jeye: “Sare beno bara beno wũnae. Ichitha icha barapo sare beno jopa abenataeyo bapoxonae jopa peitacũpæwatsi xua equeicha peabenataewa. Bapoxonae jiwi barapo sare beno xuba iratha. Mataũta beno taxunaunaba iratha. Paxam pomonae tamonae pam be bara jũtiya ichiya pam, icha sare beno cana ichichi. Paxam payawende jiwi pomonae jinompa barapo cae pin nacuathe xua daxita jiwi jopa abe peexanaewa tsane. Ichitha icha barapomonae jopa xapain payawenaem tsane, Nacom bara paca bebai tsane. Tsipei jopa wũnae pam, Nacom bara paca bebai tsane icha jiwi ichi poxonae bebai sare beno mataũta xua beno taxunaunaba, tsipei jopa abenataeyo.

¹⁴“Icha pecoicha ichi poxonae pentha xua poxonae baxota jiwi yawenatsi, paxam bara jũta ichiya paichim poxonae beta painompame. Barapocotsi coyenewatha jiwi payawename xua beta jinompa. Po tomara ba demxuwatha eca, barapo tomara ba jiwi tajũ tane. Bara paca yabara jũta coyene ichi, jiwi paca tane xua poxonae beta painya nejinompaewa. ¹⁵Jiton dapon ba aibi xua pon pecoicha coicha exana xua pecoicha matacatetsinexa corototha. Jame, asiya coicha exanatsi xua pecoicha taenexa pomonae bomũxũtha ena. ¹⁶Bara paca yabara jũta coyene ichi

xua jiwi peitabaratha tatsi. Beta painompare xua jiwi painya nepaca cataenexa xua xanepanaya paexaname painya neantobemxae Nacom. Bapoxonae barapo jiwi Nacom wunae jainchinchí, pon painya Axa, pon itabocotha eca”, jei Jesús.

**Meje yabara poxonae Jesús jiwi yabara cuidubatsi
Moisés pia peitorobi diwesi jume**

¹⁷Equeicha Jesús barai barapo pin bicheitomonaе, pomonaе pijimonaexae tatsi, jeye: “Jopa pananta xeinaeinde xua xan patopeican xua apara Moisés pia peitorobi diwesi jume tacana exanaewa tsane xua jiwi jopa equeicha pecanantawenonaewa tsane barapo Moisés pia peitorobi diwesi jume xuano ir̃a bara cana ichin tsane pomonaе Nacom pia peitorobi jume pepaеbiwi pia pecuidubiwan tatsi. Jame apara patopeican tanayabara jume cui yabara wetsinexan tsane pocotsiwa caena bayatha neyabara tsiwunae paeba po diwесintha Moisés pia peitorobi coyenewa tatsi, ir̃uno Nacom pia peitorobi jume pepaеbiwi pia penacuidubiwan jumeintha. ¹⁸Bara xaniyeya paca tsipaebatsi poxonae cataunxuae barapo itaboco ducue, matautano poxonae cataunxuae barapo ira ducue, Moisés pia peitorobi diwesi jopa weraweracae tsane. Matautano jopa cae itanetiyo aichurucuae tsane beya poxonae wetsina pocotsiwa bayatha Nacom tsiwunae yabara paeba xua wetapaeba. ¹⁹Pon yabara nanta xeina pecuidubinexa ichamonaetha xua tsita jume ita xexenatsi Nacom pia peitorobi coyenewa bequein saya po peitorobi coyenewiyo peya itorobi coyenewiyo, bapon xuya, Nacom pia nacuatheicha cana junt̃a cui ita xexenecaeinchi. Ichitha nama pomonaе cuiduba ichamonaetha Nacom pia peitorobi coyenewan, matautano xua exana pocotsiwa Nacom itoroba, barapomonaе peainya cui jiwi tsane Nacom pia peitorobi nacuatheicha tatsi. ²⁰Paca tsipaebatsi jame bewa junt̃a coyene xanepanaya paexaneibiname ichamonaetha be pocotsi coyeneya xua Nacom paca itoroba, beyacaincha poxonae exana pomonaе pecuidubiwi Moisés pia peitorobi coyenewa tatsi, matautano xua poxonae beyacaincha jinompa fariseomonaе. Icha jopa yatsicaewa beta junt̃a coyene xanepanaya paexanaem tsane beyacaincha xua poxonae barapomonaе itara mexeya wunaeя exana, jopa papatsim tsane Nacom pia peitorobi nacua beicha tatsi”, jei Jesús.

**Meje yabara poxonae Jesús yabara
cuiduba xua peanaepanae cui coyene
(Lc 12.57-59)**

²¹Equeicha Jesús barai barapo pin bicheitomonaе, pomonaе pijimonaexae tatsi, jeye: “Paxam pajume taneme pocotsiwa Moisés namchi painya amo susato jiwitha, jeye: ‘Jopa ich̃an anaya bexubinde.

Tsipei pon xua ichun bexotsi, ichamonae yabara paebina xua bapon natsicuenta xua abe peexanaexae', jei. ²² Ichitha nama seicaya paca tsipaebatsi xua pon caseba ichuntha ichamonae yabara paebina xua bapon natsicuenta xua abe peexanaexae. Iruru pon biatane ichuntha ichamonae yabara paebina xua bapon natsicuenta xua abe peexanaexae. Pomonae pecanamata caitorobi bicheito bapon yabara paebinchi xua bapon natsicuenta tsipei bapon bichocono unthuthu anaepana. Matautano iruru pon namchi xua ichun jeichichi: 'Xam nabencame', jei pon, bapon xubinchi po nacua beya ichaxota isoto bapana jopa itacounaiyo.

²³⁻²⁴ "Equeicha paca tsipaebatsi. Ichacuitha ichun duwein becapona ichaxota xua be pexaethopaewa xua tuxusi exana Nacom nexa poxonae tauta. Poxonae cataunxuae jopa exanaeyo baxua, matha copiya tsiwanaya yabara nanta xeinaena pocotsiwa icha metha bayatha abe exana ichuntha. Matha be ichi tsane meje xuaje: Bu abu cataunxuae bota pocotsiwa pia pecatuxusi exanaewanexa xua Nacom nexa. Matha copiya bewa ponaena ichun beya xua pia penaita coxone exanaewa tsanebe. Bapoxonae bapon caibeya bewa ponaena xua duwein petuxusi exanaewa tsane Nacom nexa poxonae tauta.

²⁵ "Icha ichamonae be paca itoroba paca necacaponanexa pontha pon jiwi peyabara paebin penatsicuentisiwa, nexata patsipaebare barapomonae, poxonae cataunxuae namtotha paca baru pona xua painya nenaita coxone exanaewa tsanebe. Xain bapoxonae barapomonae jopa paca caponaebe tsane pontha pon jiwi peyabara paebin penatsicuentisiwa. Tsipei icha barapomonae bara beya paca caponaetsipa, bapoxonae pon jiwi peyabara paebin penatsicuentisiwa equeicha dabeya policiamonae beya paca itorobichipa. Bapoxonae nama policiamonae jiwi pecubi bo beya paca itorobichipa. ²⁶ Bara xaniyeya paca tsipaebatsi. Paxam jopa paca pu copabi tsane jiwi pecubi bo weya, beya abu poxonae pana pu matomacaename daxita paratixi cuntha po paratixi xua paxeiname", jei Jesús.

**Meje yabara poxonae Jesús yabara cuiduba xua jiton pita,
powa ichun piowa tatsi, powa bequein piseuri xeina taetha**

²⁷ Equeicha Jesús barai barapo pin bicheitomonae, pomonae pijimonaexae tatsi, jeye: "Paxam pajume taneme xua Moisés pia peitorobi coyenewan xua jeye caena bayatha: 'Jopa ichowa pichinde powa ichun piowa tatsi, powa piseuri xeina taetham', jei Moisés. ²⁸ Ichitha nama xan paca tsipaebatsi. Icha pebin tane petsiriwa, yawa nanta xeinaeya jeye: 'Barapowa ichichipan taisa maituncuaewa tsane, bequein bapowa jopa taseuriyo', jei, bapoxonae barapara abe exana Nacomtha, icha be pocotsi coyene ichi, poxonae pita yabuyotha powa jopa bequein piseuriyo tatsi.

²⁹“Bara xaniyeya paca tsipaebatsi. Icha po itamaiqueito painya necoxa werena ducua icha barapo itamaiqueito paca exana xua abe painya neexanaewa tsane panaitamaiquei jucuare, barapo itamaiqueiton yawa tajũ beya pabebande. Metha wũnae xua painya nebebeiwa tsane cae itamaiqueitoxi xua Nacom pia nacua beicha cae itamaiqueitoxi painya neyawa patsinexa. Baxua jame wũnae yatsicaewa, beyacaincha xua poxonae painya pepon ompin paca bebai tsane ichaxota po nacuatha isoto bapana jopa itacounayiyo. ³⁰Barichi icha painya necobe, po cobe painya necoxa weya, icha barapo cobe paca exana xua abe painya neexanaewa tsane panacobe ucubobare, yawa tajũ beya pabebande. Metha wũnae xua cae cobexi painya nebebeiwa tsane, xua cae cobexi painya neyawa patsinexa Nacom pia nacua beicha. Baxua jame wũnae beyacaincha xua poxonae painya pepon ompin paca bebai tsane ichaxota po nacuatha isoto bapana jopa itacounayiyo”, jei Jesús.

**Meje yabara poxonae Jesús yabara cuiduba xua
jiwi piseurixi pepunapenteibiyainwa
(Mt 19.9; Mr 10.11-12; Lc 16.18)**

³¹Equeicha Jesús barai barapo pin bicheitomonaе, pomonaе pijimonaexae tatsi jeye: “Caena bayatha Moisés pia peitorobi jume diwesitha namchiya jeye: ‘Pon punaxuba piowa peichaxaibixae xua pocotsiwa bapowa exana, bapon barabũ piowa catsina papera, po paperatha tina xua pexubiwa tsane piseuri’, jei barapo Moisés pia peitorobi coyenetha. ³²Ichitha nama seicaya icha coyeneya paca tsipaebatsi. Icha pebin piowa punaxuba xua saya peichaxaibixae poxonaе bequein bapowa jopa nasi cui coyene exanaeyo bapoxonaе Nacom tsita abetsi xua bapon cana exana piseuritha. Tsipei bapon cana exana piowa xua piseuri tatsi nasi cui matacaeta xua weiweina pebiwitha. Barichi pon pita petsiriwa, powa piseuri pepunaxubixae, bapon barichi pia coutha abe natsiexana, tsipei Nacom ichowa yabara nanta xeina xua bapowa cataunxuae ichũn piowa tatsi bequein punaxuba”, jei Jesús.

**Meje yabara poxonaе Jesús yabara cuiduba xua jiwi
xainyeya penacui wũnae tsiwũnaeya yabara paebiwa
xua peexanaewa pocotsiwa exanapaeba**

³³Equeicha Jesús barai barapo pin bicheitomonaе, pomonaе pijimonaexae tatsi, jeye: “Bayatha pajume taneme xua painya amo susato jiwi tsipaebatsi, xua Moisés tsipaeba. Moisés jeye: ‘Paxam jopa bewa naerabiya pana cui wũnae tsiwũnaeya yabara paebim tsane xua painya neexanaewa pocotsiwa paexanapaеbeibame xua Nacom peitabaratha tatsi. Ichitha jame bewa bara xainyeya paexaneibiname

pocotsiwa papaebame xua Nacom peitabaratha tatsi', jei Moisés pijimonaetha. ³⁴Ichitha xan seicaya icha coyeneya paca tsipaebatsi. Poxonae jiwi peitabaratha tatsi pana nacui wunae tsiwunaeya xainyeya yabara paebiname pocotsiwa xua paexanapaebame bara moya baxua paexande, xua jiwi pia painya nepaca cajume cowuntsinexa. Jopa yawa muxuna icha jumein papaebinde. Jopa pajande ichuntha: 'Bara xaniyan xua exanaein. Nacui wunae tsiwunaeya xaniyeya yabara paeban Nacom peitabaratha xua exanaein', jopa pajande. Matautano jopa pajande: 'Bara xaniyan. Baraxua paeban po wuntha xua Nacom pia nacua wuntheicha tatsi', jopa pajande baxua, tsipei Nacom bara xoteicha eca pia pexeinya equeibithopeibiwa tatsi ichaxota bapon ewatsiya itorobeibeca jiwi. ³⁵Matautano barapocotsi coyenewa jopa bewa pana cui wunae tsiwunaeya yabara paebim ichuntha xua ira yabara. Tsipei barapo ira apara Nacom pia ira. Barapo iratha nataxu yuyuteca. Barichi matautano barapocotsi coyenewa jopa bewa pana cui wunae tsiwunaeya yabara paebim ichuntha xua Jerusalén tomara yabara, tsipei barapo tomara, po tomaratha ichaxota Nacom popona pon jiwi itorobiya pia pepa Peewatsinchi. ³⁶Matautano barapocotsi coyene jopa bewa pana nacui wunae tsiwunaeya yabara paebim ichuntha xua painya nentasipa yabara. Saya meisa Nacom paca yabara matasipa yaputane. Pomonae pam xua pewowi pam xua pantana tsaebiam jopa paca itacupaeyo xua equeicha pantana inyapaname. Matautano pomonae pam pomonae amomonae pam xua pantana inyapaname jopa itacupaetsi xua equeicha pantana tsaebiam. Matautano jopa baxua daichiyo xua caentanatoxitha. Saya meisa Nacom itacupatsi xua cana exana baxua. ³⁷Saya meisa barapo jumethabe patsipaebare ichuntha ichaxota po jumetha jei 'Je, bara exanaein', jei, matautano ichaxota po jumetha jei 'Jume jopa exanaein tsane', jei. Tsipei poxonae pamuxuna paebame poxonae pana tsiwunae yabara paebame ichamonaetha Nacom pia wuntha tatsi xua painya neexanaewa pocotsiwa paexanapaebame baraxua apara caurimonae pia pentacaponaein tatsi paca tsimuxu duba xua painya nepaebiwa baxua", jei Jesús.

**Meje yabara poxonae Jesús yabara
cuiduba xua penayantomocae coyene**
(Lc 6.29-30)

³⁸Equeicha Jesús barai barapo pin bicheitomonae, pomonae pijimonaexae tatsi, jeye: "Paxam pajume taneme xua bayatha Moisés paeba xua jeye: 'Pon itamaiquei esanopa ichun peitamaiqueito, bapon xuya bewa itamaiquei esanopaeinchi. Matautano pon xua wano teranopa, xua ichun wano teranopatsi, bapon xuya wano teranopaeinchi', jei. ³⁹Ichitha nama icha coyeneya paca tsipaebatsi: Jopa xuya pebin

pacaitacueinchinde poxonaē paca caitacueinta, pon peaitabein. Matautano icha ichun paca jumata tsaquinopa pecobetha, moya equeicha icha jumata pana najumata caeware xua painya necajumata tsaquinopaenexa. ⁴⁰Icha ichun paca yabara yopichiya paeba pontha pon jiwi peyabara paebin xua penatsicuentisiwa xua painya nentoma amanayabixae bapon, bapoxonaē bara pacare xua paca itoroba. Icha painya camisa pacata pita bara yawa muxuna pacare camisa po camisa peam̄tiȳn camisa, po camisa xua athawe peruyaewa. ⁴¹Icha soldadomonae paca itoroba xua jeye: ‘Painta caponde pocotsiwa arewe xua saya cae kilómetro beya’, jei, bara moya pacaponde pocotsiwa arewe xua equeicha icha cae kilómetrono pantaropatabare. ⁴²Daxita coyenexi pocotsiwa ichamonae paca w̄ca, moya bara pacaichabeibare. Pon paca nacowaeta painyawa moya bara patsicobe copabare. Jopa paasiwinde painyawan”, jei Jesús.

**Meje yabara poxonaē Jesús yabara cuiduba xua jiwi bewa
antobe pomonaetha pomonaē pia peaitafaetabi jiwichi
(Lc 6.27-28, 32-36)**

⁴³Equeicha Jesús barai barapo pin bicheitomonae, pomonaē pijimonaexae tatsi, jeye: “Matautano pajume taneme xua caena bayatha Moisés namchi, xua jeye: ‘Paantobeinde pomonaē painya jiwi. Matautano pacasebare pomonaē painya nepaca caaitafaetabi jiwi’, jei xua Moisés paeba. ⁴⁴Ichitha icha coyeneya paca tsipaebatsi: Paantobeinde pomonaē bequein painya nepaca caaitafaetabi jiwi. Matautano Nacomtha pataw̄care pomonaē bequein abe pacata exana. ⁴⁵Icha paexanaename daxita barapo coyenexi bapoxonaē yatsicaewa Nacom piamonaē tatsi pam tsane. Bara paichim tsane icha be painya Axa ichi pon Nacom, pon peitabocotha peecaexae xua daxita jiwi antobetsi. Nacom xometo pentha taexana daxita jiwi pomonaē pejunt̄u coyene xanepanaē jiwi nexa ir̄r̄u pomonaē peajunt̄ucoyenebe jiwi nexa. Matautano Nacom ema taitorobicano daxita jiwi pomonaē xaniwaicha pejunt̄u coyene xeicaē jiwi nexa ir̄r̄u pomonaē peajunt̄ucoyenebe jiwi nexano. ⁴⁶Icha saya meisa paantobem pomonaē painya nepaca antobexae, Nacom jopa paca cui yabara matomacae tsane. Tsipei ir̄r̄u barapo coyene exana pomonaē paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa, bequein jiwi yabara nanta xeina xua bapomonaē peajunt̄ucoyenebewi. Barapomonaē antobe pomonaē xua pia peantobewixaetsi. ⁴⁷Matautano icha saya meisa painyamonaē pajacobame pomonaē ir̄u pejume cow̄ntsiwi poxonaē paca siwa pona, xuano xua jopa pajacobim ichamonae, pomonaē jopa pejume cow̄ntsiwi, barapo coyene jopa xanepanaeyo. Tsipei pomonaē Nacom jopa peyaputae jiwi, barapomonaē ir̄u ba jacobia piamonaē. Ichitha nama bewa

toxeinchiya pananta xeinaem beyacaincha barapomonae poxonae nanta xeina. ⁴⁸Daxota paxam bewa bichocono xaniwaichiya beta painompaem. Matautano xua caewiyo jopa bewa paexanaem tsane xua peabe coyenewa. Barapocotsi juta coyeneya paichim tsane icha painya Axa ichi pon Nacom, pon peitabocotha peecaexae xua bichocono xaniwaichiya beta popona. Matautano bapon caewiyo jopa exanaeyo peabe coyenewa”, jei Jesús.

**Meje yabara poxonae Jesús jiwi yabara cuidubatsi
xua jiwi xanepanaya peexanaewan**

6 ¹Equeicha Jesús barai barapo pin bicheitomonae, pomonae pijimonaexae tatsi, jeye: “Poxonae paxam paexaname pocotsiwan xua ichamonae tsita xanepanatsi xua Nacom paca itoroba, bapocotsiwan paexande xua Nacom painya nepaca cacuitaenexa. Saya meisa jopa paexanaeinde xua jiwi ɯ painya nepaca cacuitaenexa xanepanaeya painya nepaca cayabara paebinexa. Icha bapocotsi coyeneya paexanaetsipame nexata painya Axa Nacom pon itabocotha peecaexae jopa paca catsitsipae pocotsiwa paca yabara cui coyene matomacaewa tsipei jopa paexanaetsipaem Nacom nexa.

²“Daxota poxonae peacopeibiwi xoxi pacatsibeibame jopa ichamonae patsipaebinde xua baxua painya neexanaexae. Jopa barapocotsi coyeneya bara paichinde icha be pomonae pemuxuitorobiwi ichi, poxonae itara mexeya pomonae xanepanaya pepaebiwi. Tsipei barapocotsimonae saya ichawa beya paeba xua pinae yawena nawita peacopeibi jiwitha. Barapomonae matha jiwi wabeibatsi xua barapomonae pejume taenexa tsainchi, bapoxonae judiimonae pia penacaetutsi botha yawa namtontha baxua yabara paeba nawita xua pinae yawena nawita pomonaetha pomonae peacopeibi jiwi. Barapomonae baxua exana pia xua jiwi beta yabara nanta xeinaetsi, pia xua jeichi jiwi: Maisa barapomonae betiya exana, xua pejeinexa jiwi. Ichitha xaniwaicha paca tsipaebatsi, barapomonae xeina pia pecui yabara matomacaewatsi poxonae jiwi baxua caunuta tsipei jopa moicha exanaeyo Nacom nexa. ³⁻⁴Ichitha poxonae paxam payaweneme peacopeibiwi namicha moicha pacare barapomonaetha xua painya jiwimonae jopa paca necacui taenexa. Matautano poxonae Nacom painya Axa paca tane poxonae namicha moicha paexaname baxua bapoxonae bapon Nacom paca catsina pocotsiwa pia pecui yabara matomacaewa”, jei Jesús.

**Meje yabara poxonae Jesús jiwi yabara cuidubatsi
po coyene xua Nacom pewucaewatsi
(Lc 11.2-4)**

⁵Equeicha Jesús barai barapo pin bicheitomonae, pomonae pijimonaexae tatsi, jeye: “Poxonae Nacom pawucame, jopa barapocotsi

coyeneya paexanaeinde icha be pomonae pemuxitorobiwi ichi, pomonae itara mexeya beta pepaebiwi. Barapomonae saya ichichipa xua jiwi pecui taenexa poxonae barapomonae Nacom wꝛcatsi. Barapomonae ichichipa umena pewꝛcaenexa Nacomtha judiomonae pia penacaetutsi bontha tatsi xua matautano barichino namtontha. Barapomonae baxua exana xua pecui taenexatsi xua ichamonae pecui taenexa. Bara xaniyei paca tsipaebatsi. Barapomonae barompaya xeina pia pecui yabara matomatsiwatsi poxonae jiwi yabara paeba xua barapomonae pinae bara xanepanaeya exana. Nama bapoxonae Nacom jopa catsiyo pia pematomatsiwa barapomonaetha tsipei barapomonae jopa moicha exanaeyo Nacom nexa. ⁶Ichitha poxonae Nacom pawꝛcame, barompaya painya tutu beya paponde yawa bomꝛxꝛ tutu pacoibo xatababare. Bapoxonae painya Axa Nacom baraxotiya patsipaebare. Painya Axa paca yanta compa yawa daxita paca cui tane pocotsiwa namicha paexaname. Bapoxonae bapon Nacom paca catsina pocotsiwa pia paca yabara cui matomacaewa, xua beta painya neexanaexae poxonae Nacom patsipaebame.

⁷“Poxonae Nacom patsipaebame, jopa equeicha matowa patsipaebinde po jumetha xua po jume jopa paca yawenaeyo. Jopa bara paichinde icha be pocotsimonae ichi pomonae jopa peyaputaewi Nacom. Barapomonae nanta xeina xua bara Nacom jume tane pocotsiwa barapomonae tsipaeba xua matowa pepaebixae. ⁸Nexata jopa barapocotsi coyeneya bara paichinde icha be poxonae barapomonae icha ichi. Tsipei painya Axa Nacom bara yaputane pocotsiwa painya nenantawenonaewam, xua beya poxonae pawꝛcame Nacom. ⁹Daxota Nacom patsipaebare, paichinde:

‘Pata Taxam, xam ponxaem peitabocotha athabeicha neecaen.

Barabꝛ daxita jiwi cabarꝛ cui itura jina nejuntꝛ coyene xanepanaeinxae.

¹⁰ Barabꝛ jopaena matakabi, po matakabitha poxonae xam jiwi itorobiya ewatsiname barapo cae pin nacuathe.

Barabꝛ jiwi exanaena pocotsiwa jinya neichichipae coyenewa xua barapo cae pin nacuathe tsique.

Barabꝛ jiwi exanaena icha peitabocotha ichi xua exana pocotsiwa jinya neichichipae coyenewa.

¹¹ Daxita matakabin pexaewa pana catsibeibare xua po pexaewa daxita matakabin pata canantawenonaewa tsaibi tsane.

¹² Pana neyabara cui cana juntemainare xua abe pata catsita exanaewatsi.

Bapoxonae pana neyabara cui cana exaname xua jopa equeicha pata catsita natsicuentisiwatsi xua abe pata catsita exanaexaetsi. Baraxua painta exande icha paichin ichamonaetha. Tsipei paxan copiya payabara cui cana exanan xua ichamonae jopa pana netsita natsicuentisiyo xua abe pata tanetsita exanaexae.

¹³ Jopa pana copatsinde xua abe pata exanaewa tsane poxonae jiwi pana nejuntũ coyene jũjũta, xua abe pata exanaewa tsane.

Ichitha pana necapanenebiya exande barapo abe peexanae coyene weya', pajande poxonae Nacomtha patsipaebame", jei Jesús.

¹⁴ Equeicha Jesús barai barapo pin bicheitomonaе, pomonaе pijimonaexae tatsi, jeye: "Tsipei icha paxam pacui yabara jũntemainame pocotsiwa ichamonae pacata abe exana, nexata xuya painya Axa Nacom pon peitabocotha peecaexae, xuya paca cui yabara jũntemainaena pocotsiwa abe paexaname. ¹⁵ Ichitha icha paxam jopa pacui yabara jũntemainaem pocotsiwa ichamonae abe pacata exana, nexata xuya painya Axa Nacom jopa paca cui yabara jũntemainaе tsane pocotsiwa abe paexaname", jei Jesús barapo pin bicheitomonaetha pomonaе pijimonaexae tatsi.

Meje yabara poxonae Jesús yabara cuiduba po coyene peyabara nainbotsi cui coyenewa

¹⁶ Equeicha Jesús barai barapo pin bicheitomonaе pomonaе pijimonaexae tatsi, jeye: "Poxonae paxam payabara nainbotame xua Nacom beta painya newũcaenexa tsane, jopa bara jũta ichiya coyeneya paexanaeinde icha be pomonaе ichi pomonaе itara mexeya betiya peexanaewi daichitha abe exana. Barapomonaе piyain itabara aenaenaca xua poxonae bequein peyabara nainbotsiwatha Nacom. Barapomonaе jopa nanta cachetsiyo yawa jopa naitabara quiatsiyo. Barapomonaе ichipa xua ichamonae yaputane xua barapomonaе cou bara nainbota. Bara xainyeya paca tsipaebatsi xua barapomonaе bayatha xeina barompaya pia peyabara cui matomacaewatsi xua poxonae jiwi yabara wũnae jointa xua barapomonaе cou bara nainbota. ¹⁷ Ichitha paxam poxonae payabara nainbotame, xua Nacom betiya painya newũcaenexa tsane, pana naitabara iquicare yawa beta pananta caichere. ¹⁸ Bapoxonae jiwi jopa paca cui yaputae tsane xua paxam bara cou payabara nainbotame. Namicha painya netsita exanaexae Nacom barapo coyene. Meisa saya painya Axa Nacom paca cui yaputane, tsipei daxita yaputane pocotsiwa namicha paexaname. Bapon paca catsina pocotsiwa pia paca yabara cui matomacaewa", jei Jesús.

**Meje yabara poxonae Jesús yabara cuiduba xua pocotsiwa
Nacom jiwi pejuntana jebiwatsi pia nacuatheicha
(Lc 12.33-34)**

¹⁹Equeicha Jesús barai barapo pin bicheitomona, pomona pijimonaexae tatsi, jeye: “Barapo cae pin nacuathe copei jopa pacaetubinde xua painya nexainaewa tsane nawita barapo cae pin nacuathe. Tsipei bocobocowaton abe exanaena poxona xane pocotsiwan xua paxeiname. Ichacuitha abe exanaena poxona painyawan axumainbatsi. Ichacuitha painyawan pocotsiwa paxeiname baxuan pomona pecaibiwi paca caibina. ²⁰Ichitha jame paexande barapo pejuntũ coyene xanepanaewa po pejuntũ coyene xanepanaewa Nacom ichichipa. Bapoxona Nacom paca catsibina pocotsiwa painya nepaca juntana jebiwa pia nacuatheicha. Baraxoteicha bapocotsiwa bocobocowaton jopa xaeyo. Yawa jopa axumainbichi. Matautano pomona pecaibiwi jopa paca caibiyo baxuan xuan Nacom paca necayabara cui matomacaewan. ²¹Ichaxota ba pajebame xua painya neichichipaewan baxota ba payabara nanta xeiname nawita”, jei Jesús pijimonaetha.

**Meje yabara poxonae Jesús yabara cuiduba jiwi po coyene
xanepanaeya peexanaewa pejuntũ coyene wetsina
(Lc 11.34-36)**

²²Equeicha Jesús barai barapo pin bicheitomona, pomona pijimonaexae tatsi, jeye: “Pecoicha ba yonoyonei merawi painya nepaca cayawenaenexa xua beta painya netaewa tsane quireitha. Barichi painya itamaiqueiton paca yawena xua beta painya netaewa tsane. Icha painya itamaiqueiton wuna, bara beta pataneme. ²³Ichitha icha painya itamaiqueiton abe, jopa beta pataetsipaem. Barichiru painya juntũ coyenewan xua painya nenanta xeinaewan. Icha painya juntũ coyenewan xanepanaetsipa bara beta Nacom payabara najuntũ coyene xeinaetsipame. Ichitha icha painya juntũ coyenewan jopa xanepanaetsipae jopa beta Nacom payabara najuntũ coyene xeinaetsipaem. Painya juntũ coyenewan paca cana exanaetsipa xua bichocono abe paexanaetsipame”, jei Jesús.

**Meje yabara poxonae Jesús yabara cuiduba jiwi, xua
pon nantaũta ainya pia pecanamataxeinaeinhibe tatsi
(Lc 16.13)**

²⁴Equeicha Jesús barai barapo pin bicheitomona, pomona pijimonaexae tatsi, jeye: “Jiton dapon aibi pon xeina ainya pia pecanamataxeinaeinhibe tatsi xua pon beta tanacuita barapo pia

ainya pecanamataxeinaeinchibe tatsi. Tsipei barapo petanacuichin meisa antobeya taexana caeintha pon pia pecanamataxeinaeinchi poxonae itorobatsi. Icha pia pecanamataxeinaeinchi jopa taraichiyo. Cae pia pecanamataxeinaeinchi xanepanaeya taexana. Icha pia pecanamataxeinaeinchi abeya taexana. Barichi jiton pon bichocono antobe Nacom jopa itacupaetsi xua bichocono peantobewa paratixi poxonae yawa bichocono antobetsi Nacom”, jei Jesús barapo pin bicheitomonaetha, pomonaе pijimonaexae tatsi.

**Meje yabara poxonaе Jesús yabara cuiduba
po coyene xua Nacom eena pijimonaе
(Lc 12.22-31)**

²⁵Equeicha Jesús barai barapo pin bicheitomonaе, pomonaе pijimonaexae tatsi, jeye: “Paca tsipaebatsi, jopa bichocono payabara najüntu coyene exabinde pexaewa xua painya neuna jinompaewa tsane yawano xua painya neapaewanno tsane. Barichi jopa bichocono payabara najüntu coyene exabinde papaburu xua painya pepon nexa. Po coyene xua asu pejinompaewa xua Nacom naca cata jame baxua ainya cui, beyacaincha pexaewa xua peuna jinompaewa. Pepon ainya cui iru, beyacaincha papaburu xua pepon nexa. ²⁶Pataema peyapupunaewi. Barapoxi jopa ubiyo pabitha. Yawa xua penawetsiwa jopa notsiyo. Yawa jopa xeinaeyo bomuxun xua pejebinexa pexaewan. Ichitha Nacom apata peyapupunaewi pexaewa. iPaxam nama bichocono Nacom patsita ainya cuim, beyacaincha peyapupunaewi xua Nacom tsita ainya cuichi, po Nacom painya Axa pon itabocotha eca! ²⁷Dapon aibi pon paxam jiwana pon itacupatsi xua xeinaena icha matacabi xua po matacabitha pepoponaewa tsane poxonaе tupaena. Bequein bapon bichocono nayabara najüntu exaba baxua, ichitha jopa itacupaetsi xua xeinaena caentacabi equeicha.

²⁸“Paxam bichocono payabara najüntu exabame papaburu. Jame pacayabara nanta xeinare pentonon, po pentonon wexotha xuwa, xua matono itupana. Pentonon jopa nacuichiyo yawa jopa natsiexanaeyo papaburu penama xatabinexa. ²⁹Ichitha paca tsipaebatsi xua pentonon matono itupana bichocono beyacaincha pocotsi paparuwa Salomón nama xatata xua pexeinya paparuwa. Bapon Salomón pon caena bayatha judiomonaе itorobiya pia pepa peewatsinchi pon bayatha tupa. ³⁰Pentonon po matonon wexotha anoxuae xuwa, Nacom cana exana xua matono itupana. Ichitha pebiwi baya matono tautsina ichaxota pocotsiwatha pan seba, tsipei saya pentono. Nacom cana exana xua pentonon bichocono wunaе bara bequein saya pentonon. Barichi Nacom itacupatsi xua beta paca neca-eenaewa xua beta painya nejinompaenexa. Matautano Nacom paca catsina paparuwan. iMaisa

pebiwi pam tsobenae, be conotha pajume cowuntame Nacom! ³¹Jopa paunthuthu deideijeya jinompaeinde xua ichawa painya neyabara nanta xeinaexae. Jopa pajan tsaibinde: ‘¿Eta xua xaeinchi jane? ¿Eta xua apaeinchi jane? ¿Eta xua nama xatabinchi jane?’ jopa pajan tsaibinde. ³²Tsipei barapo cae pin nacuathe jiwi saya u baxua pecayabara najuntu coyene exabi pocotsiwa nantawenona. Ichitha nama paxam painya Axa Nacom panantautame. Barapon Nacom pon peitabocopin, pon yaputane daxita pocotsiwa xua xoxi panantawenoname. ³³Saya meisa jame bichocono copiya payabara nanta xeinare xua painya neexanaewa xua pocotsiwa Nacom ichichipa pon jiwi itorobiya pia pepa peewatsinchi. Matautano jame bichocono payabara nanta xeinare painya nexeiaenexa pejuntu coyene xanepanaewa Nacomtha. Icha paexanaename barapo coyenewan nexata bapoxonae Nacom paca catsibina xua daxita pocotsiwa panantawenoname. ³⁴Jopa payabara muxuna najuntu exabinde anoxuae pocotsiwa baya tsane pocotsiwa painya neexanaewa tsane, tsipei barapo matabi nama xeina pocotsiwa bichocono pacata ayapube. Daxita matabi tsoponeibi pocotsiwa xua pacata ayapube xua pocotsiwa painya neexanaewan”, jei Jesús.

**Meje yabara poxonae Jesús cuiduba xua jiwi jopa bewa
yabara paebi xua ichamonae penatsicuentiwa
(Lc 6.37-38, 41-42)**

7 ¹Equeicha Jesús barai barapo pin bicheitomonae, pomonae pijimonaexae tatsi, jeye: “Jopa ichamonae payabara paebinde xua penatsicuentiwa xua abe peexanaexae. Nexata bapoxonae Nacom jopa paca yabara paebi tsane painya nenatsicuentiwa xua abe painya neexanaexae. ²Nacom pia coya paca yabara paebina xua painya nenatsicuentiwa xua abe painya neexanaewa icha po coyeneya paichim poxonae ichamonae payabara paebame xua penatsicuentiwa xua abe peexanaexae. Icha daunweya payabara paebiname xua penatsicuentiwa ichamonae xua abe peexanaexae, Nacom barichi daunweya paca yabara paebina xua painya nenatsicuentiwa xua abe painya neexanaexae”, jei Jesús. ³Equeicha Jesús paeba caeintha pomonae pijimonae jiwana pecayabara juta pepaebi diwesiyo jeye: “Xam ba jinya jiton itata taneme poxonae itata jopiyatsi naeputiyo, ichitha jopa taem xua iruru xam nama pin naeputo neitamaiqueitha ducua. Barapocotsi juta coyeneya ichi, xam ba jinya jiton cui taneme xua poxonae abe exana, ichitha jopa nayaputaem xua iruru xam baraichim nama bichocono abe exaname. ⁴Icha jopa taem pin naeputo xua neitamaiqueitha ducua jopa caitacupaeyo xua nejeiwa jinya jitontha: ‘Tajiton, cata jutinchi naeputiyo xua ducua neitamaiqueitha’, xua nejeiwa. ⁵Xam nepaebim xua ichan exana xua baxua neexanaewatha iru. Xam copiya nata jure barapo

pin naepũto xua neitamaiqueitotha ducua. Bapoxonae beta taename nejetsinexa tsane naepũtiyo xua jinya jiton peitamaiqueitotha tarucuatsi.

⁶“Jopa patsipaebinde Nacom Pejume Diwesi pomonae anaya paca aeba, xuano anaya aeba Nacom Pejume Diwesi pomonae jopa pejume cowũntsiwi Nacom. Tsipei barapomonae peajũntũcoyenebe jiwi bichocono. Barapomonae bara abe exana be barapocotsi jũta coyeneya ichiya exana icha be auri ichi xua poxonae anaepanaya nawano webaba pocotsiwa pacatame. Mataũtano barapomonae bara abe exana be barapocotsi jũta coyeneya ichiya exana icha be marrano ichi, xua poxonae petaxutha taxunaunaba xua irainyaba po pexaewa paapatame”, jei Jesús.

**Meje yabara poxonae Jesús yabara paeba xua jiwi
bewa matowa wũqueibi Nacomtha
(Lc 11.9-13; 6.31)**

⁷Equeicha Jesús barai barapo pin bicheitomonae, pomonae pijimonaexae tatsi, jeye: “Matowa Nacom pawũcare, bapoxonae paca catsibina pocotsiwa xua pawũcame. Baraxua matowa paexande icha paichim poxonae matowa pajeiteibame beya poxonae pataebame yawa icha paichim poxonae matowa pawawam bomũxũtha beya poxonae ichũn paca jume nota. ⁸Tsipei pon matowa wũca ichũn bara catatsi. Tsipei pon matowa necoba, bara taeba. Tsipei pon bomũxũ pecoibototha matowa wawai, bara tacoibo sarana xorenatsi, mataũta jume notatsino.

⁹“Paxam pomonae pexui paxeiname paca muxuwetatsi. Poxonae painya pexui paca wũca pan, ¿pacatsipame iboto? ¡Jume! ¹⁰Ichacuitha tsipae, poxonae painya pexui paca wũca duwei, ¿pacatsipame jomo wito? ¡Jume! Jopa baxua paraichim tsane. ¹¹Bara bequein peajũntũcoyenebe jiwi pam, ichitha paxam payaputaneme xua xanepanaeya painya pexui pacatsibeibame. Ichitha nama Nacom painya Axa pon itabocotha peecaein bichocono jopa juniya paca catsiyo pejũntũ coyene xanepanaewan poxonae pawũcame beyacaincha poxonae painya pexui pacatsibeibame poxonae paca wũqueiba.

¹²“Paexande ichamonaetha xua po coyene painya neichichipaewa xua barapomonae beta painya nepacata exanaewa tsane. Tsipei barapo coyenewa bayatha Moisés pia peitorobi coyenewatha paca itoroba, mataũtano Nacom pia peitorobi jume pepaebiwi bayatha paca cui itoroba”, jei Jesús.

**Meje yabara poxonae Jesús yabara
cuiduba po boupayo tsica boupayo dena
(Lc 13.24)**

¹³⁻¹⁴Nexata equeicha Jesús barai barapo pin bicheitomonae, pomonae pijimonaexae tatsi, jeye: “Poxonae jiwi pona tomara beya, pomonae itapeta pin

namto iya pona, barapo jiwi pinmonae, tsipei barapo tomara namto boupa iya xua jopa ayapubeyo. Pomonae nama itapeta, po namto tsica namtiyo iya pona, barapo jiwi tsiquimonaeyo tsipei barapo tsica boupayo ayapube iya. Barichi poxonae jiwi patsina Nacom pia nacua beicha saya tsiquimonaeyo patsina tsipei ichamonae jopa tsita juntu cui coyene xanepanaetsi xua xanepanaeya pejinompaewa Nacomtha. Daxota pomonae Satanás pia nacua beya patsina pinmonae tsane tsipei jopa taayapubetsi xua barapo Satanás pia juntu coyenyatha tatsi jinompa. Nama itapeta pacananta xeinaeya jinompare Nacom pia juntu coyenewa tatsi xua icha jiwi ichi poxonae seicaya irarũ barompaya pona tomara tsica namtiyo boupayo iya”, jei Jesús.

**Meje yabara poxonae Jesús yabara cuiduba xua
jiwi yaputane nae, penacoichixae
(Lc 6.43-44)**

¹⁵Equeicha Jesús barai barapo pin bicheitomonae, pomonae pijimonaexae tatsi, jeye: “Dota pam, dota pomonae penaerabiwi, pomonae xua jeye: ‘Paxan papaeban Nacom nexa’, jei. Barapomonae painya xainya beya pata itara mexeya jopa juntu coyene anaepanaeyo icha be ichi pomonae xua Nacom pejume jejei jiwichi xua peexanaewa pocotsiwa Nacom itoroba xua matautano icha be ovejamonae ichi xua pia cui coyene xeina xua jopa anaepanaeyo. Daichitha barapomonae bichocono antucucoyenyapube xua anaepana, icha be neuthũ ichi poxonae bichocono anaepana. ¹⁶Ichitha paxam pacayabara ita coxoname barapomonae poxonae pataneme pocotsiwa barapomonae exana, icha be jiwi ichi xua poxonae yaputane nae, po nae penacoichixae. Matautano jiwi jopa yaputaeyo xua bapana jiwi jopa teracae uva cuei po naetha sojei, tsipei apara uva cuei xuwa unbototha po unbo jopa e dubenaeyo. Matautano jiwi jopa bapana teracae higo thei naexitha, tsipei apara higo thei xuwa higo naetha. ¹⁷Tsipei daxita naein, po naein pexeinya naein bara nacoita po pethei pexeinya thei. Matautano daxita naein, po naein camatsa naein bara nacoita po pethei camatsa thei. ¹⁸Po nae pexeinya nae jopa bapana nacoichi po pethei camatsa thei. Barichi po nae camatsa nae jopa bapana nacoichi po pethei pexeinya thei. ¹⁹Daxita naein, po naein jopa nacoichiyo po pethei pexeinya thei, jiwi barapo naein uncata. Bapoxonae jiwi barapo naein tauta isototha. ²⁰Icha naein cana ichichi xua poxonae jopa penacoichiyoxaera, bara cana ichi tsainchi jiwi xua poxoru xanepanaeya jopa peexanaexaera tsane. Icha ichi xua payaputaneme naein poxonae pia pethei pataneme, barichi jiwi pantũ cui coyene yaputaneme poxonae pataneme pocotsiwa barapomonae exana”, jei Jesús.

**Meje yabara poxonae Jesús pinae paeba xua pinae daxita jiwi jopa
patsi tsane Nacom pia peitorobi nacua beicha
(Lc 13.25-27)**

²¹Equeicha Jesús barai barapo pin bicheitomonae, pomonae pijimonaexae tatsi, jeye: “Pinmonae jiwi neyabara caunutsiya jei tsane:

‘Tanecanamataxeinaem’, jei tsane. Daichitha barapomonae jiwana tsicamonaeoyo patsina Nacom pia peitorobi nacua beicha. Saya meisa patsina pomonae exana xua pocotsiwa Taxa ichichipa. Barapomonae patsina ichaxota Taxa po nacuatheicha ewatsiya itorobeibeca. ²²Poxonae barapo matacabi jopaena, po matacabitha poxonae Nacom yabara paebina xua jiwi penatsicuentsiwa pinmonae jiwi pijunuwi neyabara caunutsiya jei tsane: ‘Pata Tanecanamataxeinaem, paxan pacueicueijan nejume diwesi xam nexa. Matautano cauri paitawetan newantha. Matautano jinya newantha papaeban poxonae pexeinya petsita itutsi coyenewa paexanan’, nejei tsane. ²³Daichitha barapomonae jume notsin. Jan tsane: ‘Bũ canta bapana jopa paca yaitaetsi. iTaxainya weya pana natsixibarucupare pomonae abe painya neexanae jiwi pamxaem!’ jan tsane”, jei Jesús.

Meje yabara poxonae Jesús ainya bomuxube yabara paeba
(Mr 1.22; Lc 6.47-49)

²⁴Equeicha Jesús barai barapo pin bicheitomona, pomonae pijimonaexae tatsi, jeye: “Pon nejume naitomata pocotsiwa paeban matautano exanano pocotsiwa ichichipan barapon beta popona Nacom nexa. Bara barapon barapocotsi jata coyeneya nacana exana icha be pocotsin peyaputaein ichi, pon bo acabanota peira matatsucaewatha xua ichaxota ira daunwei. Meje jeye: Copiya muthun tajũ exanareca pecuaranobinexa bomuxu naeton. ²⁵Poxonae ema duneica yawa mene matacaewaxuba yawa joibo bomuxu daunweya capubabanota, barapo bomuxu jopa joparenaeyo, poxoru naeton tajũ umenareca xuano poxoru barapo bomuxu peira matatsucaewatha uncuia ichaxota ira daunwei. ²⁶Ichitha nama pon nejume taetha xuano jopa exanaeyo pocotsiwa ichichipan jopa beta poponaeyo Nacom nexa. Bara barapon barapocotsi jata coyeneya nacana exana icha be pocotsin amameibatsi ichi. Bapon be meje: Bapon be pocotsin bo acabanota ichaxota ira matafatsana xuano naeton jopa tajũ umenarecaeyo poxoru taetowa. Baraxota mene pateiba poxonae awũbo tsaibi. ²⁷Poxonae ema duneica, yawa mene matacaewaxuba, yawa pin joibo capubabanota barapo bo, bapoxonae barapo bomuxu joparena poxoru naeton jopa tajũ umenarecaeyo xuano poxoru bomuxu uncuia ichaxota ira matafatsana. iMaisa bomuxu bichocono abe!” jei Jesús barapo pin bicheitonaetha, pomonae pijimonaexae tatsi.

²⁸Poxonae Jesús barapo diwesi najume weta, pomonae Jesús jume tainchi, barapomonae yabara najuntũ coyene cabenaeca xua Jesús pia pecuidubiwan tatsi. ²⁹Tsipei Jesús ba cuiduba be peyaputaein pia peayapusu itorobi coyeneya tatsi. Jesús jopa cuidubiyo be judiomona pia pecuidubiwi pia picoyeneya tatsi.

Meje yabara poxonae Jesús axaibi exana pon peperu sawinchi
(Mr 1.40-45; Lc 5.12-16)

8 ¹Poxonae Jesús peitapatororo wejuinca, pin bicheitomonae Jesús puna poinchi. ²Jesús imoxoyo caquita poinchi pebin, pon peperu sawinchi. Bapon pentabocototha uncua Jesús peitabaratha tatsi xua Jesús pebaru cui itura jinaexaetsi. Bapon namchi Jesús beya, jeye:

—Pon Necanamataxeinaem jiwi, icha bara ichichipame bara caitacupa xua axaibi tana neexanaewam, tsipei jinya neayapusu itorobi coyenewa nexainaem, jei bapon.

³Nexata Jesús nacobe yota yawa mata jayaba barapo pebin. Jesús barai, jeye:

—Bara ichichipan. ¡Bara axaibinde! ¡Bara caaperuxaibi exanatsi! jei Jesús.

Bapoxonae bapon nainya taaichurucuaetsi xua peperu sawiwatsi.

⁴Nexata Jesús barai peperu sawinchi:

—Taema, jopa yabara tsipaebinde ichamonaetha xua neaxaibiwam. Saya jame meisa ponde sacerdotemonaepintha xua nenaitutsinexa xua bapon necataenexa xua bayatha nejumewa. Bapontha care pocotsiwa xua pecatsiwa Nacomtha, pocotsiwa xua bayatha Moisés cui itoroba xua equeicha jopa jinya nenataxobinexa jinya pepontha. Bapoxonae daxita jiwi cayaputaena xua tsita ita peinya xeinatsi xua xam bara jumem yawa xua peru wunaem, jei Jesús.

**Meje yabara poxonae Jesús axaibi exana pon soldadomonae
romanomonae pia pentacaponaein tatsi tanacuitatsi**
(Lc 7.1-10)

⁵Poxonae Jesús joniya Capernaum tomaratha, bapoxonae pebin Jesús imoxoyo caquita poinchi. Bapon romanomonae soldadomonae pia pentacaponaein tatsi. Bapon nantauta pon tanacuiteibatsi pia botha.

⁶Barapo pentacaponaein Jesús jume daunweya baraichi, jeye:

—Tanecanamataxeinaem, pon inta nacuiteiba camatha boca tabohta. Bapon mubatsi yawa bichocono atene, jei barapo pentacaponaein.

⁷Jesús namchi:

—Bara beya tha ponaetsi taaxaibi exanaenexa bapon, jei Jesús.

⁸Barapo soldadomonae pia pentacaponaein tatsi jume nota:

—Tanecanamataxeinaem, xan saya tacui pawin. Auran xua xam nepatopaewa tsane tabohta tsipei xam ainya cuim. Icha saya paebiname xua bapon pia peatenewatha tatsi, bapoxonae bara axaibi tsane pon inta nacuiteiba. ⁹Xan barichi xeinan tanecanamataxeinaein pon neitoroba. Barichiru xeinan soldadomonae pomonae itorobeiban. Poxonae ichun itoroban: ‘ponde’, jan, bara bapon pona. Poxonae ichun waban: ‘antha’,

jan, bara bapon patopa. Pon inta nacuita itoroban: ‘inta exande’, jan. Bara inta exana, jei barapon pon pentacaponaein.

¹⁰Poxonae Jesús baxua jume taeba, jume cui yabara cananthũthũ nanta xeinanaya cabenaeca, beta pepaebixae romanomonae soldadomonae pia pentacaponaein tatsi. Jesús necotaba pomonae puna poinchi, barai, jeye:

—Xaniyeya paca tsipaebatsi, Israel nacuatha irũ dapocotsin jopa caxinaeinyo pocotsin icha pon iche pon tana necui yabara jume cowũntsin xua bara neitacũpa xua axaibi taexanaewa jiwi.

¹¹Paca tsipaebatsi, pinmonae patsina Nacom pia peitorobi nacuatha penabanaenexa tsane. Ichamonae pomonae ichaxota xometo ecoina, barapomonaepiwi patsinano. Ichamonae pomonae ichaxota xometo jopeica, barapomonaepiwi patsinano. Daxita carepaya barapomonae Abraham barũ equiyaena, irũ Isaac barũ equiyaena irũ Jacob barũ equiyaena. Daxita carepaya barapo nacuanmonaepiwi barũ nabanaeinchi peitaboco beicha. Abraham, barũ nabanaena barapomonae ichaxoteicha Nacom itorobiya ewateiba jiwi. ¹²Ichamonae nanta xeina xua bepa pinae patsina Nacom pia peitorobi nacua beicha tatsi, bara bequein jopa xanepanaeya peexanaewi. Daxota barapomonae bebai tsainchi ichawatha waxainya weya ichaxota pequireiwatha. Baraxota barapomonae bichocono wecoyei tsane yawa nantanuweya nantũ jayabina, jei Jesús.

¹³Nexata Jesús barai pentacaponaein, jeye:

—Ponde jinya bo beya. Bara cata exanatsi tanecui yabara jume cowũntsimxae xua bara taneitacũpaewa xua tacata exanaewatsi, jei Jesús.

Bapoxonae barapo pentacaponaein pia petanacuichin tatsi bara caena taaxaibi exanatsi.

Meje yabara poxonae Jesús axaibi exana Pedro pamiyo tatsi

(Mr 1.29-31; Lc 4.38-39)

¹⁴Jesús joniya Simón Pedro pia botha tatsi. Baraxota Jesús tane Pedro pamiyo tatsi xua camatha boca yawa xua domaebatsi. ¹⁵Jesús cobe pita, barapowa cobe pitatsi. Domae taaichurucuatsi bapowa. Nainya barapowa nanta cotaxuba. Bapoxonae bapowa pexaewa apata barapomonaetha.

Meje yabara poxonae Jesús axaibi exana pin bicheitomonae

(Mr 1.32-34; Lc 4.40-41)

¹⁶Poxonae tabopiya tsanaicha, ichamonae pomonae cauri xeina barapomonae Jesús becarendenatsi. Jesús pia jumetha itaweta caurimonae. Barichi Jesús axaibi exana daxita pomonae peatenewi. ¹⁷Poxonae Jesús barapo coyenein exana, bara nayabara jume cui weta exana caena bayatha Isaías peyabara cui tsiwũnaeya paebixae. Bapon

Isaías Nacom peitorobi jume pepaebin. Bapon jeye Cristo yabara: “Bapon naca wenota wajuntũ coyene bojeiwa. Matautano bapon naca wenota waatene coyenewan”, jei Isaías pejume diwesitha.

**Meje yabara poxonae Jesús yabara paeba pomona
ichichipa xua pepuna ponaewatsi**
(Lc 9.57-62)

¹⁸Poxonae Jesús tane xua pin bicheitomona nacaetuta bapontha, bapoxonae bapon pijimona itoroba xua icha muxunene beya peponaenexa tsane xua pucua epatauta iya. ¹⁹Poxonae cataunxuae Jesusbaru jopa torobabiyayo xua icha muxunene beya nexa, bapoxonae Jesús imoxoyo caquita uncuatabũtsi pon jwi pecuidubin Moisés pia peitorobi coyene. Jesús baraichi:

—Pon jwi Necuidubim, capuna ponaeinchi daxita jũpaeyantha xua ichaxotan neponaewa tsane, jei.

²⁰Jesús jume nota:

—Namomona ba pia mũthũn xeina ichaxota pemaitathopeibiwa. Iru peyapupunaewi ba coton xeina, ichaxota peyamaitathopeibiwa. Ichitha nama xan ponxaein Nacom Tananeitapetsin nama jopa daichinyo. Nama jopa xeinaeyo bo xua tabo xua xota nafifinacaecan, jei Jesús.

²¹Bapoxonae ichũn pon irũ Jesús pijimona jiwana bapon Jesustha namchi, jeye:

—Tanecanamataxeinaem, bara nepu copare tha taxa matha mũthũtha xubichi copiya xua bapoxonae tacapuna ponaewatsi tsainchi, jei.

²²Jesús jume nota:

—Maisa jame nepuna ponde. Bara copare xua petũpaewi bara mũthũcaeinchi, pomona be pewerapaewi, jopa be tana nejume cowũntsiwixae, barapomona mũthũcaena, jei Jesús.

**Meje yabara poxonae Jesús xainya ducuanaya exana joibo yawa
maratsacano xainya mene ducuanaya exanano**
(Mr 4.35-41; Lc 8.22-25)

²³Nexata Jesús jeratha nontabiya. Jesús pijimona baru pona jeratha. ²⁴Bapoxonae jemeicha pin joibo naetaba mentha. Maratsacan jeratha mene othopa muxu pebunarecae. Daichitha Jesús maituncua. ²⁵Bapoxonae Jesús pijimona yaũbaxotsi, jeichichi Jesús:

—iPata Necanamataxeinaem, pana capanepare! iYanabunarecatsi! jei Jesús pijimona tatsi.

²⁶Jesús jume nota:

—¿Eta pocotsiwa metha bichocono pajunuwame? ¿Cataunxuae jopa pana neyabara jume cowũntsim xua bara tana neitacũpaewa xua tapaca yawenaewatsi? jei Jesús.

Nexata Jesús asiya uncua. Bapoxonae Jesús itawetaxuba joibo, maratsacano. Daxita caewanaya joibo yawa maratsacano. ²⁷Bapoxonae barapo pebiwi yabara najüntü coyene cabenaecarүcүpa xua pocotsiwa Jesús peexanaexae. Barapomonae najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dubenanaya! najei barapomonae.

**Meje yabara poxonae pebinbe ponbe caurimonae pexeinaeinbe,
ponbe Gadara nacuapinbe**
(Mr 5.1-20; Lc 8.26-39)

²⁸Poxonae Jesús patopa pucua icha muxunene beya xua po nacuatha Gadara nacua, bapoxonae pebinbe Jesús imoxoyo caquita uncuatabүtsibe. Baponbe ibo wountha poponeibabe. Caena bayatha baponbe xeinabe caurimonae. Barapo caurimonae baponbe anaepana cana exanatsibe daxota daxita jiwi junuwa xua peponaewa barapo namtotha ichaxota baponbe poponabe. ²⁹Bapoxonae jemeicha caurimonae baponbe wawai exanatsibe, jeibe:

—Nacom Pexantom tatsim, ¿eta pocotsiwa metha patopame pata xantha? ¿Patopame jinya painya neperaxa exanaetsibe pewүnaeya xua po matabitha xua poxonae Nacom atene pana exanaena xua abe pata exanaexae? jei baponbe xua caurimonae wawaya exana.

³⁰Tsiwiyo tajүyo beya pin marrano duweimonae xayompa.

³¹Caurimonae Jesús jeichi:

—Icha pana itawetame, moya pana nepu copabare marrano duweimonaetha, jei caurimonae.

³²Nexata Jesús jume nota caurimonaetha, jeye:

—Moya pataema, jei.

Nexata caurimonae pebinbe wepu ponatsibe, yawa marrano duweimonaetha pata. Barapo marrano duweimonae дүcүpa, pin pitapatororo othopareca. Pucuatha bunothopa. Caurimonae cabunothopatsi.

³³Pomonae yapu eena barapo marrano duweimonae, junuwiya cuinaenouta peyabara paebinexa tomarapiwitha. Barapomonae yabara paeba daxita pocotsiwa Jesús cana exana marrano duweimonaetha yawano pocotsiwa Jesús cana exana ponbetha ponbe xua cauri pexeinaeinbe.

³⁴Bapoxonae daxita tomarapiwi pona ichaxota Jesús eca. Poxonae Jesús tainchi, barapomonae Jesús jeichichi: “Maisa bewa warapaename Gadara nacua weya, po nacua pata nacua weya”, jei daxita barapomonae.

Meje yabara poxonae Jesús axaibi exana pon pecuenobinchi
(Mr 2.1-12; Lc 5.17-26)

9 ¹Nexata Jesús jeratha nontabiya. Jeratha pona icha muxunene beya xua pucua epataүta iya. Jesús pia tomara beya patopa,

barapo tomara icha muxunenetha eca. ²Baraxota pebiwi pata. Barapo pebiwi Jesús tacarendenatsi pon pecuenobinchi. Xua xota pocotsiwatha pemaiteibiwa, barapomonaе barapocotsiwatha pecuenobinchi carendenatsi. Poxonaе Jesús tane xua barapomonaе yabara jume cowanta xua bara Jesús peitacupaewatsi xua axaibi peexanaewatsi pon pecuenobinchi, bapoxonaе Jesús barai pecuenobinchi:

—Tajiton, najuntu coyene tsacatabare. Cacui yabara juntemainaya juntu puxana exanatsiba jinya abe neexanae cuiru coyenein, jei Jesús.

³Bapoxonaе pomonaе jiwi pecuidubiwi Moisés pia peitorobi coyenewa tatsi, barapomonaе daxita carepaya pia coutha nanta xeina. Najei: “Maisa bapon bichocono abe tsipei pocotsiwa bapon paeba bichocono Nacom tsita ajumbetsi. Jiton dapocotsin aibi pon xua jiwi cacui yabara juntemainaya juntu puxana exanatsi abe pia peexanae cuiru coyenein tatsi”, najei barapomonaе. ⁴Daichitha Jesús yaputane xua barapomonaе pijuntu coyeneintha natsipaeba. Jesús barai barapomonaе, jeye:

—¿Eta xua metha baxua abeya pana neyabara cananta xeiname?

⁵¿Eta po jumetha baran tsane pecuenobinchi? ¿Metha jan tsane: ‘Jinya abe neexanae cuiru coyenein cata juntemainatsi’, jan tsane? Ichacuitha ¿metha jan tsane: ‘Nontaponare, yawa bara ponare’, jan tsane? ⁶Daxota aunxuae paca tsita itapeinya xeinaeinchi xua xan ponxaein Nacom Tananeitapetsin, xua xeinan taayapusu itorobi coyenewa xua bara tana neitacupaewa xua jiwi tayabara cacui juntemainaya juntu puxana exanaewa abe pia peexanae cuiru coyenein tatsi pomonaе jinompa barapo cae pin nacuathe, jei Jesús.

Bara nexata pecuenobinchi Jesús barai, jeye:

—Catsipaebatsi nontaponde. Jinya nemaituncuaewa pire. Jinya bo beiyande, jei Jesús.

⁷Bapoxonaе pon pecuenobinchi caena nainya nontapona barapomonaе peitutha tatsi, yawa pita xua pemaituncuaewa. Bapoxonaе pia bo beiya. ⁸Poxonaе jiwi tane baxua, barapomonaе yabara najuntu coyene cabenaeca yawa Nacom wunaе jaintatsi. Barapomonaе nabarai:

—Anoxuae waxainchi tainchi pocotsiwa pewunaewa pocotsiwa jopa yaputaetsi, yawa wunaе jaintatsi xua Nacom barapo jitontha pecatsixae pia peayapusu itorobi coyenewa, jei barapomonaе.

Meje yabara poxonaе Mateo wabatsi, Jesús waba

(Mr 2.13-17; Lc 5.27-32)

⁹Jesús bara weya pontaba ichaxota axaibi exana pon pecuenobinchi. Bapoxonaе Jesús tane pebin pon pewun Mateo. Bapon eca ichaxota bapon paratixi matoma noteibeca po paratixi jiwi bewa catsibina pon romanomonaе itorobiya pia pepa peewatsinchi nexa. Jesús Mateo baraichi:

—Nepuna ponde, jei Jesús.

Bapoxonae Mateo caena nainya nontapona yawa napuna pona Jesustha.

¹⁰Pirapaeyo Jesús baru ecatsi, Mateo baru eca pia botha pexaethopeibiwatha xua Jesús pebaru xaenexatsi. Barichi Jesús baru eca pinmonae barapo pexaethopeibiwatha pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Iruru Jesús baru eca ichamonae pomonae abe peexanae cuiru coyenein peexanaewi. Daxita barapomonae Jesús baru eca pexaethopeibiwatha yawa Jesús pijimonae baru ecano penabanaenexa. ¹¹Ichitha poxonae fariseomonae tane xua Jesús dacotsiwa baru eca, barapomonae namchi. Jesús pijimonae tatsi baraichi:

—Maisa Jesús abe exana poxoru baru xayeca pomonae paratixi pentoma noteibiwi. Matautano, baru xayeca pomonae abe peexanae cuiru coyene peexanaewi, jeichichi Jesús pijimonae tatsi barapo fariseomonae.

¹²Poxonae Jesús baxua jume tane, bapon Jesús namchi barapomonaetha:

—Pomonae ba xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa pomonae ba atene barapomonae jame canantawenona pon jiwi peyawubin. Bara juta coyene ichi barapomonae pomonae nebaru xane. Barapomonae nenantawenona xua tayabara cui jantemainaenexa abe pia peexanae cuiru coyenein tatsi. ¹³Panacuidubaponde xua Nacom Pejume Diwesi paeba. Meje xua Nacom namchi, jeye: ‘Ichichipan xua jiwi nantanuweya peyabara nanta xeinaewa ichamonaetha xua peyawenaewa tsane. Baxua jame ichichipan beyacaincha xua ichichipan po cui coyene xua jiwi duwei petautsiwa xua tuxusi exana xan nexa’, jei Nacom. Barichinno xan patopan apara tha jopa tawabinexa tsane pomonae pejuntu coyene xanepanaewi. Apara jame patopan tha meisa tawabinexa tsane pomonae peajuntucoyenebe jiwi, xua barapomonae icha juntu coyene pexeinaenexa tsane peuraxae xua abe exana, jei Jesús.

**Meje yabara poxonae Jesús yabara yainyabatsi po
coyene xua Nacom peyabara nainbotsiwatsi
(Mr 2.18-22; Lc 5.33-39)**

¹⁴Nexata Juan pon jiwi Pebautisabin, bapon pia pepuna jinompaewichi barapomonae pata Jesús pia xantha tatsi. Barapomonae Jesús yainyabatsi, jeye:

—Apara paxan iru fariseomonaeru jopa juniya Nacom payabara nainboteibinyo poxonae Nacom pawuqueiban. ¿Eta xua metha jinyamonae daxua jopa cou daichiyo, saya cou u penabaneibi? jei barapomonae pomonae Juan pia pepuna jinompaewichi tatsi.

¹⁵ Jesús jume nota barapomonae:

—Jiwi ba jopa bewa wecoyeya yabara nainbotsi poxonae ichamonae pexaewa tsinacaetuta penabanaenexa xua poxonae pebin pecotsiwa pita. Poxonae cataunxuae awiya bapon eca pexaewa penabanaewatha, bapoxonae jiwi ba pebur̄ya nabane, jopa bewa yabara nainbotsi tsane. Ichitha icha pon aena piowa pita, caena nainya waetabatsi, ichamonae waetaba xua bapon taj̄ pecaponaenexatsi, bapoxonae jame jiwi ba bewa wecoyeya yabara nainbotsi xua equeicha bapon caewa pepatopaewa tsane.

¹⁶ “Jiwi ba jopa exanaeyo xua pena paparuwa tsiwiyo jiwana caxinaxubeta po paparuwa cataunxuae jopa matanaxubiyo, xua barapo paparuwa pewan botsinexa peru dorouto. Icha baxua exanaetsipa xua pena paparuwatha wan bota peru dorouto, bapoxonae barapo dorouto abe tsipae. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha nama bichocono pin wan tsanaya beyacaincha xua poxonae copiya. ¹⁷ Matautano jiwi ba pena vino mera jopa eparecaeyo peru bocoto, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba yawa barapo bocoto naxuba poxonae barapo bocoto tsitsica. Daxota bewa jame pena vino mera eparecae pena bocoto. Bapoxonae pena vino mera jopa naxubiyo, yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

**Meje yabara xua poxonae Jairo pexantiyo taaxaibi exanatsi,
yawa yabara xua bapoxonae icha yab̄yo ir̄ axaibi
exanatsi poxonae Jesús pia paparuwa tajayabatsir̄
(Mr 5.21-43; Lc 8.40-56)**

¹⁸ Poxonae cataunxuae Jesús cueicueijeji barapomonaetha, bapoxonae pebin patopa. Bapon judiomonaē pia penacaetutsi bo pia pecanamataxeinaein tatsi. Bapon pew̄n Jairo. Jesús petaxutha irabe tatayecarecatsi. Bapon baxua exana tsipei Jesús pon ainya cui peexanaeinchi. Bapon namchi Jesustha:

—Taxantiyo anoxuaetha inta t̄pa. Icha xam ponaename yawa necobetha mata jayabiname, bapoxonae barapowa equeicha as̄ tsane xua equeicha nacosatsina, jei Jairo.

¹⁹ Jesús bapoxonae nontapona. Jairo puna poinchi. Ir̄ Jesús pijimonaē puna poinchi. ²⁰ Poxonae Jesús iya ir̄ yab̄yo Jesús imoxoyo caquita poinchi. Barapowa caena bayatha be yadoce po weiyobe jopa xua pentab̄ janatha boca xua be nantawane. Barapowa Jesús pia paparuwa

xainyowa tajayabapoinyatsi. Bapowa paparuwa tajayaba xua peopirawa xua Jesús pia penamaxatatsiwa tatsi. ²¹⁻²²Baxua exana tsipei bapowa nanta xeina, jeye: “Icha pia paparuwa tajayabin bapoxonae axaibin tsane”, jei bapowa.

Poxonae bapowa Jesús tajayabatsi pia paparuwa, bapoxonae caena jüntübü jana naruntaba.

Nexata Jesús napatomeicha necota, yawa yabüyo tainchi. Jesús namchi bapowatha:

—Yabüyo, najüntemiya xore. Caaxaibi exanatsi jinya tana neyabara jume cowuntsixaem xua bara tana neitacüpaewa xua tacaaxaibi exanaewatsi, jei Jesús.

²³Jesús equeicha pona. Poxonae Jesús patopa pecanamataxeinaein pia bo tatsitha, bapoxonae Jesús tane xua pebiwi oba tsipei yabüyo bayatha tupa. Barapo pebiwi pomonae pecapu obiwi pewerapeibiwi. Matautano Jesús tane pomonae pesiwa namtsebiya wecoyei jiwi. ²⁴Jesús namchi jiwitha:

—Tutu weya paponde. Yabüyo apara jopa tupaeyo, maituncua apara, jei Jesús.

Poxonae Jesús baxua paeba, jiwi Jesús jume cui caponatsi. ²⁵Ichitha Jesús itoroba xua barapomonae tutu wejoniya pesato beya. Bapoxonae Jesús bo tutu joniya. Jesús cobe pita, yabüyo cobe pitatsi yawano asiya cuaranotatsino penacosatsixae. ²⁶Xua Jesús yabüyo axaibi exanatsi, barapo diwesi daxita jiwi jume taetaepona pomonae barapo nacuattha jinompa.

Meje yabara poxonae Jesús axaibi exana ponbe nantiyabe itata nacutabe

²⁷Poxonae Jesús bara weya pona ichaxota yabüyo caewa asü exanatsi, pebinbe Jesús puna poinchi. Baponbe peitata nacutsinbe. Baponbe wawaya jeibe:

—Xam Jesús, David pia pemomoxi susatopin jiwanam ponxaem Nacom necaitapetsin pana neyabara najüntü coyene xeinarebe xua pata tana neyawenaenexamebe, jeibe baponbe ponbe peitata nacutsinbe.

²⁸Poxonae Jesús bomüxü bejoniya, ponbe peitata nacutsinbe Jesús imoxoyo caquita poinchibe. Jesús yainyaba baponbetha:

—¿Bara pana neyabara jume cowuntamebe xua bara tana neitacüpaewa xua axaibi tapaca caexanaewatsibe? jei.

Jume notabe:

—Aja, pata Tanecanamataxeinaem, bara paca cui yabara jume cui cowuntatsibe, jeibe.

²⁹Bapoxonae Jesús itamaiquei jayababe baponbe. Jesús namchi baponbetha, jeye:

—Icha pana necui yabara jume cowuntamebe xua bara tana neitacupaewa xua axaibi tapaca exanaewatsibe bara baxua pacata exanaeinchibe xua axaibi paca exanaeinchibe, jei Jesús.

³⁰Bapoxonae caena nainya aitamaiqueixaibibe. Jesús jume daunweya baraibe baponbe, jeye:

—Jopa pana necui yopichindebe ichamonaetha xua pacata exainchibe baxua, jei Jesús baponbetha.

³¹Daichitha poxonae Jesús weya ponabe, pejume taewathabe xua Jesús paeba, tsipaebabe ichamonaetha pomonae barapo nacuatha jinompa, daxita pocotsiwa xua Jesús cana exana baponbetha.

Meje yabara poxonae Jesús axaibi exana pon pemuxusipanaein

³²Poxonae Jesús bo wejoniya irurũ ponbe aitamaiqueixaibi exanatsibe, bapoxonae ichamonaetha Jesustha pata. Barapomonae capona pebin, pon muxusipana, matautano jopa paebiyo, tsipei cauri xeina. ³³Bapoxonae Jesús itaweta cauri xua barapo pebin muxusipana exainchi. Caena nainya bapon cueicueijei. Nexata pomonae xua tane xua Jesús exana, barapomonae yabara najuntũ coyene benaeca. Barapomonae namchi, jeye:

—Jopa bapana taetsi Israel nacuatha icha be ichi pocotsiwa Jesús exana, jei barapomonae.

³⁴Ichitha poxonae fariseomonae jume tane baxua, barapomonae namchi Jesús yabara, jeye:

—Barapon caurimonae itawetatsi tsipei xeina caurimonae pia pentacaponaein tatsi pia peayapusũ itorobi coyene tatsi, jei fariseomonae.

Meje yabara poxonae Jesús nantanuweya yabara cui nanta xeina jiwi xua peyawenaewa tsane

³⁵Jesús pona daxita pin tomarantha yawa po tomaraxi tsiqui tomaraxitha. Bapon cuiduba ducuaeta judiomonae pia penacacetutsi bontha tatsi. Matautano bapon paeba ducuaeta Nacom pia pexeinya jume diwesi tatsi po diwesi yabara xua Nacom waba jiwi petanaexanaenexatsi piamonae pomonae Nacom jũntũ coyene itorobiya ewata. Matautũ bapon jiwi axaibi exana ducuaeta pomonae xua atene yawa xua cuenecuenona. ³⁶Poxonae Jesús jiwi tainchi, Jesús yabara nanta xeina barapomonae xua peyawenaewa tsane. Tsipei barapomonae natsepa matautano jopa itacupaetsi xua pia coutha penayawenaewa. Barapomonae bara be jũta coyeneya ichi, icha be ovejamonae ichi xua poxonae iratha bobena tsipei natsepa matautano tsipei dapon aibi, pon pe-eenaein ovejamonae xua peyawenaenexa. ³⁷Nexata Jesús namchi pijimonaetha:

—Bara xainyeya paca tsipaebatsi. Pabitha ba pocotsiwa peũbiwan naweta nawita, daichitha ba penacuichiwi pomonae jota pinmonae

aibi. Bara jũta ichi barapo cae pin nacuathe. Jiwi pinmonae jinompa pomonae nantawenona xua pejume taewa tsane Nacom pia pexeinya jume diwesi tatsi. Daichitha pomonae Nacom Pejume Diwesi cueicueijeji tsurubenanaebiya ichamonaetha, barapomonae pinmonae aibi, saya tsiquimonaeyo. ³⁸Daxota Nacom pawũcare xua peccatorobinexa tsane ichamonaetha xua petacamuxu tsipaebinexa tsainchi pia pejume diwesi pomonaetha pomonae barapo cae pin nacuathe pejinompaewi, jei Jesús.

**Meje yabara poxonae Jesús itapetsiya waba pia
peitorobiwi tatsi xua doce poyobe
(Mr 3.13-19; Lc 6.12-16)**

10 ¹Nexata Jesús pijimonae waba. Barapomonae jiwana itapetatsi doce poyobe, pomonae baraichi: “Jesús pia peitorobi jiwi tatsi”, jeichichi. Jesús barapomonae cata pia peayapusũ itorobi coyenewa xua cauri ichamonaetha petaitawetsinexatsi pomonae xua cauri xeina. Mataũtano Jesús cata pia peayapusũ itorobi coyenewa xua pijimonae tatsi axaibi peexanaenexa pomonae xua atene, xuano xua cuenecuenona.

²Barapomonae pomonae doce poyobe pomonae peitorobiwichi, ichũn pewũn Simón, pon icha wũnno “Pedro” baraichi. Irũ ichũn pewũn Andrés, pon Simón peweicho tatsi. Irũ ichũn pewũn Santiago. Irũ ichũn pewũn Juan, pon Santiago peweicho tatsi. Baponbe Zebedeo pexantobe tatsi. ³⁻⁴Irũ ichũn pewũn Felipe, irũ ichũn pewũn Bartolomé, irũ ichũn pewũn Tomás, irũ ichũn pewũn Mateo. Barapon Mateo pon paratixi pentoma noteibin po paratixi jiwi bewa catsibina pon romanomonae itorobiya pia pepa peewatsinchi nexa. Irũ ichũn pewũn Santiago, pon Alfeo pexanto tatsi. Irũ ichũn pewũn Tadeo. Irũ ichũn pewũn Simón, pon celotemonaepin. Irũ ichũn pewũn Judas Iscariote, pon Jesús caenaetaxubatsi ichamonaetha xua pebexubinexatsi.

**Meje yabara poxonae Jesús itoroba pijimonae xua barapomonae
peyabara cueicueijeinexa jiwitha po coyene xua Nacom
waba jiwi xua petanaexanaenexatsi pijimonae tatsi
(Mr 6.7-13; Lc 9.1-6)**

⁵Barapo doce poyobe Jesús itoroba, Jesús jeye:

—Jopa paponaeinde po nacua ichaxota jinompa pomonae jopa judiomonaetha naexanaeyo. Jopa paponaeinde po tomaran ena Samaria nacuaetha. ⁶Meisa saya paponde pomonae Israel nacua monaepiwitha. Barapomonae payawende tsipei barapomonae Nacom taju wepu jinompatsi xua pipato jinompa. Icha be pocotsi jũta coyeneya ichi oveja, barapo ovejamonaetha napuxana poxoru wepu pona taju beya, xua pon pe-eeinaein barapo ovejamonaetha bapon taju wepu poinchi icha xua poxonae napuxana. ⁷Poxonae papaeba dubenanaebiyame,

papaebare barapomonaetha po coyene xua anoxuae Nacom waba jiwi xua petanaexanaenexatsi piamonae pomonae itorobiya peewatsixae. ⁸Matautano Nacom pia peayapusu itorobi coyenewatha po coyenewe meje baxua paexande: Axaibi paexande pomonae peatenewi; equeicha asu paexande pomonae werapeibina; axaibi paexande pomonae xua peperu sawichimona; matautano caurimonae pata taitawere pomonae caurimonae pexeinaewi. Nacom amanaya paca cata barapo pia peayapusu itorobi coyene, daxota poxonae jiwi payawenama Nacom pia peayapusuwatha, jopa jiwi paratixi pawucaeiinde.

⁹“Jopa pacaponaeiinde paratixi xua poxonae painya newarapaenexa. ¹⁰Jopa pacaponaeiinde cote xua painya nejeyaenexa paparuwan poxonae pawarapame. Saya cae camisa panama xatabare, jopa icha camisa pacaponaeiinde. Matauta jopa pacaponaeiinde ichawan xua painya nenataxu xatabiwan, yawa icha iwaton jopa pacaponaeiinde. Painya xoba paauram xua poxonae jiwi paca catsibeibina tsipei baraxua pocotsiwa paca cata apara bara painya matoma painya netanacuichixaemxae Nacom.

¹¹“Poxonae papanenebiyam pin tomaratha, ichacuiha tsiqui tomariyotha, pajeire pon jiwi baru cui itura jina xuano xua paca tsiwaba pia botha tatsi pia paca apatsinexa tsane. Bapon pia botha tatsi painya nepu enaeiinde beya tsane poxonae barapo tomara weya pawarapaname. ¹²Poxonae bomuxutha pajojoniyame, barapo bopiwi pajacobare, pajande: ‘Barabu Nacom juntema jinompa paca cana exanaena’, pajande. ¹³Icha baxota jinompa pomonae pomonaetha jiwi baru cui itura jina, bara baxua Nacom barapomona taexanaeinchi pocotsiwa papaebame. Ichitha icha baxota jinompa pomonae pomonaetha jopa jiwi baru cui itura jinaeyo, baxua Nacom jopa taexanae tsane pocotsiwa papaebame barapomonaetha. Equeicha caewa pacata parenana xua pocotsiwa papaebame. ¹⁴Ichitha icha icha tomarapiwi jopa paca matenta weyataeya wabiyo yawano icha jopa xapain paca jume naitawatsiyo, nexata bapoxonae panatsixibare. Namto beya paponde xua bomuxu weya xua ichacuiha icha tomara weya. Po tsorobo painya taxutha dubena pana nataxu wenunbabare barapo tomaratha. Poxonae baxua paexaname patsita itapeinya xeinaename, apara xua barapomona abe exana painya xainya berena xua poxonae barapomona paca jume itaweta. ¹⁵Bara xainyeya paca tsipaebatsi matabi patopaena, po matabitha Nacom yabara paebina jiwi petsita natsicuentisixaetsi xua abe petsita exanaexaetsi. Barapo matabitha jopa juniya bichocono atene tsane pomonae paca jume itaweta. Caena bayatha Sodoma tomarapiwi iru Gomorra tomarapiwi bichocono abe exana. Daxota Nacom atene exanaena barapo tomaramonaebe. Bara bequein Sodoma tomarapiwi atene matauta iru Gomorra tomarapiwi bequein atene tsipei bichocono

abe exana barapomonaē. Ichitha nama pomonaē barapo tomaratha jinompa, pomonaē paca jume itaweta, jopa juniya peraxa jubebi tsainchi, beyacaincha poxonaē Sodoma tomarapiwi yawa Gomorra tomarapiwi peraxa jubebatsi”, jei Jesús.

**Meje yabara poxonaē Jesús yabara paeba xua ichamonaē
abe exanaena Jesús pijimonaetha tatsi**

¹⁶Equeicha Jesús jeye: “Paponde ichaxota paca itorobatsi. Paca caitorobatsi pia xainya beya pomonaē jopa pejume cowuntsiwi, pomonaē itacupatsi xua abe painya nepaca exanaewa, icha ovejan ichi xua poxonaē pona ichaxota neuthu jinompa xua itacupatsi xua abe peexanaewatsi. Paxam pananthuthu cui wnaetsiya tsaquiya jinompare, tsipei ichamonaē beya paca pepeichipa. Baxua bara paichinde icha jomo ichi xua peita coxonaēin poxonaē waxouto cuitaya naetsiriwatsi. Paxam bara jutiya jopa paichim tsane jopa ichamonaetha abe paexanaeinde, icha topiboto ichi xua anaepana jopa nanta xeincaeyo xua juntea yapoponeca. ¹⁷Paxam dota pam, dota pomonaē peajuntucoyenebe jiwi. Barapomonaē paca teicaena pepaca caponaenexa tsane pomonaetha pomonaē tomaran pentacaponaei. Bapoxonaē barapomonaē paca cuainchina judiomonaē pia penacetutsi bontha tatsi. ¹⁸Matauta barapomonaē paca caponaena pomonaē peyanacua ewatsi jiwi peitabaratha tatsi. Matauta paca caponaena pomonaē jiwi itorobiya pia pepa peewatsiwichi pia peitabaratha tatsi. Baxua paca cana exanaena painya tana nejume cowuntsixaemxae. Daichitha barapo pentacaponaei peitabaratha tatsi paca itacupaena xua pata neyabara paebiwān pocotsiwa bayatha tapacata exanaewatsi paxam. Matautano paca itacupaena xua pata neyabara paebiwān pomonaē jopa judiomonaē naexanaeyo peitabaratha tatsi. ¹⁹Ichitha poxonaē paca caponaena pentacaponaei beya, jopa payabara najuntu coyene exabinde pocotsiwa xua painya nejume notsiwa tsane barapomonaetha. Nama Nacom paca tsijume dubina po jume xua painya nacaunutsiwam tsane. ²⁰Tsipei beta jopa papaebimchipae painya coutha, ichitha Nacom pia Pejumope tunaxu tatsi paca tsimuxu cueicuejei tsane. Bapon paca catsina po jumetha xua patsipaebiname.

²¹“Jiwi caenaetsina barompaya peweicho jiwi ichamonaetha xua ichamonaē pejutebinexa tsane. Iru coxiyeiwi ichamonaetha caenaetsina pia pexui xua ichamonaē pejutebinexa tsane. Iru pexui paxeiwi caenaetsina ichamonaetha xua ichamonaē pejutebinexa tsainchi. ²²Daxita nacuanpiwi paca casebina painya tana nejume cowuntsixaemxae. Ichitha icha awiya paantuyapusya nejume cowuntsiya jinompaename xua beya payacuiya werapaeya othopaename, poxonaē bequein abe pacata exana ichamonaē Nacom napaeba paca cana exanaena. ²³Icha cae tomarapiwi paca abe exanaena, parucupare icha tomara beya. Bara xainyeya

paca tsipaebatsi xua xan ponxaein Nacom Tananeitapetsin, equeicha patopeicaein beya abũ poxonae cataunxuae jopa panacui wetsim tsane xua paponame daxita israelmonae pia nacua tomarantha tatsi, xua papaeba dubenanaebiyame Nacom Pejume Diwesi.

²⁴“Pon ba aena nacuiduba xua peyaputaenexa, bapon jopa be bapocotsinyo, pon pecuidubin jiwi, pon peyaputaein. Matauta pon ba petanacuichin jopa ainya cuiyo, jopa be bapocotsinyo pon xua peitorobixaetsi pon pia pecanamataxeinaeinchi tatsi. ²⁵Pon ba penacuidubin bewa nanta xeinae, bewa najei: ‘Maisa ichamonae inta abe exanatsi pon tana necuidubin. Metha bara neichi tsane’, bewa najei. Iru pon ba tanacuita pia pecanamataxeinaeinchi bewa najei: ‘Maisa ichamonae inta abe exanatsi pon tanecanamataxeinaein. Metha bara neichi tsane’, bewa najei. Icha pocotsi coyeneya baponbe ichi poxonae baxua nayabara nanta xeinabe, bara pocotsi coyeneya paca cana ichiya exana jiwi icha poxonae neyabara ichiya namchi. Tsipei jiwi abe neyabara paeba xua jeye: ‘Maisa bapon Beelzebú tsecae pon caurimonae pia pentacaponaein tatsi’, jei. Matauta paca yabara jei tsane: ‘Maisa barapomonae Beelzebú pijimonae tatsi po Beelzebú caurimonae pia pentacaponaein tatsi’, paca yabara jei tsane”, jei Jesús.

**Meje yabara poxonae Jesús yabara paeba xua
pontha bewa ba jiwi cuitaya cunuwina
(Lc 12.2-7)**

²⁶Equeicha Jesús jeye: “Jopa jiwi pacunuwinde xua tapana neyabara paebiwam. Tsipei daxita diwesi, xua po diwesi bequein anoxuae jiwi jopa yaputaeyo, bexa yaputaena. Pocotsiwa jiwi abe nameicha exana daichitha ichamonae bexa yaputaeponaena baxua. ²⁷Tsipei daxita baxua xua nameicha paca tsipaebatsi, baxua xuya patsipaebare jiwi. Po diwesi xua merawi paca tsipaebatsi, barapo diwesi xuya ichamonae mataqueitha patsipaebare. Po diwesi xua paxapaxeya paca tsipaebatsi, barapo diwesi xuya panatha pana nejume canawabiya wawande. ²⁸Tamonae pam, paca tsipaebatsi, jopa pacunuwinde pomonae itacũpatsi xua paca jutebina xua saya meisa painya pepontha. Ichitha barapomonae jopa itacũpaetsi xua equeicha paca jumopein tũnaxũ jutebina. Jame paca tsipaebatsi pon jame bewa pajume cuitaya cunuwim bapon apara jame Nacom. Tsipei barapon Nacom itacũpatsi xua paca bebai pin isototha po pin isototha jopa bapana itacounayiyo xua weraweraca painya nepaca exanaenexa painya pepon yawa painya nejumope tũnaxũ.

²⁹“Jiwi ba caenaeta sito dos poyobe, saya cae paratiyotha nantomata. Bequein barapo sitobe caenaeta jiwi xua jopa matoma nautsiyo, poxoru saya sito, ichitha painya Axa Nacom yaputane yawa copata poxonae barapo sitobe jiwana iratha yajopeica xua yatũpa. ³⁰Nacom daxita

carepaya jopa juniya paca yabara yaputaeyo, daxota paca matana yaputane xua pontanatiyobe painya nexainaewa. ³¹Jopa pajunuwinde tsipei paxam bichocono Nacom patsita ainya cuim, beyacaincha siri”, jei Jesús pijimonaetha.

**Meje yabara poxonae Jesucristo yabara paeba xua pomonae
peyabara paebiwichi ichamonaе peitabaratha tatsi
(Lc 12.8-9)**

³²Equeicha Jesús namchi: “Yabara paca tsipaebatsi pomonae xua nayopita ichamonaetha pomonae xua najei: ‘Apara paxan Jesús pijimonaе tatsi pan’, najei. Barichi xan xuya jan tsane Nacomtha: ‘Barapomonae apara tana nejume cowuntsiwi’, jan tsane xuya barapo Nacom peitabaratha pon Taxa, pon peitabocotha peecaexae. ³³Ichitha pomonae xua neyabara jei ichamonaetha: ‘Jopa bapon yaitaeinyo’, jei, xan xuya barapomonae yabara jan tsane: ‘Apara barapomonae jopa yaitaeinyo’, jan tsane xuya Taxa beicha, pon peitabocotha peecaexae”, jei Jesús.

**Meje yabara poxonae Jesús yabara paeba xua jiwi ainya
bicheiton naexanaena xua Jesús pejume cowuntsixaetsi
xua ichamonaе jopa pejume cowuntsixaetsiru
(Lc 12.51-53; 14.26-27)**

³⁴Equeicha Jesús namchi: “Jopa pananta xeinaeinde xua patopeican saya meisa xua jiwi juntema jinompa tacana exanaewa tsane. Jopa baxua tsipatopaeinyo. Apara jame tsipatopeican taexanaenexa po coyene jiwi naba exanatsi xua daxota ainya bicheiton penaexanaenexa. Pomonae jopa nejume cowuntsiyo ita aenae-aenei pomonaetha pomonae tana nejume cowuntsiwi. ³⁵Coxiyan pexanto ita aenae-aenei tsainchi. Irü coxiwa pexantiyo ita aenae-aenei tsainchi. Irürü ichowayo pecopeinyo ita aenae-aenei tsainchi. ³⁶Daxota pebin barompaya piamonae penaitafaetabi jiwi nacana exanatsi.

³⁷“Pon antobe paxa yawa pena beyacaincha xua neantobe bapon jopa naexanae tsane pon tajiwiwimonae jiwanapin. Pon antobe pexanto beyacaincha xua neantobe, bapon jopa naexanae tsane pon tajiwiwimonae jiwanapin. Yawa pon antobe pexantiyo beyacaincha xua neantobe bapon jopa naexanae tsane pon tajiwiwimonae jiwanapin. ³⁸Mataütano pon jopa awiya exana ducunaebiyayeo pocotsiwa itoroban, tsipei jopa be peraxa exanaetsi icha be xua poxonae neichi nexata bapon jopa tajiwiwimonaepinyo. ³⁹Pon naantobeya nata exana pocotsiwa bapon ichichipa bapon jopa xeinaeyo peajüntuyapusüwa, po peajüntuyapusüwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan taneantobexae bapon xeinaena peajüntuyapusüwa, po peajüntuyapusüwa ataya tsiteca xua Nacom pia nacua beicha”, jei Jesús.

**Meje yabara poxonae Jesús yabara paeba xua
pocotsiwan peyabara cui matomatsiwa**

(Mr 9.41)

⁴⁰Equeicha Jesús namchi: “Pon xua paca matenta weyatane pia tana neyabara jume taenexa tsane pocotsiwa papaebiname, barapara bapon yawa neweyatanerũ. Barapon pon xua neweyatane, barapara mataũtano weyataenarũ xua weyatainchi pon xua tana neitorobixae, bapon Nacom. ⁴¹Pon cueicueijejei Nacom pia peitorobi jume diwesi, Nacom bapontha catsina pia peyabara cui matomatsiwa tsipei barapon pon barapo peitorobi jume pepaebin Nacom tanacuitatsi. Po peyabara cui matomatsiwa catatsi pon Nacom peitorobi jume pepaebin Nacom barichi tsane jũpa catsina pontha pon matenta weyatane, xua matenta weyatainchi pon Nacom pia peitorobi jume pepaebin. Mataũta irũ pon xua pejũntũ coyene xeicaein bapontha Nacom catsina peyabara cui matomatsiwa tsipei bapon xanepanaya popona Nacom nexa. Nacom barichi tsane jũpa catsina pontha pon matenta weyatane xua matenta weyatainchi pon pejũntũ coyene xeicaein. ⁴²Pon xua apatsina tajiwiwimonae jiwana pintha bequein jopa matowa apatsiyo mera xua bequein cae corotiyo xua ameneque, daichitha Nacom bapontha catsina pia peyabara cui matomatsiwa tsipei bapon tajiwiwimonae jiwapanin yawenatsi”, jei Jesús.

**Meje yabara poxonae Juan pon jiwi Pebautisabin itoroba
pijimonae Jesús beya, peyainyabinexa tsainchi Jesús**

(Lc 7.18-35)

11 ¹Jesús najume weta xua pijimonae muxuwetsiya cuiduba, po jiwimonae tatsi xua doce poyobe tatsi. Bapoxonae Jesús bara weya natsixitaba xua tomarantha peponaenexa po tomaran ena barapo nacuatha xua jiwitha pecuidubinexa Nacom pia pexeinya jume diwesi tatsi.

²Juan pon jiwi Pebautisabin, bapon jiwi pecũbi botha etatsi. Poxonae cataunxuae jiwi pecũbi botha eca, bapon jume tane xua juinya Cristo exana. Bapoxonae Juan itorobabe Jesús beya ponbe pia pepuna jinompaewichi jiwanaabe tatsibe xua petayainyabinexatsibe Jesús beya.

³Barapomonae Jesús yainyabatsi xua Juan najume caruta, xua jei:

—¿Metha bara xaniwaicha xam baponda, pon bewa patopaena pon Mesías? ¿Ichacuitha metha bara ichũn pawũnae ewatan jampa? jei baraponbe xua Juan najume caruta.

⁴Jesús jume nota baraponbe, jeye: “Papondebe, mataũta Juan patsipaebarebe xuaunxuae pocotsiwa pana necui tanemebe, mataũtano xuaunxuae pocotsiwa pana nejume tanemebeno. ⁵Mataũtano

patsipaebarebe xua pomonae peitata nacutsi jiwi equeicha tane, matauta xua pomonae pejayuyajujeiwi beta pona equeicha, matautano xua pomonae peperu sawichimonae equeicha peru wuna, matauta pomonae xua pemuxusipanaewi equeicha muxu nasaba, matauta pomonae xua pewerapaewi equeicha asu tsane. Matauta pomonae xua peacopeibi jiwi jume tane Nacom pia pexeinya pecapanenebiyae diwesi jume.

⁶Patsipaebarebe Juan xua xan janje: ‘Juntu coyene weiweinaena pon jopa ainya unthuthuyo, pon xaniwaicha neyabara jume cowanta’, xua jan”, jei Jesús.

⁷Poxonae Juan pia penacana jume caitorobinbe tatsi ponatababe, bapoxonae Jesús tamropata pitaba xua yabara paeba jiwitha xua Juan yabara paebatsi, jeye: “Ira xuepana susato tsurucuae nacuatha paponame. Poxonae bara beya poponame, zeta xua painyatsi, painya jume taetsi pebin pon ainya unthuthuto cui xeina icha be naepanaewa ichi xua saya joibo ba jubabiya caya tsaibi? Jume apara. ⁸Bara paichim. Paponame zepainya nejumetaenexa pebin pon peitupanae paparuwa nama xatata? Jume apara. Payaputaneme pomonae peitupanae paparuwan nama xataba, barapomonae ba jinompa pexeinya bontha pomonae jiwi itorobiya pia pepa peewatsiwixaetsi. ⁹Jume. Jopa baxua patsiponaem xua jopa painya jume taenexa pebin pon ainya unthuthuto cui xeina, matautano xua jopa painya jume taenexa pebin pon peitupanae paparuwa nama xatata. Apra jame baxua patsiponame xua painya nejume taenexa pon Nacom peitorobi jume pepaebin. Bapon Juan bichocono peainya cuin pon Nacom pia peitorobi jume pepaebiwi jiwana pin beyacaincha ichun pon Nacom peitorobi jume pepaebin. ¹⁰Juan bapon apra, pon yabara paebatsi Nacom Pejume Diwesitha poxonae Nacom netsipaeba, nejei:

‘Catsiwanae itorobinchi copiya pon tana nacajume carutsin.

Barapon juntu cui wunaetsina jiwi xua daxita jiwi najuntu cui wunaetsina xam nexa, xua necantenta weyataeya wabinexa poxonae patopaename’, nejei Nacom Pejume Diwesitha.

¹¹Bara xaniyeya paca tsipaebatsi xua daxita Nacom peitorobi jume pepaebiwi pomonae Juan tsiwanaya jinompatsi bayatha, dapocotsin aibi barapomonae jiwana pon yatsicaewa peainya cuin beyacaincha pon Juan, pon jiwi Pebautisabin. Juan peainya cui diwesi yabara cueicueije po coyene xua Nacom itorobina jiwi. Ichitha po diwesi xua tamonae anoxuae paeba barapo diwesi bichocono ainya cui diwesi beyacaincha xua Juan cueicueije, bequein jiwi nanta xeina xua tamonae jopa ainya cui jiwi.

¹²“Juan pon jiwi Pebautisabin, poxonae bapon tamropata pitaba xua cueicueije Nacom Pejume Diwesi xua beya anoxuae pin bicheitomonae nejume cowanta pia penaexanaenexa Nacom piamonae tatsi.

Barapomonae pichichi xua penaexanaewa Nacom piamonae tatsi pomonae Nacom itorobiya peewatsixae bequein ichamonae ayapube taexana barapomonaetha. ¹³Daxita po petinae diwesin Nacom peitorobi jume pepaebiwi tina iruru Moisés pia peitorobi coyenewa tatsi barapo naxobe peitorobi coyenewathabe yabara tsiwunae muxu dutsiya paeba. Barapo peitorobi coyenewabe yabara paeba xua bexa tsane jopaena matacabi po mataqueitha xua Nacom juntu coyene itorobiya canamataxeinaena jiwi. Matapainya Juan patopa. Bapoxonae iru Nacom tamropata pitaba xua exana pocotsiwa bayatha yabara tsiwunae muxu duta. ¹⁴Icha paxam xaniwaicha paichichipame xua payabara jume cowuntame xua pocotsiwa barapomonae bayatha yabara paeba, bapoxonae bara panejume cowuntsiname xua paeban, xua jan: ‘Apara Juan bapon Elías pon caena bayatha tupa. Barapon apara pon Nacom peitorobi jume pepaebin, pon bayatha Nacom yabara paeba xua bepa pinae equeicha patopaena’, jan. ¹⁵Icha pamuxu dubename moya pana nejume naitaware pocotsiwa tapaca tsipaebiwatsi.

¹⁶“¿Eta pocotsimonae cui jupatsi barapomonae pomonae xote jinompe pomonae Nacom jume itawetatsi? ¿Etabe juta ichi barapomonae? Barapomonae be pexui, pocotsixi panatha nabaru jinompa. Nabaru wawai tsurubenanaebiya. ¹⁷Barapoxi nabarai, jeye: ‘Bayatha oibo paca tsimumu obatsiba ichitha jopa panawirabim. Bayatha paca tsimumu wecoyeichiba icha be ichi poxonae ichun tatupatsi ichitha jopa pana itanuwe jume notsim xua painya newecoyeinexaru’, jei barapoxi. ¹⁸Juan patopa pon jiwi Pebautisabin. Bapon jopa xaeyo pan, yawa jopa apaeyo vino mera. Ichitha paxam pajam: ‘Apara Juan xeina cauri’, pajam. ¹⁹Bapoxonae xan ponxaein Nacom Tananeitapetsin patopan. Xan pan taxaein yawa vino mera taapaein. Paxam pana neyabara paebame pajam: ‘Bapon maisa jopa juniya nabanaeyo, yawa jopa juniya apaeyo. Peatsacaewi abe peexanae jiwi pia jiton tatsi, iru pomonae paratixi pentoma noteibiwi, barapomonae pia jiton tatsi’, pana neyabara jam. Nacom piamonae tatsi barapomonae tsita exana xua jiwi tsita exanatsi Nacom pia peyaputae coyeneintha tatsi. Po coyene barapomonae exana, baxua Nacom tsita pexainyei coyenetsi”, jei Jesús.

**Meje yabara poxonae Jesús yabara paeba po
tomaranpiwi jopa pejume cowuntsiwichi
(Lc 10.13-15)**

²⁰Nexata Jesús tamropata pitaba xua biatane ainya tomaranpiwi, ichaxota bayatha copiya matha matowa exana pia petsita itutsi coyenewan. Bequein Jesús baxua matowa exana, ichitha barapomonae jopa icha juntu coyene xeinaeyo xua peauraxae xua abe exana. ²¹Daxota barapo tomaranpiwi beya, jeye: “iPai jaibo, Corazín tomarapiwi

tsobenae! iIru Betsaida tomarapiwi tsobenae! Po tsita itutsi coyenewan exanan Corazín tomaratha iru Betsaida tomarathano, ichun jopa bapana exanaeyo barapo tsita itutsi coyenewan Tiro tomaratha yawa Sidón tomaratha. Icha barapo tsita itutsi coyenewan exanaetsipa Tiro tomaratha Sidón tomarathano, barapo tomarabepiwi icha penanta xeinae coyenewatha yabara nanta pentsipa Nacomtha. Barapomonaе iratha enaetsipa yawa paparuwan nama xatabichipa xua pocotsiwa be peru mapaton xua axun, yawa ipuna nacaxuebichipa pia pepontha. Barapomonaе baxua exanaetsipa xua ichamonae petsita itapeinya xeinaewa tsainchi xua icha juntu coyenein Nacom petsita xeinaewatsi peauraxae abe peexanaexae bapontha. ²² Paxam pomonaе Corazín tomarapiwi pam iru Betsaida tomarapiwi pam, bara xaniyeya paca tsipaebatsi. Poxonae barapo matacabi patopeicaena po mataqueitha Nacom yabara paebina daxita jiwi petsita natsicuentaetsi abe petsita exanaexaetsi, Tiro tomarapiwi iru Sidón tomarapiwi daxita barapo tomarabepiwi bichocono peraxa jubebinchi. Ichitha nama paxam pomonaе Corazín tomarapiwi pam, iruru Betsaida tomarapiwi pamdu, daxita paxam jopa juniya paca peraxa jubebi tsane, beyacaincha xua peraxa jubebinchi Tiro tomarapiwi iru Sidón tomarapiwi. ²³ Incane iru Capernaum tomarapiwi pamdu! ¿Bara pana nanta xeiname xua paca capanenebiya tsane peitaboco beicha? Jume, apara paca itorobina petupae coyene cuiru bereca. Po petsita itutsi coyenewan painya tomaratha exanan icha bayatha barapo petsita itutsi coyenewan exanaetsipa Sodoma tomaratha, bara cataunxuae barapo tomara ecaetsipa, xua beya anoxuae tsipae. Tsipei barapomonaе metha bayatha xeinaetsipa icha juntu coyene xua peauraxae xua abe exana Nacomtha. Metha bapoxonae Nacom jopa jutebichipae barapo tomarapiwi. ²⁴ Ichitha paca tsipaebatsi paxam Capernaum tomarapiwi pam, matacabi patopeicaena po mataqueitha Nacom yabara paebina daxita jiwi petsita natsicuentaetsi abe petsita exanaexaetsi. Barapo mataqueitha bichocono paca peraxa jubebina, beyacaincha xua Sodoma tomarapiwi peraxa jubebinchi bichocono”, jei Jesús.

**Meje yabara poxonae Jesús waba jiwi: “Anetha xan
berena tapaca yawenaewa tsainchi”, jei
(Lc 10.21-22)**

²⁵ Bara caena bapoxonae Jesús juntu coyene weiweina exanatsi Nacom pia Pejumope tunaxu tatsi. Jesús namchi, jeye: “Axa peitaboco Necanamataxeinaem, yawa ira Necanamataxeinaem. Wunaе cajaintatsi tsipei jopa tsita itubim pocotsiwa pexainyei coyenewa xan yabara pomonaetha pomonaе bichocono penacuidubiwi pomonaе be pinyon penatsicotaewi tsipei nanta xeina xua bichocono peyaputaewi daxita.

Jame tsita itútame barapo pexainyei coyenewa xua xan yabara pomonaetha pomonae jopa bichocono penacuidubiwi, pomonae be pexui penatsicotaewi tsipei jopa nanta xeinaeyo xua bichocono peyaputae jiwi daxita. ²⁶Axa, baxua exaname necatsita xanepanaexae baxua”, jei Jesús Paxatha.

²⁷Equeicha Jesús namchi pijimonaetha, jeye: “Taxa daxita necata xua pia peitorobi coyenewa tatsi, matautano xua pia peyaputae coyenewa tatsi. Dapon aibi pon xaniwaicha nejüntu cui coyene yaputane. Jame saya meisa Taxa Nacom, nejüntu cui coyene yaputane. Dapon aibi pon Taxa jüntu cui coyene yaputainchi. Saya jame meisa Taxaxae jüntu cui coyene yaputan. Matautano barichi Taxa meisa jüntu coyene yaputainchi pon saya bara copatan xua bara Taxa pejüntu cui coyene yaputaewa tsainchi. ²⁸Anetha xan berena daxita paxam xua tapaca yawenaewa tsainchi. Daxita paxam xua pocotsiwa paca jüntu coyene natsepa exana painya abe neexanae cui ru coyene baxua paca jüntu cui coyene canapuxanaeya yabara jüntemainaechi xua painya nenaafinacaewatsinexa. Equeicha pena jüntu coyene paca cana exanaechi, xua painya nejüntu coyene weiweinaeya jinompaewa tsane. ²⁹Pana necui coyene xeinare tacuidubi coyene painya nenacuidubinexam tsane yawa painya neyawenaenexa tsane xua painya necuidubiwa tsane ichamona. Baxuan paexande tsipei xan jopa bapana jüntu cui coyene anaepanaeya tacuidubin jiwi. Matauta bapana jopa tajüntu cui coyene atsacaein. Matautano jopa pajüntu coyene deideijeya jinompaem tsane. Saya jame xanepanaeya painompaename tsipei paexanaename tacuidubi cui coyenein. ³⁰Barapo tacuidubi cui coyenewan jopa ayapubeyo painya jüntu cui coyenetha. Bara paca itacupa xua painya neexanaewa tsane barapo tacuidubi cui coyenewan”, jei Jesús.

Meje yabara poxonae Jesús pijimonaetha tatsi yaboto nota trigo xu judiomonaetha barompaya pia pentaquei seicaetha tatsi
(Mr 2.23-28; Lc 6.1-5)

12 ¹Caentacabi poxonae judiomonaetha barompaya pia pentaquei seicaetha matabitha tatsi barapo mataqueitha Jesús iru pijimonaetha tatsino pabi iyiya. Jesús pijimonaetha tatsi jainpa. Barapomonaetha tamropata notarucupa xua yaboto xunumenapona trigo xu, bapoxonae pecobetha xu mata pepeta yawa xu xane. ²Poxonae fariseomonaetha cui tane xua Jesús pijimonaetha tatsi exana, bapoxonae barapomonaetha Jesús tsipaebatsi, jeye:

—Jamaisa jinya jiwimonaetha nacuita barapo matabithe poxonae yaboto nota trigo xu. Apará jiwi jopa yabara copatichi xua penacuichiwa po mataqueithe xua judiomonaetha barompaya pia pentaquei seicaetha matabitha tatsi, jei fariseomonaetha. ³Jesús jume nota, jeye:

—Barapo tajiwiwimonaetha jopa apará abe exanaeyo. Jopa payabara yorobim pocotsiwa bayatha David exana poxonae jainpa, poxonae iru pijimonaetha

tajainpatsirũ. Bapon David, pon caena bayatha israelmonae itorobiya pia pepa Peewatsinchi. ⁴Bapon David irũ pijimonae tatsi barapomonae Nacom pin pia botha tatsi jojoniya. David xane pan, po pan ichamonae cana exana xua Nacomtha pecatsiwatsi. Irũ barapo pan David pijimonae cata xua pexaenexarũ. Barapomonae xane bequein bara Nacom pia peitorobi coyenewatha copata xua saya meisa sacerdotemonae itacũpatsi xua pexaewa tsane barapo pan. ⁵Matautano bequein payabara yorobame Moisés pia peitorobi coyenewatha ichaxota jei: ‘Sacerdotemonae piwi nacuita judiomonae barompaya pia pentaquei seicae matakabitha tatsi poxonae Nacom pin pia botha tatsi duwei tauta xua petuxusi exanaenexa Nacom nexa’, jei. Aparã barapo coyene jopa peabe coyenewiyo. Jiwi bara copata. Jopa cui matawentsiyo bequein bara barapo judiomonae barompaya pia pentaquei seicae matakabitha tatsi exana taetha. ⁶Ichitha paca tsipaebatsi xua nama taayapusũ itorobi coyenewa ainya cui beyacaincha Moisés pia peitorobi coyenewan tatsi, xuano beyacaincha barapo coyene po coyene poxonae Nacom pin pia botha exana. ⁷Paxam jopa xanepanaeya payaputaem xua Nacom jei pejume diwesitha: ‘Ichichipan xua painya nexeiaewa tsane nantanuweya peyabara nanta xeinae unthuto xua ichamonae painya neyawenaewa tsane. Baxua jame bichocono ichichipan beyacaincha xua duwei petautsiwa xua petuxusi exanaewa xan nexa’, jei Nacom Pejume Diwesitha. Icha bayatha payaputaetsipame pocotsiwa Nacom Pejume Diwesitha paeba, bapoxonae barapo tamonae jopa abe payabara paebimchipae pomonae bequein bara jopa abe exanaeyo. ⁸Xan ponxaein Nacom Tananeitapetsixae taitorobi coyene xeinan xua jiwi tacoya taitorobiwa pentaquei seicae matakabitha, jei Jesús, fariseomonaetha.

Meje yabara poxonae Jesús cobe wũnae exana pon pecobe mũbinchi
(*Mr 3.1-6; Lc 6.6-11*)

⁹Poxonae Jesús najume weta xua fariseomonae tsipaebatsi, bapoxonae Jesús bara weya natsixitabiya ponataba trigo pabi weya. Bapoxonae pona judiomonae pia penacaetutsi bo tatsi beya, bapoxonaeno joniya barapo botha. ¹⁰Barapo botha pebin eca pon pecobe mũbinchi. Baxotarũ fariseomonae ena. Barapo fariseomonae ichipa piraichi Jesús yainyabatsi xua icha Jesús jume notsina icha jumetha xua bapoxonae Jesús pecui yabara paebinxatsi jiwitha xua Jesús abe exana. Barapo fariseomonae Jesús jeichichi:

—¿Barã Moisés pia peitorobi coyene jumewatha yabara copata jampa xua pon atene bara axaibi peexanaewatsi pentaquei seicae mataqueitha jampa? jei.

¹¹Jesús jume nota, jeye:

—¿Jintam metha pon paxam jiwana, pon xeina cae oveja, xua poxonae jopa jutsipae icha barapo oveja mũthũtha tajoparecatsi?

Apara bara awiya jutsipa pia ovejaxae bara bequein pentaquei seicae matakabi taetha. ¹²Nama apara bichocono jiwi yabara Nacom tsita ainya cuichi beyacaincha xua oveja yabara Nacom tsita ainya cuichi. Daxota Nacom copata xua bara jiwi pexanepanae coyene exaneibina, bara bequein xua poxonae pentaquei seicae matakabintha taetha, jei Jesús fariseomonaetha.

¹³Nexata Jesús barai pontha pon pecobe m̄binchi jeye:

—Nacobe doire, jei.

Poxonae bapon nacobe doita, bapoxonae nainya cobe w̄nae tsanaya icha icha cobe ichi. ¹⁴Bapoxonae fariseomonae Jesús weya ponar̄c̄upa xua Jesús pecui yabara pābinexatsi xua po cui coyenewatha Jesús pebexubiwa tsainchi.

Meje yabara xua Jesús peyabara tsiw̄nae cui pābiwatsi

¹⁵Poxonae Jesús yaputane xua yabara cui pābatsi xua abe exana matautano xua bexubapaebatsi, bapoxonae Jesús bara weya ponataba. Matautano Jesús pinmonaeno puna poinchi. Jesús axaibi exana ducuaenaibiya daxita pomonae peatenewi. ¹⁶Matauta Jesús barapomonaetha itoroba, jei: “Jopa baxua ichamonaetha pana necui yopichinde xua jiwi axaibi taexanaewa”, jei Jesús. ¹⁷Jesús itoroba pomonae xua axaibi peexanaexae xua jopa peyabara cueicueijeinexa tsainchi ichamonaetha. Baxua exana xua penayabara jume cui wetsinexa xua Isaías pejume diwesitha bayatha yabara tsiw̄naeya tina Nacom nexa pon Nacom peitorobi jume pepaebin. Nacom jeye, Jesús yabara:

¹⁸“Bapon apara pon inta nacuita, pon itapetan,
pon bichocono antobein yawa xua nēj̄nt̄u
coyene weiweina exana pon.

Taitorobicaein tajumope t̄nax̄u xua
bapon peyantsiwa tsainchi.

Bapon daxita nacuanpiwitha capona exanaena
tapexeinya jume diwesi pomonaetha pomonae
jopa judiomonae naexanaeyo.

Barapon barapo pexeinya jume diwesi caponaena,
xua pejume cow̄nts̄inexa tsane pomonae poxonae
jume taibina barapo pexeinya jume diwesi xua
bapoxonae barapomonae tayabara j̄nt̄emainena
abe pia peexanae cuiru coyenein tatsi.

¹⁹Matauta bapon jopa jume matsontsonobeibi tsane.
Bapon jopa namtsebiya wawai tsaibi tsane namtotha
xua jiwi bapon pejume taenexa tsaibi tsainchi, xua
bapon pejume naitaewatsinexa tsaibi tsainchi.

²⁰Pomonae jopa pēaj̄nt̄ucoyenes̄wi xua tana nejume

cowũntsiwa, bapon jopa bebai tsaibi tsane.
 Barapomonaē capanenebiya tsainchi.
 Matautano pijimonaē tatsi poxonaē jũntũ
 coyene faefaenena, jopa anaya jutebi tsane.
 Bara bapon yawenaena barapomonaē.
 Bapon baxua exanaena xua pijimonaē
 yayawenaponaena beya tsane xua cui
 amanayabina pia peaitaetaibi jiwichi.
 21 Matauta daxita nacuanpiwi jiwanamonaē
 pomonaē jopa judiomonaē naexanaeyo barapomonaē
 bapon wũnaē ewatatsi xua bara bapon
 barapomonaē pecapanenebiwa tsainchi Nacom
 beicha”, jei Nacom Jesús yabara Isaías pejume
 diwesitha.

**Meje yabara poxonaē Jesús baraichi xua pinae xeina
 Beelzebú pia peayapusũ itorobi coyenewa tatsi
 (Mr 3.20-30; Lc 11.14-23; 12.10)**

22 Bapoxonaē jiwi Jesús tacapatũtsi pebin pon muxusipana exainchi
 cauri, matautano xua itata nacũta exainchino. Bapon Jesús axaibi
 exana. Bapoxonaē pebin muxu nasaba, beta necota, matautano paebano.
 23 Daxita pomonaē cui tane baxua, pocotsiwa Jesús exana, daxita
 barapomonaē yabara najũntũ coyene benaecaeya najei: “Jina, ¿bapon
 apara David pia pemomoxi susato jiwi jiwanapin tatsi jampa, pon Nacom
 yabara wũnaē tsiwũnaeya paeba xua pinae patopeicaena jampa?” jei.
 24 Poxonaē baxua fariseomonaē jume tane, jeye: “Bapon caurimonaē
 itawetatsi apara pexeinaexae Beelzebú pia peayapusũ itorobi coyenewa
 tatsi pon caurimonaē pia pe ntaaponaein tatsi”, jei fariseomonaē.
 25 Jesús yaputane xua fariseomonaē nanta xeina poxonaē natsipaeba
 baxua, daxota jei fariseomonaetha: “Icha cae nacuapiwi nawepu tsatabe
 matauta nababe, bapoxonaē jopa xaexaenaecaeyo. Matauta irũrũ icha
 cae tomarapiwi nababe, bapoxonaē jopa xapain jinompaeyo barapo
 tomarapiwi. Matauta irũrũ icha cae bo matabũxũyomonaēbe nababe,
 yawa nawepu tsatajopabe bapoxonaē jopa xaexaenaecaeyo. 26 Barichi
 icha Satanás pijimonaē tatsi nawepu tsatajopabe, matautano nababe,
 bapoxonaē jopa xaexaenaecaeyo. Satanás jopa itacũpaetsi xua itoroba
 pijimonaē, tsipei amsiya exana. 27 Paxam pana neyabara jam: ‘Apara
 bapon itaweta cauri tsipei bapon xeina Beelzebú pia peayapusũ itorobi
 coyenewa tatsi, pon Beelzebú caurimonaē pia pentacaponaein tatsi’,
 pana neyabara jam. Icha baxua bara xainyei, ¿nexata eta po peayapusũ
 itorobi coyeneya tatsi painyamonaē itaweta cauri? ¿Irũrũ barapomonaē

itaweta cauri Beelzebú pia peayapusú itorobi coyenewatha tatsi? Daxota painyamonae paca yaputane xua apara paxam panaerabame. ²⁸Ichitha nama xan cauri itawetan Nacom pia pejumope tñaxú tatsi pia peayapusú itorobi coyenewatha tatsi, xua barapo pejumope tñaxú tana necatsixae pia peayapusú itorobi coyenewa. Baxua apara paca tsipaebatsi painya neyaputaenexa xua painya xantha patopan ponxaein Nacom Tananeitapetsin.

²⁹“Dapon aibi pon itacupatsi xua botha joniya po botha pon bichocono maxú daunwei pia bo tatsi xua daxita penotsiwa tsane pocotsiwa bapon xeina pon maxú daunwei, icha jopa copiya matha maxú cñtanotsiyo. Barapocotsi jñta coyeneya ichin. Xan cui amanayaban Satanás daxota neitacupa xua torotsiya itawetan bapon pijimonae tatsi pomonae caurimonae.

³⁰“Pomonae jopa neyawenaeyo, barapomonae apara inta abe exana. Barapomonae exana xua ichamonae jopa tana nejume cowñtsiwa tsane. Barapomonae jopa yawenaeyo xua ichamonae nenacaetutsina tajiwimonaexae tsane.

³¹“Daxota paca tsipaebatsi xua pocotsiwa jiwi abe peexanae cuiru coyenein exana matautano pocotsiwa xua jiwi abe paeba, barapo coyene Nacom itacupatsi xua yabara jñntemainaena daxita barapo coyenein. Pon abe yabara paeba Nacom pia Pejumope tñaxú tatsi Nacom bapana jopa yabara jñnteminae tsane xua bapon paeba. ³²Matautano xan ponxaein Nacom Tananeitapetsin pon abe neyabara paeba Nacom itacupatsi xua bapon peyabara jñntemainaewatsi pocotsiwa bapon abe neyabara paeba. Ichitha pon nama bichocono abe yabara paeba Nacom pia Pejumope tñaxú tatsi, Nacom jopa bapana yabara jñnteminae tsane bapon, anoxuae matautano xua bexa tsane”, jei Jesús.

**Meje yabara poxonae Jesús yabara cuiduba xua pinae
jiwi yaputane nae penacoichixae
(Lc 6.43-45)**

³³Equeicha Jesús jeye: “Icha nae po nae pexeinya nae bara nacoita po pethei pexeinya thei. Icha nae po nae peabe nae bara nacoita po pethei camatsa thei. Jiwi ba nae yaputane tsipei po nae penacoichixae. ³⁴¡Paxam pomonae bichocono abe peexanaewi pam! Icha jomomonae ichi xua abe exana jiwitha bara paichim, abe paexaname jiwitha. Paxam jopa paca itacupaeyo xua xanepanaeya painya nepaebiwa, tsipei pocotsiwa painya coibototha papaebame barapara baxua painya jñntú coyenetha pacayabara nanta xeiname. ³⁵Pon ba pejñntú coyene xanepanaein bapon ba xua xanepana paeba, tsipei ba pejñntú coyene xeicaein. Pon ba peajñntúcoyenebein bapon ba xua abe paeba tsipei ba peajñntúcoyenebein. ³⁶Ichitha paca tsipaebatsi xua matakabi

patopeicaena po mataqueitha Nacom yabara paebina daxita jiwi penatsicuentiwa abe peexanaexae bapontha. Barapo matacabitha daxita jiwi bewa atene tsane pepaebixae po jumein jopa xanepanaeyo. ³⁷Poxonae Nacom yabara paebina daxita jiwi penatsicuentiwa abe peexanaexae bapontha, Nacom tsanaya tsabina pia pepaebixae jumeintha tsane. Pomonae paxam xanepanaya papaebame ichamonaetha poxonae cataunxuae pajinompame po irathe, Nacom xuya paca yabara jei tsane: ‘Barapomonae bara jopa abe exanaeyo’, paca yabara jei tsane. Paxam pomonae bayatha abe papaebame poxonae cataunxuae pajinompame po irathe Nacom xuya paca yabara jei tsane: ‘Maisa barapomonae abe pepaebiwi’, paca yabara jei tsane”, jei Jesús.

Meje yabara poxonae pomonae peajuntucoyenebe jiwi Jesús cui itorobatsi xua peexanaewa tsane pexeinya petsita itutsi coyenewa
(*Mr 8.12; Lc 11.29-32*)

³⁸Nexata fariseomonae jivanamonae iruru pomonae jiwi pecuidubiwi Moisés pia peitorobi coyene tatsi jivanamonae, daxita barapomonae Jesús cui itorobatsi, jeichichi:

—Pon jiwi Pecuidubim, paichichipan xua pata taewa tsane xua tapana netsita itutsiwam tsane cae jinya pexeinya netsita itutsi coyenewa pocotsiwa Nacom cacatsina pia peayapusu itorobi coyenewatha. Bapoxonae paca jume cowantsinchi, jei.

³⁹Daxita barapomonaetha Jesús barai, jeye:

—Pomonae peajuntucoyenebe jiwi iruru pomonae jopa tana nejume cowantsi jiwi barapomonae necui itoroba xua taexanaewa cae coyenewa tapexeinya tsita itutsi coyenewa. Ichitha jopa tsita itutsin tsane icha tapexeinya tsita itutsi coyenewa. Saya meisa exanaein icha bayatha juta coyene cana ichichi Jonás pon Nacom peitorobi jume pepaebin, pon caena bayatha tupa. ⁴⁰Nacom Jonás itorobatsi Nínive tomarapiwi beya petsipaebinexa Nacom Pejume Diwesi barapomonaetha. Jonás jopa baxua peexanaexae daxota Nacom exana xua Jonás quianaxorecatsi duwein pon pinyo. Bapon barapo pin duwein tsijuntutha eca acoibi po matacabiyobe, matautano acoibi po merawiyobe, beya poxonae equeicha yacabaxotsi xua asu popona. Barichi tsane xan ponxaein Nacom Tananeitapetsin tupaein. Bapoxonae muthutha nebotsina acoibi po matacabiyobe nexa tsane, matautano acoibi po merawiyobe nexa tsane, beya poxonae equeicha Nacom asu juina neexanaena. ⁴¹Matacabi patopeicaena po matacabitha Nacom yabara paebina daxita jiwi peperaxa exanaenexatsi penatsicuentisixae abe peexanaexae. Barapo mataqueitha Nínive tomarapiwi pomonae caena bayatha jinompa barapomonae abeya paca yabara paebina poxonae umenaena Nacom peitabaratha. Baxua exanaena tsipei barapo Nínive tomarapiwi icha juntu coyene xaina Nacomtha

peuraxae xua abe exana caena bayatha poxonae Jonás muxuwetsiya tsipaeba barapomonaetha Nacom pia pexeinya jume diwesi tatsi. Ichitha paxam jopa bara paichim, jopa icha juntu coyene paxeinaem. Nama apara xote uncuanje ponxaein taexanaein po coyenewa pepa peainya cui coyenewa xua tacaponaewa Nacom Pejume Diwesi daxita jiwitha. Bara pocotsi coyenewa toxeinchiya ainya cui coyenewa beyacaincha Jonás po cui coyene exana poxonae Nacom Pejume Diwesi capona Nínive tomarapiwitha. ⁴²Matauta barapo matacabitha tsane petsiriwa, powa caena bayatha tupa, bapowa asiya uncuaena Nacom peitabaratha tatsi. Barapowa pia nacuapiwayo, po nacua pocotsiwa parowa bereca taju bereca eca. Barapowa pia nacuapiwi tatsi itorobiya pia pepa peewatsiwayo. Barapowa yabara cueicueije tsane pomona xua anoxuae jinompa poxonae uncuaena Nacom peitabaratha tatsi. Jei tsane bapowa: ‘Maisa pomona xua jinompa poxonae Mesías popona po irathe deque, barapomona abe bichocono peexanaewi, tsipei ajuntucoyenefaetabiya jume tane pocotsiwa Mesías cuiduba bequein Mesías bichocono peyaputaen’, jei tsane barapowa. Barapowa baxua paebina tsipei bapowa bayatha taju werena pona, pesiwa ponaenexatsi Salomón, pon caena bayatha Israel nacuapiwi itorobiya pia pepa peewatsinchi. Bapowa yaputane xua Salomón bichocono peyaputaen Nacom yabara. Daxota bapowa ichichipa xua pecuidubiwatsi xua Salomón pecuidubinexa Nacom yabara. Nama apara xote uncuanje ponxaein taexanaein pocotsiwa pepa peainya cui coyenewa xua tacuidubin Nacom yabara daxita jiwitha. Barapocotsi coyenewa toxeinchiya ainya cui coyenewa beyacaincha Salomón po cui coyene exana poxonae cuiduba Nacom yabara barapo petsiriwatha, jei Jesús.

**Meje yabara poxonae Jesús yabara paeba cauri
xua caewa nauyata pebintha
(Lc 11.24-26)**

⁴³⁻⁴⁴Equeicha Jesús jeye: “Poxonae pebin wepu poinchi cauri, bapoxonae cauri pona wexotha ichaxota ira tsewa pepoponaenexa tsane baxota. Ichitha poxonae jopa caxinaeyo xua ichaxota pepoponaenexa bapoxonae bapon nabarai: ‘Tha caibeya ponaetsi pebin beya ichaxota bayatha wepu ponan’, jei cauri. Poxonae caibeya pona cauri caxina, pebin caxinatsi xua xanepanaeya popona. ⁴⁵Nexata equeicha cauri pona pebin weya. Pirapaeyo bapon baru patopa siete poyobe cauri pomona bichocono abe beyacaincha bapon pon copiya. Daxita barapo caurimona pebin puna jinompati. Anoxuae bapon nama yatsicaya bichocono abe cana exainchi beyacaincha poxonae copiya abe cana exainchi poxonae saya caein. Barichi tsane caurimona abe cana exanaena pomonaetha pomona anoxuae jinompa, pomonaetha pomona peajuntucoyenebe jiwi, icha barapo caurimona ichi poxonae pebin abe cana exainchi”, jei Jesús.

Meje yabara xua Jesús pena tatsi iruru peyapin jiwi tatsino
(*Mr 3.31-35; Lc 8.19-21*)

⁴⁶Jesús cataunxuae cueicueijeji tsuncuae poxonae beya iru pena tatsi peyapin jiwi tatsino pata. Daxita barapomonaeyobe pesato beya umena bequein ichichipa Jesús baru cueicueijeichi canta pin bicheito. ⁴⁷Ichun Jesús baraichi, jeye:

—Ena, iruru neyapin jiwino pesato beya umena. Bepara bequein cataei, necatsipaebinexa tsane, jei bapon.

⁴⁸Ichitha Jesús jopa bara jume jejeyo, saya jame yainyaba bapontha, jeye:

—¿Jintam powa be taena natsicotanera? ¿Jintam pomonae be tayapin jiwi natsicotanera? jei Jesús bapontha.

Baxua Jesús caunuta pia pecuidubinexa xua peyabara caunutsinexa pomonae pia pepuna jinompaewichi.

⁴⁹Nexata Jesús pijimonae cowai yawa jei jiwitha:

—Pomonae xua cowan apara barapomonae be taena tsicotan matautano iru be tayapin jiwi tsicotanno. ⁵⁰Pomonae xua exana pocotsiwa Taxa Nacom itoroba, pon peitabocotha peecaeinxae, barapomonae be tayapin jiwi tsicotan, matautano iru be tayapixi tsicotanno, matautano iru be taena tsicotanno, jei Jesús.

Meje yabara poxonae Jesús cuiduba jiwi pecayabara
juta pepaebi diwesiyo xua pon peubin yabara
(*Mr 4.1-9; Lc 8.4-8*)

13 ¹Barapo mataqueitha caena Jesús bo weya pona, bapoxonae pucua itapatha ecopa. ²Tsipei pin bicheito nacaetuta Jesustha daxota Jesús jeratha nontabiya yawa tsiwiyo nayana toroya bapoxonae ecoundeca. Daxita barapo pin bicheito taetabo mene itapatha umena.

³Jesús barapo pin bicheito cuiduba pecayabara juta pepaebi diwesintha.

Cae diwesiyotha Jesús namchi, jeye: “Pebin pon peubin pontaba pia ubichi pabitha. ⁴Poxonae pon peubin ubauya, icha xu namtotha xu othopeica. Peyapupunaewi yapata yawa xu xane. ⁵Icha xu, xu othopeica ibowantha ichaxota ira itafafana. Barapoxonae barapo xu caena nainya xu xuwa tsipei jopa tajü xu xuwarecaeyo. ⁶Ichitha poxonae xometo atsa tsina bapoxonae yaboto tsaquiwa yawa tupa tsipei jopa tajü tabü opina xuwarecaeyo. ⁷Icha xu, xu othopeica ichaxota pesoiwan xuwinaena. Barapo xu yaboto nanta capanaba poxoru yawa muxuna xuwina pesoiwan. ⁸Icha xu, xu othopeica ichaxota ira wuna. Poxonae barapo xu, xu xuwa, xu nawunaeta. Icha xun, xu nanacoitapona cien po xu matabuxyobe tsiniya. Icha xun, xu nanacoitapona sesenta po xu matabuxyobe tsiniya. Icha xun, xu nanacoitapona treinta po xu

matabuxuyobe tsiniya. ⁹Ichá pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

**Meje yabara poxonae Jesús namchi xua exua metha
pecayabara juta pepaebi diwesiyo yabara jane, jei**
(Mr 4.10-12; Lc 8.9-10)

¹⁰Nexata Jesús pijimonae imoxoyo caquita umenarucupatsi yawa yainyabatsi, jeichichi:

—¿Eta xua metha jiwitha paebame pecayabara juta pepaebi diwesin? jei Jesús pijimonae tatsi.

¹¹Jesús jume nota barapomonaetha, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawun xeinaewa. Barapo moya peyawun xeinaewa xua jiwi jopa peyaputaewa apara xua Nacom paca cana exana xua painya nepaca itacupaewa xua painya nenaexanaewa Nacom piamonaetha tatsi pam, pomonaetha pamxaem Nacom itorobiya paca ewata. Ichitha jame ichamonaetha pomonaetha jopa nejume cowuntsiyo jopa daichichi. Nacom jopa copatsiyo xua barapomonaetha peyabara yaputaewa baxua. Daxota barapomonaetha cuiduban pecayabara juta pepaebi diwesintha xua Nacom peyabara yaputaenexatsi.

¹²Pon ba be conotha Nacom yabara yaputainchi, Nacom bapontha cana exanaena xua ichawa peyabara yaputaewa tsane beya poxonaetha bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowuntsiwa tsainchi. ¹³Daxota jiwitha paeban pecayabara juta pepaebi diwesintha. Baxua paeban barapomonaetha xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha jopa pia tana nejume copi taibenaewatha tsane. ¹⁴Barapomonaetha baxua exana bayatha petsiwunaetha cui yabara paebixaetsi, xua bayatha Isaías pon Nacom peitorobi jume pepaebin, petsiwunaetha cui yabara paebixae pejume diwesintha pocotsiwa barapomonaetha poxonaetha baxua exanaena. Isaías Mesías nexa jeye barapomonaetha:

‘Xaniwaicha pana nejume taename ichitha jopa bepayaputaem tsane xua jopa painya tana nejume cowuntsinexam tsane.

Pana necui taename ichitha xaniwaicha jopa bepayaputaem tsane xua painya tana necui yabara jume cowuntsinexam tsane.

¹⁵Paxam bichocono paainya unthutotom, xua jopa painya tana neyaputaexae jiwim.

Matautano jopa xanepanaeya pajume taem tsane,

be pomonae penamuxujematsi jiwi pam tsane.

Panaichaquetsiname icha be pomonae peitata

nacutsi jiwi pam tsane.

Baxua paexanaename tsipei jopa bepainya tana

nejume taewam tsane, xua jopa painya

tana nejume cowuntsinexa tsane.

Yawano matauta, baxua paexanaename tsipei

jopa bepainya tana necui taewam tsane xua

jopa painya tana nejume cowuntsinexam tsane.

Matauta baxua paexanaename tsipei jopa bepainya

tana neyaputaewam tsane painya itamaiqueitontha.

Matautano jopa painya neuraxae xua abe

paexaname daxota jopa paca jüntu coyene

xanepana exanaetsi', jei Isaías barapomonaetha

xua Mesías nexa", jei Jesús.

¹⁶Nexata Jesús pijimonaetha jeye: "Paxam pajüntu coyene weiweiname tsipei poxonae pana necui taneme pocotsiwa exanan bapoxonae pana necui yaputaneme. Matautano pajüntu coyene weiweiname tsipei poxonae pana nejume taneme pocotsiwa paeban bapoxonae pana nejume cowuntame. ¹⁷Xaniwaicha paca tsipaebatsi pin bicheitomonae, pomonae Nacom peitorobi jume pepaebiwi, matautano iruru pomonae pejüntu coyene xeicae jiwi, pomonae caena bayatha jinompa barapomonaewunaewata xua tapatopeicaewa. Daxita barapomona bequein bichocono betaena pocotsiwa pana necui taneme, daichitha jopa baxua taeyo. Matautano bequein bejume taena pocotsiwa pana nejume taneme daichitha baxuan jopa nejume taeyo", jei Jesús.

Meje yabara poxonae Jesús pijimonae muxu yaputane exana po diwesi

xua pecayabara jüta pepaebi diwesiyo pon peubin yabara

(Mr 4.13-20; Lc 8.11-15)

¹⁸Equeicha Jesús jeye: "Pajume taema xua paca tsipaebatsi pecayabara jüta pepaebi diwesiyo xua pon peubin yabara: ¹⁹Pomonae bequein jume tane po pecuidubi coyenewa xua Nacom tamropata pitaba xua ewatsiya itoroba jiwi, barapomona daichitha jopa yaputaeyo barapo coyenewa. Daxota barapomona jopa xanepanaya exanaeyo icha be pocotsi jüta coyeneya ichi xua pexuton xua po xuton namto othopeica. Bara jüta coyeneya cana ichichi pomonae jopa yaputaeyo tacuidubiwa. Caurimona pia pentacaponaein tatsi barapomona omeicha bara jüntu coyene weichichi tacuidubi coyenewa daxota barapomona jopa nejume cowuntsiyo. ²⁰⁻²¹Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi xuano jüntu coyene weiweinaya Nacom jume cowuntatsi. Ichitha bara caeto

jume cowanta poxoru barapomonae antufaetabiya jume jeba Nacom pejume diwesi pejuntũ coyeneintha. Poxonae yaitama barapomonae bichocono peatenexae, matautano poxonae barapomonae yaitama abe petaexanaexaetsi ichamonae xua pejume cowantsixae Nacom, bapoxonae caurimonae abe exana barapomonaetha xua barapomonae juntũ coyene wejuntemaina exanatsi xua Nacom pecayabara jũntemainawatsi.

²²Po xuton xua xu othopa pesoiwantha, barapo xuton caunuta xua pomonae Nacom Pejume Diwesi jume tane ichitha saya barompaya pia juntũ coyenetha jinompa. Matautano saya Ʃ copei cayabara nanta xeina. Matautano saya exana pocotsiwa juntũ coyene weiweina cana exainchi. Po coyene pebiwi exana baxuan barapocotsi jũta coyene exana icha ichi xua po xuton be pesoiwantha xu othopiya. Barapo xuton jopa thei dubenaeyo. Barapocotsi jũta coyeneya ichi barapo jiwi. Jopa xanepanaya Nacom tsita jinompaetsi.

²³Po xuton xua xu othopeica peira wũnaewatha, bara nacoita. Barapo xuton yabara caunuta pomonae jume tane Nacom Pejume Diwesi, matautano jume cowantano poxoru juntũ coyene xanepanaeya jume tane. Matautano beta exana dubenanaebiya beya matapainya jiwi cui tane xua barapomonae bara juntũ coyene xanepana Nacom peitabaratha tatsi. Bapoxonae ichamonae barapomonae jiwana beta yawena ichamonaetha icha barapo xuto ichi xua cien po xu matabũxũyobe tsiniya tsoponae. Matautano ichamonae barapomonae jiwana beta yawena ichamonaetha icha barapo xuto ichi xua sesenta po xu matabũxũyobe tsiniya tsoponae xua jume cowanta. Matautano ichamonae barapomonae jiwana beta yawena ichamonaetha icha barapo xuto ichi xua treinta po xu matabũxũyobe tsiniya tsoponae”, jei Jesús.

Meje yabara poxonae Jesús cuiduba pecayabara jũto pepaebi diwesiyo xua trigo xu yabara xua irũ baxoyo xuwina ayabo xu

²⁴Bapoxonae Jesús equeicha cuiduba jiwi icha pecayabara jũta pepaebi diwesiyo, jeye: “Yabara paca tsipaebatsi po coyene xua Nacom exanaena pon jiwi ewatsiya peitorobixaetsi. Bapon yabara paebina daxita jiwi penatsicuentisixae abe peexanaexae. Barapo coyenewa jũpa, icha be pocotsi coyeneya jũta ichi poxonae pebin ba Ʃbapona pabitha peubi xuton po peubi xuton pexeinya xuton.

²⁵Ichitha poxonae cataunxuae jiwi maitumena, bapoxonae pon pabi pexeinaein pia peitafaetabi jitontsi tapatopatsi pia pabitha tatsi. Bapoxonae bapon ayabo xu taũbarecatsi ichaxoyo Ʃbareca po pexu pexeinya xu. Poxonae nacobe weta xua Ʃba ayabo xu, bapoxonae napitabiya ponataba.

²⁶Poxonae trigo xu yaothopa bapoxonae irũ ayabo xuwina.

²⁷Bapoxonae pon pabi pexeinaein baraichi pomonae pia petanacuichixaetsi: ‘Pata Tanecanamataxeinaem, icha bara metha Ʃbame po xu pexeinya xu, ¿nexata eta werena metha ayabo pona xua xuwa?’ jei.

²⁸Pon pabi pexeinaein jume nota

pomonae pia petanacuichiwiwaetsi jeye: ‘Apara baxua inta exana pon tana neaitafaetabi jiton’, jei. Bapoxonae bapon baraichi pomonae pia petanacuichiwichi, jeye: ‘¿Ichichipame xua pata ponaewa tsane bara beya pata xunaenexa barapo ayabo?’ jei. ²⁹Ichitha bapon jume nota jeye: ‘Bara tsane itompaena tsipei icha barapo ayabo paxunaetsipame payawa xunaetsipame trigo xu. ³⁰Bara saya yawa umenaena barapo ayabo beya abũ poxonae yawa nawetsina trigo xu. Tha nexata bapoxonae itorobichi penacuichiwi xua copiya pexunaenexa barapo ayabo xua pepa cunton peexanaenexa, xua petautsinexa tsane, xua bapoxonae trigo xu pejebinexa tabotha xua trigo xu matabotha’, jei pon pabi pexeinaein”, jei Jesús.

**Meje yabara poxonae Jesús cuiduba pecayabara jũta
pepaebi diwesiyo po peubi xutiyo pewũn mostaza xutiyo
(Mr 4.30-32; Lc 13.18-19)**

³¹⁻³²Equeicha Jesús jiwi cuiduba icha pecayabara jũta pepaebi diwesiyo, jeye: “Nacom waba jiwi xua petanaexanaenexatsi pijimonae tatsi, pomonae itorobiya peewatsixae beya pinmonae tsoponae xua pomonae jume cowũntapona Nacom. Barapo coyene jũpa icha be poxonae pebin ichi poxonae ũbanota pabitha po peubi xuto tsica xutiyo. Barapo xuto xuwa beya pin nae tsoponae. Barapo nae pepinnaexae daxota siri pemaxũranantha coton exana”, jei Jesús.

**Meje yabara poxonae Jesús cuiduba pecayabara jũta pepaebi
diwesiyo xua levadura yabara xua pan cotowa exana
(Lc 13.20-21)**

³³Jesús equeicha cuiduba jiwi icha pecayabara jũta pepaebi diwesiyo, jeye: “Poxonae Nacom waba jiwi petanaexanaenexatsi pijimonae tatsi pomonae itorobiya peewatsixae barapomonae pin bicheitomonae naenaexanapona. Barapo coyene bara jũta ichi, icha levadura matawũn ichi pocotsiwa cotowa exana poxonae pan exana. Petsiriwa tres po tsoropabe trigo xu beno muxuna cauwentaba levadura matawũn pocotsiwa xua cotowa exana pan. Bapoxonae pentũbũ naexananaya cocotowapona tsipei levadura matawũn muxunaxuba”, jei Jesús.

**Meje yabara poxonae Jesús cuiduba jiwi
pecayabara jũta pepaebi diwesixitha
(Mr 4.33-34)**

³⁴Jesús cuiduba jiwi daxita barapo coyenein xua xuan saya ũ pecayabara jũta pepaebi diwesixitha. Jesús jopa cuidubeibiyo poxonae jopa paebeibiyo pecayabara jũta pepaebi diwesixitha. ³⁵Bara barapo coyeneintha Jesús cueicueijeji xua penayabara jume wetsinexa xua

bayatha pon Nacom peitorobi jume pepaebin pecui yabara wunaē tsiwunaeya paebixae, xua jeye:

“Jiwitha tsipaebin pecayabara jūta pepaebi diwesintha. Matautano muxuna yabara tsipaebin pocotsiwa moya yawun xeina xua jiwi jopa peyaputaewa, po coyene caena bayatha moya yawun xeina xua poxonae aena Nacom forota po cae pin nacuathe xua pocotsiwa beya anoxuae tsoponae”, jei bapon xua saya Jesús tapaebatsi.

Meje yabara poxonae Jesús pijimonae yaputane exana po pecayabara jūta pepaebi diwesiyo xua ayabo yabara

³⁶Nexata Jesús napeyaba pin bicheito jiwimonae. Bapoxonae botha joniya. Irū baxota Jesús pijimonae tatsi barapo botha najojoniyarū. Jesús pijimonae baraichi, jeye:

—Yabara pana neyaputane exande po diwesiyo xua ayabo po ayabo xuwa trigo pabitha, jei.

³⁷Nexata Jesús namchi, jeye: “Pon ūba po xuton pexeinya xuton, trigo xuton jan, bapon apara bara xan ponxaein Nacom Tananeitapetsin.

³⁸Matautano po pabitha ichaxota ūba jan, apara jiwi pia juntu coyenein yabara caunutan. Pocotsi xuton xua yabara caunutan xua pexeinya xuton jan, apara yabara caunutan pocotsi jiwimonae xua patsina Nacom pia peitorobi nacua beicha tatsi. Po xuto peabe xuton, po xuton ayabo xu jan, apara yabara caunutan pocotsi jiwimonae caurimonae pia pentacaponaein tatsi pijimonae tatsi. ³⁹Pon ūba po xuton abe xua ayabo xu jan, apara bapon caurimonae pia pentacaponaein tatsi yabara caunutan. Xua bayatha xu naweta jan, apara yabara caunutan, po mataqueitha xua Nacom daxita nacui wetsina. Matautano barapo matacabitha Nacom yabara paebina jiwi penatsicuentisiwa abe peexanaexae bapontha. Pomonae xua trigo xu, xu siraca jan, apara yabara caunutan matatsunpiwimonae. ⁴⁰Copiya matha xuexuetapona ayabo petautsinexa isototha. Jiwi bara jutiya ichainchi po matacabitha tsane Nacom daxita yabara paebina jiwi penatsicuentisiwa abe peexanaexae bapontha. Matautano barapo cae pin nacue weraweracaena. ⁴¹Xan ponxaein Nacom Tananeitapetsin itorobin tamatatsunpiwi xua jiwi penatsinexa tsainchi pomonae abe peexanaewi, pomonae xua cana exana ichamonaetha xua ichamonaē xuya irū abe peexanaenexarū. Barapo matatsunpiwi wenotsina pomonae abe peexanaewi pomonae tajiwiwimonae barū jinompatsi. Barapo abe peexanaewi jopa tamonaeyo pomonae itorobiya taewatsixae. ⁴²Daxita barapo jiwi pomonae abe peexanaewixae bebai tsainchi, matatsunpiwi bebai tsane ichaxota isoto jopa itacounayiyo ataya. Baxota daxita jiwi wecoyei tsane matauta baxota nantanuweya nantu jayabina, poxoru bichocono atene tsane. ⁴³Bapoxonae pomonae exana pocotsiwa Nacom ichichipa

barapomonaē bichocono pexeinya coicha xeinaena po nacuatha ichaxota Nacom itorobiya ewata piamonaē pon barapomonaē pia paxaxae tatsi. Po pexeinya coicha xua barapomonaē xeinaena, bichocono itupana icha be xometo ichi xua poxonaē pentha. Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús.

**Meje yabara poxonaē Jesús pecayabara juta pepaebi
diwesiyo paeba xua po peitupanaewa pocotsiwa bichocono
ainya matoma xua ira baxupanatha boca panatha**

⁴⁴Equeicha Jesús namchi, jeye: “Yabara paca tsipaebatsi po coyene xua Nacom exana, pomonaetha pomonaē pejuntũ coyene canamataxeinaexae pon jiwi itorobiya pia pepa peewatsinchi. Barapo coyene bara juta ichi, icha be pocotsiwa peitupanaewa ichi pocotsiwa ainya matoma xua ira baxupanatha boca pabitha. Poxonaē pebin barapo peitupanaewa jemeicha ira baxupanatha namicha taebota, bichocono tsorobotha matatsaebota, bichocono peichichipaexae baxua. Jopa muxu tsipaebiyō ichamonaetha. Bichocono juntũ coyene weiweina. Bapoxonaē pia botha pona pecaenaetsinexa daxita xua xuan pocotsiwan xeina. Bapoxonaē barapo paratixitha comota barapo pabi, po pabitha boca barapo peitupanaewa. Bewa barichi jiwi. Bewa jiwi bichocono beita cui jichatsi xua pexeinaewanexa tsane barapo peajuntũyapusũwa, icha poxonaē pebin ichi xua pitapeitupanaewatsi piraichi daxita caenaeta pocotsiwan xeina”, jei Jesús.

**Meje yabara poxonaē Jesús cuiduba jiwi pecayabara juta
pepaebi diwesiyo xua po warowa pewun perla**

⁴⁵Equeicha Jesús namchi, jeye: “Barichiru yabara paca tsipaebatsi po coyene xua Nacom exanaena pon jiwi ewatsiya peitorobixaetsi po coyene bichocono wunaē. Barapo coyene bara juta icha be ichi poxonaē jiton warowan matowa jeita. Barapo warowan xua bapon jeita, pewun perla. Bapon jeita pecomotsinexa tsane barapo warowan, po warowan ainya matoman. ⁴⁶Poxonaē bapon cae warowaxuto taebota, po warowaxuto perla matawun xua bichocono ainya matoma, bapoxonaē bapon pia botha pona matauta bapoxonaē caenaeta daxita xua xuan pocotsiwa xeina. Bapoxonaē comota po warowa bichocono ainya matoma, po warowa pewun perla. Bewa barichi jiwi. Bewa jiwi bichocono beita cui jichatsi xua pexeinaenexa peajuntũyapusũwa po peajuntũyapusũwa ataya tsiteca, icha poxonaē pebin ichi xua pitaperlatsi piraichi daxita caenaeta pocotsiwan xeina”, jei Jesús.

**Meje yabara poxonaē Jesús cuiduba jiwi pecayabara juta
pepaebi diwesiyo xua pecayamonaewa yabara**

⁴⁷Equeicha Jesús namchi, jeye: “Yabara paca tsipaebatsi po coyene xua Nacom exana pon jiwi ewatsiya peitorobixaetsi xua poxonaē yabara

paebina jiwi penatsicuentisixae abe peexanaexae. Barapo coyene bara juta ichi, icha be pocotsiwa xua xota jiwi yacamona duwei ichi. Jiwi peyacamonaewa xoya pepa mar mentha xua daxita duweimonaein tunto pecapirenaenexa. ⁴⁸Poxonae bichocono wuncaxuba xua peyacamonaewa pomonae peyaxunubiwi taetabo bejutaboreca. Bapoxonae enoundeca, xua naitaũbiya tsana pejehebaponaenexa. Po duwei pepa duwei tsana naitaũbiya jehebapona corotontha. Po duwei pocotsiwa camatsawan bebai tsoponae. ⁴⁹Barapocotsi juta coyeneya ichi tsane poxonae matacabi patopeicaena, po mataqueitha xua poxonae nacua weraweracaena, matautano Nacom daxita yabara paebina jiwi penatsicuentisixae abe peexanaexae bapontha. Bapo mataqueitha matatsunpiwi patsicaena xua daxita jiwi petsabinexa tsainchi, pomonae abe peexanae cuiru coyenein peexanae jiwi tsana nobinchi xua pomonae xanepanaya peexanae jiwi pia xainya weya tatsi. ⁵⁰Pomonae abe peexanae cuiru coyene peexanae jiwi bebai tsainchi isototha ichaxota jopa ataya itacounayiyo. Baraxota wecoyei tsane matautano baxota nantanuweya nantũ jayabina”, jei Jesús.

Meje yabara poxonae Jesús cuiduba jiwi pecayabara juta pepaebi diwesiyo xua pena peitũpanaewa yawa xua peru peitũpanaewa yabara

⁵¹Nexata Jesús pijimonae yainyaba, jeye:

—¿Bara daxita baxuan payaputaneme xuaunxuae paca tsipaebatsi? jei. Barapomonae Jesús jume notatsi:

—Aa, bara payaputan pocotsiwa xuaunxuae pana netsipaebame pon pata Tanecanamataxeinaemxaem, jei barapomonae.

⁵²Bapoxonae Jesús pijimonaetha namchi, jeye:

—Pomonae pecuidubiwi Nacom pia peitorobi diwesi pomonae tamonaexae barapomonae yabara cuiduba ichamonaetha xua po coyene Nacom exana pon itorobiya peewatsin jiwi. Barapomonae xeina ainya diwesi coyenewabe, po diwesi xua xan yabara, peru diwesi poxonae cataunxuae aibin tsica po cae pin nacuathe tsique yabara. Matautano xeina pena diwesi poxonae xua anoxuae poponan yabara. Barapo ainya diwesi coyenewabe barapomonae paeba jiwitha. Barapomonae bara be juta ichi icha be poxonae pon bo pexeinaein ichi. Poxonae piamonae tatsi nantawenona paparuwa yawa pexaewa, bapon baxua bara cata pijimonaetha, poxoru bapon jeba xua peruwa yawa xua penawa piamonae nexa, jei Jesús.

Meje yabara poxonae Jesús Nazaret tomaratha popona

(Mr 6.1-6; Lc 4.16-30)

⁵³Poxonae Jesús najume weta xua cuiduba jiwi barapo pecayabara juta pepaebi diwesixi bapoxonae Jesús tomara weya pontaba. ⁵⁴Bapoxonae Jesús patopa pia tomaratha, po tomara pewũ Nazaret tomara. Baraxota

Jesús cuiduba jiwi, judiomonae pia penacaetutsi botha tatsi. Pomonae jinompa Nazaret tomaratha yabara najuntũ coyene cabenaeca xua pocotsiwa Jesús cuiduba. Barapomonae natsipaeba, najei:

—¿Exota metha bapon nacuiduba jane, xua daxota bapon daxita peyaputaein? ¿Jintam metha pia peayapusuwatha tatsi jane, poxonae po petsita itutsi coyene bapon exana? ⁵⁵Apara saya bapon pexanto tatsi pon xua pecobe coxonaein xua naepan pematabobiwa. Apara bapon pena tatsi María. Apara bapon Santiago pentapin tatsi, irũ José pentapin tatsi, irũ Simón pentapin tatsi, irũ Judas pentapin tatsitũ irũ. ⁵⁶Matautano irũ pamcho jiwi tatsi apara jinompa barapo tomarathe. ¿Exota metha bapon nacuiduba jane, pocotsiwa xua beta naca cuiduba? jei barapomonae.

⁵⁷Daxota barapomonae Jesús casebatsi pecui uwixaetsi. Barapomonae uwa tsipei Jesús bichocono peyaputaein. Jesús namchi jiwitha, xua nayabara paeba, jeye:

—Daxita jiwi ba barũ cui itura jina pontha pon Nacom peitorobi jume pepaebin. Nama pia nacuapiwi tatsi irũ pia bomonae matabũxũyomonaepiwi tatsi barapomonae ba jopa bapon barũ cui itura jinaetsi, jei Jesús, xua nayabara paeba.

⁵⁸Nazaret tomaratha, barapo tomaratha Jesús saya be conotha exana pexeinya petsita itutsi coyenewan tsipei barapo tomarapiwi Jesús jopa jume cowuntichi.

Meje yabara poxonae Juan bexotsi

(Mr 6.14-29; Lc 9.7-9)

14 ¹Bapoxonae caena Herodes pon Galilea nacuapiwi, pia peyanacua ewatsinchi, bapon jume tane daxita pocotsiwa juinya xua Jesús exana. ²Herodes tsipaeba pomonae petanacuichiwiwaetsi pia botha tatsi, xua Jesús yabara paebatsi. Herodes Jesús catsawiya yabara paebatsi, jeye: “Apara bapon Juan, pon jiw i Pebautisabin, pon bequein bayatha tũpa, pon equeicha asũ juina. Tsipei bapon peayapusũ itorobi coyenewa xeina daxota petsita itutsi coyenewa exana”, jei Herodes.

³Baxua Herodes paeba tsipei caena bayatha Herodes cui itoroba xua Juan pewaetabinoxatsi, matautano xua pemaxũ cubinexatsi, matautano xua jiwi pecũbi botha peetsinexatsi. Baxua Herodes exana tsipei piowa tatsi powa pewũn Herodías, pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabũyo. ⁴Juan bayatha paeba Herodestha, jeye: “Nacom pia peitorobi coyenewa jopa copatsiyo xua nexainaewa bapowa tsipei ichũn piowa tatsi”, jei Juan.

⁵Daxota Herodes bichocono anaepana. Herodes ichichipa xua Juan pebexubiwatsi. Daichitha Herodes jopa baxua exanaeyo tsipei junuwa, jiwi cunuwatsi. Tsipei daxita jiwi nanta xeina xua Juan apara pon Nacom

pia peitorobi jume pepaebin. ⁶Ichitha poxonae Herodes yantacabi jopa po maticabitha poxonae caena bayatha nowaeuncua, barapo mataqueitha pinmonae nacaetuta xua pexaewa yabara nacaetuta pia xaetsi. Barapo penacaetutsiwi peitutha tatsi Herodías pexantiyo tatsi nawiraba. Herodes baxua bichocono ita cui xanepanatsi. ⁷Herodes barapowa beya paeba, jeye:

—Nacom peitutha cata tsiwūnae yabara paebatsi xua pocotsiwa tacacatsiwa tsainchi pocotsiwa xua tana newūcaewam tsane tsipei inta pexeinya penawirabi coyene exaname, jei Herodes.

⁸Bapoxonae pocotsiwa pena itorobatsi barapowa Herodes wūcatsi baxua. Bapowa namchi, jeye:

—Necare Juan pentasipa xua yūtabore paratontha, pon jiwi Pebautisabin matasipa, jei Herodías pexantiyo tatsi.

⁹Ichitha baxua Herodes jume taya wecoyei tsanareca poxoru jopa ichipaeyo xua Juan petūpaewa tsane. Tsipei mexeya poxoru bayatha Nacom peitutha peyabara tsiwūnae paebixae xua bepa pinae catsina xua pocotsiwa pewūcaewaxae tsainchi, matautano mexeya poxoru barapo pin bicheitha peitutha pepaebixae baxua, daxota itoroba xua bapowa bara catinchi baxua. ¹⁰Daxota Herodes pomonae petanacuichiwiwaetsi, barapomonae Herodes cui itoroba xua Juan pewisi ucuibinexatsi jiwi pecūbi botha iya. ¹¹Bapoxonae barapomonae paratontha matasipa yūtabota yawa carendena. Bapoxonae Herodías pexantiyo tatsi catatsi, equeicha barapowayo xuya pena cata, Herodías catatsi, xua peyaputaenexa xua bara cou Juan bayatha tūpa.

¹²Nexata pomonae Juan pia pepuna jinompaewichi, barapomonae pata jiwi pecūbi botha. Juan petūpaein pitatsi. Barapoxonae barapomonae Juan mūthutha xotsi. Barapoxonae barapomonae pona Jesús beya xua baxua Jesús peyabara tsipaebinxatsi.

Meje yabara poxonae Jesús apata pexaewa cinco mil pebiwi

(Mr 6.30-44; Lc 9.10-17; Jn 6.1-14)

¹³Poxonae Jesús yaputane xua Juan tūpa, bapoxonae compa jeratha pona icha muxunene beya ichaxota jiwi ajibi. Ichitha jiwi yaputane xua ichaxota Jesús pona. Daxota pinmonae xua carepaya tomaranpiwi pecae iya pona, ichaxota Jesús ponaena jeratha. ¹⁴Poxonae Jesús jera wenontounya, bapoxonae Jesús pin bicheito tane. Jesús yabara nanta xeina barapomonae xua peyawenaewa tsane. Bapoxonae Jesús axaibi exana peatenewi. ¹⁵Tsipei yaitama bayatha tabopiya tsanaichaba, daxota Jesús imoxoyo caquita umenarūcupatsi pijimonae. Barapomonae Jesús baraichichi, jeye:

—Apara bayatha tabopiya tsanaicha. Apara xote bomūxūn ajibi. Barapo jiwi itorobare bū tsiqui tomaraxi beya ponaena xua pecomocaenexa pexaewa xua pexaenexa, jei.

¹⁶ Jesús jume nota pijimonae, jeye:

—Apara jopa bewa ponae barapomonae, paxam jame maisa paapare pexaewa, jei.

¹⁷ Jesús jume notatsi pijimonae, jeye:

—Xote jopa pexaewa paxeinaeinyo. Saya apara cinco po panyobe paxeinan matauta saya ainyobe paxeinan duweiyobe, jei.

¹⁸ Jesús jume nota:

—Painta xawena baxua, jei. ¹⁹ Bapoxonae Jesús najume caitoroba xua bepa daxita barapo jiwi iratha taenaetsei. Bapoxonae Jesús pecobetha pita cinco po panyobe yawa xua barapo duweiyobe xua ainyobe. Jesús peitaboco benecoicha yawa Nacomtha tsipaeba, jeye: “Axa, j̄nt̄u coyene weiweinan xua pexaewa pata tanecatsiwaxaem”, jei. Poxonae Jesús najume weta xua Paxatha tsipaeba, bapoxonae pan epa janaca, yawano duwei epa janaqueba. Bapoxonae Jesús pijimonae caitoroba pexaewa xua pijimonae tatsi xuya pecacataponaenexa barapo jiwi. ²⁰ Daxita barapo jiwi nabane beya barapo jiwi jain cowuntarucupatsi. Bapoxonae Jesús pijimonae tatsi doce po cote matabuxuyobe wunba xua bayatha nacopaba pocotsiwa xua bayatha barapo jiwi jopa xaeyo petonsanaexae. ²¹ Pomonae xua pexaewa nabane barapomonae cinco mil pebiwi. Yabuxino ir̄u nanabane. Matautano pexuino ir̄u nabane. Daichitha jopa ununaetsi pexui matauta yabuxi jopa ununaetsi.

Meje yabara poxonae Jesús mene matatsun jumatha pona

(*Mr 6.45-52; Jn 6.16-21*)

²² Nexata bapoxonae Jesús jera beitorobiya pijimonae, xua pijimonae copiya petsiwana warapaenexa tsainchi icha muxunene beya xua pucua iya. Poxonae barapomonae ponarucupaba bapoxonae Jesús barapo jiwi pu itoroba xua penawibiyaenexa pia tomaran beya. ²³ Bapoxonae Jesús demxuwa beicha pona xua baxota compa petsipaebinexa Nacomtha. Poxonae quirei tsuxubi Jesús demxuwatha compa eca. ²⁴ Poxonae Jesús Paxa tsipaebauya, bapoxonae caena ir̄u Jesús pijimonae tatsi cataunxuae tuwutha yana pona. Jera maratsaca caewa carena tsaibi tsipei joibo dawerena daunwei. ²⁵ Mataquei wunaeyo Jesús mene matatsun jumatha pona, pijimonae itiya pona. ²⁶ Poxonae Jesús pijimonae taerucupatsi, barapomonae nanthuthu cui coyene nabenaeca. Junuwiya wawaya jeye:

—iPai jaibo, jina! iApara dowatsi! jei barapomonae.

²⁷ Jesús pijimonaetha caena nainya tsipaeba, jeye:

—iApara xan! iJopa pajunuwindel! iMaisa paj̄nt̄u coyene weiweinarel! jei Jesús.

²⁸ Bapoxonae nexata Pedro Jesús baraichichi, jeye:

—Tanecanamataxeinaem, icha bara metha xam yatsicaewa bapom, moya neitorobare xua mene matatsun juma ta-iyaeenexa nexainya beya, jei Pedro.

²⁹ Jesús jume nota, jeye:

—iMoya anetha denande! jei Jesús.

Nexata Pedro mene matatsun juma nontabiya dunareca jera wereca. Bara Pedro mene matatsun juma iya pona pepatopaenexa Jesús pia xainya beya tatsi. ³⁰Daichitha poxonae Pedro yabara nanta xeinanareca pin joibo, bapoxonae bichocono junuwanareca. Daxota bapoxonae Pedro yamene jopareca. Bapoxonae Pedro jume daunweya wawaya jeye:

—iTanecanamataxeinaem, necapanepare, nepitaxuina! jei.

³¹Bapoxonae Jesús nainya cobe pitaxuina. Jesús namchi, jeye:

—iMaise be conotha neyabara jume cowantame xua bara tana neitacupaewa xua tacayawenaewa tsainchi! ¿Eta xua metha ainya juntu coyeneintha nanta xeiname? jei Jesús.

³²Poxonae Jesús iru Pedro nontabiyabe jeratha, Jesús bapoxonae joibo yainjei tsanaya exana. ³³Daxita pomonaе jeratha ena, barapomonaе Jesús wunaе jaintatsi. Barapomonaе Jesús baraichi, jeye:

—Bara yatsicaya apara xam Nacom Pexantom tatsim, jei barapomonaе.

**Meje yabara poxonae Jesús axaibi exana pomonaе
peatenewi, pomonaе Genesaret nacuapiwi
(Mr 6.53-56)**

³⁴Bapoxonae Jesús iru pijimonaе tatsi jeratha yana enapona beya poxonaе Genesaret nacua beya pata. ³⁵Pomonaе baxota jinompa, barapomonaе Jesús caena yaitainchi. Daxota barapomonaе najume caitoroba ichamonaetha daxita barapo Genesaret nacuapiwitha beya, xua Jesús pepatopaexae. Bapoxonaе daxita jiwi carendena peatenewi ichaxota Jesús pucua itapatha uncua. ³⁶Barapomonaе pomonaе peatenewi Jesús jume daunweya wucatsi, xua Jesús bara pecui copatsinexa xua bara petajayabinexatsi pia paparuwa tatsi xua peopirawa. Bapoxonaе daxita barapomonaе axaibi tsane. Pomonaе Jesús pia paparuwa tajayabatsi daxita barapomonaе equeicha axaibi exanatsi pocotsiwa bayatha atene.

**Meje yabara poxonae Jesús yabara paeba xua pebin abe
pia peexanae cuiru coyene juntu coyene webocatsi
(Mr 7.1-23)**

15 ¹Fariseomonaе iru pomonaе jiwi pecuidubiwi Moisés pia peitorobi coyene tatsi, barapomonaе jiwana Jerusalén tomara werendena. Barapomonaе Jesús imoxoyo caquita umenarucupiya yainyabatsi, jeye:

²—¿Eta xua metha jinyamonaе jopa exanaeyo xua pocotsiwa wamo susato jiwi pia peitorobi cui coyenewatha itoroba? Barapomonaе pomonaе jinyamonaе barapo cui jopa exanaeyo. Barapomonaе jopa matha tsiwanaya nacobe quiateibiyo poxonaе beya xaiba xua jopa penataxobinexa tsane pia juntu coyenewantha, jei daxita fariseomonaе, iruru pomonaе jiwi pecuidubiwi Moisés pia peitorobi coyene tatsi.

³Nexata Jesús xuya yainyaba, jeye:

—Iruru paxamdũ, ¿eta xua metha jopa paexanaem pocotsiwa Nacom Pejume Diwesitha itoroba? ¿Eta xua metha saya meisa paexaname pocotsiwa painya amo susato jiwi pia peitorobi cui coyenewantha tatsi itoroba? ⁴Jopa bewa paexanaem tsane painya amo susato jiwi pia peitorobi coyenewa tatsi po peitorobi coyenewa paca tsita ainya cui bichocono beyacaincha xua Nacom Pejume Diwesi. Tsipei Nacom Pejume Diwesitha jeye: ‘Axatha baru cui itura jinare, iruru enatha baru cui itura jinare’, jei Nacom. Yawa equeicha Nacom jeye: ‘Pon paxa abe yabara paeba matautano xua pena abe yabara paeba, bapon bewa tupaena’, jei Nacom Pejume Diwesitha. ⁵⁻⁶Ichitha paxam ba papaebame xua pinae pebin ba itacupatsi xua pepaebiwa xua pejeiwa paxatha yawa penatha: ‘Jopa neitacupaeyo xua tapaca cayawenaewatsi bara bequein paacopeibim, tsipei daxita pocotsiwa xeinan baxua yabara tsiwuna paeban xua Nacomtha hexa catsin’, xua pejeiwa. Matautano ba pajam: ‘Pon bapocotsiwa paeba, jopa nantawenonaeyo xua paxa yawenaena. Matauta jopa nantawenonaeyo xua pena yawenaena bara bequein acopeibi taetha’, ba pajam. Poxonae baxua pacaunutsiya paebame paxam pacana exaname xua painya amo susato jiwi pia peitorobi cui coyenewa tatsi bichocono ainya cui coyene, beyacaincha xua Nacom Pejume Diwesi xua ainya cui coyene. ⁷Itara mexeya pomonae xanepanaeya pepaebi jiwi pam, daichitha apara peajuntucoyenebe jiwi pam! Bara apara Isafas caena bayatha xaniwaicha paca yabara paeba pon Nacom peitorobi jume pepaebin. Bapon paca yabara jeye poxonae tina pejume diwesitha:

⁸ ‘Barapomonae itara be xanepanaeya neyabara
paebina jiwitha xua pinae neyabara
baru cui itura jina.

Daichitha barapomonae pia juntu
coyewatha jopa xaniwaicha neyabara
baru cui itura jinae tsane.

⁹ Bequein barapomonae newuna jainteibina
poxonae nacaetuteibina, daichitha baxua jopa
yawena tsaibi tsainchi tsipei barapomonae
peajuntucoyenebewi.

Matautano tsipei po peitorobi coyenewa
cuidubina jiwitha, apara jopa taitorobi
coyewiyo tsane, apara xua saya jiwi
barompaya pia peitorobi coyenewa tatsi tsane’,
jei Isafas xua paca yabara paeba, jei Jesús.

¹⁰Nexata bapoxonae Jesús waba daxita jiwi xua imoxoyo
peumendenaenexa. Yawa namchi barapo jiwitha, jeye:

—Pana nejume naitaeware, painya neyaputaenexa pocotsiwa paca
tsipaebatsi. ¹¹Pocotsiwa ba pebin pecoiboto deca tsijain jojonecatsi

pexaewan, bequein jopa tsiwunaeya matha nacobe quiatsiyo poxonaе xaiba, barapo coyene apara ba jopa bapana pebin juntu coyene taxobichi xua poxonaе pocotsiwa pexaexae. Jame pocotsiwa ba pebin pecoibotha caunuta, xua peabe jume barapo jume coyene apara pebin juntu coyene taxobatsi xua poxonaе pecueicueijeixae baxua, jei Jesús.

¹²Nexata Jesús imoxoyo caquita umenarucupatsi pijimonae. Jesús pijimonae yainyabatsi, jeichichi:

—¿Bara yaputaneme xua fariseomonaе cayabara muxu coniquiya anaepana, xua nepaebixae baxuan? jei.

¹³Jesús jume nota pijimonae, jeye:

—Taxa pon peitabocotha peccaexae xubina pon jopa pejume cowantsinchi. Taxa barapocotsi juta coyeneya cana ichi tsane jiwitha icha pebin ichi xua poxonaе pabitha pona, matauta poxonaе naeyo tabu opina jonta daxita, pexubinexa. ¹⁴Bara barabu neyabara muxuconacaena, fariseomonaе. Jopa payabara jume naitaewatsinde pocotsiwa barapomonaе paeba. Tsipei barapomonaе jopa xanepanaya peyawenaе jiwi ichamonaetha. Barapomonaе barapocotsi juta coyeneya exana, icha be pon peitata nacutsin ichi, xua poxonaе matakapona ichun xua pon peitata nacutsin matakapoinchi. Bapoxonaе barapo cae peitata nacutsinbe napuna joparecabe muthutha deca, jei Jesús.

¹⁵Nexata Pedro Jesús baraichi, jeye:

—Yabara pana yaputane exande po pecayabara juta pepaebi diwesiyo xua pexaewa yabara, jei Pedro.

¹⁶Jesús biataeya jume nota pijimonae, jeye:

—¿Paxam bara paichimdu icha jiwi ichi? ¿Cataunxuae jopa painya yaputae jiwi pamdu? ¹⁷Bayatha paxam payaputaneme pocotsiwa pebin tsjain jojonecatsi pexaewa pecoiboto deca baraxua jopa juntu coyene taxobichi, tsipei barapo pexaewa jopa ponaeyo pia juntu coyenewatha. Jame barapo pexaewa pecotsorotha pona, bapoxonaе nawexacaeca. ¹⁸Ichitha pocotsiwa pecoiboto tsina caunuta peabe jume, baxua apara seicaya pejuntu coyene wetsina jume pichapa. Tsipei baxua penanta xeinae coyenewa, daxota pebin abeya paeba. Daxota Nacom tsitatsi xua bapon peajuntucoicyenebein Nacomtha. ¹⁹Tsipei pejuntu coyene wetsina jume pichapa pocotsiwa abeya penanta xeinae coyenewan, pocotsiwe meje: Ichun anaya pebexotsi coyenewa, iru ichun piseuri tatsi pepichi coyene, iru peita coxanae coyenewatsi coyene xua poxonaе penayaputae jiwi naperu nacyoba, iru ichun piawa tatsi pecaibi coyene, iru ichun yabara penaerabiwatsi coyene, iru ichun yabara peabiwatsi coyene. ²⁰Nacom tsitatsi xua daxita barapocotsi coyenein pebin ajuntucoyenebe exanatsi xua juntu coyene taxobatsi xua daxota jopa itacupaetsi xua beta exana. Ichitha pocotsiwa pebin nabane matautano xua poxonaе bequein tsiwanaya matha jopa nacobe quiatsiyo, barapocotsi coyenein pebin jopa juntu coyene taxobichi Nacom peitutha tatsi, jei Jesús.

**Meje yabara poxonaē yabũyo powayo penanapaincha
poponaewayo Jesús jume cowũntatsi
(Mr 7.24-30)**

²¹Nexata bapoxonaē Jesús barapo ira weya warapa Genesaret nacua weya. Mataũtano pona icha nacua beya po nacuatha ichaxota Tiro tomara eca yawa Sidón tomara ecano. ²²Yabũyo, powayo barapo cananeamonaewayo patopa Jesús pia xantha tatsi. Bapoxonaē barapowa wawaya Jesustha jeye:

—iTanecanamataxeinaem, David pia pemomoxi susato jiwi jiwanam! Neyabara najũntũ cui coyene cananta xeinare, xua tana neyawenaenexam tsane. Taxantiyo inta cauri xeina; inta bichocono atene exanatsi, jei bapowa.

²³Daichitha Jesús jopa jume notsiyo, saya moya uncuā. Nexata bapoxonaē Jesús imoxoyo caquita umenarũcũpatsi pijimonaē. Mataũtano jume daunweya baraichichi pijimonaē, jeye:

—Barapowa itawere, tsipei barapowa waputha jume daunweya wawai, jei.

²⁴Nexata Jesús jume nota pijimonaē, jeye:

—Nacom meisa saya neitoroba Israel piamonaē susato saineiwitha pomonaē judiomonaē xua tayawenaenexa barapomonaē, tsipei barapomonaē Nacom tsitatsi xua barapomonaē nacabeta icha be ovejan ichi xua poxonaē pipato napuxanompa, jei.

²⁵Ichitha barapowa pentabocotha uncuā yawa irabe taeuncuareca Jesús peitabaratha tatsi tsipei bapowa barũ cui itura jina peuraxae, yaitama tsipei Jesús pon jiwi pepa Pecanamataxeinaein. Bapowa namchi, jeye:

—iPon Tanecanamataxeinaem, neyawende! jei.

²⁶Jesús jume nota barapowa, jeye:

—Jopa xanepanaeyo icha matha cayawenatsi powayo nenanapaincha poponaewayom poxonaē cataunxuae matha jopa yawenaeyo pepa tamonaē judiomonaē. Icha baxua exanaetsipan, bapoxonaē be pitan pexui pia pexaewa taapatsinexa aurimonaē, jei.

²⁷Barapowa Jesús jume notatsi, jeye:

—Aa, bara barichi xuaunxuae netsipaebame ponxaem Tanecanamataxeinaem. Jopa bewa auri catsibi pexui pia pexaewa tatsi, yaitama auri irũ xane pocotsiwa pexui sorobaba barapo pepũrũwixi pocotsiwa pexaethopaewa pebũxũpana tsica. Daxota bara ichiya neichinde: Neyawende, tsipei bara neyapusũ itorobi coyenewa nawita xeiname jinya axaibi exanaenexa judiomonaē. Po neyapusũ itorobi coyenewa judiomonaē jopa canantawenonaeyo barapo neyapusũ itorobi coyenewatha inta axaibi exande taxantiyo, jei.

²⁸Nexata Jesús jume nota, jeye:

—iYabũyo, maisa bichocono neyabara jume cowũntame xua bara tana neitacupaewa xua tacayawenaewatsi tsainchi! Bara cata exainchi pocotsiwa aunxuae newũcame, jei Jesús.

Poxonae Jesús baxua paeba, bapoxonae nainya barapo yabũyo pexantiyo tatsi taaxaibi tsuxubichi.

Meje yabara poxonae Jesús axaibi exana pin bicheitomonae peatenewi

²⁹Nexata bapoxonae Jesús bara weya pona. Galilea pucua itapa iya pona. Bapoxonae demxuwa icha juinya, baxota ecopa. ³⁰Ichaxota Jesús eca baxota pin bicheito jiwi ayei pata. Barapo bicheito jiwi carendena pejayujayujeiwi, irũ peitata nacutsi jiwino, irũ pemuxusipanaewino, mataũta pomonae irũ peacowaebi jiwi xua pomonae jopa xeinaeyo xua xota nacowaeba. Mataũtano irũ icha bicheitomonaeno, pomonae peatenewi. Pomonae peatenewi Jesús pexainya tajebarecatsi. Daxita barapomonae Jesús axaibi exana. ³¹Poxonae daxita jiwi baxua cui tane, pomonae jopa judiomonae naexanaeyo daxita barapo jiwi yabara cui coyene nanthũthũ cabenaeca. Bapoxonae Jesús xanepanaya peexanaexae, barapomonae Nacom wũnae jaintatsi, po Nacom Israel nacuapiwi pia Nacom tatsi. Daxota barapomonae baxua exana, tsipei Jesús equeicha paeba cana exanaeya exana pomonae pemuxusipanaewi. Mataũta tsipei Jesús taduba exana pomonae bayatha jopa xeinaeyo xua xota nacowaeba. Mataũtano tsipei pomonae pejayujayujei jiwi equeicha beta pona. Mataũtano tsipei pomonae peitata nacutsi jiwi equeicha beta tane.

**Meje yabara poxonae Jesús pexaewa apata cuatro mil pebiwi
(Mr 8.1-10)**

³²Nexata Jesús waba pijimonae, jeye:

—Yabara cui cananta xeinan barapo pin bicheitomonae tayawenaenexa, tsipei barapomonae acoibi po matababiyobe jinompa taxantha, maisa ajibi xua barapomonae penabanaewa tsane. Jopa jainbotha bepu itorobinyo pia bon beya tatsi, tsipei icha barapomonae jainbotha pu itorobichipan, metha piyain namtotha xuirabathopaetsipa, jei Jesús.

³³Jesús baraichi pijimonae, jeye:

—Xote ira xuepana susato tsurucuae nacua ichaxota jiwi ajibi. ¿Eta beya tsijeitinchi pexaewa barapomonae pomonae pinmonaexae? jei.

³⁴Jesús yainyaba pijimonae jeye:

—¿Eta po panyobe paxeiname? jei.

Barapomonae Jesús jume notatsi, jeye:

—Siete po panyobe paxeinan yawa be conothano duweixi, poxi tsiquirixi, jei.

³⁵Nexata Jesús pijimonae najume caitoroba xua bepa pinae barapo pin bicheito jiwi iratha taenaetsei. ³⁶Jesús pecobetha pita barapo siete panyobe yawa duweixino. Bapoxonae Jesús Paxatha tsipaeba: “Axa, jüntu coyene weiweinan xua pexaewa pata tanecatsiwaxaem”, jei Jesús. Bapoxonae Jesús pijimonae tsicobe epa nantarubiya jajanaquiya catsibapona xua xuya pijimonae tatsi pecatsibaponaenexa barapo jiwitha. ³⁷Daxita barapomonae nabane, beya barapomonae bichocono jain cowuntarucupatsi. Bapoxonae Jesús pijimonae tatsi siete po cotebe wunba pocotsiwa xua barapo jiwi jopa xaeyo petonsanaexae. ³⁸Pomonae xua nabane pexaewa barapomonae cuatro mil pebiwi. Matautano iru yabuxi nanabane matautano iru pexui nanabane, daichitha daxita jopa ununaeyo. ³⁹Bapoxonae Jesús pu itoroba xua barapo jiwi penawibiyaenexa pia tomaran beya. Bapoxonae Jesús jeratha nontabiya, peponaenexa Magadán nacua beya.

Meje yabara poxonae fariseomonae iru saduceomonae Jesús cui itorobatsi pia pexeinya petsita itutsi coyene xua peitabocotha
(Mr 8.11-13; Lc 12.54-56)

16 ¹Fariseomonae iru saduceomonae, barapomonae pona Jesús beya xua Jesús pejüntu coyene jujutsinexatsi. Barapomonae Jesús cui itorobatsi pia petsita itutsi coyenewa pocotsi coyenewa xua cana exana itaboco wetsica. Icha Jesús jopa itacupaetsi xua exana baxua, barapomonae pepaebinexa tsane xua deta cou Jesús jopa apara Nacom Pexanto tatsi. ²Daichitha Jesús jume nota barapomonaetha, jeye: “Poxonae tabopiya paxam ba pajam: ‘Baya tsane pexeinya matabi tsane tsipei anoxuae quiripitha itaboco tsobia’, ba pajam. ³Ichacuitha tsipae poxonae baya, paxam ba pajam: ‘Anoxuae ema duneicaena tsipei itaboco tsaebia yawa ituruna’, ba pajam. Iltara mexeya pomonae xanapanaya pepaebiwi pam, daichitha abe painya neexanaewi pam! Paxam peitaboco payabara yaputaneme. Ema ba payabara wunae yaputaneme. Matautano pexeinya matabibino ba payabara wunae yaputaneme, deta meisa paxam jopa pana neyabara yaputaem matautano jopa payabara yaputaem pocotsiwa exanan tapexeinya tsita itutsi coyenewan. ⁴Barapo peajüntucoyenebe jiwi iru pomonae jopa tana nejume cowuntsi jiwi, barapomonae necui itoroba tapexeinya tsita itutsi coyenewa pocotsi coyene cana exanan itaboco wetsica daichitha jopa baxua beexanaeinyo pocotsiwa barapomonae necui itoroba. Saya meisa barapo petsita itutsi coyene exanaein, icha be pocotsi coyeneya Jonás cana ichichi pon Nacom peitorobi jume pepaebin xua poxonae pin duweintha tsijuntutha eca acoibi po matabibibe beya equeicha poxonae yacabaxotsi xua asu popona”, jei Jesús xua nayabara paeba xua tupaena xua equeicha Nacom asu exanaena acoibi po merawithabe.

Bapoxonae Jesús ponataba, yawa cuenta pona barapomonae.

**Meje yabara poxonae Jesús pijimonaе yabara yaputane exana,
pocotsiwa pan cotowa exana
(Mr 8.14-21)**

⁵Poxonae Jesús pijimonaе tatsi icha muxunene beya pona jeratha xua pucua iya, barapomonaе jüntemaina xua pan capana. ⁶Nexata Jesús pewunaeya muxuweta pijimonaе xua jopa pejume cowuntsinexa tsane fariseomonaе iru saduceomonaе pia pecuidubiwa coyenewa tatsi po pecuidubi coyenewa jopa Jesús pia pecuidubi coyenewa tatsi. Jesús jeye:

—Dota pam jopa pajume naitaewatsinde fariseomonaе pia pecuidubi coyenewa tatsi xua painya nejume cowuntsiyainwa. Matauta dota pam xua saduceomonaе pia pecuidubi coyenewa tatsi xua painya nejume cowuntsiyainwa. Barapo pecuidubi coyenewan jiwi ichawa beya ajuntacuicoyeneyapube cana exanapoinchi icha be pocotsi coyene ichi xua levadura matawun xua pan cotowa exanapona beya poxonae pin pan, jei Jesús.

⁷Poxonae Jesús yabara paeba pocotsiwa xua pan cotowa exana, bapoxonae Jesús pijimonaе tatsi catsawiya nanta xeinaeya natsipaeba caemonaе, najei:

—Metha Jesús daxota baxua paeba metha poxoru yaitama jopa caponaetsi pan, najei barapomonaе.

⁸Jesús yaputane pocotsiwa barapomonaе natsipaeba, daxota Jesús barai, jeye:

—Pocotsiwa pana natsipaebame xua jopa painya necaponaexae pan, apara poxoru jopa pana nejume cowuntsim. ⁹iCataunxuae jopa pana necui yabara yaputaem! Paxam pana necui yabara jüntemainame poxonae cinco mil pebiwi apatan pexaewa xua yabara jüntemainame poxonae saya cinco po panbe. Matautano pana necui yabara jüntemainame poxonae equeicha doce po cotebe pawwunbaponame pocotsiwa jiwi jopa xaeyo. ¹⁰Matautano paxam pana necui yabara jüntemainame xua poxonae cuatro mil pebiwi apatan pexaewa xua poxonae saya siete po panbe. Matautano pana necui yabara jüntemainame poxonae equeicha siete po cotebe pawwunbaponame pocotsiwa jiwi jopa xaeyo. ¹¹Matautano jopa payaputaem xua poxonae yabara paca tsipaebatsi fariseomonaе pia pecuidubi coyenewa tatsi, iru saduceomonaе pia pecuidubi coyenewa tatsi, apara jopa pan yabara paca tsipaebichi xua jopa painya necaponaexae, jei Jesús.

¹²Bapoxonae matapainya Jesús jume yaputaerucupatsi pijimonaе, xua apara yabara paeba fariseomonaе pia pecuidubi coyenewan yainwa tatsi, iruru saduceomonaе pia pecuidubi coyenewan yainwa tatsi. Matautano matapainya yaputaerucupa xua apara Jesús jopa yabara paebiyo pocotsiwa pan cotowa exana.

Meje yabara poxonae Pedro namchi Jesustha jeye:
“Xam apara Mesías Nacom caitorobica”, jei
(Mr 8.27-30; Lc 9.18-21)

¹³Bapoxonae pirapae Jesús pona. Poxonae Jesús patopa Cesarea de Filipo tomara pecuariya xua pepa tomaratha, bapoxonae Jesús yainyaba pijimonae, jeye:

—¿Eta po jiton, po jiton xua jiwi yabara paeba xua pinae bapon Nacom pia Peitapetsin tatsi? jei Jesús.

¹⁴Jesús jume notatsi pijimonae, jeye:

—Ichamonae cayabara jeye: ‘Apara bapon Juan pon jiwi Pebautisabin, pon equeicha petupaein asu juina’, jei. Iru ichamonae cayabara jeye: ‘Apara bapon Elías pon equeicha petupaein asu juina’, jei. Iruru ichamonae cayabara jeye: ‘Apara bapon Jeremías pon equeicha petupaein asu juina’, jei. Iruru ichamonae cayabara jeye: ‘Apara bapon jiwana pomonae Nacom peitorobi jume pepaebiwi’, jei, jei Jesús pijimonae tatsi.

¹⁵Nexata Jesús pijimonae barai, jeye:

—¿Incane iru paxamdu? ¿Eta pana neyabara jumichimdu xua xan eta pondun? jei Jesús.

¹⁶Simón Pedro Jesús jume notatsi, jeye:

—Xam apara Mesías. Nacom caitorobica, pon asu popona. Xam apara Nacom Pexanto tatsim, jei Simón Pedro.

¹⁷Jesús barai, Simón Pedro baraichi, jeye:

—Simón, Jonás pexantom, maisa Nacom cajuntu coyene weiweina exana, tsipei bapana jiton bapocotsiwa jopa cacuidubi pocotsiwa xua tana neyabara paebiwam. Saya apara meisa Nacom, Taxa, cacuiduba baxua pocotsiwa tana neyabara paebiwam, pon itabocotha eca. ¹⁸Pocotsiwa xua tana neyabara paebiwam baxua natsita jume itapeinya xeiname xua bichocono tana necui yabara jume cowuntsiwam. Daxota cawun dutatsi po wun xua jei: ‘Pedro’, jei, po wun caunuta xua jei: ‘iboto’, jei, tsipei ba iboto bichocono mata daunwei. Pocotsiwa xua xainyeya neyabara paebame baxua be iboto coyene jutiya paebame poxonae jam: ‘Xam apara Mesías. Nacom caitoroba, pon asu popona. Xam apara Nacom Pexanto tatsim’, jam. Daxita pomonae xua neyabara jume cowunta barapo pexainyeya jume tana neyabara paebiwathaxaemxae, barapomonae tajiwimonae exanaein. Tajiwimonae catsin taayapusu itorobi coyenewa xua barapo tajiwimonae jopa peamanayabinexa tsainchi pia peitafaetabi jiwichi pomonae petupae cuiru nacua beya ponaena. ¹⁹Xam Pedrom, cacatinchi taayapusu itorobi coyenewa xua copiyam tsane caponaename tajume diwesi xua xan yabara ponxaein Mesías, ponxaein Nacom Pexanton. Barapo tajume diwesi caponaename judi monaetha matautano caponaename pomonaetha pomonae jopa judi monae naexanaeyo.

Matautano xam pon tajitonxaem, pocotsiwa xam jopa copatsim barapo cae pin nacuathe, xua pocotsiwa tamonaexana, baxuan bara iru Nacom jopa copatsiyo pia peitorobi nacua beicha xua barapomonae bara peexanaenexa baraxua. Pocotsiwa copatame xua tajiwiwimonae peexanaenexa barapo cae pin nacuathe, bapocotsiwa iru Nacom copata pia peitorobi nacua beicha xua barapomonae bara peexanaenexa baxua, jei Jesús.

²⁰Nexata Jesús pijimonae muxu barai xua pijimonae jopa peyabara pepeabinexatsi ichamonaetha baxua xua po coyene bapon apara Mesías.

**Meje yabara poxonaexa Jesús nayabara diwesi paeba
po coyene xua petupaewa tsane
(Mr 8.31-9.1; Lc 9.22-27)**

²¹Bapoxonaexa barapo matakabi weya Jesús tamropata pitaba xua pijimonaetha tsipaeba pocotsi coyene Jesús cana exanaeinchi ichamonaexa, jeye:

—Bewa ponaein Jerusalén tomara beya ichaxota pitiri jiwi, iruru sacerdotemonaexa pia pentacaponaei tatsi, iruru pomonaexa jiwi pecuidubiwi Moisés pia peitorobi coyene tatsi, daxita barapomonae bichocono neperaxa jubina. Matautano barapomonae nebexubina. Daichitha poxonaexa acoibi po matakabiyobe tsuxubi tsane equeicha Nacom tatupaein asu neexanaena, jei Jesús.

²²Ichitha bapoxonaexa Pedro, Jesús baru natsixitabatsi aisowa beya. Pedro Jesús baraichichi, jeye:

—Xam pon Necanamataxeinaem. iJamaisa daxua paebameno, bara! Nacom jopa copatsi tsane xua jiwi cata exanaena baxua, jei Pedro.

²³Nexata Pedro peitabara beya tatsi Jesús napatomeicha cauncuatabiya namchi, jeye:

—iXam newepu natsixitabare, tsipei be Satanám! iNejuntu coyene jujutame xua jopa xanepanaya taexanaewa tsane neaichaxaibixae xua tatsitupaewa tsane jiwi! Xam saya abe nanta xeiname icha pebiwi ichi. Saya jopa nanta xeinaem pocotsiwa Nacom necayabara nanta xeina xua tatsitupaewa tsane jiwi, jei Jesús.

²⁴Nexata Jesús barai pijimonae, jeye:

—Icha pebin ichichipa xua tajiwiwimonae jiwapanin penaexanaewa tsane, bewa bapon yabara naitematsi pocotsiwa xua bapon ichichipa pia peexanaexa coyenewan tatsi. Bapoxonaexa jame bapon bewa eexanaponae pocotsiwa itoroban, bequein bara bapon bexotsi ichamonaexa, tajiwiwimonae jitonxae. ²⁵Pon naantobeya nata exana pocotsiwa bapon ichichipa, bapon jopa xeinaeyo peajuntuyparusuwa, po peajuntuyparusuwa ataya tsiteca xua Nacom pia nacua beicha. Ichitha pon neantobeya inta exana pocotsiwa ichichipan tana neantobexae bapon xeinaena peajuntuyparusuwa, po

peajüntuyarusüwa ataya tsiteca xua Nacom pia nacua beicha. ²⁶Icha pebin bichocono copei xeina pocotsiwa xeina po cae pin nacuathe, ichitha jopa xeinaeyo peajüntucoyenesüwa po peajüntucoyenesüwa ataya tsiteca, baroxonae bapon jopa itacüpaetsi xua penajüntü coyene capanepaewa xua jopa peweraweracaewa. Tsipei pebin jopa itacüpaetsi xua barapo copeitha matomatsina Nacomtha xua bapon pecatsinexa tsainchi peajüntucoyenesüwa xua barapoxonae pepatopaewanexa tsane Nacom pia nacua beicha tatsi. ²⁷Tsipei xan ponxaein Nacom Tananeitapetsin bewa yawa muxuna patopeicaein Nacom pia peitüpanaewa tatsi. Matauta matatsunpiwi barü patopeicaein. Daxita carepaya jiwitha catsibin pocotsiwa peyabara cui matomatsiwatsi. Pomonae jopa xapain exanaeyo ichamonaetha xuya barapocotsi coyeneya exanaein xua antomabeya catsin. Pomonae xua xanepanaya exana ichamonaetha pocotsiwa cui itoroban xuya barapocotsi coyeneya exanaein matoma xanepanaya catsibin. ²⁸Bara xaniwaicha paca tsipaebatsi xua pomonae xote umene barapomonae jiwana abü, copiya matha yabara yaputaena poxonae xan ponxaein Nacom Tananeitapetsin tamropata pitabin xua itorobiya taewatsiwa tsane pomonae tana nejume cowüntsiwi, jei Jesús.

**Meje yabara poxonae Jesús pijimonae peitütha
pexeinya itüpanae coicha tsanaya naexana
(Mr 9.2-13; Lc 9.28-36)**

17 ¹Poxonae seis po matabibe jopa, po matabin weya poxonae Jesús paeba baxua, bapoxonae icha matabitha Jesús pona demxuwa beicha. Pedro Jesús barü pona, irüno Santiago Jesús barü pona, irüno Juan Jesús barü pona, pon Santiago peweicho tatsi. Barapo acoibi poyobe Jesús matabapona demxuwatha, po demxuwatha bichocono taücha ichaxota jiwaibi. ²Baxoteicha daxita Pedrobarü peitütha tatsi Jesús pexeinya itüpanae coicha tsanaya. Bichocono itabara daedaena icha be xometo ichi poxonae pentha. Mataütano pocotsiwa penama xatatsiwa bichocono inyapana tsanaya icha pecoicha ichi. ³Bapoxonae Pedrobarü taerücüpa Moisés irü Elías xua baponbe Jesús barü cueicueijeichibe. ⁴Bapoxonae Pedro namchi Jesustha, jeye:

—Pata Tanecanamataxeinaem, maisa wünae xua xote pata umenaewa. Icha ichichipame, bapoxonae pacata acabinchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

⁵Poxonae cataunxuae Pedro cueicueijeji, xua Jesús barü cueicueijeichi, bapoxonae daxita barapomonae bematawacaicha taruneicatsi tsaquinaebowa po tsaquinaebowa bichocono pentha. Nexata barapomonae tsaquinaebowatha pejume jume tane xua Nacom namchi, jeye: “Bapon apara Taxanto, pon bichocono antobein, pon itapetan. Bapon bichocono nejüntü coyene weiweina exana. Bapon beta pajume taema pocotsiwa paca tsipaeba”, jei Nacom.

⁶Poxonae Jesús pijimonae tatsi jume taerucupa baxua, bapoxonae barapomonae pia coutha iratha nabebeya, irabe taebobendeca. Barapomonae bichocono pijunuwi. ⁷Bapoxonae Jesús pijimonae imoxoyo caquita uncuataba yawa pijimonae waruba, jeye:

—Panonobaponde, painya xoba pajunuwame, jei Jesús.

⁸Poxonae barapomonae necobarucupa beya meisa Jesús compa uncua, ichamonae aichurubena.

⁹Poxonae Jesús pijimonae baru duneica demxuwa wetsica, pijimonae barai, jeye:

—Ichamonaetha jopa baxua patsipaebinde pocotsiwa aunxuae pataneme xuaunxuae paca tsita itutatsi, beya abu poxonae xan ponxaein Nacom Tananeitapetsin equeicha asun poponaein tatupae coyene weya, jei Jesús.

¹⁰Nexata Jesús yainyabatsi pijimonae, jeye:

—Pomonae jiwi pecuidubiwi Moisés pia peitorobi coyene jeye: ‘Mesías matha tsiwanaya patopaeinchi Elías’, jei. ¿Eta pocotsiwa metha jane? jei Jesús pijimonae tatsi.

¹¹Jesús jume nota, jeye:

—Bara xainyei, copiya matha netsiwanaya patopa pon icha be Elías ichi. Matautano bapon cana exana jiwitha xua jiwi cana juntu coyene weta exanaya exanatsi xua tana nejume cowantsiwa tsane xua tapatopaewa tsane. ¹²Ichitha xan paca tsipaebatsi xua bayatha apara patopa pon copiya matha netsiwanaya patopa pocotsin xua icha Elías ichi. Poxonae bapon bayatha patopeica jiwi jopa yaitaeyo bapontha pon icha Elías ichi. Saya barapo jiwi bapon abe cana exanatsi be pocotsi coyeneya ichichipa beya poxonae bapon yatsicaya bexotsi. Icha bapon ichichi xua poxonae cana exanatsi, barapomonae bara neichi tsane ponxaein Nacom Tananeitapetsin. Barapomonae iru nebexubina, jei Jesús.

¹³Jesús pijimonae tatsi matapainya yaputane xua poxonae Jesús pijimonae tsipaeba Elías yabara, apara xua Juan yabara paebatsi pon jiwi Pebautisabin.

Meje yabara poxonae Jesús cauri taitaweta xua pewowin xeina
(*Mr 9.14-29; Lc 9.37-43*)

¹⁴Poxonae demxuwa weya pona, bapoxonae Jesús pijimonae baru patopa ichaxota pin bicheito jiwi jinompa. Bapoxonae pebin Jesús imoxoyo caquita uncatabatsi. Bapon pentabocototha uncua Jesús peitabaratha tatsi. Bapon Jesús baraichi, jeye:

¹⁵—Tanecanamataxeinaem, inta taxanto yabara najuntu coyene xeinare xua jinya neyawenaenexa. Taxanto inta waetabatsi cauri. Inta papai exanatsi. Inta coibo thamthamei exanatsi. Matayaiba exanatsino.

Matauta isototha inta bebai tsaibichino. Matautano mentha inta bebai tsaibichino. ¹⁶Bequein barapo taxanto xote caponanje jinyamonaetha yawa janje: ‘Painta taxanto taitawere cauri’, jan, daichitha jopa itacupaetsi xua taxanto petaitawetsinexatsi cauri, jei bapon.

¹⁷Jesús namchi daxita barapomonaetha, jeye:

—iPaxam barapomonaetha pam pomonaetha jopa xapain cataunxuae pana nejume cowuntsim! iPaxam barapomonaetha pam, peajuntucoyenebe jiwi pam! ¿Eta po weibe nantawenonan xua bewa tapaca baru ecaewatsi tsainchi xua beya poxonaetha tapana nejume cowuntsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Inta xawena pewowin, jei Jesús.

¹⁸Bapoxonaetha Jesús itaweta cauri, matautano pewowin wepu ponatsi exanatsi. Barapo pewowin nainya axaibi tsuxubi.

¹⁹Bapoxonaetha pirapaeyo Jesús compa tsipaebatsi pijimonaetha. Jesús jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei Jesús pijimonaetha tatsi.

²⁰Jesús jume barai pijimonaetha jeye:

—Jopa paca itacupaeyo xua painya itawetsiwa cauri tsipei jopa beta payabara jume cowuntsim xua Nacom painya nepaca cayawenaewa. Bara xaniyeya paca tsipaebatsi. Icha paxeinaetsipame xua be peya pejume cowuntsi coyenewiyo xua bequein, icha mostaza xutiyo juta ichi xua tsica xutiyo, ichitha bara paca itacupa xua urutotha painya nejeiwa: ‘Uruto bara jincoutha natabu jonde, icha ira beya naxore’, xua painya nejeiwa. Bara jopa bayathiyo tsipae barapo uruto. Dapocotsiwa apara pacata aibi, pocotsiwa peayapubeya daunweiwa icha paxeiname tapana nejume cowuntsiwam xua peya jume cowuntsiwiyo. ²¹Barapo cauri saya paca itacupa xua painya neitawetsiwa poxonaetha matha payabara nainbotame matautano poxonaetha matha Nacomtha matowa pawucame, jei Jesús.

Meje yabara poxonaetha equeicha Jesús nayabara paeba xua poxonaetha tupaena
(Mr 9.30-32; Lc 9.43-45)

²²Poxonaetha cataunxuae Jesús pijimonaetha baru popona Galilea nacuatha, pijimonaetha tsipaeba, jeye:

—Xan ponxaein Nacom Tananeitapetsin, jiwi necaenaetsina ichamonaetha.

²³Bapoxonaetha bequein nebexubina, ichitha poxonaetha acoibi po matacabiyo be yapucaewina Nacom equeicha tatupaetha asu neexanaena, jei Jesús.

Bichocono Jesús pijimonaetha tatsi anthuthutane, xua poxonaetha Jesús pejume taexaetsi poxonaetha baxua paeba.

Meje yabara poxonaetha Jesús cata paratiyo xua Nacom pin pia bo nexa

²⁴Jesús baru patopa pijimonaetha Capernaum tomaratha. Bapoxonaetha pomonaetha paratixi penotebiwi po paratixi judiomonaetha bewa catsibeibina

xua Nacom pin pia bo nexa, barapomonaē Pedro pexainya beya taponatsi. Barapomonaē Pedro yainyabatsi, jeichichi:

—¿Pon painya nepaca cuidubin, bapon bepa pana catsei paratixi xua Nacom pin pia bo nexa? jei.

²⁵Pedro jume nota, jeye:

—Aa, bepa paca catsei, jei Pedro.

Poxonaē Pedro botha joniya, Jesús copiya barai bapon, jeye:

—Simón, ¿eta be caita cui jicha? Barapo cae pin nacuathe, ¿eta po jiwi wɔcatsi paratixi, po paratixi xua jiwi bewa catsibeibina pomonaetha pomonaē jiwi itorobiya pia pepa peewatsiwichi poxonaē pomonaē jiwi itorobiya pia pepa peewatsiwichi wɔca? ¿Metha bara piamonaē matabɔxɔ wɔca? Ichacuitha, ¿metha bara ichamonaē wɔcatsi pomonaē penanapaincha jinompaewi xua icha nacua werena peponaewi? ¿Eta pomonaē cuita wɔcatsi? jei Jesús.

²⁶Pedro Jesús jume notatsi, jeye:

—¡Apara jame wɔcaetsipa ichamonaetha! jei Pedro.

Equeicha Jesús jume nota, jeye:

—Nexata barapomonaē jopa wɔcaeyo piamonaē matabɔxɔyo.

²⁷Barichin jopa bewa Taxa catsin tsane paratixi, yaitama tsipei aparta Taxa Pexanton tatsin. Ichitha xua barapomonaē jopa wanaca casebinexa, matha mene beya ponde. Curupobo xoyama mentha bapoxonaē po duwein copiya wana pichina curupobo, pire barapo duwein. Bapoxonaē barapo duwein coiboto tsina paratiyo taename po paratiyo xua naca yajɔpabe xua watomatsiwabe tsane Nacom pin pia bo nexa. Bapoxonaē barapo paratiyo caponde pomonaē paratixi penoteibiwi beya bara careno, jei Jesús.

**Meje yabara poxonaē Jesús yabara yainyabatsi
pijimonaē xua pon peainya cui peexanaeinchi**

(Mr 9.33-37; Lc 9.46-48)

18 ¹Nexata bapoxonaē Jesús imoxoyo caquita umenarɔcupatsi pijimonaē, yawa pijimonaē yainyabatsi, jeichichi:

—¿Jintam paxan jiwana pan pon bichocono ainya cui cana exanaeinchi po mataqueitha poxonaē Nacom wabina jiwi xua petanaexanaenexatsi pijimonaē pomonaē itorobiya pecanamataxeinaexae? jei Jesús pijimonaē tatsi.

²Nexata Jesús waba pexuyo, yawa pijimonaē tatsi peitabarayo deca tatsi tacuaranoreca. ³Jesús namchi pijimonaetha, jeye:

—Bara xainyeya paca tsipaebatsi bewa paxeinaem icha jɔntɔ coyenewa xua jopa pananta xeinaem peainya cui coyenewa yabara. Barapocotsi jɔntɔ coyenewa pexui ba xeina xua jopa taayapubetsi poxonaē nejume cowɔnta. Bewa pananta xeinaem icha pexui ichi poxonaē nanta xeina,

icha paichichipame xua Nacom painya nepaca wabiwa xua pijimonae tatsi painya nepaca exanaewa pomonae pamxaem Nacom itorobiya paca ewata. ⁴Po jiton pon najuntũ coyene acaura, xua daxota bichocono Nacom canantawenonatsi xua pejume cowuntsiwatsi, bapon jame ainya cui xua pecana exanaewatsi Nacom pijimonae tatsi jiwanapin pomonae pejume cowuntsiwichi pomonae Nacom itorobiya peewatsixae. ⁵Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo apara bara irũ matenta weyataeya wabatsi pon tana neitorobixae, xua pon bara Nacom, jei Jesús.

**Meje yabara poxonae Jesús paeba xua jiton jopa bewa
cana exanae ichũntha xua irũ abe peexanaewa tsane
(Mr 9.42-48; Lc 17.1-2)**

⁶“Nacom tsitatsi xua pebin bichocono abe exana poxonae ichũn cana exanatsi xua abe peexanae cuiru coyene exana, po barapo ichũn pon cataunxuae aena tana nejume cowuntsixae. Metha jame wũnae tsipae xua barapo pebin pon abeya cana exanaeya taexana ichũntha, barapon pin iboto wisi cutsipatsi yawa xua tuwũtha xua pin mar mentha barapo iboto cayawa cabutabachipatsino. Tsipei jopa wũnae tsipae xua bapon cana exana xua ichamonae abe peexanae cuiru coyene exana pomonae cataunxuae aena nejume cowũnta. ⁷Maisa bichocono jopa xanepanaeyo barapo cae pin nacuathe nexa pomonae abe exaneiba. Barapo cae pin nacuathepiwi ataya xeineiba po jiwi pecana exanaexaetsi xua ichamonae cana exana xua barapo jiwi pecana exanaexaetsi xua ichamonae cana exana xua barapo jiwi abe peexanae cuiru coyene peexaneibinexa xua daxota jopa nejume cowũnteibiyo. Ichitha pebin tsocuae xua bapon abe taexana xua ichũn abe exanaeya taexanaetsi.

⁸“Daxota paca tsipaebatsi icha painya cobe paca exana xua abe painya neexanaewa tsane maisa pana nacobe ucubobare yawa tajũ beya pana nacobe bebande abe painya jopa neexanaenexa. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua ainya cobebe painya necayawa bebai tsane ichaxota po nacuatha isoto jopa itacounayiyo. Mataũtano icha painya taxu paca exana xua abe painya neexanaewa tsane maisa pana nataxu ucubobare yawa tajũ beya pana nataxu bebande xua abe painya neexanaeyainwa. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebai tsane ichaxota po nacuatha isoto jopa itacounayiyo.

⁹Matautano icha pocotsiwa pataneme painya itamaiqueittha xua icha baxua paca exana xua abe painya neexanaewa tsane painya netaexae painya itamaiqueittha, maisa pana naitamaiquei jucuare. Yawa tajũ beya pana naitamaiquei bebande abe painya neexanaeyainwa. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa patsiwa tsane Nacom pia nacua beicha tatsi. Baxua jame yatsicaewa xanepana beyacaincha xua poxonae ainya itamaiqueitobe painya necayawa bebai tsane ichaxota isoto jopa itacounayiyõ”, jei Jesús.

Meje yabara poxonae Jesús tsipaeba pijimonae pecayabara jũta pepaebi diwesiyo xua oveja yabara pon penapuxanaein
(Lc 15.3-7)

¹⁰Equeicha Jesús jeye: “Barapocotsi pexuyo jopa catsa jumeja pacayabara jande: ‘Maisa barapo pexuyo jopa peainya cuiyiyõ’, jopa pajande. Matauta pomonae aena pejume cowũntsiwi Nacom jopa pacayabara jande: ‘Maisa barapomonae jopa peainya cuimonaeyõ’, jopa pajande. Paca tsipaebatsi pomonae Nacom pejume cowũntsiwi barapomonae nantaũta pia matatsunpiwi po matatsunpiwi barapomonae yawenatsi. Barapo matatsunpiwi, Taxa Nacom peitabaratha tatsi tajinompeibatsi pia nacuatheicha, xua barapo pejume cowũntsiwi peyawenaenexa tsaibi tsainchi. ¹¹Tsipei xan, ponxaein Nacom Tananeitapetsin patopeican tayawenaenexa pomonae jopa pejume cowũntsiwi xua barapomonae napaeba tacana exanaewa tsane.

¹²“Pana nejume naitaeware po pecayabara jũta pepaebi diwesiyo xua paca tsipaebinchi. Barapo diwesiyo jeye: Jiton ba xeina oveja cien poyobe. Caein tanapuxanatsi. Jiton demxuwatha cuenta pona noventa y nueve poyobe oveja, pewenaweneinexa oveja, pon catsawa jopa, beya matapainya taeba. ¹³Xaniwaicha paca tsipaebatsi poxonae jiton oveja taeba, bapon bichocono weiweina petaebixae oveja pon catsawa jopa, beyacaincha xua poxonae weiweina poxonae saya noventa y nueve poyobe po ovejamonae jopa catsawa othopaeyõ. ¹⁴Barichi barapocotsi jũta coyeneya ichi, Nacom pon Taxa, pon peitabocotha eca, bapon jopa ichichipaeyõ xua pebarapentsiwatsi pijiwimonae xua pejume cowũntsiwatsi matautano xua bara caeinno irũ, pomonae aena pejume cowũntsiwixaeitsi”, jei Jesús.

Meje yabara poxonae Jesús yabara paeba xua jiton eta bichi tsane poxonae cayabara jũntemainaena pontha pon abe petaexanaexaetsi
(Lc 17.3)

¹⁵Equeicha Jesús barai pijimonae, jeye: “Icha ichũn pon irũ pejume cowũntsiwatsi, icha bapon pacata abe exana, bapon baxua yabara

patsipaebare xua bapon peyaputaewa tsane xua deta cou abe exana. Icha barapon paca jume taeya jejei tsane pocotsiwa xua bapon abe exana bara bapoxonae paca itacoxonaena. ¹⁶Ichacuiitha icha ichun pon pejume cowuntsindu, icha bapon jopa paca jume cowuntsiya jejeyo, bara nexata equeicha pawabare pebinbe nacueyatabe xua yoroba painya netsipaebinxaxa bapon xua abe peexanaexae. ¹⁷Ichitha icha awiya bapon jopa cataunxuae paca jume cowuntsiya jejeyo, bara nexata barapon pacaponde pomonaetha pomonae Nacom pejume cowuntsiwichi, xua barapomonae bapon peyabara paebinxatsi. Icha bapon awiya cataunxuae jopa came jume cowuntsiya jejeyo barapomonaetha barapoxonae barapomonae bewa yabara nanta xeinae xua bapon bara be pocotsi jiton pon jopa bapana pejume cowuntsin Nacom. Ichacuiitha bewa yabara nanta xeinae xua bapon bara be pocotsi jiton jiwana, pomonae peajuntucoyenebewi, pomonae paratixi pentoma noteibiwi, po paratixi jiwi bewa catsibeibina pon romanomonae itorobiya pia pepa peewatsinchi nexa.

¹⁸“Xainyeya paca tsipaebatsi. Pocotsiwa paxam jopa pacopatsim barapo cae pin nacuathe xua pocotsiwa exana pomonae tana nejume cowuntsiwi, bapocotsiwa bara iru Nacom jopa copatsiyo pia peitorobi nacua beicha xua barapomonae peexanaewa tsane baxua. Pocotsiwa pacopatame xua tajiwimonae peexanaenexa barapo cae pin nacuathe bapocotsiwa iru Nacom copata pia peitorobi nacua beicha xua barapomonae bara peexanaewa tsane baxua.

¹⁹“Matautano paca tsipaebatsi icha paxam jiwana nacueyatabe barapo cae pin nacuathe icha baponbe peburuya jupaya yabara nanta xeinabe xua Nacomtha pewucaewabe, baponbe bara baxua taexanaeinchibe pocotsiwa pewucaexaebe xua Taxa Nacom bara taexanaena pon peitabocotha eca. ²⁰Tsipei ichaxota ba nayantabe xua nacueyatabe poyobe, xua poxonae pewucaenexabe Nacom xua ichacuiitha ichaxota acoibi poyobe, xua pomonae taneantobe jiwixae, bara bequein saya caeyobe daichitha xan baxota ba uncueiban iru”, jei Jesús.

²¹Nexata Pedro Jesús yainyabatsi, jeye:

—Tanecanamataxeinaem, icha inta abe exana pon iruru jume cowunta, zeta po cuiyobe tsipaebocuaein xua bewa tacui yabara juntemainawa tsane pocotsiwa inta abe exana? ¿Metha saya beya poxonae siete po jume cuiyobe tsipae? jei Pedro.

²²Jesús jume nota, jeye:

—Ichitha jopa catsipaebichi xua saya siete po cuiyobetham netsipaebiwa tsane xua jinya necui yabara juntemainawa tsane pocotsiwa cata abe exana. Seicaya apara jame catsipaebatsi, xua jopa cuinaya najume baraxubim tsane xua jinya necui yabara juntemainawa tsane pon cata abe exana xua beya bequein jame cuatrocientos noventa po cuiyobetham tsane xua netsipaebiwa tsane, jei Jesús.

Meje yabara poxonae Jesús cuiduba pecayabara juta pepaebi diwesiyo xua pon jopa yabara jüntemainaeyo ichuntha

²³Equeicha Jesús pijimonaе barai pecayabara juta pepaebi diwesiyo, jeye: “Anoxuae paca cuidubatsi xua Nacom yabara. Nacom pijimonaе bichocono yabara jüntemaina po abe peexanae coyenein pijimonaе tatsi exana. Nacom baxua exana icha pebin ichi pon jiwi itorobiya pia pepa peewatsinchi. Bapon wuca xua caewa equeicha pematomsinexatsi xua po matoman caena bayatha penacowaebixaetsi. ²⁴Pon jiwi itorobiya pia pepa peewatsinchi tamropata pitaba xua waba pia petanacuichiwichi. Pon copiya, bapon pon jiwi itorobiya pia pepa peewatsinchi jopa equeicha caewa tacanawitichi diez millones po paratiximonaеbe. ²⁵Barapon pon copiya pon petanacuichinxae pon jiwi itorobiya pia pepa peewatsinchi nexa jopa xeinaeyo paratiximonaе xua pon jiwi itorobiya pia pepa peewatsinchi caewa petacanawichinexa tsainchi. Daxota pon jiwi itorobiya pia pepa peewatsinchi itoroba ichuntha xua barapo petanacuichinchi caenaetaxubinchi ichuntha xua ichun pecomotsinexa tsane xua pon pebusi cui taetaeinchi pecanaexanaenexa tsainchi. Barapon pon jiwi itorobiya pia pepa peewatsinchi matauta cui itoroba xua yabuyo pecaenaetsinexa tsainchino, powa barapo petanacuichin piowa tatsi. Yawano cui itoroba xua pexuino pemuxuna caenaetsinexa tsainchi. Yawano cui itoroba xua pemuxuna caenaetsinexa pocotsiwan xeina pon petanacuichin, xua barapo matoma pecatsinexatsi pon jiwi itorobiya pia pepa peewatsinchi. Ichitha daxita barapo matoma awiya seica, bequein bapon daxita baxua cana exanaetsipatsi. ²⁶Nexata pon petanacuichin pentabocototha uncua pon jiwi itorobiya pia pepa peewatsinchi itabaratha tatsi matautano jume daunweya namchiya jeye: ‘Tanentacoponaem, abu necayabara najuntu coyene xeinare, xua jopa bepijawa neaitaconaenexa. Barapara bexa daxita pentoman cacatsibinchi’, jei pon petanacuichin. ²⁷Pon jiwi itorobiya pia pepa peewatsinchi bara yabara najuntu coyene xeina peyawenaenexa, yawa yabara jüntemaina barapo paratiximonaе, matautano bara saya pu copata. ²⁸“Daichitha bapon pon petanacuichinxae poxonaе pontaba pon jiwi itorobiya pia pepa peewatsinchi weya, jemeicha caxina pia jiton pon penabarü nacuichinxaebe. Pon caxinatsi bapon matoma amanayaba saya cien po paratiximonaеbe. Pon jiwi itorobiya pia pepa peewatsinchi weya pona matoma amanayabatsi. Pon jiwi itorobiya pia pepa peewatsinchi weya pona bapon pia jiton coibotathu waetaba, muxu penaichatabi. Pon pecoibotathu waetabixae bapon jei: ‘iEqueicha inta caewa canawire xua bayatha nentoma amanayabame!’ jei. ²⁹Bapoxonaе pon coibotathu waetabatsi pentabocototha uncua pia jiton itabaratha tatsi, matautano jeye: ‘Abu, neyabara najuntu coyene xeinare, xua jopa bepijawa

neaitaconaenexa. Barapara bexa pentoma cacatsinchi', jei pon coibotathu waetabatsi. ³⁰Ichitha pon jiwi itorobiya pia pepa peewatsinchi weya pona bapon aichaxaibi xua abu came pentoma ewatsiwa. Daxota bapon pia jiton capona jiwi pecubi bo beya, beya abu poxonae matoma catsinchi pia jiton, xua pon jiwi itorobiya pia pepa peewatsinchi weya pona matoma catsinchi. ³¹Poxonae ichamonae pomonae iruru petanacuichiwi baxua cui tane, barapomonae unthuthu wecoyei, tsipei ichun pon iru petanacuichin jiwi pecubi botha etatsi. Bapoxonae barapomonae pon jiwi itorobiya pia pepa peewatsinchi beya pona. Barapomonae tsipaeba pontha pon jiwi itorobiya pia pepa peewatsinchi daxita pocotsiwa pon petanacuichin cana exana ichuntha pon iruru petanacuichin. ³²Bapoxonae pon jiwi itorobiya pia pepa peewatsinchi itoroba pijimonae xua petawabinexa tsainchi pon petanacuichinxaeysi pontha xua pon peyabara juntemainaexae pocotsiwa penacowaetsixaetsi. Pon jiwi itorobiya pia pepa peewatsinchi bapontha jeye: 'iMaise pon inta nacuitame maisa bichocono abem! Xan cayabara juntemainatsi daxita barapo ainya paratiximonae tsipei tanebaru jumichimxae. ³³Xam bewa bayatha barichim. Bewa yabara najuntu coyene xeinaem jinya jiton xua nejuntemainaenexa pocotsiwa bapon cantoma amanayaba, icha xan ichin xua bayatha cayabara najuntu coyene xeinatsi tacayawenaenexa tsainchi', jei. ³⁴Pon jiwi itorobiya pia pepa peewatsinchi bichocono anaepana. Daxota bapon cui itoroba ichamonae, xua barapon pon petanacuichinxaeysi caponaeinchi jiwi pecubi bo beya. Baraxota peraxa exanaeinchi xua beya abu poxonae barapon pon petanacuichinxaeysi matoma catsinchi daxita po pentoma bayatha jopa caewa petacanawichixaetsi', jei Jesús.

³⁵Equeicha Jesús jeye:

—Bara juta coyeneya ichi tsane icha be pon jiwi itorobiya pia pepa peewatsinchi ichi. Poxonae bapon peraxa exana barapo pia petanacuichinxaeysi xua bapon pia jiton jopa pecui yabara juntemainaexae, Nacom pon itaboco peecaein barichi tsane pijiwitha. Nacom exanaena baxua poxonae barapomonae jopa xapain yabara juntemainaeyo pomonaetha pomonae abe petaxanaexaetsi, jei Jesús.

**Meje yabara poxonae Jesús cuiduba xua
jiwi piseurixi pepunapenteibiyainwa.**

(Mr 10.1-12; Lc 16.18)

19 ¹Poxonae Jesús najume weta xua tsipaeba pijimonae, bapoxonae Galilea nacua weya warapa. Bapoxonae Jordán mene deca bara bereca pona, equeicha dabeya barapo Jordán mene, mene epa uncatabiya xua patopa Judea nacua, po nacua eca ichaxota pocotsiwa xometo bejopiya xua po nacua Jordán mene weya eca. ²Pin bicheitomonae puna poinchi. Baxotiya Judea nacua Jesus axaibi exana peatenewi.

³Bapoxonae fariseomonae piraichi Jesús imoxoyo caquita umenaracupatsi xua Jesús pejunta coyene jujutsinexatsi daxota jeye Jesustha:

—¿Moisés pia peitorobi coyenewa copata xua pebin piseuri pepunaxubiwa ichi saya poxonae ichipa? jei fariseomonae.

⁴Jesús fariseomonae jume notatsi, jeye:

—¿Jopa payorobim Nacom Pejume Diwesi? Barapo diwesitha jeye: ‘Poxonae aena Nacom forota, Nacom forota pebin yawa forota petsiriwa’, jei barapo Nacom Pejume Diwesitha. ⁵Matauta jeyeno Nacom Pejume Diwesitha: ‘Daxota baxuaxae pebin paxa wepu natsata yawa pena wepu natsata xua piowabe imoxoyo penaperu nacoyobinexabe. Baraponbe be cae jiwimonae naexanabe’, jei Nacom Pejume Diwesitha. ⁶Bapoxonae baponbe xua ainya jiwibe aibi, bara be caein naexanabe. Daxota pebin bapana jopa bewa punaxubi piowa, tsipei apara bayatha Nacom cana exana xua bara be bara caein naexanabe, jei Jesús.

⁷Nexata fariseomonae Jesús yainyabatsi, jeye:

—¿Eta xua metha Moisés pia peitorobi coyenewa copata xua jiton itacupatsi xua pecatsiwa papera piseuri po paperatha tina xua pexubiwa tsane piseuri? jei fariseomonae.

⁸Jesús jume nota, jeye:

—Moisés copata xua paxam painya seuriwi painya nepunapenteibiwa jopa painya nejume cowuntsi jiwixae Nacom. Apra caena bayatha Nacom jopa baxua copatsiyo poxonae aena foratapona jivi. ⁹Nama paca tsipaebatsi pon piowa punaxuba xua poxonae yabuyo bequein jopa nasi cui exanaeyo ichantha, icha bapon ichowa pita, bapon abe exana Nacom peitutha tatsi tsipei Nacom tsitatsi xua powa copiya baru popona apra bara piowa tatsi, jei Jesús.

¹⁰Nexata Jesús tsipaebatsi pijimonae, jeye:

—Icha Nacom jopa copatsiyo xua pebin piowa punaxubina poxonae barapowa saya u exana pocotsiwa pebin aichaxaibi, baxua bichocono ajumeyapube. Metha nexata pebin jopa jitha ecaetsipae. Bara saya pebin metha misa ecaetsipa, jeichichi Jesús pijimonae.

¹¹Jesús barai pijimonae, jeye:

—Daxita jivi ba jopa itacupaetsi xua peyabara yaputaewa pocotsiwa aunxuae payabara caunutame xua jopa jitha peenaewa. Saya meisa pomonae Nacom yabara yaputane exana barapo coyene, barapomonae itacupatsi xua pecana exanaewa barapo coyenetha xua jopa jitha peenaewa. ¹²Barichi acoibi po cui coyenewabe xua pebiwi jopa penotsiwa pecotsiwaxi jivi. Ichamonae aichaxaibi xua jitha peenaewa tsipei barapocotsi jiwimonae bara yacuiya naexana xua jopa penotsiwa yabuxitha. Ichamonae jopa itacupaetsi xua pecotsiwaxi penotsiwa tsipei bayatha tobu jucuatsi, xua ichamonae tobu jucua. Daxota jopa itacupaetsi

xua pexui pecanaexanaewa. Ichamonae aichaxaibi xua pecotsiwaxi nota, peichichipaexae xua saya ɯ peexanaewa pocotsiwa Nacom itoroba. Pon itacɯpatsi xua peyabara yaputaewa xua pocotsi coyene jopa pepichiwa pecotsiwa, bara moya jopa exanae tsane xua pepichiwa tsane pecotsiwa, jei Jesús.

Meje yabara poxonae Jesús jeye pexuitha:
“Barabɯ Nacom beta paca yawenaena”, jei
(Mr 10.13-16; Lc 18.15-17)

¹³Nexata jiwi Jesús tacaponatsi pexui xua Jesús pejayabinexa pecobetha yawa xua Nacomtha pewɯcaenexa barapo pexui nexa xua pejeinexa: “Barabɯ Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarɯcɯpa xua barapomonae cui matawentatsi pomonae pexui carendenana tsaibi.

¹⁴Ichitha Jesús jume barai pijimonae, jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntɯ coyene xanepanaewi icha pexui ichi. Pexui pia cui xua tayapu xanepanatsi xua pia juntɯ coyeneintha jume cowanta Nacom, jei Jesús pijimonaetha.

¹⁵Poxonae Jesús nacobe weta xua pexui jayabatsi yawa xua Nacomtha tawɯca barapo pexui, xua jeye: “Barabɯ Nacom beta paca yawenaena”, jei. Bapoxonae Jesús wepu pona barapomonae.

Meje yabara poxonae pewowin pon copei pexeinaein Jesús tsipaebatsi
(Mr 10.17-31; Lc 18.18-30)

¹⁶Pewowin pona xua Jesús petaenexatsi. Barapo pewowin jeye Jestustha:

—Ja Tanecuidubim, maisa nejuntɯ coyene xanepanaem. ¿Eta xua copiya matha exanocuaein xua ajuntɯyapusɯya tapoponaewa tsane xua ataya tsane? jei.

¹⁷Jesús jume barai, jeye:

—¿Eta xua nebaram: ‘Nejuntɯ coyene xanepanaem’, jam? Apará ichɯn dapon aibi pon pejuntɯ coyene xanepanaein. Jame meisa apará bapon Nacom compa pejuntɯ coyene xanepanaein. Icha ichichipame xua ajuntɯyapusɯya nepoponaewa xua ataya tsane, moya matha exande pocotsiwa Moisés itoroba pia peitorobi jume coyenewantha, jei Jesús.

¹⁸Pewowin Jesús jume baraichi jeye:

—¿Eta po peitorobi jume coyenewara? jei.

Jesús jume notsiya namchi xua Moisés pia peitorobi coyenewa namchi, jeye:

—‘Jopa ichɯn bexubinde. Jopa ichowa pichinde ichɯn piowa tatsi. Jopa caibinde ichɯn piawan tatsi. Jopa naerabiya cayabara paebinde pocotsiwa

ichamonae exana. ¹⁹Axatha baru jume cui itura jinare. Antobeinde necatsicuarabu enaewi icha ichim xua jincoutha naantobem', jei Moises, jei Jesús.

²⁰Pewowin Jesús jume baraichi, jeye:

—Daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon. ¿Eta pocotsiwa meisa inta acoibi xua exanaein? jei barapo pewowin.

²¹Jesús jume barai, jei:

—Cataunxuae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaya neexanaewa, matha daxita caenaere pocotsiwa xeiname yawa catsibare pomonaetha pomonae peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajuntana botsiwa pocotsiwa bichocono wuna, jei Jesús.

²²Poxonae barapo pewowin baxua jume taeba bichocono unthuthu wecoyeya ponataba tsipei bichocono copei pexeinaein.

²³Nexata Jesús barai pijimonaetha, jeye:

—Bara xaniyeya paca tsipaebatsi. Maisa bichocono ayapubecai xua pomonae bichocono copei pexeinaewi naexana Nacom pijimonaetha tatsi jiwana pomonae Nacom itorobiya peewatsixae. Tsipei barapomonae bichocono antasiwayatane barapo pia copei beyacaincha xua Nacom antobetsi. ²⁴Equeicha paca tsipaebatsi. Bichocono acuiruyapube xua duwein pon pewun camello xua pejoniyaewa acuicheto peetabu wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaetha tatsi jiwana pomonae Nacom itorobiya peewatsixae beyacaincha xua poxonae acuiruyapube xua poxonae camello acuicheto peetabu wan iya pejoniyaewa, jei Jesús.

²⁵Poxonae baxua Jesús jume taerucupatsi pijimonaetha, barapomonae yabara najuntu cui coyene cabenaeca, yawa Jesús jeichichi:

—Bapoxonae ¿jintam metha nexata itacupatsi xua penacapanepaewa pia coutha? jei barapomonae.

²⁶Jesús necotsiya jeye:

—Pebiwi ba jopa itacupaetsi xua baxua exana, saya jame meisa Nacom compa itacupatsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁷Nexata Pedro jeye Jestutha:

—Pata Tanecanamataxeinaem, paxan daxita pacuenta ponan pocotsiwa paxeinan pata paca puna ponaewa tsainchi. Tsipei baxua bayatha paexanan ¿eta pocotsiwa metha nexata pana necatsiname? jei.

²⁸Jesús jume nota, jeye:

—Bara xaniyeya paca tsipaebatsi. Po mataqueitha tsane Nacom pena ira exanaena, barapo mataqueitha, xan ponxaein Nacom Tananeitapetsin

ecaain tapexeinya itũpanae ecaethopaewatha po tapexeinya itũpanae caecaethopaewa bichocono itũpana. Paxam pomonae tapana nepuna jinompaewim doce po itũpanae eneibithopeibiawatha paenaename painya yabara paebinxam tsane pomonae doce po matabuxuyobe israelmonae pia penatsicuentsiwa abe peexanaexae. ²⁹Daxita pomonae taneantobe jiwixae xua pecueicueijeji tsurubenanaebiyaenexa Nacom Pejume Diwesi, Nacom beta cana exanaena barapomonae. Nacom beta cana exanaena pomonae pia bon pecuenta ponaexae, matauta ichacuitha ichamonae peweicho jiwi pecuenta ponaexae, matautano ichacuitha pamcho jiwi pecuenta ponaexae, matautano ichacuitha paxeiji pecuenta ponaexae, matautano ichacuitha pena jiwi pecuenta ponaexae, matauta ichacuitha pia pexui pecuenta ponaexae, matautano ichacuitha pia iran pecuenta ponaexae. Barapomonae barapo coyenein exana tana neantobe jiwixae, daxota daxita barapomonaetha Nacom jopa juniya catsi tsane barapo cae pin nacuathe. Matautano barapomonaetha Nacom catsina pia peitorobi nacuatheicha peajũntũcoyenyapũsũwa, po peajũntũcoyenyapũsũwa ataya tsiteca. ³⁰Pomonae xua anoxuae pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawi naexana, pomonae jiwi jopa petsita ainya cui jiwichi po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

Meje yabara poxonae Jesús paeba pecayabara jũta pepaebi diwesiyo pomonae uva pabitha petanacuichiwi

20 ¹Equeicha Jesús tsipaeba pijimonae pecayabara jũta pepaebi diwesiyotha, jeye: “Nacom pijimonae matomatsina pia nacuatheicha xua be pematomatsiwa petaexanaexaetsi pia petanacuichiwa tatsi icha pon pabi pexeinaein ichi xua poxonae matoma catsiba pomonaetha pomonae petanacuichixaetsi. Pon pabi pexeinaein caemũbotha pona xua jeita pomonae pia petanacuichinexa tsainchi pia uva bacabo. ²Bapon muxu tsipaeba pia petanacuichiwichi, jeye: ‘Paxam painta nacuire ta uva bacabo, nexata paca matoma catsibebinchi pocotsi paratiyo xua caentaqueitha nexa’, jei. Bapoxonae bapon pia petanacuichiwichi itoroba pia uva bacabo beya. ³Bapoxonae equeicha bapon pona poxonae xometo tajũ beequeina xua pejeichinexa ichamonae pomonae petanacuichiwichinexa tsainchi pia uva bacabo. Bapoxonae bapon tane ichamonae, pomonae panatha saya jinompa xua jopa nacuitompaeyo. ⁴Bapon barai barapomonae jeye: ‘Paxam irũrũ painta nacuire ta uva pabi. Nexata beta paca matoma catsibinchi, xua pocotsi paratiyo po horatha panacuitame nexa’, jei. Bapoxonae barapomonae pona pabi beya penacuichinexa. ⁵Bapon mateinyaxae equeicha pona

xua pejeichinexa ichamonae pomonae pia petanacuichiwichi tsainchi. Barichi equeicha poxonae tabopiya pona xua pejeichinexa ichamonae pomonae pia petanacuichiwichi tsainchi. ⁶Bapon equeicha pona pana beya poxonae xometo iriya ducuaaicha xua pejeichinexa ichamonae pomonae pia petanacuichiwichi tsainchi. Bapon equeicha tane ichamonae pomonae xua jopa iru nacuitompaeyo. Bapon barai barapomonaetha, jeye: ‘¿Eta xua metha came saya anoxuae paumename po panathe, xua jopa panacuitompaem?’ jei pabi pexeinaein. ⁷Barapomonae jume nota, jeye: ‘Canta dapon aibi pon pata tana neitorobiwa tsane’, jei. Nexata bapon barai barapomonaetha, jeye: ‘Paxam paponare, iruru painta nacuire ta uva pabi, nexata beta paca matoma catsibinchi xua pocotsi paratiyo po horatha painya nenacuichixae tsane’, jei pon pabi pexeinaein.

⁸“Poxonae quirei tsanaicha pon pabi pexeinaein, bapon itoroba pon pia petayapucaeaeinchi uva pabi, jeye: ‘Inta wabare pomonae inta nacuita yawa matoma catsibare. Tamroropata wabaponde yawa matoma catsibaponde. Copiya matha wabare pomonae opi dubena pomonae inta cotacaya nacuita poxonae xometo iriya ducuaaicha, beya poxonae papataponaena pomonae copiya inta nacuita caemumbotha’, jei.

⁹Nexata copiya pata pomonae cotacaya nacuita poxonae xometo iriya ducuaaicha. Daxita barapoyobe pomonae cotacaya nacuita bara beta matoma catsibatsi xua pocotsi paratiyo caentaqueitha nexa, bequein bara jopa pin mataqueitha nacuichiyo. ¹⁰Nexata bara iru bapoxonae pata pomonae tamropata notarucupa xua nacuita poxonae tabopiya, bara barapomonae iru beta matoma catsibatsi pocotsi paratiyo caentaqueitha nexa. Bapoxonae iru pata pomonae tamropata notarucupa xua nacuita poxonae mateinyaxae, bara barapomonae iru beta matoma catsibatsi, pocotsi paratiyo caentaqueitha nexa. Bapoxonae iru pata pomonae tamropata notarucupa xua nacuita poxonae xometo tajü beequeina, bara barapomonae iru beta matoma catsibatsi, pocotsi paratiyo caentaqueitha nexa. Bapoxonae iru nama pata pomonae tamropata notarucupa xua nacuita caemumbotha. Barapomonae najei: ‘Metha equeicha mataropeichiya naca catsibina paratixi tsipei nacuitatsi caemumbotha’, najei barapomonae. Daumetha barapomonae saya matoma catsibatsi, pocotsi paratiyo caentaqueitha nexa. ¹¹Ichitha poxonae barapomonae matoma nota, itaconacarucupa pontha pon peitorobixae barapomonaetha. ¹²Barapomonae anaya jei bapontha: ‘Pomonae nacuita cotacaya, saya cae horatha nacuita, barapomonae matoma catsibame pocotsi matoma pana catsibame. Nama apara paxan daunweya panacuitan, yawa atsatha daunweya panacuitan’, jei barapomonae. ¹³Ichitha pon pabi pexeinaein jume nota caeintha barapomonae jiwapanintha, jeye: ‘Tajiton, apara jopa bara abe pacata exanaetsi. Canaunxuae paca muxu tsipaebatsiba paca jeichi: Paca matoma catsibinchi xua pocotsi paratiyo caentaqueitha nexa,

paca jeichi. ¹⁴Bara jinya matoma pire. Bara nawiyama. Xan ichichipan tacoya matoma catsiban pomonae quiripitha nacuita barapocotsi matoma, pocotsi matoma jupa paca catsibatsi. ¹⁵Apara xan tawaxae itacoxonan xua tantoma exanaewa. Apara pauwame ichamonae xua jopa taasiwaxae xua tantoma exanaewa ichamonaetha', jei pon pabi pexeinaein.

¹⁶“Nacom barapocotsi juta coyeneya cana ichi tsane jiwitha icha pon pabi pexeinaein ichi poxonae cana exana pomonaetha pomonae pia petanacuichiwichi. Pomonae xua anoxuae pepawi naexana, pomonae jiwi jopa petsita ainya cui jiwichi po cae pin nacuathe, barapomonae Nacom pia peitorobi nacuatheicha peainya cui jiwi tsane. Pomonae xua anoxuae pomonae xua jiwi petsita ainya cui jiwichi po cae pin nacuathe, barapomonae hexa Nacom pia peitorobi nacuatheicha jopa peainya cui jiwi tsane”, jei Jesús.

**Meje yabara poxonae Jesús nayabara paeba acoibi
po coyenebetha xua poxonae tupaena
(Mr 10.32-34; Lc 18.31-34)**

¹⁷Bapoxonae pirapae Jesús pona Jerusalén tomara beya. Poxonae cataunxuae Jesús pijimonae baru ecapona namtotha pomonae doce poyobe tatsi, barapo doce poyobe Jesús meisa waba aisowa beya petsipaebinxexa.

¹⁸Jesús jeye:

—Anoxuae ponaeinchi Jerusalén tomara beya. Barapo tomaratha xan ponxaein Nacom Tananeitapetsin necaenaetsina sacerdotemonae pia pentacaponaeawitha tatsi yawa pomonaetha pomonae jiwi pecuidubiwi Moisés pia peitorobi coyene tatsi. Barapomonae necaenaetsina ichamonaetha xua ichamonae tana nebexubiwa tsane. ¹⁹Bapoxonae daxita barapomonae necaenaetsina pomonaetha pomonae penanapaincha jinompaewi xua icha nacua werena peponaewi xua barapomonae tana necui caponaenexa. Matautano barapo penanapaincha jinompaewi nebena yawano tupaerucua neexanaena naetotha. Daichitha poxonae acoibi po matabibe yapu jopaena equeicha Nacom asu neexanaena petupa cuiru coyene weya, jei Jesús.

**Meje yabara poxonae Jesús wucatsi powa,
Santiago pena tatsi xua iru Juan pena tatsi
(Mr 10.35-45)**

²⁰Nexata petsiriwa Jesús imoxoyo caquita uncuatabatsi. Barapowa, Juan pena tatsi yawa Santiago pena tatsi. Juan iru Santiago, baponbe Zebedeo pexantobe tatsi. Barapo petsiriwa pexantobe baru patopa Jesthatha. Barapo petsiriwa pentabocototha uncua Jesús peitabaratha tatsi, xua Jesús pewucaenexa tsainchi. ²¹Jesús barai bapowatha, jeye:

—¿Eta pocotsiwa jinya neww̄caetsi? jei.

Bapowa Jesús jume notatsi, jeye:

—Poxonae matacabi patopaena po mataqueitha itorobiya ewatsiname jiwi barapo mataqueitha caww̄catsi xua bara itorobiname barapo taxantobe, xua nantiyabe peecaewa tsanebe xamtha, xua ich̄un necoxa weya peecaewa tsane, xua ich̄un netsocona weya peecaewa tsane, jei.

²²Ichitha Jesús baraibe baraponbe, jeye:

—Paxambe jopa payaputaembe xua pocotsiwa pana neww̄caenamebe. Poxonae ichamonae abe inta exanaena bara saya copatsin xua barapomonaē bara neperaxa jubina. Barichi poxoru paxambe pana neantobem, ¿bara ir̄u paca itac̄upabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara t̄upa neexanaena. Barichi, ¿bara ir̄u paca itac̄upabe xua bara pacopatsinamebe xua bara ichamonae t̄upa paca exanaenabe? jei Jesús.

Santiago peweichobe jume notabe, jeibe:

—Aa, bara pana itac̄upabe, jeibe.

²³Jesús jume nota, jeye:

—Bara bara xainyei barapocotsi coyene ichamonae paca cana exanaenabe. Ichamonae paca peraxa exanaenabe. Matautano t̄upa paca exanaenabeno icha xan necana ichi tsane. Nama xua xantha nantiya paecamebe xua ich̄un pocotsiwa tacoxa weya eca, yawa xua ich̄un tatsocona weya eca, baxua jopa tacoya yabara itorobinyo. Saya jame Taxa Nacom meisa baxua taexanaena pomonaetha pomonaē caena bayatha tsiw̄naeta xua peenaewa tsane, jei Jesús.

²⁴Jesús pijimonaē pomonaē umena, pomonaē diez poyobe jume tane xua Santiago ir̄u Juan Jesús w̄w̄catsibe. Bapoxonae barapo diez poyobe, Santiago ir̄u Juan yabara anaepanar̄uc̄upatsibe. ²⁵Ichitha Jesús pia xainya berena pijimonaē waba yawa namchiya jeye barapomonaetha:

—Paxam bayatha pataneme po coyenewa ba exana pomonaē jopa judiomonaē naexanaeyo. Barapomonaē ba nantaut̄a pomonaē pia nacua tatsi pia petaewatsiwichi tatsi. Daichitha barapo nacua peewatsiwi aebiya itoroba piamonaē, xua daxota bichocono jiwi taayapubetsi. ²⁶Ichitha nama paxam barapocotsi coyeneya jopa barapaichim tsane. Seicaya nama icha j̄unt̄u coyenyatha paca itorobatsi. Icha pon paxam jiwana icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina.

²⁷Matautano icha pon paxam jiwana icha bapon ichichipa naexana be pocotsin bichocono ainya cui penaexanaein xua beyacaincha ichamonae, bapon bewa copiya matha daxita paxam amanaya pacata nacuichina pia coya peichichipaexae. ²⁸Icha be pocotsi coyeneya icha ichin, bara paichinde. Xan ponxaein Nacom Tananeitapetsin patopeican xua

tanacuichinexa tsane ichamonae nexa. Apará jopá baxua tsipatopaeinyo xua ichamonae inta penacuichiwanexa tsane. Saya patopeican tsipei ichichipan xua daxita carepaya jiwi tayawenaewa tsane. Matautano patopeican xua tatsitupaenexa tsane be pentoma xua daxita jiwi pepanenebiyaenexa abe pia peexanae cuiru coyenein weya tatsi, jei Jesús pijimonaetha.

Meje yabara poxonae Jesús axaibi exana ponbe peitata nacútsinbe
(*Mr 10.46-52; Lc 18.35-43*)

²⁹Poxonae Jesús pijimonaé baru pontaba Jericó tomara weya, bapoxonae Jesús puna poinchi pin bicheito. ³⁰Barapo Jerusalén namto iya ecabe pon peitata nacútsinbe. Poxonae baponbe, ponbe peitata nacútsinbe jume yaputanebe xua juinya Jesús xentapona, bapoxonae jume daunweya wawaibe, jeibe:

—iPon jiwi Necanamataxeinaem, ponxaem David pia pemomoxi susato jiwanaipim, pana neyabara najuntú coyene xeinarebe xua pata taneyawenaenexamebe! jei baraponbe ponbe peitata nacútsinbe.

³¹Barapo peitata nacútsinbe jume matawentsibe barapo pin bicheito xua moya peecaenexabe. Ichitha baponbe equeicha jume daunweya wawaibe, beyacaincha xua poxonae copiya, jeyebe:

—iPon jiwi Necanamataxeinaem, ponxaem David pia pemomoxi susato jiwanaipim, pana neyabara najuntú coyene xeinarebe xua pata taneyawenaenexamebe! jei baraponbe ponbe peitata nacútsinbe.

³²Nexata Jesús naruntaba yawa wabatsibe ponbe peitata nacútsinbe. Bapoxonae baponbe Jesús yainyaba, jeye:

—¿Eta xua jinya pata cata exanaetsibe? jei Jesús.

³³Baraponbe Jesús jume notatsibe, jeibe:

—Pon jiwi Necanamataxeinaem, bepanecotsinbe cuinaya, jeibe baponbe. ³⁴Nexata baponbe Jesús yabara najuntú coyene xeinabe xua pia peyawenaewa tsane. Bapoxonae baponbe Jesús itamaiquei jayababe. Bapoxonae baponbe nainya necotaxubabe. Jesustha napuna ponabe.

Meje yabara poxonae Jesús Jerusalén tomaratha patopa
(*Mr 11.1-11; Lc 19.28-40; Jn 12.12-19*)

21 ¹Poxonae bara itiya pona Jerusalén tomara, Jesús bara muxu pebaru patopae pijimonaé Betfagé tomaratha. Barapo Betfagé tomara demxuwa itapatororotha eca po demxuwa pewun Olivowa, tsipei baxota umena olivo naein. Bapoxonae Jesús itoroba pebinbe nacueyatabe xua doce poyobe jiwanaibe. ²Jesús baraibe baponbe, jeye:

—Paponarebe po tomara painya itabaraya equiya. Poxonae papatopaenamebe barapo tomaratha pacaxinaenamebe burra pesowato xua pon quetanotatsi yawano xua penun quetanotatsi pon pebto. Barapo

burra paisanaxorebe yawa payama carenandebe coxiwa yawa penunno. ³Icha ichun paca barai tsane: ‘¿Eta xua payama isanaxubamebe burra?’ jei tsane, nexata pajandebe: ‘Pon jiwi Pecanamataxeinaein bepa pata yama caiyaeinjei, tsipei pinae nantawenona’, pajandebe. Nexata bapoxonae nainya bapon paca cobe itorobinabe xua painya neyama carenaenexambe tsane, jei Jesús.

⁴Poxonae Jesús daxita baxua paeba bara bapoxonae nayabara jume weta pocotsiwa bayatha Isaías yabara paeba pijume diwesitha xua Mesías pepatopaewa tsane Jerusalén tomaratha, jeye:

⁵“Patsipaebare Sión tomarapiwi.

Pajande: ‘Pataename pon itorobiya painya pepa paca Ewatsin.

Pacata juntea patopaena, xua burriyotha equeicaena, penuntha xua burra pesowato coxi tatsi’ pajande”, jei pon Nacom pia peitorobi jume pepaebin, bapon Isaías, xua Mesías yabara paebatsi.

⁶Nexata Jesús pijimonae jitonbe tatsi ponabe. Matautano baponbe exanabe pocotsiwa bayatha Jesús itoroba. ⁷Baponbe yama carenabe burra pesowato yawa yama carenabe penun. Baponbe pia paparuwan tsijuma jebicabe po paparuwan matha weruyabe coxiwathano yawa penunthano. Bapoxonae Jesús equeica penuntha. ⁸Jiwi, barapo jiwi pin bicheito bichocono. Bapoxonae barapo pin bicheito namtotha paparuwan yerababa jejabapoinya. Ichamonae peaxu ucuboba po axu icha coichaxu axu ichi. Bapoxonae barapo axu, namtotha axu jejabapoinya. Daxita barapomonae barapo coyene exana xua Jesús pebaru cui itura jinaenexa tsainchi. ⁹Pomonae, xua Jesús tsiwana enapoinchi iruru pomonae Jesús peputha taenapoinchi daxita barapomonae bichocono jume daunweya wawaya jeye:

—iPai jayana, barabu jiwi baru cui itura jinaena bapon pon David pia pemomoxi susatopin tatsi! Bapon jiwi yabara jei: ‘iBapon David pexanto tatsi!’ jei. iMaisa Jesús pon jiwi itorobiya pia pepa peewatsinchi, maisa wuna! iBapon patopa Nacom peitorobixae! iMaisa Nacom bichocono wuna jaintatsi pon athabeicha eca! jei barapomonae.

¹⁰Poxonae Jesús patopa Jerusalén tomaratha, daxita barapo tomarapiwi najume cayayatsiya paeba. Cae bicheitomonae nayainyaba, jeye:

—¿Jintam metha bapon jane? najei.

¹¹Ichamonae jume nota, jeye:

—Apara bapon Jesús pon Nacom pia peitorobi jume pepaebin, pon Nazaret tomarapin po tomara eca Galilea nacuatha, jei ichamonae xua iru ichamonae jume notatsi.

**Meje yabara poxonae Jesús aisowa benapuna torobabiya
pomona Nacom pin pia botha pecaenaetsiwi
(Mr 11.15-19; Lc 19.45-48; Jn 2.13-22)**

¹²Bapoxonae Jesús joniya Nacom pin pia botha, yawa aisowa benapuna torobabiya pomona caenaeta baxota. Jesús tabu tayebiya bebai iratha pocotsiwa pexaethopaewan, po pexaethopaewantha nantiya nacatsiba paratixi yawa xua tabu tayebiya bebai iratha peenaewan po peenaewan ichaxota ena pomona caenaeta topibo. ¹³Jesús barai barapomona:

—Nacom Pejume Diwesitha namchi, jeye: ‘Tabo apara po botha jiwi tanetsipaebinxeta tsaibi tsane barapo botha’, jei Nacom Pejume Diwesitha. Ichitha paxam barapo bo be pecaibiwi pia muthu tutu pacana exaname ichaxota pijunuwi nantsiyabeibathopa tsipei baxota panacaetutame saya u xua painya necaibinxam tsane paratixi pomonaetha pomona xua pateiba xua Nacom petsipaebinxatsi, jei Jesús.

¹⁴Barapo Nacom pin pia botha tatsi, Jesús imoxoyo caquita umenarucupatsi pomona peitata nacutsiwi. Iruru Jesús imoxoyo caquita umenarucupatsi pomona pejayujayujeiwi. Jesús axaibi exana daxita barapomona. ¹⁵Sacerdotemona pia pentacaponae tatsi iruru pomona jiwi pecuidubiwi Moisés pia peitorobi coyenewa tatsi, daxita barapomona tane pocotsiwa Jesús exana pia pexeinya petsita itutsi coyenewatha. Daxita barapomona jume tane xua pexui wawai Nacom pin pia botha tatsi xua pexui Jesús yabara jeichichi: “iPai jayana, barabu jiwi baru cui itura jinaena bapon pon David pia pemomoxi susato jiwanapin tatsi! Pon jiwi yabara jei: ‘Bapon David pexanto tatsi’, jei”, jei pexui. Bapoxonae daxita pomona sacerdotemona pia pentacaponae tatsi iruru pomona jiwi pecuidubiwi Moisés pia peitorobi coyenewa tatsi anaepana poxonae Jesús cui tainchi yawa xua jume tainchino. ¹⁶Daxita barapomona jopa ichipaeyo xua pexui paeba, daxota anaya Jesús jeichichi:

—¿Bayatha jume taneme xua baxua pexui cayabara wawaya namchi? jei barapomona.

Jesús jume nota barapomona, jeye:

—Aa, bara bayatha jume tan xua pexui newuna jainta. Paxam bayatha payorobame Nacom Pejume Diwesi xua pexui bara cui copatatsi xua bara wuna pejainteibiwa tsane. David pexui yabara jeichichi Nacom Pejume Diwesitha, jeye:

‘Xam Nacom, cana exaname pexui poxi isainatsi,
iru poxi jinompena, xua barapoxi pexeinya
weixi cayabara caununaya naxuna
poxonae sawuna jainchina’,
jei David Nacom Pejume Diwesitha,

jei Jesús daxita barapomonaetha.

¹⁷Nexata Jesús daxita barapomonaē wepu pona Jerusalén tomara weya. Bapoxonaē Betania tomara bewarapiya. Baxota merawi maiteca.

**Meje yabara poxonaē Jesús biatane
higuera nae xua jopa penacoichixae
(Mr 11.12-14, 20-26)**

¹⁸Poxonaē Jesús caemumbotha equeicha caibe iya Jerusalén tomara beya, bichocono jainpa pona. ¹⁹Bapoxonaē Jesús imoxoyo namtotha taenota higuera nae. Imoxoyo caquita pona piyain, pia taetsi pethei. Daichitha barapo naetha Jesús jopa taeyo pethei, saya Ꞇ noxu tane. Nexata Jesús biataenota higuera nae, jeye:

—Bapana equeicha jopa nacoichim tsane pethei, jei Jesús higuera naetha.

Bapoxonaē caena nainya higuera nae yꞆnuncua. ²⁰Poxonaē Jesús cui tainchi pijimonaē baxua barapomonaē yabara najꞆntꞆ coyene cui cabenaeca bichocono. Yawa Jesús yainyabatsi pijimonaē, jeye:

—¿Eta xua metha higuera nae nainya yꞆnuncua? jeichichi Jesús pijimonaē.

²¹Jesús jume nota pijimonaē, jeye:

—Bara xaniyeya paca tsipaebatsi. Icha xanepanaya payabara jume cowꞆntame xua Nacom painya nepaca cayawenaewa xuano xua jopa ainya ꞆnthꞆton paxeinaem bara paca itacꞆpaena xua painya nepaebiwa icha ichin xua cana exanan higuera nae. Matautano bara paca itacꞆpaena xua painya nejeiwa uruto beya xua pajam: ‘Uruto natsixitabare, mar mene beya jopare’, xua painya nejeiwa. Bapoxonaē bara baxua jopa bayathiyo tsane. ²²Daxita xua xuan pocotsiwan Nacom beya pawꞆcame, icha bara xanepanaya pajume cowꞆntsiya wꞆcame, bara Nacom paca catsibina baxuan, jei Jesús.

**Meje yabara xua Jesús pia peitorobi coyenewa xeina
(Mr 11.27-33; Lc 20.1-8)**

²³Nexata bapoxonaē Jesús joniya Nacom pin pia botha tatsi. Poxonaē cataunxuae Jesús baxota cuidubuncua jiwi, bapoxonaē Jesús imoxoyo caquita umenarꞆꞆpatsi sacerdotemonaē pia pentacaponawewi tatsi irꞆ judiomonaē pia pitiri jiwi tatsi. Daxita barapomonaē Jesús yainyabatsi, jeye:

—¿Eta po peayapusꞆ itorobi coyenewatha cuidubame baxuan? ¿Jintam cacata barapo peayapusꞆ itorobi coyenewa?

²⁴Jesús jume nota barapomonaē, jeye:

—Xan irꞆrꞆ tha barichichi paca yainyabinchi. Icha beta pana nejume notsiname, bapoxonaē xuya yabara paca tsipaebinchi xua po peayapusꞆ

itorobi coyenyatha taexanaewa baxuan. ²⁵ ¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús, xua Juan yabara paebatsi pon caena bayatha tupa.

Nexata daxita barapomonae caemonae najume matsontsonoba, najei: “¿Eta xua metha jei tsainchi? Icha jei tsipaetsi: ‘Juan cui itorobatsi Nacom xua pebautisabiwa jiwi’, metha naca jei tsipae: ‘¿Eta xua metha nexata jopa pajume cowantsim Juan?’ metha naca jei tsipae Jesús. ²⁶ Jiwi cui cunuwatsi icha jeichi: ‘Juan cui itorobatsi jiwi xua bautisaba’, icha jeichi. Metha bapoxonae jiwi naca casebichipa anaya. Tsipei daxita jiwi Juan yabara jume cowantatsi xua bapon apara pon Nacom pia peitorobi jume tatsi pepaebi jiton”, najei barapomonae. ²⁷ Nexata barapomonae Jesús baraichi, jeye:

—Canta jopa payaputaeyno, jei barapomonae.

Nexata Jesús barai barapomonae, jeye:

—Nexata barichin tsane, jopa yabara paca tsipaebi tsainchi po peayapusu itorobi coyenyatha xua daxita taexanaewan, jei Jesús.

**Meje yabara poxonae Jesús cuiduba pecayabara juta
pepaebi diwesiyo xua pebin ainya pexantobe tatsi**

²⁸ Equeicha Jesús namchi Nacom pin pia botha daxita barapomonaetha, xua sacerdotemonae pia pentacaponawitha tatsi, iru judiomonae pia pitiri jiwitha tatsino. Jesús jeye:

—Moya pana nejume naitaeware pocotsiwa paca tsipaebinchi. Pebin nacueyatabe poyobe tatsi pexantobe tatsibe. Bapon caeintha nacoxi barai, jeye: ‘Owae, inta anoxuae uva bacabo pabi nacuire’, jei. ²⁹ Bapon jume notatsi pexanto jeye: ‘Bara, aichaxaibin’, jeichichi bapon pexanto. Daichitha equeicha bapon pexanto tatsi nanta xeinataba, bapoxonae pona xua penacuichinexa uva pabi, paxa tatsi pia pabi tatsi. ³⁰ Pirapae equeicha ichuntha, nacoxi barai barapo jumetha, jeye: ‘Owae, inta anoxuae uva pabi nacuire’, jei bapon pexantotha. Bapon paxa jume nota, jeye: ‘Je, moya daichane, methaunxuae ponaein’, jei paxatha. Daichitha bapon jopa ponaeyo. ³¹ Incane yabara paca yainyabinchi xua bapon barapo pexantobe tatsi, ¿eta po pewowinda pon exana pocotsiwa paxa itorobatsi? jei Jesús.

Barapomonae Jesús jume notatsi, jeye:

—Pon copiya paxa itorobatsi, jeichichi Jesús barapomonae.

Nexata Jesús jume barai barapomonae, jeye:

—Bara xaniyan yabara paca tsipaebatsi, pomonae paratixi pentoma notebiwi po paratixi jiwi bewa catsibina pon romanomonae itorobiya pia pepa peewatsinchi nexa, iruru yabuxi powaxi pesi cui weiweinaewaxi. Bara bequein barapomonae peantucoyenebewi, daichitha barapomonae

naexanaena Nacom piamonae tatsi jiwana tatsi, beya poxonae paxam iru panaexaname Nacom piamonae tatsi jiwana tatsi. ³²Juan pon jiwi Pebautisabin patopa xua pia nepaca cuidubinexa xua pocotsiwa bewa paexanaename painya nexeiaenexa tsane po juntu coyene pexanepanae juntu coyene. Daichitha paxam jopa pajume cowuntsim pocotsiwa Juan paeba. Ichitha Juan yabara jume cowuntatsi pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchichi nexa. Iruru yabuxi powaxi pesi cui weiweinaewaxi Juan yabara jume cowuntatsi po coyene Nacom Juan peitorobiwatsi. Nama paxam bequein bara Juan pacui taneme pocotsiwa exana, daichitha jopa painya neauraxae poxonae abe paexaname. Daxota icha juntu coyene jopa paxeinaem xua painya nejume cowuntsinexa Nacom, jei Jesús.

Meje yabara poxonae Jesús paeba pecayabara juta pepaebi diwesiyo pomonae xua abe exana, pomonae petayapucaenaewi uva pabi
(*Mr 12.1-12; Lc 20.9-19*)

³³Nexata Jesús equeicha namchi jiwitha, jeye: “Incané pana nejume naitaeware xua paca tsipaebinchi pecayabara juta pepaebi diwesiyo. Matha iruru pebin pia pabi xeina. Bapon uba po unbo pewun uva cuei unbo. Yawano yapu curarata barapo uva pabi ibowantha xua jopa pejojondenaenexa ichamonae barapo pabitha. Yawano baxota ibo fetó exana, xua barapo ibo fetótha pecubinexa uva cuei. Matautano baxota exananota bo po bo tacha xua baxota pebin bara wenecotequeica uva pabi. Bapoxonae bapon itoroba pomonae pia uva pabi pia petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona. ³⁴Barapo matabi tsuxubi po matabitha uva cuei naweta. Bapoxonae barapo mataqueitha pomonae pabi petayapucaenaewi jiwana itapetanota xua penawetsiwa. Bapoxonae pon uva pabi pexeinaein, bapon pomonae petanacuichiwichi jiwana itoroba, xua petawucaenexa tsainchi uva cuei pomonae beya, pomonae pabi petayapucaenaewichi. ³⁵Ichitha barapomonae, pomonae pabi petayapucaenaewichi teica, teiquebatsi pomonae itorobatsi, pomonae pabi pexeinaein itoroba uva pabi petayapucaenaewichi tatsi beya. Barapomonae pomonae petayapucaenaewi pabi, cuainta caeintha pomonae penajume carutsi jiwichi jiwapanintha. Ichun bexotsi. Ichun ibotontha cuinbabatsi. ³⁶Pon pabi pexeinaein barichi equeicha itoroba ichamonae pomonae pia petanacuichiwichi. Equeicha barichi pomonae pabi petayapucaenaewi bara jutiya cana exana barapomonaetha.

³⁷“Bara nama matapainya pexanto itoroba. Bapon najei: ‘Barapomonae metha taxanto inta yabara baru cui itura jinaeinchi, daxota itoroban

bapon', najei bapon. ³⁸Dapo jumetha pomonae pabi petayapucaenaewi poxonae bapon tainchi barapomonae najei: 'Apara bapon paxa copiniwa pichina. Daxota bapon bu bexotsi xainya xeinatsi barapo uva pabi', najei barapomonae. ³⁹Barapo pexanto tatsi uva pabi juma bemaxu cayiyatsi. Baxotiya bexotsi", jei Jesús.

⁴⁰Nexata Jesús barai barapo jiwí Nacom pin pia botha, jeye: "Poxonae pabi pexeinaein patopaena, ¿eta be cana ichi tsane pomonaetha pomonae barapo uva pabi pia petayapucaenaewichi?" jei Jesús.

⁴¹Barapomonae Jesús jume notatsi, jeye:

—Bapon bewa jutebina barapomonae, jopa weyatae tsane barapomonaetha xua peantucoyeneyapube jiwixae. Bapoxonae itorobina ichamonae xua petayapucaenaenexa tsainchi barapo uva pabi. Barapo pabi petayapucaenaewi matha notsina uva cuei xua naweta. Bapoxonae tsabina pabi pexeinaein nexa yawa iruru barapomonae nexaru, jei barapo jiwitha pomonae peenaexae Nacom pin pia botha.

⁴²Nexata Jesús barai barapomonae xua nayabara paeba, jeye:

—iPaxam bara bayatha payorobameba Nacom Pejume Diwesitha! Barapo diwesitha neyabara caunuta poxonae iboto yabara paeba, xua jeye:

'Pebiwí pomonae ibo bon peacabiwi,
barapo pebiwí xuba po iboto tabu caboca
po iboto peainya cui iboto.
Ichitha Nacom itapeta barapo iboto xua
petabu cabocaenexa barapo peainya cui ibotoxae.
Waxainchi nanta xeinatsi jeichichi:
Maisa pocotsiwa Nacom exana naca tsita xanepana',
jeichichi, jei Nacom Pejume Diwesitha
xua neyabara caunuta.

⁴³Daxota paca tsipaebatsi, Nacom paca itawetsina xua jopa painya nenaexanaenexa tsane Nacom piamonae jiwana tatsi pam. Barapo coyenewa xua Nacom piamonae jiwana tatsi penaexanae coyenewa Nacom pichina painya xainya weya xua ichamonaetha pecatsinexa pomonaetha pomonae petsita juntu coyene xanepanaewichi. ⁴⁴Incane iboto yabara paca tsipaebinchi. Barapo ibototha poxonae ichauyo jopeica pepurwixi tsanaya. Matautano poxonae barapo iboto ichauyo matatsun jopeicatsi pebeno tsanaya. Icha barapo iboto ichi poxonae cana exana ichauxitha peainya cui ibotoxae, xan barapocotsi juta coyeneya barichin pomonaetha pomonae jopa tana nejume cowuntsiwi. Pia jopa tana neyaputaexae barapomonae daxota peraxa exanaein, jei Jesús.

⁴⁵Sacerdotemonae pia pentacaponae tatsi iru fariseomonae, poxonae jume tane barapo pecayabara juta pepaebi diwesi, xua Jesús paeba, barapomonae yaputane xua apara bara Jesús yabara paeba barapomonae.

⁴⁶Bequein barapomonaē Jesús muxu pewaetabichi, ichitha barapomonaē junuwa. Jiwi cunuwatsi, tsipei daxita jiwi Jesús xanepanaya yabara paeabatsi xua pinae Jesús Nacom pia peitorobi jume pepaebiwi jiwana tatsi.

**Meje yabara poxonaē Jesús cuiduba pecayabara j̄ta pepaebi
diwesiyo xua pin penabanaewa peexanaewa tsane
(Lc 14.15-24)**

22 ¹Equeicha Jesús tsipaeba jiwitha pecayabara j̄ta pepaebi diwesiyo, jeye:

²“Nacom cana exana piamaetha pomonaē j̄ntu coyene itorobiya ewata, icha pocotsin ichi pon jiwi itorobiya pia pepa peewatsinchi poxonaē waba, xua poxonaē ichamonaē wabatsi xua petsinacaetutsinexa pexaewa xua penabanaenexa. Baxua exana poxonaē pexanto tatsi pecotsiwa pepichixae. ³Barapon pon jiwi itorobiya pia pepa peewatsinchi itoroba pomonaē pia petanacuichiwichi xua petawabinexa tsainchi pomonaē xua bayatha petsipaebixae xua petapatsiwa tsainchi pia botha xua bepa pinae petanabanaewa tsainchi pia botha. Daichitha barapomonaē aichaxaibi xua pepatsiwa tsane. ⁴Bapoxonaē barapon pon jiwi itorobiya pia pepa peewatsinchi equeicha itoroba ichamonaē pomonaē pia petanacuichiwichi, jeye barapomonaetha: ‘Pomonaē bayatha tsiwaban pexaewa xua penabanaenexa painta tsipaebare pajande: Bepa pinae nainya papatsim, tsipei pinae bayatha pexaewa canacui w̄naeta. Tsipei caena bayatha pinae cobe itoroba xua petajutebiwa tsainchi vacan, yawano po duwein bichocono nasita. Daxota bewa pinae nainya paponam bara beya xua painya nenanabanaenexa pexaewa, yaitama tsipei pinae pexanto tatsi pichina pecotsiwa, pajande’, jei barapon pon jiwi itorobiya pia pepa peewatsinchi. ⁵Daichitha barapomonaē pomonaē tsiwabatsi pexaewa, barapomonaē jume naitemata, saya meisa u naitomatsiya exana piawan. Barapomonaē jiwana pin pia pabitha pona. Iru ichun piawa caenaetauya. ⁶Ichamonaeru teica, pomonaē pon jiwi itorobiya pia pepa peewatsinchi itoroba, barapomonaē teicatsi. Yawano bichocono abe exainchi beya poxonaē nama werapa. ⁷Nexata bapon pon jiwi itorobiya pia pepa peewatsinchi bichocono caseba pomonaē petajutebixaetsi pomonaē bapon itoroba. Nexata bapon itoroba pia soldadomonaē xua barapomonaē xuya pejutebinexa tsainchi matauta xua tomara petatautsinexa tsainchi. ⁸Bapon pirapae equeicha barai ichamonaetha pomonaē pia petanacuichiwichi jiwitha, jeye: ‘Bayatha bequein daxita wetan xua penabanaewa tsane, daichitha pomonaē waban jopa xanepanaya nejume jejeyo daxota jopa bewa patsi tsane xua penabanaenexa. ⁹Daxota paponde tomara namtontha, po namtontha pin namtontha, baxotiya pomonaē poxonaē pacaxibeibame, barapomonaē

painta wabare', jei bapon. ¹⁰Pomonae petanacuichiwi, barapomonae pona namton beya. Bapoxonae barapomonae, daxita pomonae caxiba namtontha, matacayiya pon jiwi itorobiya pia pepa peewatsinchi pia bo tatsi beya. Pomonae abe peexanaewino carendenatsi, pomonae xanepanaya peexanaewino carendenatsi, beya poxonae bo tutu nayucaxuba.

¹¹“Nexata pon jiwi itorobiya pia pepa peewatsinchi bo tutu joniya petaenexa tsane pomonae pata. Bapon itabara tane pebin xua iruru pon baxota eca. Ichitha barapo pebin pexeinya paparuwa jopa nama xatatsiyo icha be jopa ichiyo ichamonae, tsipei ichamonae pexeinya paparuwa nama xataba xua po paparuwa jiwi ba nama xataba poxonae pona penacuettsiwatha xua penabanaenexa pexaewa poxonae pebin pecotsiwa pita. ¹²Pon jiwi itorobiya pia pepa peewatsinchi barai bapon, jeye: ‘Tajiton, ¿eta xua metha xote naecame xua matauta jopa pexeinya paparuwa nama xatatsim?’ jei bapon. Ichitha bapon saya moya eca. ¹³Bapoxonae pon jiwi itorobiya pia pepa peewatsinchi barai pomonaetha pomonae pexaewa carena tsaibi pexaethopaewatha, jeye: ‘Bapon pacobe caecunta cure yawa pataxu caecunta cure, yawa aisowa beya paxore ichaxota quirei. Baxota bapon wecoyei tsane yawa baxota nantanuweya nanta jayabina, bichocono peatenexae tsane’, jei pom jiwi itorobiya pia pepa peewatsinchi. ¹⁴Barapon pon jiwi itorobiya pia pepa peewatsinchi bequein pinmonae waba ichitha saya tsiquimonaeyo pata penabanaewatha. Icha barapon ichi Nacom bara juta coyene ichiya cana ichi tsane jiwi. Nacom bequein waba pin bicheitomonae, daichitha saya tsicamonaeyo itapetatsi, pomonae Nacom pijimonae tatsi penaexanaenexa tsane”, jei Jesús.

**Meje yabara poxonae Jesús yabara cuiduba paratixi
matoma po paratixi jiwi bewa catsibina pontha pon
romanomonae itorobiya pia pepa peewatsinchi
(Mr 12.13-17; Lc 20.20-26)**

¹⁵Nexata fariseomonae pona Jesús weya, caemonae natsipaeba najei: “¿Eta po peyainyabiwa Jesús taexanaeinchi xua catsawa wanaca jume notsinexa? Bapoxonae waxainchi xain yopitatsi ichamonaetha xua bapon abeya wanaca jume notsiwaxae”, najei fariseomonae. ¹⁶Bapoxonae barapomonae itoroba pia pepuna ponaewichi, matautano barapomonae itorobano pomonae Herodes pia pepuna jinompaewichi. Daxita barapo matabuxuyobe pata Jestustha pomonae fariseomonae itoroba. Barapomonae Jesús beya jeye:

—Pon jiwi Necuidubim. Bara payaputan xua bara jume xainyeya tsipaebame jiwi, matautano xua jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po juntu coyene

pexanepanae jũntũ coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi bara catsita najũpa. ¹⁷Incane yabara pana netsipaebare xua nanta xeiname xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacua werena peponaein? Icha jopa tsipae ¿metha daxua abe tsipae? jeichichi Jesús barapomonae pomonae fariseomonaе itoroba.

¹⁸Daichitha Jesús yaputane xua bichocono barapomonaе abeya nanta xeina xua Jesús abe pecanaexanaenexa tsainchi. Jesús barai barapomonaе, jeye:

—Paxam pomonaе itara mexeya xanepanaya pepaеbiwi pam, daichitha abeya pepaеbiwi pam. ¿Eta xua metha pana nejũntũ coyene jũjũtame poxonaе baxua yabara pana neyainyabame? ¹⁹Incane moya painta xawena tha taetsi barapo paratiyo, jei Jesús.

Bapoxonaе barapomonaе barapo paratiyo Jesús tacapoinchi. ²⁰Poxonaе Jesús tane barapo paratiyo, bapoxonaе yainyaba barapomonaе, jeye:

—¿Jintam pejumopere? ¿Yawano jintam wãn ducuaе? jei Jesús.

²¹Nexata Jesús jume notatsi barapomonaе, jeye:

—Apara romanomonae itorobiya pia pepa peewatsinchi, jei barapomonaе.

Nexata Jesús barai barapomonaе, jeye:

—Bara nexata romanomonae itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua irũ piawaxae tatsi, jei Jesús.

²²Poxonaе barapomonaе jume tane xua Jesús beta xanepanaya jume nota, bapoxonaе barapomonaе yabara najũntũ cui coyene cabenaeca. Bapoxonaе ponarũcũpa Jesús weya.

**Meje yabara poxonaе Jesús yabara yainyabatsi po
coyene xua equeicha asũ pomonaе pewerapeibiwi
(Mr 12.18-27; Lc 20.27-40)**

²³Bapoxonaе caena barapo mataqueitha saduceomonaе jiwana pata Jesús pia xantha tatsi xua Jesús piraichi petsipaеbinexatsi. Saduceomonaе barompaya pia pecuidubi coyenewa xeina xua pinaе pomonaе pewerapeibiwi equeicha jopa asũ tsaibiyo. Barapo pecuidubi coyenewa jopa jũpaeyo po pecuidubiwa Jesús pia pecuidubiwa tatsi xua pinaе jiwi equeicha asũ jinompaena poxonaе werapa. Daxota barapo saduceomonaе Jesús tsipaebatsi jeye:

²⁴—Pon jiwi Necuidubim, Moisés nacata tina, namchi: ‘Icha pebin piowa cuenta tũpa, yawa jopa xeinaeyo pexui, xuyapin bewa xuya pentapin pecoutha

coseuri pichina xua bapoxonae pentapin pecoutha pexeinaenexa tsane pexui', jei Moisés. ²⁵Barichi, matha iruru cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. Pon cotacaya naexana xuya pentapin coseuri pita xua bapoxonae pentapin pecoutha pexui pexeinaenexa. ²⁶Bapon iru cuenta tupa, iru jopa xeinaeyo pexui. Bapoxonae ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. Daxita barapo siete poyobe cuenta nanapentapona bapowa poxonae bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. ²⁷Bapoxonae matapainya iru bapowa tupa. ²⁸Xam Jesús, ba paebame, ba jam: Matabi jopaena po matabitha Nacom asu exanaena, xua jiwi asu exanaeinchi muthun wetsina, ba jam. Poxonae barapo matabi jopaena xua daxita jiwi asu jujuinaena, barapo matabitha jintam metha bapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe caepiwi cuenta nanapentapona barapowa, jei saduceomona.

²⁹Nexata saduceomona Jesús jume nota, jeye:

—Paxam apara catsawiya pana nejume notame, tsipei jopa beta payaputaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. ³⁰Poxonae petupaewi equeicha asu jujuinaena, jopa jitha eenaponae tsane. Yawa barapomona jopa pexantixi jitha cuarebaponae tsane. Tsipei barapomona barichi tsane icha be matatsunpiwimona ichi, po matatsunpiwimona Nacom pia nacuatheicha jinompa, xua po matatsunpiwi jopa jitha enaeyo. ³¹Paxam bequein bara bayatha payabara yorobame pocotsiwa Nacom namchi Pejume Diwesitha, po coyene xua pomona pewerapaewi equeicha asu jujuina. Barapo diwesitha Nacom jeye: ³²'Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin', jei Nacom. Baxua Nacom paeba tsipei Abraham iru Isaac iru Jacob pomona bayatha pewerapaewi anoxuae equeicha caewa asu jinompa Nacom pia nacuatheicha tatsi. Pomona pewerapaewi pomona jopa caewa equeicha asu pejinompaewi, barapomona jopa pia Nacom tatsi, pon itabocotha eca. Saya jame meisa pomona bayatha pewerapaewi xua caewa equeicha asu pejinompaewi, pomona pejume cowuntsiwixaetsi Nacom barapomona jame pia Nacom tatsi, pon itabocotha eca, jei Jesús.

³³Poxonae jiwi jume tane pocotsiwa Jesús cuiduba, barapomona yabara najuntu cui coyene cabenaeca.

**Meje yabara poxonae Jesús yabara cuiduba po
peitorobi cui coyene pepa peainya cui coyenewa
(Mr 12.28-34)**

³⁴Poxonae fariseomona yaputane xua saduceomona moya umena xua Jesús beta pejume notsixae, bapoxonae fariseomona nacaetuta xua

equeicha peyainyabiwanexa tsainchi Jesús. ³⁵Barapo fariseomonae caein jiwana, pon peyabara yaputaein Moisés pia peitorobi coyene tatsi, bapon ichichipa xua Jesús pejuntũ coyene jujutsiwatsi xua icha bara metha Jesús abeya jume notsina. Bapon jeye Jesthã:

³⁶—Ja pon jiwi Necuidubim, çeta po peitorobi coyene pepa ainya cui coyenewara po peitorobi coyene beyacaincha xua icha peitorobi coyene? jei.

³⁷Jesús jume nota bapon, jeye:

—Po peitorobi cui coyenewa pepa ainya cui coyenewa jeye: ‘Antobeinde pon jiwi Pecanamataxeinaein, bapon Nacom xua daxita nejuntũ coyene wetsina, matautano xua daxita jinya nepoponae coyenewatha, matautano xua daxita nenanta xeinaewatha nentasipatha’, jei. ³⁸Jame barapo peitorobi coyene bichocono ainya cui coyenewa beyacaincha icha peitorobi coyene. Barapo peitorobi coyene, po peitorobi coyene ainya cui coyenewa, Nacom copiya itoroba. ³⁹Po peitorobi coyene cotacaya itoroba ichaxota ba ‘dos’ jei, barapo peitorobi coyene be jume jũpa po peitorobi coyene copiya ducua. Irũrũ barapo peitorobi coyenewatha jeye: ‘Antobeinde jinya necatsicuarabũ ecaein icha ichim xua jinya coutha naantobem’, jei barapo peitorobi coyenewatha. ⁴⁰Barapo peitorobi coyene jumebe caunuta, xua Moisés pia peitorobi coyenewatha baxua yabara paeba, irũ pomonae Nacom peitorobi jume pepaebiwi pia peucidubi coyenewatha baxua yabara paebã, jei Jesús.

**Meje yabara poxonae Jesús nayabara jei: “Mesías,
¿jintam pia pemomoxi susato jiwana pin tatsira?” jei
(Mr 12.35-37; Lc 20.41-44)**

⁴¹Poxonae fariseomonae cataunxuae nacaetutompa bapoxonae Jesús yainyaba barapo fariseomonae, jeye:

⁴²—¿Eta xua pacayabara nanta xeiname Mesías pon Nacom pia Peitapetsin? ¿Jintam pia pemomoxi susato jiwana pin tatsira? jei Jesús.

Barapomonae Jesús jume notatsi, jeye:

—Apara David, pon Israel nacuapiwi itorobiya pia pepa peewatsinchi, bapon pia pemomoxi susato jiwana pin tatsi, jei fariseomonae.

⁴³Bapoxonae Jesús barai barapomonae, jeye:

—David yabara paeba xua Mesías apara pia Pecanamataxeinaeinchi tatsi poxonae David cueicueijeje exanatsi Nacom pia Pejumo pe tũnaxũ tatsi.

⁴⁴David salmos penaxũnae wei diwesitha bayatha jeye:

‘Nacom pon Pecanamataxeinaein jiwi,
Tanecanamataxeinaein baraichi pon Mesías, jeichichi:
Tacoxa werena ecare, beya abũ tsane poxonae
necaaitafaetabi jiwi pia pecanamataxeinaeinchi

tatsi caexanaeinchi, jei Nacom',
 jei David salmos penaxūnae wei diwesitha.

⁴⁵Icha David Mesías yabara jei: 'Bapon Mesías Tanecanamataxeinaein',
 jei, ¿eta xua metha tsipae xua Mesías apara David pia pemomoxi susato
 jiwanapin tatsi? jei Jesús.

⁴⁶Daxita barapomonaе jopa itacupaetsi xua Jesús pejume notsiwatsi
 tsainchi, poxonaе pinae David paeba xua pinae jei: 'Bapon Mesías
 Tanecanamataxeinaein', jei. Bara nama barapo matabitha weya,
 equeicha nama Jesús jopa bepeyainyabiwatsi barapomonaе.

**Meje yabara poxonaе Jesús muxuweta jiwi xua pomonaе fariseomonaе
 irū pomonaе jiwi pecuidubiwi Moisés pia peitorobi coyene tatsi
 barapomonaе pecuiyainwa tatsi**
(Mr 12.38-40; Lc 11.37-54; 20.45-47)

23 ¹Nexata Jesús barai pin bicheito jiwi irū pijimonaе, jeye:
²"Pomonaе jiwi pecuidubiwi Moisés pia peitorobi coyene
 tatsi irū fariseomonaе daxita barapomonaе pia pecuidubi coyene
 xeina xua po coyene jiwi yaputane exanatsi po coyene Moisés pia
 peitorobi coyenewatha paeba. ³Pacui yabara jume cowunde pocotsiwa
 barapomonaе pia pecuidubi coyenewan tatsi. Matautano paexande
 pocotsiwa barapomonaе paca itoroba. Daichitha jopa paexanaeinde
 pocotsiwa barapomonaе exana tsipei barapomonaе itara beta pepaebiwi
 daichitha yabara jume toxechiya catsawiya exana, barapo peitorobi
 coyenewan. ⁴Barapomonaе be pocotsimonaе poxonaе ichamonaе
 itorobatsi xua pecaponaewa pocotsiwa arewe, pocotsiwa jiwi bapana
 jopa itacupaetsi xua pecaponaewa. Daichitha barapomonaе jopa
 yawenaeyo pocotsiwa ichamonaе itorobatsi. Matautano barapomonaе
 jopa tayoichaeyo cae cobesitiyotha. Icha barapomonaе ichi poxonaе
 ichamonaе itorobatsi xua pecaponaewa pocotsiwa bichocono arewe,
 barapocotsi jata coyeneya ichi pomonaе jiwi pecuidubiwi Moisés pia
 peitorobi coyene tatsi, irū fariseomonaе, daxita barapomonaе itoroba
 pia pecuidubi coyenewatha pocotsiwa paxam painya neexanaenexa.
 Ichitha barapomonaе jopa exanaeyo baxua. Pocotsiwa barapomonaе paca
 cui itoroba pocotsiwa painya neexanaenexa, paxam bapana jopa paca
 itacupaeyo xua painya neexanaewa baxuan. ⁵Barapomonaе ichichipa
 nawita xua jiwi pecui taewa tsane pocotsiwa poxonaе barapomonaе
 exana xua bapoxonaе jiwi penanta xeinaenexa xua barapomonaе
 bara pejuntū coyene xanepanaewi. Daxota barapomonaе tsica cajaxi
 peitapatha querabaduba xua pebocoton. Barapo bocotontha tututha
 iya jeya xua xoxitha tinaduba Nacom Pejume Diwesi. Yawa icha cajaxi
 pemaxutha querabaduba. Yawa barapo bocotontha tututha iya jeya
 xua xoxitha tinaduba Nacom Pejume Diwesi. Matauta barapomonaе

nama xataba po paparuwan bichocono apipiya deca, beyacaincha xua poxonae ichamonae nama xataba po paparuwan apipiya. ⁶Matauta barapomonae nanta caxunaeneiba ichaxota nanta caxunaeneiba pomonae peainya cui jiwi penaexanaewi. Matautano barapomonae judiomonae pia penacaetutsi bontha ichichipa nawita xua nanta caeneiba ichaxota enathopeiba pomonae peainya cui jiwi penaexanaewi. ⁷Matauta barapomonae ichichipa xua jiwi pejacobeibiwa tsane namtontha barapomonaetha, xua jiwi pebaru cui itura jineibinexa barapomonae. Matautano barapomonae ichichipa nawita xua jiwi ainya cui pecana exanaewa barapomonae poxonae jiwi pejei tsaibinexa ‘Pomonae jiwi pecuidubiwi’ poxonae pejei tsaibinexa jiwi.

⁸“Ichitha nama paxam jopa bewa pacopatsim xua bara jiwi jacobiya paca necajei tsaibinexa: ‘Pata pecuidubi jiwi pam’, paca necajei tsaibinexa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam be caemonae jiwi pam, saya jame panantautame bara caein pon ainya cui penaexanaein painya itatha. ⁹Pomonae po irathe jinompe jopa bewa wabi pajam ‘Axa’, jopa bewa pajam xua painya baru cui itura jinaexae pomonae jopa bequein barompaya painya axeiwi. Painya xoba jiwi baxua bara pajume copatame, tsipei paxam panantautame bara caein painya Axa, pon pabarui cui itura jiname pon peitabocotha eca. ¹⁰Matautano jopa bewa pacopatsim xua bara jiwi jacobiya paca necajei tsaibiwa: ‘Pata necanamataxeinaewi pam’, paca necajei tsaibiwa xua ainya cui jiwi painya nepaca exanae jiwixae. Painya xoba jiwi baxua bara pajume copatame, tsipei apara paxam panantautame bara caein pon painya Necanamataxeinaein, jame apara bapon meisa Cristo. ¹¹Icha pon paxam jiwana, icha bapon ichichipa naexana be pocotsin canamataxeina ichamonae bapon matha bewa copiya daxita paxam beta amanaya pacata nacuichina. ¹²Pon xua pia coutha peainya cui jiton naexana pejuntu coyenetha, Nacom exanaena xua bapon pecui pawi jiton naexanaena. Ichitha pon xua pecui pawi jiton naexana, pejuntu coyenetha, Nacom exanaena xua bapon peainya cui jiton naexanaena.

¹³“iPaxam pomonae Moisés pia peitorobi coyene tatsi painya necuidubiwi jiwi pam tsobenaem! iPaxam iru pomonae fariseomonae pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam acucoyenyapubeya paexaname xua poxonae jiwi bequein ichichipa naexana Nacom piamonae tatsi jiwana. Paxam jopa pajume cowuntsim Nacom yawa jopa pacopatsim xua ichamonae iru pejume cowuntsiwa Nacom.

¹⁴“iPaxam pomonae Moisés pia peitorobi coyene tatsi painya necuidubiwi jiwi pam tsobenaem! iPaxam iru pomonae fariseomonae

pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Powaxi pecuenta werapaewaxichi piseurixi, barapowaxi pacueranta ename pia bon. Naemata Nacom pawuqueibame. Jopa cuinaya pana najume copababeibim poxonae pawuqueibame Nacom tsipei paichichipame nawita xua jiwi xanepanaya paca necayabara paebiwa xua bara cou paxam pejuutu coyene xanepanae jiwi pam. Daxota poxonae po mataqueitha Nacom yabara paebina daxita jiwi penatsicuentisiwa barapo mataqueitha Nacom bichocono paca peraxa jubina, beyacaincha poxonae peraxa jubinchi pomonae pacuidubame.

¹⁵“iPaxam pomonae Moisés pia peitorobi coyene tatsi painya necuidubiwi jiwi pam tsobenaem! iPaxam iru pomonae fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam taju beya paponame daxita carepayan beya, xua painya cana exanaenexa ichuntha xua bapon pejume cowuntsiwa tsane painya necuidubi coyenewan xua bapoxonaе bapon be judiomonaepin penaexanaewa tsane. Bapon pacana exaname, xua bapon bichocono equeicha mataropeicha abe peexanaein. Daxota bapon bewa xubinchi ichaxota po nacuatha isoto jopa itacounaiyo, icha paca cana ichi tsane poxonaе paca bebai tsane barapo nacuatha.

¹⁶“iPaxam abe peexanae jiwi tsobenaе pam! Paxam barapocotsi coyeneya juta panacana exaname, icha be pon peitata nacutsin ichi xua poxonaе ichun matacapoinchi pon iruru peitata nacutsin. Paxam ichamonaе ba pacuidubeibame ba pajam tsaibim: ‘Icha ichun nayabara cui wunaе tsimuxu duta xua jeye: Xaniwaicha exanaein pocotsiwa xua catsipaebatsi Nacom pia pin bo wunthaxae tatsi, poxonaе jei, baxua ba jopa ainya cuiyiyo poxonaе ichun nayabara cui wunaе tsimuxu duta bapocotsi wuntha’, ba pajam tsaibim xua ichamonaе poxonaе pacuidubeibame. Matautano ba pajam tsaibim: ‘Icha ichun nayabara cui wunaе tsimuxu duta xua jeye: Xaniwaicha bara exanaein pocotsiwa xua catsipaebatsi oro nainto wuntha pocotsiwa daedaena po oro nain coroton Nacom pin pia botha tatsi eca, poxonaе jei, baxua ba xua bapon exana bapocotsi wuntha, baxua jame ainya cui poxonaе barapon barapo wuntha nayabara cui wunaе tsimuxu dubeibina’, ba pajam tsaibim poxonaе pacuidubeibame. ¹⁷iPaxam barapocotsi coyeneya juta panacana exaname, icha be pomonaе matasipa daunwei ichi poxonaе jopa beta jume cowuntsiyo Nacom! Nacom pin pia bo bichocono ainya cui beyacaincha oro nain, po oro nain coroton Nacom pin pia botha tatsi ena. Tsipei barapo oro nain poxonaе aisowa beequiya Nacom pin pia bo weya jopa ainya cuiyiyo. Jame saya meisa poxonaе bo tututha eca bapoxonaе ainya cui barapo oro nain, tsipei barapo bo ainya cui cana exanatsi.

¹⁸Matauta ba pajam tsaibim: ‘Icha ichun nayabara cui wunae tsimuxu duta, xua jeye: Xaniwaicha bara exanaein pocotsiwa xua catsipaebatsi xua be pexaethopaewa wuntha xua ichaxota duwei tauteiba xua tuxusi exaneiba Nacom nexa, poxonaе jеi, baxua ba bapon jopa bewa exanae poxoru baraxua xua be pexaethopaewa jopa ainya cuiyiyo poxonaе ichun nayabara cui wunae tsimuxu duta bapocotsi wuntha’, ba pajam tsaibim poxonaе ichamonae pacuidubeibame. Matautano ba pajam tsaibim: ‘Icha ichun nayabara cui wunae tsimuxu duta xua jeye: Xaniwaicha bara exanaein pocotsiwa xua catsipaebatsi duwei wuntha po duwei xua bocopiya ichaxota xua be pexaethopaewa wuntha, poxonaе jеi, baxua ba bapon jame bewa exanae poxoru po duwei xua bocopiya ichaxota xua be pexaethopaewa, baxua jame ainya cui poxonaе bapon barapo wuntha nayabara cui wunae tsimuxu dubeibina’, ba pajam tsaibim poxonaе pacuidubeibame. ¹⁹iPaxam barapocotsi coyeneya juta pana cana exaname, icha be pomonaе matasipa daunwei ichi poxonaе jopa beta jume cowantsiyo Nacom! Pocotsiwa xua be pexaethopaewa ichaxota duwei tauteiba xua tuxusi exana Nacom nexa, poxonaе tauta baraxua xua be pexaethopaewa bichocono ainya cui, beyacaincha ainya cui poxonaе duwein aisowatha bexuba xua saya pexaenexa. Tsipei duwei saya ainya cui poxonaе pocotsiwa xua be pexaethopaewatha bocopiya poxonaе petuxusi exanaewa tsane Nacom nexa. Bapoxonaе barapo duwein ainya cui, tsipei baraxua xua be pexaethopaewa ainya cui cana exanatsi.

²⁰Daxota pon nayabara cui wunae tsimuxu duta xua be pexaethopaewa wuntha, xua ichaxota duwei tauteiba xua tuxusi exaneiba Nacom nexa, saya meisa jopa barapo wunthiyo, matautano jame nayabara cui wunae tsimuxu dutsina duwei wuntha, po duwein baxota bocopiya. ²¹Matautano pon nayabara cui wunae tsimuxu duta Nacom pin pia bo wuntha tatsi, saya jopa meisa barapo wunthiyo, matautano jame nayabara cui wunae tsimuxu dutsina Nacom pewuntha tatsi. Tsipei bara Nacom pin pia bothaxae eca. ²²Daxota pon nayabara cui wunae tsimuxu duta itaboco wuntha, saya meisa jopa barapo wunthiyo, matautano jame nayabara cui wunae tsimuxu dutsina Nacom pia pexeinya peecaethopeibiwa tatsi wuntha beicha matauta Nacom pewuntha tatsi pon baxoteicha eca.

²³“iPaxam pomonaе Moisés pia peitorobi coyene painya necuidubi jiwi pam tsobenaem! iPaxam pomonaе fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam ba caewaxi pajiwana wetsabeibame xua painya catsibeibinexa Nacom poxonaе diez xoyobe paxeineibame xua pocotsiwa painya neubiwan. Barichi pacana exaname tsiqui xutixitha po xutoxi pewun menta, matautano po pexuno pewun anís barichi matautano po pexuno pewun comino. Bara bequein barapo coyene paexaneibame, daichitha jopa paexanaem pocotsiwa bichocono ainya cui coyenewa pocotsiwa Nacom

pia peitorobi coyenewatha itoroba. Matautano jopa paexanaem po cui coyenewatha bewa bara xaniwaicha pata exanaename jiwi. Matautano jopa paexanaem po cui coyenewatha bewa jiwi payabara najuntũ coyene xeinaename painya neyawenaenexa jiwi. Matautano jopa paexanaem po cui coyenewatha xua pana cana exaname xua beta painya nejume cowuntsinexa Nacom. Daxita barapo coyenein jame maisa paexanare, muxuna pa-eexanaponde po coyene copiya pa-eexanaponame, po coyene poxonae pajiwana nonotaponeibame poxonae pocotsiwan diez xoyobe paxeineibame, xua pocotsiwa painya neubiwan. ²⁴ iPaxam barapocotsi coyeneya jũta pana cana exaname, icha be pon peitata nacũtsin ichi xua poxonae ichũn matacapoinchi pon irurũ peitata nacũtsin! Paxam jopa juniya pacayabara jume exaneibim xua Moisés pia peitorobi coyenewatha itoroba. Daichitha jopa paexanaem po peitorobi coyene peainya cui coyenewa Nacomtha. Barapocotsi jũta coyeneya paexaname icha jiton ichi poxonae mera mene caewata paparuwatha xua pichixi pemuxuna apaeyainwa, daichitha apara yawa apareca xua xuan poxi peconoxi.

²⁵ “iPaxam pomonaе Moisés pia peitorobi coyene tatsi painya necuidubi jiwi pam tsobenaem! iPaxam pomonaе irũ fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam jopa ba juniya paexaneibim poxonae meisa panaperũ iquicame. Daichitha bũpana iya painya jũntũ coyenetha pecaibi coyene paxeiname, peuwi coyeneno paxeiname. Be barapocotsi jiwi pam pocotsimonaе coroton saya matawacaicha iquica yawa paratonno, ichitha atutuxuira bichocono. ²⁶ Paxam fariseomonaе pam, pocotsi jiwimonaе pam pomonaе be peitata nacũtsi jiwi pam. Copiya matha pana najũntũ cui coyene barapende barapo painya neajũntũcoyenebewan, bapoxonaе jame xanepanaya painompaename.

²⁷ “iPaxam pomonaе Moisés pia peitorobi coyene tatsi painya necuidubi jiwi pam tsobenaem! iPaxam irũ pomonaе fariseomonaе pam tsobenaem! Daxita paxam itara mexeya xanepanaya pepaebi jiwi pam, daichitha apara abeya peexanae jiwi pam. Jiwi ba inyapana exana xua pocotsiwa jiton petũpaein peyamũthũ acatabiwatsi. Bequein bara baxua inyapana daichitha xua matha bocareca bichocono ayei xua jiton petũpaein. ²⁸ Barapocotsi jũta coyeneya paexaname, icha be pocotsi coyene peayeiwa ichi xua jiton petũpaein. Bequein panaperũ wũnaetame, daichitha painya jũntũ coyene abe bichocono. Bequein jiwi paca yabara nanta xeina poxonaе paca cui tane xua paxam deta cou pejũntũ coyene xanepanae jiwi pam Nacomtha, daichitha painya jũntũ coyene bichocono paajũntũcoyenebem. Matautano bara bequein paxam itara mexeya xanepanaya pepaebi jiwi pam, daichitha apara abeya pepaebi jiwi pam.

²⁹ “iPaxam pomonaе Moisés pia peitorobi coyene tatsi painya necuidubi jiwi pam tsobenaem! iPaxam pomonaе irũ fariseomonaе pam tsobenaem! Daxita

paxam itara mexeya xanepanaya pepaebi jiwi pam, daichitha apara abeya peexanae jiwi pam. Paxam petupaewi pomonae Nacom pia peitorobi jume pepaebiwí payamuthu acabame boutixi. Matautano pomonae pejuntu coyene xeicae jiwi payamuthu itupana exaname. ³⁰ Matauta naerabiya pana najam: ‘Icha caena bayatha jinompaetsipatsi poxonae wamo susato jiwi jinompa metha jopa cueicha yawenaetsipaetsi poxonae barapo Nacom peitorobi jume pepaebiwí jutebatsi’, pana najam. ³¹ Barapo jumetha poxonae baxua pacaunutame, barapara barapo cui coyene paexaname, icha painya amo susato jiwi ichi poxonae barapo juntu coyeneya exana poxonae jutebatsi Nacom pia peitorobi jume pepaebiwí. ³² iPainya amo susato jiwi abe peexanaexae, caena bayatha bara paichinde! Poxonae pana nebexubiname moya pana necui yabara jume cui were icha matha painya amo susato jiwi ichi poxonae tamropata notarucupa xua barapo Nacom pia peitorobi jume pepaebiwí jutebatsi.

³³ “iMaisa paxam pomonae pemuxuitorobi jiwi pam! iDaxota be jomomonae pacui jupame poxoru jomo ba cuitaya ducupa nawa! Bara paichim anoxuae bequein paichichipame xua Nacom pacuitaya ducupame xua abe paca exanaeyainwa. Ichitha Nacom paca itorobina ichaxota isoto jopa itacounayoyo. Jopa papanenebiyaem tsane barapo isoto weya. ³⁴ Itorobicaein painya xantha pomonae taitorobi jume pepaebiwí. Matauta itorobicaein pomonae peyaputaewi. Matautano itorobicaein pomonae jiwi pecuidubiwí Moisés pia peitorobi coyene tatsi. Ichitha barapomonae pajiwana jutebiname. Ichamonae naetotha pacobe matabobiname painya jutebinexa tsane. Ichamonae judiomonae pia penacuetutsi bontha tatsi pabename. Daxita carepaya tomarantha abe pacana eexanaponaename pomonaetha pomonae taitorobi jiwi. ³⁵ Daxota Nacom paca cana exanaena xua paca peraxa exanaena xua daxita pomonae pejuntu coyene xeicae jiwi pejujutebaponaexaetsi painya nacuatha. Painya amo susato jiwi jujutebapona pomonae pejuntu coyene xeicae jiwi. Copiya matha Abel bexotsi pon pejuntu coyene xeicaein pon bequein jopa abe exanaeyo, beya poxonae iruru Zacarías bexotsiru pon Berequías pexanto tatsi. Barapon Zacarías pabexubame Nacom pin pia botha ichaxota xua barapo bo tututha uncua pocotsiwa be pexaethopaewa xua ichaxota tuxusi exana Nacom nexa xua iru baxota uncua pepa Nacom pia boyo tatsi xua naitama taeuncuabe. ³⁶ Bara xaniwaicha paca tsipaebatsi pomonae xua anoxuae pajinompame bichocono paca peraxa jubebina tsipei daxita paxam barapara Nacom tsitatsi xua paxam patsita xeiname penatsicuentsiwa xua painya amo susato jiwi pejujutebaponaexae pomonae pejuntu coyene xanepanae jiwi xua iruru paxam painya nejutebaponaexaeru”, jei Jesús.

Meje yabara poxonae Jesús Jerusalén tomarapiwi siwa wecoyeichi
(Lc 13.34-35)

³⁷ Bapoxonae Jesús yabara unthuthu wecoyei Jerusalén tomarapiwi. Jesús wecoyeya namchi, jeye: “iMaisa Jerusalén tomarapiwi pam

pajutebeibame pomonae Nacom pia peitorobi jume pepaebiwi! iMatauta paxam pajutebeibame ibotontha pomonae Nacom pacata itoroba! iMaisa be paca caetucaetuteibinchi, tapaca cayawenaewatsi tsainchi, icha wacara ichi poxonae nacoxi caetucaetuteta pecuarafetha! iMaisa be barichocuaein tsane, daichitha jopa paichichipaem! ³⁸Incane pataema Nacom nacui baraxuba xua jopa painya nepaca caewatsiwa tsane. Daxota Nacom jopa poponaeyo pia pin pia botha tatsi painya tomaratha. ³⁹Paca tsipaebatsi xua equeicha jopa pana netaem tsane beya abũ poxonae pana neyabara jam tsane: ‘iMaisa bapon jiwi jũntũ coyene weiweina cana exanatsi pon patopa, Nacom peitorobixae, pon jiwi Pecanamataxeinaeinchi!’ pana neyabara jam tsane”, jei Jesús fariseomonaetha.

**Meje yabara poxonae Jesús yabara paeba xua
ichamonae abe exanaena Nacom pin pia bo tatsi
(Mr 13.1-2; Lc 21.5-6)**

24 ¹Jesús Nacom pin pia bo tatsi wejoniya. Poxonae nama bara weya pona, bapoxonae Jesús imoxoyo caquita umenarucũpatsi pijimonae. Yawa pijimonae jeichichi:

—Maisa Nacom pin pia bo tatsi bepa wũnae, jei barapomonae.

²Daichitha Jesús jume barai barapomonae, jeye:

—iMoya caepatiyo pataema! Bara xaniyan paca tsipaebatsi. Matabi jopaeina barapo mataqueitha ichamonae pomonae penanapaincha jinompaewi xua icha nacua werena peponaewi abe cana exanaena Nacom pin pia bo tatsi po bo anoxuae pataneme. Apará jopa cae ibotiyo nacopatuncuae tsane icha iboto peũmatha. Daxita abe tsane, jei Jesús.

**Meje yabara poxonae Jesús yabara paeba xua copiya matha pewũnaeya
exanaena petsita itũtsi coyenewa poxonae daxita weraweracaenaba
(Mr 13.3-23; Lc 21.7-24; 17.22-24)**

³Bapoxonae Jesús pijimonae baru pona demxuwatheicha po demxuwa pewũn demxu Olivowa tsipei baxota umena olivo naein. Poxonae Jesús demxuwatheicha ecopiya, bapoxonae Jesús pijimonae nameicha tsipaebatsi, jeye:

—Paichichipan xua xam tapata netsipaebiwam tsane, ¿eta poxonae metha ichamonae baxua exanaena poxonae abe cana exanaena Nacom pin pia bo tatsi? ¿Eta pocotsiwa tsane metha xua pewũnaeya tsita itapeinya xeinaena xua poxonae patopeicaename, mataũtano xua poxonae imoxoyo daxita weraweracaenaba? jei Jesús pijimonae tatsi.

⁴Nexata Jesús barai, jeye:

—Dota pam bũ ichamonae naerabiya paca muxu tsipaeba xua daxota abe paexanaetsipame. ⁵Tsipei tsana patsina ayei bicheito jiwi

pomonae natsicotaena icha be xan ichin. Barapomonae jei tsane: ‘Apara xan Mesías’, jei tsane. Poxonae barapomonae muxuitorobiya paebina bapoxonae pinmonae jume cowuntsina. ⁶Pajume taename xua jiwi juinya nabenoutsina xote yawa xua juinya irurū nabenoutsina icha ira beya. Daichitha jopa pajunuwinde, tsipei baxua pewunaeya matha copiya tsane. Daichitha cataunxuae dapo matakabi aichica tsane xua poxonae daxita weraweracaenaba yatsicaewa. ⁷Cae nacuapiwi irū icha nacuapiwino, barapo ainya nacuapiwibe nabenoutsina. Matautano irū pon nacia peewatsin irū ichundū pon icha nacia peewatsin, baraponbe irurū nantiya nabenabe. Matautano ainya nacuantha pin jainbo nacia tsane tsipei pin mayayo tsane. Matautano domae tsurucuae tsane ainya nacuantha. Matautano ainya nacuantha ira jijiyatsina. ⁸Baraxua copiya matha tsane xua jiwi atene tsoponae tsane bichocono, xua beya jopa nama juniya tsane.

⁹“Bapoxonae jiwi paca teiquebina, paca atene exanaena matautano paca jutebina. Daxita nacuanpiwi paca casebina painya tana nejume cowuntsixaemxae. ¹⁰Barapo matakabintha jiwi pentsina xua Nacom pejume cowuntsiwatsi. Matautano daxita jiwi nacasebina, matauta barapomonae piamonae caenaetsina ichamonaetha. ¹¹Pinmonae tsana pateibina, pomonae jiwi pemuxuitorobiwi. Tsana jei tsane: ‘Xan Nacom peitorobi jume tapaebin, Nacom yabara paca cuidubinchi’, jei tsane. Barapo pemuxuitorobi diwesi jume pinmonae jume cowuntsina barapo diwesi. ¹²Pinmonae jopa juniya abe exanaponae tsane daxota jiwi, jopa caemonae nantiya naantobe tsalbi tsane. ¹³Ichitha pon awiya xua antuyapusya nejume cowuntsiya poponaena xua beya yacuiya tupaeya jopaena poxonae bequein abe taexanatsi ichamonaetha, bapon jame Nacom napaeba cana exanaena. ¹⁴Tamonae capanaena tapexeinya jume diwesi po diwesi xua Nacom waba jiwi petanaexanaenexatsi pijimonae pomonae itorobiya peewatsixae. Barapo diwesi tajiwiwimonae pomonae tanejume cowuntsi jiwi paebinoutsina daxita jiwitha. Poxonae barapo diwesi daxita nacuanpiwi jume taena, bapoxonae daxita barapo jiwi yaputaena xua bara matakabi imoxoyo jopaena po mataqueitha poxonae daxita weraweracaenaba.

¹⁵“Daniel, pon Nacom peitorobi jume pepaebin bapon caena bayatha yabara tsiwunaeya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichun Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo matakabi jopaenaba poxonae daxita weraweracaenaba”, jei Jesús. (Xan Mateon, paca baraichi: “Pon yorobina po jume diwesi tinan, moya jume naitawatsina pia peyaputaenexa tsane”, paca jeichi.)

¹⁶ Cataunxuae Jesús cueicueije, jeye: “Poxonae bara pocotsiwa pataename bapoxonae pomonae Judea nacuatha jinompa, barapomonae bewa demxuwān berucūpiyaena. ¹⁷Barapo matacabitha pon bo matatupatha uncua bapon jopa bewa botha joniya tsane xua penotsiwa tsane pocotsiwa tabobeinchi bomūxū tututha. Saya jame bewa nainya benaetsircuaena. ¹⁸Irurū pon pabitha popona bapon jopa bewa caibeya ponae tsane botha xua penotsiwa tsane pia paparuwan. Saya jame bewa nainya benaetsircuaena. ¹⁹iPai yabūxi tsobenae powaxi pexui būpana taenatsi barapo matacabitha! iPai powaxi irū pexui isaina, barapowaxi tsobenaerū! Tsipei acabe tsobenae tsane pexui. ²⁰Poxonae pēwūnaeya tsane baxua Nacom pawūcare xua jopa painya nerūcūpaewa tsane poxonae awūbo peaquexae bichocono, mataātano xua jopa painya nerūcūpaewa tsane poxonae pentaquei seicae matacabitha. ²¹Tsipei barapo matacabintha jiwi bichocono pin peraxa exanaeinchi. Atene tsane beyacaincha poxonae jiwi atene tsaibi poxonae Nacom aena nacua exana, xua equeicha nama bichocono pin peraxa tsane. Equeicha bexa bapoxonae bapana jopa baxua exanae tsane poxonae bichocono jiwi pin peraxa. ²²Icha Nacom jopa be caentacabiyobe exanaetsipae, metha dapomonae ajibi tsipae pomonae panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonae, pomonae pia peitapetsiwixae tatsi.

²³“Bapoxonae icha ichūn paca jei: ‘Pataema bapon apara Mesías uncue pon Nacom itorobica’, paca jei, irū icha ichūn paca jei: ‘Pataema bapon Mesías xota uncuiye’, paca jei, baxuan jopa pajume cowūntsinde barapo jumein. ²⁴Tsipei pomonae pemuxuitorobi jiwi tsana patsina. Barapomonae natsicotaena icha be xan ichi ponxaein Mesías. Mataātano barapomonae natsicotaena icha be pomonae Nacom peitorobi jume pepaebiwi ichi tsane. Barapomonae pexeinya petsita itūtsi coyenewan exanaena peitabocotha, po irathe tsaneno xua jiwi pemuxuitorobinexa tsainchi, xua jiwi pejume cowūntsinexa pocotsiwa barapomonae paeba. Barichirū pomonaetha pomonae Nacom pia peitapetsiwi tatsi pemuxuitorobinexa tsainchi, xua irurū icha metha barapomonae pejume cowūntsinexa tsanerū pocotsiwa barapomonae paeba. Ichitha jopa itacūpaetsi tsainchi xua barapomonae pemuxuitorobiwa tsainchi. ²⁵Baxua tsiwanaya yabara paca tsiwūnae muxu dutatsi. ²⁶Daxota icha jiwi paca jei tsane: ‘Pataema bapon Mesías uncuiye ira xuepana susato tsurucuae nacua beya’, icha paca jei, jopa bara beya paponaeinde. Mataūta icha paca jei: ‘Pataema bapon Mesías xote uncue bomūxū tututha’, icha paca jei, jopa baxua pajume cowūntsinde. ²⁷Icha yamūxū ichi poxonae jemeicha yacoicha uncueica xua coicha nayotaxuba itabocotha, barichi tsane po matacabitha patopeicaein jemeicha. Xan ponxaein Nacom Tananeitapetsin tsita naitūtsin daxita jiwi.

²⁸Quequeremonae ba nacaetuta ichaxota baurin boca. Bara j̄ta paichim tsane. Paxam pomonae tana nejume cowuntsi j̄wi pam, pana newunaewatsiname po mataqueitha patopeicaein. Bara po mataqueitha pana nacaetutsiname”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin
(*Mr 13.24-37; Lc 21.25-33; 17.26-30, 34-36*)

²⁹Equeicha Jesús namchi: “Po matabin poxonae nacui wetsina xua j̄wi pin peraxa tsane, bapoxonae xometo nainya naquitabina. Jomocoichato jopa pentha tsane. Opiteiton peitaboco weothopeicaena. Matāta Nacom napuna torobabiyaena xua xuan itabocotha dubena. Bapoxonae jopa xapain dubenae tsane. ³⁰Bapoxonae daxita j̄wi taena peitabocotha xua cou equeicha apara tapatopaewa tsane ponxae Nacom Tananeitapetsin. Poxonae daxita nacuanpiwi netaena xua patopaen, barapomonae pijunuwi wecoyei tsane. Jiwi netaena ponxae Nacom Tananeitapetsin xua patopeicaein tsaquinaebowantha. Nacom pia peayapus̄ itorobi coyenewatha, matātano bichocono pexeinya it̄panae coichatha patopeicaein. ³¹Matātano itorobin tamatatsunpiwi xua bichocono daunweya peobinexa tsane, po peobiwa pew̄n trompeta. Poxonae baxua jume taena tamatatsunpiwi inta caetutsina pomonae taitapetsiwi. Nacaetutsina daxita nacuanpiwi jiwana, ir̄u ichamonae pomonae ichaxota xometo weecoinapiwi jiwana, ir̄u ichamonae pomonae ichaxota xometo bejopiyapiwi jiwana, ir̄u ichamonae pomonae pocotsiwa werenepiwi jiwana, ir̄u ichamonae pomonae pocotsiwa berequepiwi jiwana”, jei Jesús.

³²Equeicha Jesús jeye: “Pajume taema barapo pecayabara j̄ta pepaebi diwesiyo xua higuera nae xua painya nenacuidubiwa tsane. Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua pentono perubenaenexa. ³³Barapocotsi j̄ta coyeneya ichi tsane poxonae pataename daxita baxuan pocotsiwa aunxuae paca tsipaebatsi, pocotsiwa bexa exanaena, bapoxonae payaputaename, xua bara imoxoyo tsane xua tapatopae w̄nae tsane. ³⁴Bara xainyeya paca tsipaebatsi daxita judiomonae naitapataya naexanaponaena beya yacui othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweracaena. ³⁵Peitaboco aichurucuae tsane, matātano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban”, jei Jesús.

³⁶Equeicha Jesús jeye: “Po matabitha baxua exanaena, matāta po horatha baxua exanaena j̄wi jopa baxuan yabara yaputaeyo. Ir̄u

matatsunpiwi pomonae peitaboco beicha jinompa baxuan irurũ jopa yabara yaputaeyo. Irũ xan, ponxaein Nacom Pexanton baxuan jopa yabara yaputaeyo. Meisa saya Nacom pon Waxa yaputane poxonae po matacabitha baxua exanaena, matautano yaputane poxonae po horatha daxita exanaena baxua xuaunxuae paca tsipaebatsi”, jei Jesús.

³⁷Equeicha Jesús jeye: “Icha matha ichi poxonae Noé caena bayatha popona jiwi jopa tsaqueinaeyo xua Nacom pin awũbo exanaena methaunxuae. Saya barompaya icha jũntũ cuitha jinompa daxota jiwi werapa. Barichi jũta ichi tsane poxonae patopeicaein barapo cae pin nacuathe xua ponxaein Nacom Tananeitapetsin. Poxonae patopeicaein jiwi jopa tsaqueinae tsane xua Nacom werapa exanaena barapo jiwi pomonae jopa pejume cowũntsiyoxaetsi. ³⁸Barapo matacabintha poxonae Noé popona poxonae cataunxuae pin ema jopa duneicaeyo, jiwi jopa tsaqueinaeyo xua bexa pin awũbo tsane. Barapo jiwi jũntema nabaneiba yawa apeiba. Yawa jiwitha jijnapona, yawa pexantixi jitha dodoubapona beya yacuiya othopa poxonae po matacabitha Noé pin jera naetha joniya. Bapoxonae pin ema mũ jopa. Daxita Noé wepu bunothopatsi pomonae jinompa poxonae Noé popona. ³⁹Barapo jiwi jopa awũbo yabara tsaca jinompaeyo. Barapoxonae jemeicha pin ema uncueica. Matauta monapentatsi barapo jiwi. Icha jiwi ichi poxonae Noé popona poxonae barapo jiwi jopa nanta xeinaeyo xua nacabetsina, barichi tsane poxonae xan patopeicaein ponxaein Nacom Tananeitapetsin, jiwi jopa baxua yabara tsaqueinae tsane xua poxonae equeicha patopeicaein. ⁴⁰Barapo mataqueitha ainya pebinbe nacuara nacuitauyaenabe pabitha. Ichũn matatsunpin pichina, pejume cowũntsiyoxaetsi Nacom. Ichũn saya cuenta ponaeinchi jopa pejume cowũntsiyoxaetsi Nacom. ⁴¹Irurũ ainya yabũyobe nacuara yacatoyorobauyaenabe. Ichowa matatsunpin pichina, pejume cowũntsiyoxaetsi Nacom. Ichowa saya cuenta ponaeinchi, jopa pejume cowũntsiyoxaetsi Nacom. ⁴²“Tsaca pajinompeibare xua tapatopae wũnae tsane, tsipei jopa payaputaem po mataqueitha patopaein ponxaein jiwi Tacanamataxeinaein. ⁴³Meje pocotsiwe payaputaema. Icha pon bo pexeinaein yaputaetsipa xua poxonae patopaena pon jiwi pecaibin, bapoxonae bapon jopa maitecaetsipae. Matauta bapon jopa copatsipae xua pon pecaibin petajondenaewatsi pia botha. ⁴⁴Daxota bara paichinde. Tawanaetha pana nacui wũnaere, tsipei xan, ponxaein Nacom Tananeitapetsin patopeicaein poxonae jopa tsaca payabara jinompaem tsane tsipei jopa payabara nanta xeinaem tsane xua tapatopaewa tsane”, jei Jesús.

**Meje yabara poxonae Jesús yabara diwesi paeba
ponbe xua bo peyapucaecaenbe pon xua beta
peexanaein irũ xua pon jopa beta peexanaein
(Lc 12.41-48)**

⁴⁵Equeicha Jesús namchi pijimonaetha pecayabara jũta pepaebi diwesiyo xua pepatopaewa tsane, jeye: “Yabara paca tsipaebatsi

pon matabapopona pomonae bo pexeinaein tanacuitatsi. Barapon xanepanaya yaputaeya matabapopona. Poxonae bo pexeinaein wepu warapa barapomonae, pon bo pexeinaein itoroba pontha pon bo petayapucaecaeinchi, jeye: ‘Inta beta matabapoponde, yawa inta beta pexaewa apare daxita matababi pomonae xua inta nacuita’, jei bo pexeinaein. ⁴⁶Pon bo petayapucaecaein bara juntu coyene weiweinaena poxonae patopaena pon bo pexeinaein petaexaetsi xua bara beta tayapucaeca bo, xuano bara beta peexanaexae pocotsiwa xua bo pexeinaein itoroba. ⁴⁷Xaniwaicha paca tsipaebatsi. Bo pexeinaein itorobina xua pon petayapucaecaetsi bo xua bapon cana exanaeinchi xua equeicha daxita piawan beta petayapuenawatsi xua xuan xeina pon bo pexeinaein. ⁴⁸Ichitha ichacuitha pon bo petayapucaecaein bapon peantucuiyapubein tsipae. Bapon pia coutha nanta xeinaetsipa, najei tsipae: ‘Metha bo pexeinaein jopa cuinaya patopae tsane’, najei tsipae pon bo petayapucaecaein. ⁴⁹Bapoxonae bapon cueinta pomonae pon bo pexeinaein tanacuitatsi. Matautano bapon nanabanaetsipa nawita ichamonae yawa cupatsi nanaexanaetsipano. ⁵⁰Bapoxonae pon bo pexeinaein jemeicha patopaena poxonae pon bo petayapucaecaein jopa wuna tsaqueinaeyo. Poxonae bara po hora tsuxubi jopa yaputaeyo yawa poxonae barapo matababi tsuxubi jopa yaputaeyo. ⁵¹Pon bo pexeinaein itoroba ichamonaetha xua pebenexatsi yawa peperaxa jubinexatsi tsainchi pon bo petayapucaecaeinchi. Matautano itoroba xua barapomonae bapon pexubinexatsi ichaxota jinompa pomonae itara mexeya wunaeya pepaebiwi ichitha abe peexanaewi. Barapo nacua bereca jiwi bichocono wecoyeyi pomonae abe peexanaewixae, matautano nantanuweya nantu jayabina bichocono peatenexae”, jei Jesús.

**Meje yabara poxonae Jesús cuiduba pecayabara juta
pepaebi diwesiyo xua diez powayobe xua penowaxi**

25 ¹Nexata Jesús equeicha icha pecayabara juta pepaebi diwesiyo cuiduba pijimonae, jeye: “Nacom cana exanaena jiwi xua pomonae pejuntu coyene itorobiya ewatsixae, icha pebin ichi poxonae diez powayobetha xua penowaxi cana exana powaxi bapana jopa peru nacoyabiyo pebiwi. Barapo diez powayobe nota pia lámpan xua peewatsinexa pon pia pecotsiwa nacoyobina. Barapowaxi barompaya capona pia lámpan xua aceite epaca. ²Icha cinco powayobe barapo diez powaxi jiwana, barapowaxi ita coxanatsi xua penacui wunaetsiwa. Icha cinco powayobe ita coxone xua penacui wunaetsiwa. ³Barapowaxi powaxi ita coxanatsi xua penacui wunaetsiwa barapowaxi poxonae lámpan cajjinca jopa muxuna cajjincaeyo icha aceite xua equeicha pemene epacaenexa poxonae ameneibi tsurubena. ⁴Saya meisa powaxi yaputane xua penacui wunaetsiwa jame barapowaxi pia lámpan

muxuna cajjinca aceite xua equeicha pemene epacaenexa poxonae ameneibi tsurubena. ⁵Tsipei pon imoxoyo pecotsiwa nacoyobina bapon jopa cuinaya patopaeyo, daxota daxita barapo diez powayobe itamaipanarucupa. Matapainya maitarucupa. ⁶Poxonae papae tsuxubi poxonae barapowaxi cataunxuae maita, bapoxonae jume tane pon wawai xua barapowaxi jeichichi: ‘Bara juinya dawerena pebin pon pecotsiwa nacoyobina. Bapon panta enare painya necobe jacobinexa’, jei pon wawai. ⁷Daxita barapo diez powayobe nacosabarucupa. Matauta equeicha icha aceite epacarucupa xua bapoxonae pechoicha exanaenexa. ⁸Bapoxonae icha cinco powayobe, powaxi jopa nacui wunaetsiyo jeye ichawaxitha xua cinco powayobetha: ‘Panecatsibare icha aceite meraxi pata tha equeicha mene epacaetsi, yaitama pata lámbaran acueicheibi’, jei barapowaxi. ⁹Ichitha powaxi penacui wunaetsiwaxi jume barai, jeye: ‘Aibi apara, canta peyaxi barompaya pacajjincan patauxi, jopa pacajjincaeyo xua paxam nexaru. Maisa ichaxota pecaenaetsithopaewa aceite bara bepaiyande matha pacomocare aceite xua painya nemene epacaenexa’, jei barapowaxi poxonae xua jume barai ichawaxitha. ¹⁰Poxonae cataunxuae ichawaxi enapona xua pecomocaenexa aceite ichamonaetha, bapoxonaeru pebin pecoutha patopa, pon pecotsiwa imoxoyo nacoyobina. Powaxi bayatha nacui wunaeta napuna joniya bapontha xua penanabanaenexa pexaewa xua poxonae barapo pexaewa jiwi tsinacaetuta xua penabanaenexa poxonae barapo pebin pecotsiwa nacoyobina. Bapoxonae bomuxu bichocono boupa cateitabanota. ¹¹Bapoxonae pirapaeyo ichawaxi pata powaxi aceite siwayiya, jeye: ‘Pata Tanecanamataxeinaem, painta boupa saranaxorena’, jei bapowaxi. ¹²Ichitha bapon barapowaxi jume baraichichi, jeye: ‘Canta jopa paca yaitaetsi’, jei bapon”, jei Jesús, xua pijimonaes tsipaeba. ¹³Bapoxonae Jesús barai pijimonaetha, jeye: “Tawanaetha pana najuntu coyene wunaere, tsipei jopa payaputaem po matabitha patopaem, matautano jopa payaputaem po horatha patopaem ponxaein Nacom Tananeitapetsin”, jei Jesús.

**Meje yabara poxonae Jesús paeba pecayabara
 juta pepaebi diwesiyo xua paratixi yabara
 (Lc 19.11-27)**

¹⁴Equeicha Jesús pijimonaes cuiduba pecayabara juta pepaebi diwesiyo xua paratixi, jeye: “Anoxuae ichichipan xua tapaca tsipaebiwatsi po coyene xua xan beta matomacan pomonaes inta beta penacuichiwi pomonaes Nacom juntu coyene itorobiya ewata. Barapo coyene jupa icha be poxonae pebin ichi poxonae bara juntucuru warapaenaba icha nacia beya. Pewunaeya poxonae warapaenaba matha waba pomonaes pia petanacuichi jiwichi tsainchi. Barapomonaetha itoroba xua pia

paratixi tatsi beta petacacomocaewa tsainchi poxonae cataunxuae wūnae ewatatsi xua pepatopaewa tsane. ¹⁵Ichuntha pomonae barapomonae jiwana cata cinco mil po paratiximonaebe. Iru ichuntha cata dos mil po paratiximonaebe. Iru ichuntha cata saya be cae mil po paratiximonaebe. Bapon daxita barapomonaetha barompaya catsiba be pocotsi coyeneya barapomonae yapu jupatsi xua poxonae pecacomocaewa tsane barapo paratiximonaetha. Bapoxonae bapon warapa. ¹⁶Pon catatsi cinco mil po paratiximonaebe, barapo cinco mil po paratiximonaebetha equeicha icha cinco mil po paratiximonaebe matoma exana. ¹⁷Barichi pon catatsi dos mil po paratiximonaebe, barapo dos mil po paratiximonaebetha equeicha matoma exana icha dos mil po paratiximonaebe. ¹⁸Ichitha pon catatsi cae mil po paratiximonaebe, bapon muthu cua iratha. Bapoxonae barapo muthutha bota barapo cae mil po paratiximonaebe”, jei Jesús.

¹⁹Equeicha Jesús jeye: “Poxonae ainya matakabin yapucaewa, bapoxonae patopa pon paratixi catsiba barapomonaetha pon barapomonae pia pecanamataxeinaeinchi tatsi. Bapon pia petanacuichiwichi pia paratixi matoma yabara yainyaba. ²⁰Copiya patopa pon cinco mil po paratiximonaebe catatsi. Bapon icha cinco mil po paratiximonaebe cata pia pecanamataxeinaeinchitha, yawa jeye: ‘Tanecanamataxeinaem, caena bayatha cinco mil po paratiximonaebe necatame, equeicha icha cinco mil po paratiximonaebe cata matoma exainchi’, jei bapon. ²¹Pon pecanamataxeinaein jume nota, jeye: ‘Maise juntu coyene wūnaem matautano xam ponxaem cayabara jume cowuntatsi xua xanepanaya neexaneibiwam pocotsiwa caitorobatsi. Tsipei inta xanepanaya beta exaname bequein poxonae be conotha caitorobatsi, daxota equeicha ichawa caitorobatsi xua bichocono nawita. Moya tabotha nebaru jonyama yawa nebaru juntu coyene weiweinare’, jei pon pecanamataxeinaein. ²²Bapoxonae pirapae ichun patopa pon dos mil po paratiximonaebe catatsi yawa jeye pia pecanamataxeinaeinchitha: ‘Tanecanamataxeinaem, caena bayatha dos mil po paratiximonaebe necatame, equeicha icha dos mil po paratiximonaebe cata matoma exainchi’, jei bapon. ²³Pon pecanamataxeinaein jume nota, jeye: ‘Maise juntu coyene wūnaem matautano xam ponxaem cayabara jume cowuntatsi xua xanepanaya neexaneibiwam pocotsiwa caitorobatsi. Tsipei inta xanepanaya beta exaname bequein poxonae be conotha caitorobatsi, daxota equeicha ichawa caitorobatsi xua bichocono nawita. Moya tabotha nebaru jonyama yawa nebaru juntu coyene weiweinare’, jei pon pecanamataxeinaein”, jei Jesús.

²⁴Equeicha Jesús jeye: “Bapoxonae matapainya patopa pon cae mil po paratiximonaebe catatsi. Bapon atsaquiya jei pia pecanamataxeinaeinchitha: ‘Tanecanamataxeinaem, xan yaputan xua xam be barapocotsim pon jopa jivi juniya itorobeibim. Matautano

jiwi cobe itorobeibame xua penoteibiwa pocotsiwa jopa jinyawiyo. Matautano pexaewa xua naweta noteibame ichaxota jopa ubim. ²⁵Daxota cacunuwatsi baxua neexanaeinxae tsipei metha inta pichipame barapo paratiximonaebe poxonae equeicha icha paratiximonaebe cata matoma exainchi daxota jinya paratiximonaebe muthutha xubotan. Xote barapo paratiximonaebe caewa cata canawitatsi', jei bapon. ²⁶Nexata pon pecanamataxeinaein namchi jeye: 'iBepa maisa dapon abem, pon fifiname poxonae inta nacuitame! Xam apara neyabara nanta xeiname xua xan pexaewa tanoteibiwa pocotsiwa naweta ichaxota jopa tacoya ubeibinyo. Matautano xua ichamonaeb cobe itorobeiban xua noteiba pocotsiwa jopa tawiyo. ²⁷Tsipei catsawiya neyabara nanta xeiname, xua bichocono daunwei itoroban daxota bayatha inta bewa barapo paratiximonaebe banco botha botsipame. Nexata poxonae equeicha patopan, icha paratiximonaeb equeicha matoma xeinaetsipan xua equeicha inta pemataropeicha botsixaetsipae poxonae ichamonaeb nacowaeta barapo taparatiximonaebe', jei pon pecanamataxeinaein. ²⁸Bapoxonaeb pon pecanamataxeinaein barai pomonaeb baxota umena jeye: 'Bapon pacobe wepire barapo cae mil po paratiximonaebe. Bapoxonaeb barapo paratiximonaebe pacare pon icha diez mil po paratiximonaebe xeina. ²⁹Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane xua beya poxonae bapon equeicha bichocono Nacom pejume cowantsiwa tsainchi. Pon ba jopa ichipaeyo xua Nacom peyabara yaputaewatsi, Nacom wepichina po coyene bapon yaputane xua beya daxota Nacom jopa pejume cowantsiwa tsainchi. ³⁰Matauta bapon pon inta beta jopa nacuichiyo bapon paxore peitaquirei nacuatha, xua barapo nacuatha pewecoyeinexa, xua nantanuweya penantu jayabinexa tsane', jei pon pecanamataxeinaein", jei Jesús.

**Meje yabara poxonae Jesús nayabara paeba xua bepa
pinae Nacom Pexanto tatsi tsabina daxita jiwi**

³¹Equeicha Jesús pijimonaeb tsipaeba, jeye: "Xan, ponxaein Nacom Tananeitapetsin patopeicaein, iru matatsunpiwi nebaru patsicaena. Poxonaeb patopeicaein, bapoxonaeb ecaein pexeinya peitupanaeb ecae watha xua tawa tayabara paebinexa daxita jiwi xua penatsicuentaewa abe peexanaexae Nacomtha. ³²Jiwi nacaetutsina taitabaratha pomonaeb daxita nacuan werena pona. Barichin tsane icha pon oveja peewatsin ichi. Bapon ba tsaba ovejamonaeb, matautano tsaba icha duweimonaeno, po duweimonaeb pewun cabra. ³³Pon ovejamonaeb peewatsin, bapon ovejamonaeb cuaranoba pecoxa weya. Cabra duweimonaeb petsocona weya cuaranoba. Bara cana jutiya ichin tsane jiwitha, icha pon ovejamonaeb peewatsin ichi. Pomonaeb xanepanaya peexanaewi tsana nobin. Pomonaeb

abe peexanaewi tsana nobin. ³⁴Bapoxonae xan ponxaein jiwi itorobiya pepa Taewatsin baran tsane pomonae tacoxa weya inta umena, jan tsane: ‘Anetha paxam pomonae Nacom, Taxa, paca jũntũ coyene weiweina exana. Pajojoniyama Nacom pia peitorobi nacuatheicha. Bara xoteicha caena bayatha Nacom paca tsiwũnaeta pocotsiwa xua paxam nexa, beya poxonae barapo nacue forota. ³⁵Paca itacũpa xua papatame baxoteicha, tsipei poxonae jainpan bayatha, bapoxonae pana neapatame pexaewa. Mataũta tsipei poxonae meratsipan, bapoxonae mera pana neapatame. Mataũta tsipei bayatha poxonae patopan painya botha poxonae be wawatsiyo coyeneya patopan daichitha pana nententa weyataeya wabame. ³⁶Mataũtano tsipei poxonae bayatha jumasa patopan, bapoxonae paparuwa pana necatame. Mataũtano tsipei poxonae bayatha neromaeba yawa poxonae atenein bara pana nesiwa poname painya tana neyawenaenexam. Mataũtano tsipei poxonae jiwi pecũbi botha neeta, paxam papatame painya tana nenecotsinexam’, jan tsane xua ponxaein jiwi itorobiya pepa Taewatsin. ³⁷Nexata barapomonae, pomonae tacoxa weya inta peumenaexae pomonae xanepanaya peexanaewi, nejei tsane: ‘Pata Tanecanamataxeinaem, ¿eta poxonae paca tainchi xua jainpame mataũta xua poxonae paca apatũtsi pexaewa? ¿Eta poxonae paca cui tainchi xua meratsipame xua bapoxonae mera paca apatatsi? ³⁸¿Eta poxonae paca tainchi xua poxonae be wawatsiyo coyeneya patopame xua bapoxonae paca matenta weyataeya wabatsi? ¿Eta poxonae paca tainchi xua poxonae jumasa patopame xua bapoxonae paca catatsi paparuwa? ³⁹¿Eta poxonae paca tainchi poxonae caromaeba xua poxonae atenemno xua bapoxonae paca siwa poinchi pata paca cayawenaenexatsi? ¿Eta poxonae paca tainchi poxonae jiwi pecũbi botha caeta xua bapoxonae papatan pata cataenexatsi?’ nejei tsane barapomonae. ⁴⁰Bapoxonae xan ponxaein jiwi itorobiya pepa Taewatsin, jume notsin barapomonaetha jan tsane: ‘Xaniyan paca tsiƨaebatsi. Daxita po coyenewan paxam bayatha paexaname tamonae jiwitha poxonae bequein barapomonae jopa peainya cui jiwiyo, apara bara painta exaname’, jan tsane ponxaein jiwi itorobiya pepa Taewatsin.

⁴¹“Nexata xan ponxaein jiwi itorobiya pepa Taewatsin baran tsane pomonae tatsocona weya peumenaewi, pomonae jopa beta peexanaewi, jan tsane: ‘Panatsixibarũcũpare taxainya weya, tsipei paxam pomonae abe painya neexanae jiwi pam. Maisa po nacuatha isoto jopa cuinaya itacounayiyo baxota paponare. Barapo iso nacua caena bayatha Nacom yabara wũnaeta caurimonae pia pentacaponaein tatsi nexa irũrũ pia matatsunpiwimonae tatsi nexa pomonae caurimonae. ⁴²Tsipei poxonae jainpan bayatha, jopa pexaewa pana necatsim. Mataũta tsipei poxonae bayatha meratsipan, jopa mera pana neapatsim. ⁴³Mataũtano tsipei caena bayatha poxonae be wawatsiyo coyeneya patopan, paxam jopa

pana nententa weyataeya wabim. Matauta tsipei poxonae bayatha jumasa patopan, paxam paparuwa jopa pana necatsim. Matautano tsipei caena bayatha poxonae neromaeba yawa poxonae jiwi pecubi botha ecan, paxam jopa pana nesiwa ponaem', jan tsane. ⁴⁴Nexata pomonae abe peexanaewi nejume notsina, jei tsane: 'Pata Tanecanamataxeinaem, ¿eta poxonae xua pata paca cui taewathatsi xua jopa paca yawenaetsi? ¿Eta poxonae xua pata paca cataebenaewathatsi poxonae jainpame? Matautano ¿eta poxonae xua pata paca cataebenaewathatsi poxonae meratsipame? Matautano, ¿eta poxonae xua poxonae pata paca cataebenaewathatsi poxonae be wawatsiyo coyeneya patopame? Matautano, ¿eta poxonae xua poxonae pata paca cataebenaewathatsi poxonae caromaeba? Matautano, ¿eta poxonae xua poxonae pata paca cataebenaewathatsi poxonae jiwi pecubi botha caeta? Daxita baxuan, ¿eta poxonae xua poxonae jopa paca yawenaetsi?' nejei tsane barapomonae. ⁴⁵Xan ponxaein jiwi itorobiya pepa Taewatsin jume notsin barapomonae jan tsane: 'Xaniyan paca tsipaebatsi. Daxita po coyenewa bayatha jopa paexanaem tamonae jiwitha xua barapomonae jopa peainya cui jiwiyoxae, apara bara jopa painta exanaem', jan tsane ponxaein jiwi itorobiya pepa Taewatsin. ⁴⁶Bexa bapoxonae tsane barapo abe peexanae jiwi ponaena po nacuatha bapana jopa naci copatsi xua atene. Pomonae pentu cui xanepanae jiwi ponaena po nacuatha jiwi xeineiba peantucoyeneyapuswa, po peantucoyeneyapuswa ataya tsiteca", jei Jesús.

Meje yabara poxonae fariseomonae iru sacerdotemonae pia pentacaponaeawi tatsi daxita barapomonae Jesús yabara nanta xeinatsi po coyeneya xua Jesús pewaetabiwa tsainchi
(Mr 14.1-2; Lc 22.1-2; Jn 11.45-53)

26 ¹Poxonae Jesús baxua daxita najume weta, bapoxonae pijimonae barai, jeye:

²—Paxam payaputaneme xua poxonae po baya tsane, jiwi nacaetutsina penabanaenexa pexaewa peyabara nanta xeinaenexa barapo matabi xua poxonae caena bayatha matha judiomonae Egipto nacia weya panenebiya, po matabi pewun Pascua matabi wun. Barapo matabeitha ichamonae necaenaetsina xua teparucua tanaexanaenexa tsane naetotha, ponxaein Nacom Tananeitapetsin, jei Jesús.

³Poxonae Jesús pijimonae baxua tsipaebuncua, bara caena barapo matabeitha sacerdotemonae pia pentacaponaeawi tatsi nacaetuta. Iruru baxota nacaetuta judiomonae pia pitiri jiwi tatsi. Barapomonae daxita nacaetuta po tututha pon pewun Caifás pon sacerdotemonae pia pepa pentacaponaein tatsi pia pexeinya tutu botha tatsi. ⁴Daxita barapomonae nabaru muxu jei xua bepa pinae eta bichi tsane poxonae Jesús nameicha waetabinchi xua pebexubiwa tsainchi. ⁵Barapomonae najei:

—Abu jopa waetabi tsainchi poxonae jiwi Pascua matakabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonae anaepanaya najume cayayataxubichipa, najei daxita barapomonaе.

**Meje yabara poxonae petsiriwa Jesús mata
epatabatsi penasiwa, po penasiwa petuxueiwa
(Mr 14.3-9; Jn 12.1-8)**

⁶Pirapae Jesús popona Betania tomaratha. Barapo tomaratha Jesús popona Simón pia botha tatsi, pon copiya bayatha peperu sawinchi. ⁷Barapo botha petsiriwa powa pesi cui weiweinaewa Jesús imoxoyo caquita uncuatabatsi. Barapo petsiriwa capatopa alabastro ibo wun bosibu atsato, xua bichocono wunca penasiwa xua petuxueiwa, po petuxueiwa bichocono ainya matoma. Poxonae Jesús eca pexaethopaewatha, bapoxonae barapo petsiriwa Jesús mata epatabatsi barapo petuxuei tuxusi nasiwatha. ⁸Poxonae Jesús pijimonae tatsi tane baxua, barapomonaе bichocono anaepana, yawa caemonae najeiно:

—¿Eta pocotsiwa metha saya baxua xuba jane? ⁹Barapo petuxueiwa becaenaetsipatsi bapoxonae bexeinaetsipatsi paratixi nawita xua bapoxonae barapo paratixitha beyawenaetsipatsi peacopeibi jiwi, najei barapomonaе.

¹⁰Jesús yaputane xua pijimonae tatsi baxua pepaebiwa, daxota Jesús jeje:

—¿Eta pocotsiwa metha barapowa pabiataneme? Pocotsiwa barapowa inta exana apara seicayarú xua pexeinya coyene inta exana. ¹¹Barapo irathe peacopeibi jiwi paca baru jinompeibina painya neyawenaenexa tsaibi tsane barapo jiwi. Ichitha nama paxam jopa ataya paca baru poponae tsainchi xua pata tana neyawenaenexam barapo irathe. ¹²Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wunaeta xua muthu tana neboyaenexa poxonae tupaеin. ¹³Bara xaniyan paca tsipaebatsi, daxita nacuantha poxonae jiwi cueicueijeji tsane Nacom pia pecapanenebiyae diwesi, barapo jiwi yawa yabara paebina xua pocotsiwa poxonae bapowa inta exana xua jiwi barapowa peyabara cui nanta xeinaenexatsi, jei Jesús.

**Meje yabara poxonae Judas, Jesús caenaetaxotsi
(Mr 14.10-11; Lc 22.3-6)**

¹⁴Nexata Jesús pijimonae tatsi pomonaе doce poyobe tatsi, barapo doce poyobe jiwana bara caein, bapon pewun Judas Iscariote. Bapon Judas pona sacerdotemonae pia pentacaponae wi tatsi beya xua petsipaеbinexa barapomonaetha. ¹⁵Judas jeje barapomonaetha:

—¿Eta po paratixi pana necatsiname icha Jesús caenaetaxubin, painya xantha? jei.

Nexata barapomonaē Judas pentoma catatsi treinta po paratiximonaēbe, xua po paratixi bichocono matoma nawita. ¹⁶Barapoxonaē Judas tamropata pitaba xua jeita xua po coyenetha Jesús pecaenaetaxubiwa tsainchi barapomonaetha, poxonaē peyapu xanepanaewatha.

**Meje yabara poxonaē Jesús pijimonaē
baru nabane Pascua wun matakabitha**
(*Mr 14.12-25; Lc 22.7-23; Jn 13.21-30; 1 Co 11.23-26*)

¹⁷Nexata copiya matakabi jopa po matakabi tsiwana penantacarucuae matakabi, xua po matakabintha poxonaē jiwī tsinacaeutsina xua penabanaewa tsane pan, po pan jopa muxunapentsiyo levadura matawun, pocotsiwa xua cotowa exana pan. Jesús imoxoyo caquita umenarucupatsi pijimonaē yawa Jesús jeichichino:

—¿Exota ichichipame xua ichaxota pexaewa paca tsinacui wunaetsinchi wanabanaenexa tsane xua Pascua wun matakabi nexa? jei barapomonaē.

¹⁸Jesús barai pijimonaē, jeye:

—Tomara beya paponde, Jerusalén tomara beya. Paponde po botha pon bichocono pin tutu xeina. Bapontha painta jande: ‘Pon jiwī Pecuidubin namchi: Bara nama tatupae wunaē tsane. Jinya tututha tajiwimonaē tha baru nabanaetsi pexaewa Pascua wun matakabi nexa’, cajei pon jiwī Pecuidubin, pajande, jei Jesús pijimonaetha.

¹⁹Jesús pijimonaē tatsi bara exana pocotsiwa bayatha Jesús pijimonaē peitorobixae. Matautano barapomonaē pexaewa nacui wunaetajeba Pascua wun matakabi nexa xua penabanaenexa.

²⁰Poxonaē quirei tsanaicha bapoxonaē Jesús pijimonaē baru eca pexaethopaewatha pomonaē doce poyobe tatsi. ²¹Poxonaē Jesús pijimonaē baru xunaeca bapoxonaē barai pijimonaē, jeye:

—Bara xaniyan paca tsipaebatsi caein pon paxam jiwana pam, bapon necaenaetaxubina ichamonaetha xua tana nebexubiwa tsane ichamonaē, jei.

²²Nexata bapoxonaē Jesús pijimonaē tatsi unthuthu wecoyei tsurucupae, nexata daxita tsana jei tsoponaē Jesththa:

—Tanecanamataxeinaem, apara ¿xan cacaenaetaxubinchi? jei daxita barapomonaē xua Jesús tsana yainyabapoinchi.

²³Jesús jume nota barapomonaē, jeye:

—Pon cae paratotha pana nabaru jajaucuncuaponanbe pan, bapon apara pon necaenaetaxubina ichamonaetha. ²⁴Xan ponxaein Nacom Tananeitapetsin bewa tupaēin, tsipei Nacom Pejume Diwesitha

baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wūnae tsipae icha bapon bayatha jopa naexaenae tsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

²⁵Nexata Judas pon Jesús caenaetaxubinchi bapon itacaretaba, jeye Jesustha:

—Pon jiwi Necuidubim, ¿xan apara cacaenaetaxubinchi? jei Judas. Jesús jume nota, jeye:

—A, xuaunxuae bara paebame, jei.

²⁶Poxonae Jesús pijimonae barū xunaeca, bapoxonae Jesús pecobetha pita pan yawa Paxatha tsipaeba, jeye: “Axa, maisa jūntū coyene weiweinan xua pan pata tana necatsiwam”, jei. Bapoxonae Jesús pecobetha pan epa janaca yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan apara yabara caunuta tapepon xua poxonae tapaca tsitūpaewatsi tsainchi, jei Jesús.

²⁷Bapoxonae Jesús equeicha pecobetha pita corotiyō yawa Nacomtha tsipaeba, jeye: “Axa, maisa jūntū coyene weiweinan xua corotiyōtha ecareca pepa uva mera xua pata tana necatsiwam”, jei. Bapoxonae Jesús pijimonae cata corotiyō xua pejiwana aapaponaenexa. Bapoxonae jeye pijimonaetha:

—Daxita pa-aapaponde xua barapo cae corotiyōtha. ²⁸Pena peyabara tsiwūnae muxu dutsi coyenewa paca tsipaebatsi. Barapo uva mera xua tsijuntutu eca corotiyōtha barapo mera yabara caunuta tajana xua jana othoparenaein poxonae tūpaein. Barapo jana tsita itapeinya xeinaena xua jiwi pinmonae, yabara jūntemainaein abe pia peexanae cuiru coyenein tatsi. ²⁹Daxota paca tsipaebatsi barapo uva mera jopa equeicha paca barū apae tsainchi anoxuae. Meisa abū bexa tsane equeicha pena coyenewatha paca barū apaeinchi, barapo uva mera poxonae Nacom neexanaena xua itorobiya ewatsin jiwi, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeyno”, pinae yabara jei tsainchi Jesús (Mr 14.26-31; Lc 22.31-34; Jn 13.36-38)

³⁰Poxonae Jesús pijimonae barū najume weta xua naxūna Nacom nexa, bapoxonae Jesús pijimonae barū pona demxuwa beya. Barapo demxuwa pewūn demxu Olivowa, olivo naein peumenaexae baxota. ³¹Nexata Jesús barai pijimonae, jeye:

—Anoxuae barapo merawithe daxita pam pana necuentarūcūpaename, tapaca urapentsixaetsi tsainchi. Baxua paexanaename tsipei Nacom Pejume Diwesitha paca yabara cui tsiwūnaeya jeye: ‘Poxonae ovejamonae peewatsin bexubinchi, bapoxonae ovejamonae tsanarūcūpaena’,

jei Nacom. Penamchixae poxonae ichamonae newaetabina tana nebexubinexa pana necuentarucupaename. ³²Ichitha taeyarapaeyo poxonae equeicha asu neexanaena, bapoxonae paca tsiwana patopiyaeinchi Galilea nacua beya poxonae bara beya paponaname, jei Jesús.

³³Nexata Pedro Jesús jume notatsi, jeye:

—Bequein ichamonae cacuentarucupaena jinya neuraxubixae nama xan bapana jopa cacuenta naetsiricuae tsainchi tana neuraxubixaemxae, jei Pedro.

³⁴Nexata Jesús Pedro jume baraichi, jeye:

—Bara xainyeya catsipaebatsi po merawithe, pewnaeya poxonae beya ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeyno’, neyabara jam tsane, jei Jesús.

³⁵Pedro Jesús baraichi:

—Bara bequein capuna tupaeinchi ichitha baxua jopa cayabara paebi tsainchi, jei Pedro.

Iruu daxita Jesús pijimonae tatsi bara jumichi, nanta jupiya paeba.

**Meje poxonae Jesús Paxa tsipaeba ichaxota
tsica iriyo, po iriyo pewun Getsemaní
(Mr 14.32-42; Lc 22.39-46)**

³⁶Nexata Jesús pijimonae baru patopa ichaxota tsica iriyo, po iriyo pewun Getsemaní. Baxota Jesús barai pijimonae, jeye:

—Xote abu paenare tha matha Taxatha tsipaebichi painya cuariyatha xotiye, jei Jesús.

³⁷Jesús baru pona Pedro. Iru Zebedeo pexantobe tatsi Jesús baru pona. Bapoxonae Jesús bichocono unthuthu wecoyei, yawa bichocono unthuthu deideije. ³⁸Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupa. Xote paenare, yawa payoyocare xua painya tana nebaru naitaewatsinexam, jei Jesús.

³⁹Nexata Jesús equeicha tsiwiyo dabe natsixitabiya, irabe taeuncuareca tsipei jopa juniya ajuntutaneyo. Bapoxonae Jesús Paxa tsipaeba, jeye:

—Axa, icha ichichipame xua tana neyawenaewam tsane, newepire pocotsiwa anthuthutane neexana. Ichitha jopa necana exanaeinde xua pocotsiwa ichichipan, saya jame necana exande xua pocotsiwa ichichipame, jei.

⁴⁰Nexata Jesús equeicha caibe iya pijimonae tatsi beya poyobe xua acoibi poyobe, ichitha barapomonae maita. Jesús Pedro baraichi, jeye:

—Maisa jopa paca itacupaeyo xua pata tana nebaru yoyocaewam xua poxonae bequein bara cae horatha. ⁴¹Maisa payoyocare. Nacom

patsipaebare xua jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa ichitha painya pepon bichocono paacoyenefaetabim xua painya netsipaebiwa Nacom, jei Jesús.

⁴²Equeicha Jesús bara nama caeto pona xua Paxa petsipaebinexa. Poxonae Paxa tsipaeba, jeye:

—Axa, icha jopa ichichipaem xua tana newepichiwam, pocotsiwa neajuntutane exana, bara jopa necana exanaeinde xua pocotsiwa ichichipan saya jame necana exande xua pocotsiwa ichichipame, jei Jesús.

⁴³Bapoxonae equeicha Jesús pijimonae beya pona xua acoibi poyobe daichitha barapo acoibi poyobe came maitumena, tsipei bichocono itata tsacatsaquei xua itamaipana. ⁴⁴Bara nexata Jesús equeicha saya cuentapona. Equeicha Jesús pona xua Paxa petsipaebinexa xua equeicha acoibi po cuiyobetha, barapo jumetha equeicha Jesús Paxa tsipaeba. ⁴⁵Nexata equeicha Jesús pona pijimonae tatsi beya. Bapoxonae barai pijimonae, jeye:

—iMoya bara painya nepu maitumenaende aunxuae jopa Nacom patsipaebim xua painya nepaca cayawenaenexa! Bayatha tsuxubiba, po horatha poxonae xua xan ponxaein Nacom Tananeitapetsin ichun necaenaetaxubina ichamonaetha, pomonaetha pomonae peantucoyenebe jiwi. ⁴⁶Panacosapende, panonobapondeno. Antha bu poinchi. Dota dawerena pon necaenaetaxubina ichamonaetha, jei Jesús pijimonaetha.

Meje yabara poxonae Jesús waetabatsi

(Mr 14.43-50; Lc 22.47-53; Jn 18.2-11)

⁴⁷Poxonae Jesús cataunxuae tsipaebuncua pijimonae bapoxonae Judas patopa. Bapon Judas doce poyobe jiwana caein, xua Jesús pepa pijimonae tatsi. Judas pinmonae baru patopa. Ichamonaе cusin cajjinca. Ichamonaе iwabi cajjinca. Daxota daxita barapomonaе pata, tsipei sacerdotemonaе pia pentacaponaewi tatsi iru pitiri jiwiru daxita barapo pentacaponaewi itoroba barapomonaе. ⁴⁸Judas, pon Jesús caenaetaxubinchi, pewunaeya tsane xua poxonae patopa bapon cou tsiwanaya paeba barapo pin bicheitha, cou jeye: “Pon tsutsubin, bapon apara barapo pebin, nexata moya pawaetabare bapon”, cou jei. ⁴⁹Daxota poxonae patopa, bapoxonae Judas Jesús imoxoyo caquita poinchi, matauta nainya Jesús jeichichi:

—Pon jiwi Pecuidubim, xamda, jei Judas.

Bapoxonae nainya Judas Jesús tsutsubatsi. ⁵⁰Nexata Jesús jume nota, jeye:

—Ponxae tajitom, moya bara exande xua jinya necana exanaetsi, jei.

Nexata barapomonaе pomonaе Judas pebaru patopaexae barapomonaе Jesús imoxoyo caquita umenarucupatsi, bapoxonae Jesús waetabatsi.

⁵¹Caein pon Jesús pijimonae tatsi jiwana, pon Pedro, bapon nainya cusi namara wejonta. Bapoxonae bapon muxuyoro catsoniba, pon sacerdotemonae pia pepa pentacaponaein tatsi tanacuitatsi, bapon muxuyoro catsonibatsi. ⁵²Nexata Jesús barai pijimonae jiwana jitontha, pon Pedro, jeye:

—Maisa cusi jeinca pentacuerutha. Tsipei pon ba cusitha namawainta, bapon ba xuya bexubinchi cusitha. ⁵³¡Maisa xam jopa yaputaem! Icha ichichipan bara neitacupa xua Taxatha tawucaewa, xua nainya inta peitorobinexa pia matatsunpiwi xua bichocono ayei pin bicheitomonae xua tana neyawenaewa tsane. ⁵⁴Icha Taxa wucaetsipan xua bapon tana neyawenaewa tsane bapoxonae jopa neyabara jume cui wetsipae po coyene bayatha Nacom Pejume Diwesitha neyabara paeba, po coyene xua tana newaetabiwa tsane xua tana nebexubiwa tsane, jei Jesús.

⁵⁵Nexata Jesús barai pomonaetha pomonae Judas baru patopa, jeye:

—Pacapatame cusin yawa iwabi be poxonae pacana ichim pontha pon jiwi pecaibin. Daxita matabin Nacom pin pia botha tatsi paca baru poponeibatsi, paca cuidubeibatsino, daichitha bapoxonae jame jopa pana newaetabim. ⁵⁶Ichitha daxita baxuan neyabara canacui jume weta exana, bayatha penecui yabara wuna tsiwanaya paebixae pomonae Nacom peitorobi jume pepaebiwi, Nacom Pejume Diwesitha, jei Jesús.

Bapoxonae Jesús cuentaracupatsi pijimonae, meisa Jesús baru umeinchi pomonae Judas bayatha baru patopa.

**Meje yabara poxonae Jesús capoinchi judiomonae pia
pecanamata caitorobi jiwi bicheito tatsi pia peitabaratha tatsi
(Mr 14.53-65; Lc 22.54-55, 63-71; Jn 18.12-14, 19-24)**

⁵⁷Pomonae Jesús teicatsi barapomonae Jesús capoinchi pon pewun Caifás itabaratha tatsi. Bapon Caifás, pon sacerdotemonae pia pepa pentacaponaein tatsi pon peainya cuin yatsicaya. Baxota iru nanacaetuta pomonae judiomonae pecuidubiwichi Moisés pia peitorobi coyene tatsi, iruru pitiri jiwi pomonae judiomonaexae. ⁵⁸Iru Pedro Jesús tsiwiyo taju pu taetae tsiniyatsi beya poxonae patopa panatha, po panatha ichaxota sacerdotemonae pia pepa pentacaponaein tatsi tauncuatsi bo. Poxonae Pedro pana tututha joniya bapoxonae imoxoyo naeca policiamonaetha pecui taenexa xua po coyeneya Jesús cana exanaeinchi pomonae nacaetuta.

⁵⁹Sacerdotemonae pia pentacaponaei tatsi iru ichamonaeno, pomonae pecanamata caitorobi jiwi bicheito, daxita barapomonae jeita ichamonaenae pomonae xua Jesús naerabiya peyabara paebinxatsi pocotsiwa xua Jesús paeba xuano xua exana, pia barapo jumetha paebichi xua bara Jesús tupa peexanaewa tsainchi. ⁶⁰Bara bequein pin bicheito pata xua Jesús abeya peyabara paebinxatsi, ichitha cataunxuae barapomonae pomonae

pecanamata caitorobi bicheito, came jopa xeinaeyo po jume naemata jume tsita itapeinya xeina pocotsiwa xua Jesús paeba xua barapo jumetha Jesús pebexubinxatsi. Matapainya bapoxonae pebinbe nacueyatabe patopabe. Baponbe Jesús abeya yabara paebatsibe. ⁶¹Baraponbe jeibe Jesús yabara:

—Bapon namchi: ‘Neitacupa xua Nacom pin pia bo abe taexanaewa. Bapoxonae equeicha acobi po matabibe barapo Nacom pin pia bo tatsi xanebin’, jei, jeibe baponbe.

⁶²Nexata bapoxonae sacerdotemonae pia pepa pentacaponaein tatsi asiya uncuataba yawa bapoxonae Jesús baraichi, jeye:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei sacerdotemonae pia pepa pentacaponaein tatsi.

⁶³Daichitha saya Jesús moya uncua. Daxota bapoxonae sacerdotemonae pia pepa pentacaponaein tatsi Jesús baraichi, jeye:

—Caitorobatsi Nacom peitabaratha tatsi, pon asu popona. Yatsicaewa pebiname pocotsiwa bara xainyei nepaebiwa. Incane pana netsipaebare. ¿Bara yatsicaya xam Mesías, pon Nacom Pexantom, pon Nacom necaitorobin? jei.

⁶⁴Jesús jume nota, jeye:

—Aa, xuaunxuae bara paebame. Paca tsipaebatsi xua pana netaename xan ponxaein Nacom Tananeitapetsin Nacom pia pecoxa weya tatsi ecaein pon peyapusu itorobi coyenewa pexeinaein. Matautano pana netaename poxonae equeicha patopeicaein tsaquinaebowantha xua peitaboco wetsica, jei Jesús.

⁶⁵Nexata bapon pon sacerdotemonae pia pepa pentacaponaein tatsi pin anaetha anaya paparuwa nata tsitsinaxuba. Bapoxonae jeye:

—Po jumetha xua bapon paeba barapo jume Nacom tsita abetsi. Nama equeicha jopa wanantawenonaewa ichamonae xua wanaca tsipaebiwa tsane xua bapon peyabara paewatsi. Bapon natsiaenae exana abe pepaebixae barapo jume poxonae Nacom Pexanto najainta. Paxam bara pajume taneme pocotsiwa bapon paeba, pocotsiwa Nacom jopa ichipaeyo. ⁶⁶¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo bicheito po bicheito baxota ena, jeye:

—Bara xainyeya paebame. Jesús abe pia pepaebixae Nacom tsitatsi xua bapon tsita natsicuentatsi. Daxota bapon bewa tupaena, jei barapo pecanamata caitorobi jiwi bicheito.

⁶⁷Poxonae barapomonae Jesús itacuere cutatsi, bapoxonae peonetha Jesús itabara subabatsi, yawano butsinno. Ichamonae Jesús itabara tsaquibacotatsi. ⁶⁸Bapoxonae barapomonae Jesús baraichi:

—Xam jam: ‘Xan Mesías’, jam, incane pana netsipaebare: ¿Jintam caitabara tsaquibobara xua bequein paca itacuere cutatsi? jei barapomonae.

Meje yabara poxonae Pedro Jesús yabara paebatsi xua jeye:
“Jopa dapon yaitaeinyo”, yabara jeichichi Jesús
(Mr 14.66-72; Lc 22.56-62; Jn 18.15-18, 25-27)

⁶⁹Poxonae cataunxuae Jesús cana exanompatsi bapoxonae iruru Pedro panatha eca xua pesato beya. Bapoxonae iruru yabuyo, powa sacerdotemonae pia pepa pentacaponaein tatsi tanacuitatsi, bapowa Pedro imoxoyo caquita poinchi. Bapowa Pedro jeichichi:

—Apara xam bayatha iruru napuna poneibame Jesús, pon Galilea nacuapin, jei yabuyo.

⁷⁰Ichitha Pedro jume matawenta bapowa, daxita jiwi peitutha tatsi. Pedro jeye:

—Jopa yaputaeinyo pocotsiwa xua yabara paebame, jei Pedro.

⁷¹Poxonae cataunxuae Pedro ecapona xua pia ponaetsi bomuxu coiboto beya, bapoxonae iru ichawayo Pedro tainchi. Barapowa tsipaeba ichamonae pomonae baxota iru umena, Pedro yabara paebatsi, jeye:

—Apara bapon, pon napuna poponeiba Jesús pon Nazaret tomarapin, jei barapowayo.

⁷²Equeicha Pedro jume matawenta, jeye:

—Bara xainyan jan. Jopa dapon yaitaeinyo pon aunxuae payabara paebame, jei Pedro.

⁷³Equeicha bapoxonae pirapaeyo Pedro imoxoyo caquita poinchi pomonae baxota umena. Barapomonae Pedro jeichichi:

—Apara bara xam iruru bapon pijimonae tatsi jiwanam, daxota barapo jume coyeneya paebame, icha barapomonae ichi, jei.

⁷⁴Nexata Pedro daunweya jeye:

—Bara Nacom peitabaratha xainyeya paca tsipaebatsi pocotsiwa bara xaniwaicha tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi, jopa dapon yaitaeinyo xuaunxuae pon payabara paebame, jei Pedro.

Bapoxonae iruru caena nainya wacara pebto fibaru. ⁷⁵Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe, pewunaeya poxonae wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo, neyabara jam tsane. Bapoxonae iru nainya wacara pebto fibina’, jeichichi Pedro, xua Jesús paeba. Nexata Pedro pesato bejoniya bichocono wecoyei, peajuntutanexae xua Jesús yabara paebatsi.

Meje yabara poxonae Jesús capoinchi Pilato beya
(Mr 15.1; Lc 23.1-2; Jn 18.28-32)

27 ¹Poxonae pentha tsina sacerdotemonae pia pentacaponaeawi tatsi iruru judiimonae pia pitiri jiwi tatsi, daxita barapomonae

yabara nacaetuta xua nanta jupaeya peburuya penanta xeinaenexa po coyeneya xua Jesús pebexubiwa tsainchi. ²Daxita barapomonae equeicha Jesús maxu cutatsi. Bapoxonae Jesús yamaxu cutsiya capoinchi Pilato beya, pon Judea nacuapiwi peyanacua ewatsinchi xua romanomonae peitorobixae.

Meje yabara poxonae Judas pia coutha nabexuba

³Judas Jesús caenaetaxubatsi ichamonaetha. Poxonae bapon jume tane xua ichamonae Jesús yabara paebatsi xua bewa tupaena abe peexanaexae, poxonae bequein jopa abe exanaeyo, bapoxonae Judas bichocono aura xua Jesús pecaenaetaxubixaetsi. Daxota Judas equeicha caewa capona barapo treinta po paratiximonaebe. Sacerdotemonae pia pentacaponaeawi catatsi iraru pitiri jiwi catatsi. ⁴Judas barai barapomonae, jeye:

—Poxonae pebin caenaetaxuban, xua jopa pon abe exanaeyo, xua poxonae ichamonae pebexubinexa xua pejana pichapabarena, xan apara bara abe exanan, jei.

Ichitha barapomonae Judas jume notatsi, jeye:

—Apara baxua jopa painta ainya cuiyiyo. Jame apara xam jinya coyam poxonae baxua cana exaname, jei.

⁵Nexata Judas barapo treinta po paratiximonaebe anaya xoya Nacom pin pia botha. Poxonae Nacom pin pia bo weya pona, bapoxonae Judas nabexuba pia coutha, nacoibo tathu catutaba athawetsica.

⁶Bapoxonae sacerdotemonae pia pentacaponaeawi tatsi nota po paratixi Judas bebaya. Bapoxonae barapomonae najei:

—Jopa naca copatsiyo xua barapo paratixi bara wajebinexa Nacom pin pia botha tatsi nexa. Tsipei apara barapo paratixi taxoba poxonae barapo paratixitha comotatsi pebin xua ichamonae pebexubinexa, xua pejana pichapabarenaenexa, jei barapomonae.

⁷Bapoxonae daxita barapomonae peburuya nanta xeinarucupa, najei: “Waxainchi barapo paratixitha comotinchi tsica iriyo, po iriyotha jiton tsorobon noteiba xua juruwaton peexaneibinexa. Barapo iriyotha tsane xua pemuthathuqueibinexa tsainchi poxonae werapeibina pomonae penanapaincha jinompaewi xua icha nacua werena peponaewi”, najei.

⁸Daxota barapo iriyo barapomonae wun duta po wun jeye: “Pejana ira”, jei. Po iriyo barapo wantha cataunxuae jiwi wun ununutapona beya anoxuae. ⁹⁻¹⁰Baraxua barapomonae exana xua bayatha pecui yabara tsiwunaeya wunae tsimumu dutsiya jeixae pon Nacom peitorobi jume pepaebin, pon pewun Jeremías pon caena bayatha tupa. Bapon Jeremías jeye: “Israelmonae pia pentacaponaeawi tatsi catsina treinta po paratiximonaebe ichantha xua poxonae pecaenaetsixae tsainchi pon pejuntu coyene xeicaein. Barapo matomatha cana matomatsinchi pon

pejuntũ coyene xeicaein. Barapomonae baxua cana exanaena bapontha tsipei barapomonae peburũya nanta xeinarũcũpa pecana matomatsinexa. Bapoxonae equeicha barapomonae caewa pichina barapo treinta po paratiximonaebe. Barapo paratixitha barapomonae iriyo comotsina, po iriyotha jiton tsorobon noteibina xua exaneibina juruwaton. Baxua bara barapomonae exana be pocotsi coyeneya Nacom pon jiwi Pecanamataxeinaein nejume cui itoroba”, jei Jeremías.

Meje yabara poxonae Jesús uncua Pilato peitabaratha tatsi
(*Mr 15.2-5; Lc 23.3-5; Jn 18.33-38*)

¹¹ Jesús cataunxuae uncua Pilato peitabaratha, pon Judea nacuapiwi peyanacua ewatsinchi. Bapon Pilato Jesús yainyabatsi, jeye:

—¿Bara yatsicaya xam judiomonae itorobiya pia pepa Neewatsin? jei. Jesús jume nota, jeye:

—A, xuaunxuae paebame bara baxua apara, jei Jesús Pilato beya.

¹² Sacerdotemonae pia pentacaponae wi tatsi irũ judiomonae pia pitiri jiwi tatsi, daxita barapomonae Jesús abe yabara paebatsi xua pinae abe exana. Daichitha Jesús jopa jume barabotsiyo barapomonae. ¹³ Nexata daxota Pilato Jesús baraichi, jeye:

—¿Jopa jume taem pocotsiwa barapomonae bichocono abe cayabara paeba? jei.

¹⁴ Ichitha Jesús jopa jume notsiyo Pilato xua pocotsiwa ichamonae Jesús abe peyabara paebiwatsi xua mataũta cae jume coyenewatha jopa jume notsiyo. Daxota Pilato bichocono yabara nantũ coyene cui cabenaeca baxua.

Meje yabara poxonae Pilato jume barũ jejei xua
Jesús bara pebexubiwa tsainchi ichamonae
(*Mr 15.6-20; Lc 23.13-25; Jn 18.38-19.16*)

¹⁵ Bara nama, Pilato ba pia cui xeina poxonae ba jiwi tsinacaetuta pexaewa penanabanaenexa. Barapo matacabitha Pilato ba caein jiwana pu sotaba pomonae jiwi pecubi botha peenaewi. Pilato ba pu sotaba pon ba jiwi itapeta cowai xua Pilato peisanaxubinexa. ¹⁶ Barapo jiwi pecubi botha irũ eca pon bichocono abe peexanaein, pon peyaputaecinchi daxita jiwi poxonae abe exaneiba. Bapon pewũn Barrabás. ¹⁷ Poxonae jiwi nacaetuta, Pilato barai barapo jiwi, jeye:

—¿Eta pon pu sotabocuaein? ¿Metha Barrabás jampa? ¿Metha Jesús jampa, pon Mesías baraichi? jei Pilato.

¹⁸ Baxua Pilato paeba tsipei bapon yaputane xua pomonae pecanamata caitorobi bicheito, Jesús peuwixaetsi, caenaetaxubatsi Pilatotha.

¹⁹ Poxonae Pilato cataunxuae pia peecaethopeibiwatha eca xua Jesús peyabara paebinxatsi penatsicuentsiwa bapoxonae Pilato

piowa tatsi najume caitoroba ichuntha xua jeye: “Jopa copatsinde xua bapon pebexubinexatsi ichamonae, tsipei apara bapon pejuntu coyene xeicaein. Yaitama tsipei merawi bapon camaitan daxota bichocono anthuthurewein, tsipei bapon dacotsiwa bexotsi”, jei bapon xua Pilato piowa tatsi najume caitoroba.

²⁰Ichitha sacerdotemonae pia pentacaponae tatsi, iruru judiomonae pia pitiri jiwi tatsi, daxita barapomonae jiwi cui tsacarabatsi, xua barapo jiwi Pilato pecui itorobinexatsi xua Barrabás pepu sotabinexatsi, matautano xua Jesús pebexubinexatsino. ²¹Bapon Pilato equeicha barai jiwi, jeye:

—¿Eta pon pu sotabocuaein caein xua baponbe jiwana? jei.

Barapomonae Pilatotha jeye:

—Maisa Barrabás pu sotabare bara, jei barapomonae.

²²Equeicha Pilato yainyaba barapomonae, jeye:

—¿Eta xua cana exanocuaein Jesús pon Mesías baraichi? jei.

Nexata pinmonae Pilato jume daunweya jume notatsi, jeye:

—iBewa maisa naetha tparucua exanaem! jei barapomonae.

²³Nexata Pilato jume barai, jeye:

—¿Eta pocotsiwa xua metha jane xua abe exana? jei.

Equeicha daumetha barapomonae jume daunweya jeye:

—iBewa maisa naetha tparucua exanaem! jei.

²⁴Poxonae Pilato yaputane xua nama taalbichiba pocotsiwa bapon pepaebinexa picoya, xua peajumetsacaxae barapomonae, daxota Pilato itoroba ichun xua petaxawenaenexa tsainchi mera. Bapoxonae barapo meratha nacobe quiataxuba barapo jiwi peitutha tatsi. Bapoxonae bapon namchi, jeye:

—Xan apara jopa tacoutha bexuba exanaeinyo bapon xua daxota pejana pichapabarena pon jopa bequein abe exanaeyo. Poxonae nacobe quiataxuban meratha, baxua tsita itapeinya xeinan xua apara jopa tacouthinyo. Apra jame painya coutha pam poxonae bexuba paexaname pon abe jopa exanaeyo, jei Pilato.

²⁵Daxita barapomonae equeicha namchi, jeye:

—iPaxan iru pata tamomoxi susato jiwi pata coutha pan apara xua bapon bexotsi paexanan! jei daxita barapo jiwi.

²⁶Nexata Pilato nama pu sotaba Barrabás. Bapoxonae itoroba xua soldadomonae bara Jesús moya bichocono pecuainchinexatsi pocotsiwatha eewa xua bichocono amupiya xua xota ba jiwi cuanteibatsi poxonae abe exaneiba. Matautano itorobano xua moya bara Jesús tparucua exanaeinchi naetha.

²⁷Bapoxonae soldadomonae Jesús capoinchi Pilato pia bo tatsi beya po soldadomonae yapu eena Pilato pia bo tatsi. Bapoxonae barapo soldadomonae waba icha soldadomonae xua daxita barapo soldadomonae

Jesús pematawacaicha umenaenexa tsainchi. ²⁸Bapoxonae Jesús pia paparuwa juma xuenatsi yawa juma xatatatsi icha paparuwa, po paparuwa tsobia xua Jesús be pecana exanaenexatsi pon jiwi itorobiya pepa Peewatsinchi. ²⁹Bapoxonae cuane tepa xua pee tepa, yawa bapoxonae Jesús canamitontsiya mata xatatatsi baxua xua cana exanatsi icha be ichi pon jiwi itorobiya pepa peewatsin poxonae mata xatatatsi tepa. Matautano Jesús cobenatatsi naewa icha be ichi pon jiwi itorobiya pepa peewatsinchi poxonae naewa cobenatatsi poxonae itoroba jiwi. Bapoxonae Jesús peitabaratha tatsi pentabocototha taenatsi xua Jesús naerabiya pebarꝰ cui itura jinaenexa tsainchi. Bapoxonae Jesús cui caponatsi, jeye:

—iJaco judiomonae itorobiya pepa Neewatsim! jei barapomonae xua Jesús canamitontatsi.

³⁰Matautano Jesús yabara naone subabatsi. Matautano Jesús cobe wepitatsi naewa. Bapoxonae barapo naewatha Jesús mata cuaintatsi. ³¹Poxonae Jesús canacui wetatsi xua cui caponatsi, equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tatsi. Bapoxonae Jesús capoinchi xua tꝰparucua peexanaenexatsi naetotha.

Meje yabara poxonae Jesús tꝰparucua exanatsi naetotha
(*Mr 15.21-32; Lc 23.26-43; Jn 19.17-27*)

³²Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin. Bapon pewun Simón. Bapoxonae barapo soldadomonae Simón itorobatsi xua pecaponaenexa Jesús pia naeto tatsi, po naetotha tꝰparucua peexanaenexatsi Jesús.

³³Bapoxonae Jesús barꝰ patatsi ichaxota po uruto be jiton matasipa piwa. Daxota barapo uruto jiwi wun unuta “Gólgota”, jei. ³⁴Baraxotiya Jesús apatatsi vino mera, po vino mera equeicha muxuna epareca hiel mera matawun po mera bichocono atsu wꝰwa. Poxonae Jesús mene pana, bapoxonae Jesús aichaxaibi apa barapo mera.

³⁵Poxonae Jesús canacobe wetatsi xua naetotha tꝰparucua exanatsi, bapoxonae soldadomonae nata tsaba Jesús pia paparuwan tatsi. Barapomonae ibotixi bebeya penacueranta notsinexa Jesús pia paparuwan tatsi. Pon beta xoya ibotiyo bapon copiya pita Jesús pia paparuwan tatsi. ³⁶Nexata barapo soldadomonae Jesús yapu caenatsi poxoru jopa ichipaeyo xua Jesús pepanepaewa tsane. ³⁷Jesús pentutu wetsica tadutatsi napaewa xua barapo napaewatha tina. Barapo petinadutsiwa jeye: “Baponje apara judiomonae itorobiya pia pepa Peewatsinchi”, jei barapo petinadutsiwa xua napaewatha tinaduta.

³⁸Iꝰꝰꝰꝰ ꝰonbe jiwi pecaibinbe tꝰparucua exanatsibe naetotha ichaxota imoxoyo Jesús ducua. Ichun Jesús petsocona wetauncuiyatsi, ichun

pecoxa wetauncuarenatsi. ³⁹Pomonae Jesús xentapoinchi barapomonae Jesús cui capoinchi, yawa Jesús yabara itata naichaqebatsi.

⁴⁰Barapomonae Jesús jeichichi:

—Xam bayatha jam: ‘Nacom pin pia bo abe exanaein, bapoxonae equeicha acoibi po matabibibe xaneibin’, jam. Moya bara jinya coutha nacapanepare naeto wetsica icha bara metha Nacom Pexantom tatsim, jei barapomonae.

⁴¹Iruru barichi sacerdotemonae pia pentacaponaeawi tatsi iruru pomonae jiwi pecuidubiwi Moisés pia peitorobi coyene tatsi iruru judiomonae pia pitiri jiwi tatsi, daxita barapomonae Jesús cui capanatsi. Daxita barapomonae najei:

⁴²—Bapon cain capanepibabei ichamonae, came jopa nacapanepaeyo. Icha bara bapon israelmonae itorobiya pia pepa Peewatsinchi, bu bapon pia coutha naeto wetsica ecoinca, xainya bapoxonae jume cowuntatsi.

⁴³Bapon jume cowanta Nacom, xua bepa pinae capanepaeinchi, xua Nacom capanepaena. Icha Nacom ichichipa, bu bara moya capanepaena, tsipei caena bayatha naca jei: ‘Apara xan Nacom Pexanton’, naca jei, jei barapomonae.

⁴⁴Barichiru baxua paeba ponbe jiwi pecaibinbe, ponbe xua iruru cobe matatabarutatsibe naetho. Baponbe iruru Jesús cui caponatsi.

Meje yabara poxonae Jesús tupa

(*Mr 15.33-41; Lc 23.44-49; Jn 19.28-30*)

⁴⁵Poxonae Jesús cataunxuae ducua naetho, bapoxonae daxita nacuantha bichocono aitaquiri xua poxonae mataeinyaxae weya, beya yatabopiya. Tres po horabe quirei tsuncuae. ⁴⁶Bapoxonae Jesús jume daunweya wawai, jeye: “Elí, Elí, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

⁴⁷Ichamonae pomonae Jesús baxota jume taeumeinchi, barapomonae jeye:

—Pajume taema. Bapon waba, Elías wabatsi, pon Elías Nacom peitorobi jume pepaebin, pon caena bayatha tupa, jei.

⁴⁸Bapoxonae caein nainya cuinaepoinya pon barapomonae jiwana yawa pitaba esponja xua baxota pemene capichinexa vino mera xua po mera mene atsu. Poxonae bapon baxota mene capita, bapoxonae naewatha duta xua Jesús petayoichaenexatsi xua peapaenexa. ⁴⁹Ichitha ichamonae namchi, jeye.

—Abu, abu jopa apatsinde. Waxainchi abu matha taeinchi icha Elías patopeicaena xua bapon pecapanepaenexatsi, jei barapomonae.

⁵⁰Equeicha Jesús jume daunweya wawai, bapoxonae nama tupanaicha Jesús. ⁵¹Bapoxonae paparuwa, po paparuwa Nacom pin pia botha ducua,

barapo paparuwa nainya bopiya matonta tsitsiqueica ainya epatobe naexanabe. Matautano ira jijiyataxuba, matauta ibo wacapouna. ⁵²Po muthuntha pomonae pewerapeibiwi bobena, barapo muthun coibo tupa wacapouna pocotsiwa coibo xatababanoba xua pin ibo panawan. Barapo muthuntha cataunxuae abu saya bobena pomonae caena bayatha werapa. Pirapaeyo acoibi po matakabiyobe poxonae Jesús asu juina exanatsi, xua Nacom exana, bapoxonae iruru pomonae bayatha pejume cowuntsiwichi Nacom pomonae xua bayatha pewerapaexae barapomonae iru asu jujuiina exanatsi xua Nacom exana. ⁵³Bapoxonae daxita barapomonae muthu weiyiya. Daxita barapomonae, Jerusalén tomara beya pona po tomaratha xeina Nacom pin pia bo tatsi. Barapomonae naituta pinmonaetha Jerusalén tomarapiwitha.

⁵⁴Bapoxonae soldadomonae pomonae Jesús yapu enatsi iruru barapo soldadomonae pia pentacaponaein tatsi, pon romanomonaein poxonae daxita barapomonae tane xua ira jijiyata yawa xua tane ichawanno, bapoxonae barapomonae bichocono junuwa. Bapoxonae barapomonae jeye:

—iApara bara yatsicaya bapon Nacom pepa Pexanto tatsi! jei barapo soldadomonae.

⁵⁵Barichi iru ainyawaxi yabuxi, barapowaxi Jesús tsiwiyo tajü wetaeumeinyatsi. Barapowaxi Jesús bayatha matha puna jinompatsi xua poxonae Galilea nacua weya pona xua Jesús peyawenaenexatsi. ⁵⁶Barapowaxi jiwana, ichowayo pewun María Magdalena, powa Magdala tomarapiwayo. Ichowayo pewun María, Santiago iru José baponbe penabe tatsi. Ichowayo pewun Salomé bapowa Zebedeo piowa tatsi, xua iru bapowa Santiago iru Juan baponbe pena tatsibe.

Meje yabara poxonae Jesús petupaen ibo muthutha yauxatatabotatsi
(*Mr 15.42-47; Lc 23.50-56; Jn 19.38-42*)

⁵⁷Poxonae quirei tsanaicha, pebin patopa ichaxota Jesús naetotha tparucua. Bapon copei pexeinaein. Bapon pewun José. Bapon Arimatea tomarapin. Matauta bapon iru Jesús pia pepuna jinompaewichi jiwanaein tatsi pomonae Jesús pia pejume cowuntsiwichixaetsi. ⁵⁸Bapon pona Pilato beya pewucaenexa xua Jesús petupaen. Nexata Pilato najume caruta xua bara José pecatsinexatsi Jesús petupaen. ⁵⁹José nexata pita Jesús petupaen. Bapoxonae pena paparuwatha mata quiyontabareca xua pexeinya paparuwa. ⁶⁰Bapoxonae José muthu iya Jesús botatsi pena ibo muthutha, po muthu bequein José pia muthu tatsi xua poxonae petupaewa tsane. Poxonae José nacobe weta xua yauxatatabota pin ibo panawatha, bapoxonae ponataba. ⁶¹Baxotiya ibo muthu itapatha eca María Magdalena, powa Magdala tomarapiwayo. Iru ichowayoru María baxota naeca.

**Meje yabara poxonae Pilato itoroba soldadomonae
xua Jesús peyamũthũ eenaenexa tsainchi**

⁶²Icha matakabitha po matakabitha pentaquei seica matakabi bapoxonae sacerdotemonae pia pentacaponawewi tatsi irurũ fariseomonae daxita barapomonae pona Pilato beya. ⁶³Barapomonae Pilato jeichichi:

—Pon pata Tanecanamataxeinaem, pananta xeinan xua barapo pemuxutorobin poxonae cataunxuae popona, pana tsipaeba, jeye: ‘Poxonae acoibi po matakabibe tsuxubi tsane equeicha asũ tsane petũpae coyene cuiru weya’, pana jei bapon. ⁶⁴Daxota xam itorobare soldadomonae xua xaniwaicha peyapu eenaenexa mũthũ xua beya poxonae acoibi po matakabibe tsuxubi tsane. Baxua exande xua jopa pepatsinexa tsane mũthũ beya Jesús pia pepuna jinompaewichi, tsipei bũ merawi barapomonae pichapa Jesús pia pepon. Tsipei pirapae naerabichipa jiwitha jei tsipae: ‘Bayatha equeicha asũ exantsi petũpae cuiru coyene weya’, jei tsipae xua Jesús yabara naerabatsi. Barapomonae baxua naerabichipa jiwitha, baxua bichocono abe tsipae, beyacaincha poxonae Jesús bayatha pocotsiwa paeba xua pemuxutorobiwa, jei barapomonae.

⁶⁵Pilato barai barapomonae, jeye:

—Bara moya pataema. Moya panore soldadomonae. Moya mũthũ beya pabarũ ponde. Paexande pocotsiwa panantawenoname xua bũ moya barapo soldadomonae xaniwaicha yapu eenaena, jei Pilato.

⁶⁶Nexata barapomonae irũ soldadomonae bara be-iyiya. Bapoxonae mũthũ coibo daunwei exananota. Bichocono barapomonae cateitabanota xua pin ibo panawa xua mũthũ boupa ata. Mataũtano bichocono barapomonae pemacatha epatautarena boupa cutabarena barapo peboupa patsiwa, xua peyaputaenexa icha ichũn namicha patopa xua pecaibinexa Jesús petũpaein. Bapoxonae barapomonae cuentadendena soldadomonae xua barapo soldadomonae peyapu eenaenexa mũthũ.

**Meje yabara poxonae Jesús equeicha asũ
juina exantsi petũpae cuiru coyene weya
(Mr 16.1-8; Lc 24.1-12; Jn 20.1-10)**

28 ¹Poxonae po pentaquei seicae matakabi yapu caewaba, bapoxonae matakabi jopa po matakabi xua nanta carucua xua cae semanatha xua penacuichi matakabi. Barapo mataqueitha María Magdalena, powa Magdala tomarapiwayo irũ ichawayo María, barapowayobe caemũbotha siwa ponabe mũthũ ichaxota Jesús yamũthũ uncua. ²Bapoxonae nainya ira jijiyataxuba tsipei Nacom itoroba matatsunpin xua peitaboco wetsica pona. Barapo matatsunpin yaupataxubanota barapo pin ibo panawa. Bapoxonae barapo ibo panawatha ecopiya. ³Barapo matatsunpin bichocono daedaena

icha be yamuxu coicha ichi. Paparuwa bichocono inyapana. ⁴Poxonae soldadomonae baxua taerucupa bichocono cuitaya jijiyei tsurucupae, mexeya poxi werapa iratha bobena, tsipei bichocono junuwa. ⁵Barapo matatsunpin namchi barapowayobetha, jeye:

—Jopa pajunuwindebe. Bara yaputan xua pawenawenambe Jesús xua painya taetsibe, pon tupa exanadutatsi naetotha jiwi. ⁶Xote apara bapon aibi. Apara bayatha equeicha asu juina exanatsi petupae cuiru coyene weya, xua caena bayatha painya nepaca catsipaebixae. Incane anetha xote, pacou taemabe ichaxota bapon petupaein botatsi bayatha. ⁷Nainya papondebe weye, patsipaebarebe Jesús pijimonae tatsi. Pajandebe: ‘Bara bequein bapon bayatha tupa ichitha equeicha asu juina exanatsi petupae cuiru coyene weya. Bapon copiya paca tsiwana ponaena Galilea nacua beya. Baxotiya bapon pataename, pana nejei matatsunpin’, pajandebe Jesús pijimonaetha. Poxonae bapon pataename, bapoxonae payaputaename xuaunxuae paca tsipaebatsi bara apara xaniyei, jei matatsunpin.

⁸Bapoxonae barapo yabuyobe muthu weya nainya pontababe. Junuwiya juntu coyene weiweinabe. Barapowayobe cuinaepoinyabe Jesús pijimonae tatsi beya xua diwesi caponabe pocotsiwa matatsunpin paeba. ⁹Poxonae barapowayobe epathotha cataunxuae cuinaecaponabe bapoxonae Jesús jemeicha uncuataba barapowayobe pia xantha tatsi. Jesús jeye barapowayobetha: “Jaco”, jei Jesús. Barapowayobe imoxoyo caquita ponabe Jesustha bapoxonae pentabocototha uncuabe yawa taxu waetababe xua Jesús wunae pejainchinexatsi. ¹⁰Jesús barai barapowayobe, jeye:

—Jopa pana necunuwindebe. Paponarebe tajiwiwimonae beya. Patsipaebarebe pajandebe: Jesús paca itoroba bepa pinae paponae Galilea nacua beya. Bepa pinae baxotiya pataem, pajandebe, jei Jesús.

**Meje yabara poxonae soldadomonae naerabiya paeba,
jeye: “Jesús pijimonae petupaein pitatsi”, jei**

¹¹Poxonae barapo yabuyobe cataunxuae namtotha ecaponabe, bapoxonae icha soldadomonae jiwana, po soldadomonae Jesús yamuthu eenatsi, barapo soldadomonae tomara beya pona. Matauta sacerdotemonae pia pentacaponaei tatsi tsipaebatsi daxita pocotsiwa xua xuan tane. ¹²Barapo sacerdotemonae pia pentacaponaei tatsi pona pitiri jiwi beya xua caemonae peyabara natsipaebinexa xua Jesús petupaein yabara. Bapoxonae daxita barapomonae soldadomonae paratixi nawita catsibatsi xua jiwi naerabiya petsipaebinexatsi. ¹³Bapoxonae barapomonae soldadomonae baraichi, jeye:

—Patsipaebare jiwi xua merawi poxonae pamaitumenae Jesús pijimonae tatsi pata, yawa xua bapoxonae petupaein pitatsi. ¹⁴Icha

Pilato pon peyanacua ewatsin jiwi jume taebina xua Jesús petupaein aichurucuae, yawa icha bapon baxua yabara paca yainyabina, bapoxonae nexata paca yabara jume yawenaeinchi xua bapon jopa paca jutebi tsane, jei barapomonae.

¹⁵Nexata barapo soldadomonae nota paratixi yawa jiwi tsipaeba tsiniyatsi xua sacerdotemonae pia pentacaponae wi tatsi peitorobixae. Barapo penaerabi diwesi jume, judiomonae jume cocowantapona. Anoxuae barichi po judiomonae anoxuae jinompa, jume cocowantapona barapo diwesi.

**Meje yabara poxonae Jesús cui itoroba pijimonae xua
pia diwesi tatsi daxita nacuantha petapaebiwa tsainchi**
(Mr 16.14-18; Lc 24.36-49; Jn 20.19-23)

¹⁶Nexata once poyobe pomonae xua Jesús pijimonae tatsi barapomonae nawibiya Galilea nacua beya. Bapoxonae barapomonae demxuwa beya pona, po demxuwa pinae Jesús caunuta xua pinae baxota patopaena.

¹⁷Poxonae barapo once poyobe baxota Jesús taerucupatsi, ichamonae Jesús wnae jaintatsi, bequein ichamonae ainya juntu coyenein xeina xua Jesús xapain beta jopa yabara jume cowuntichi. ¹⁸Nexata Jesús pijimonae imoxoyo caquita pona. Bapoxonae jeye:

—Nacom necata daxita peayapusu itorobi coyene xua peitabocotha nexa, matautano po cae pin nacuathe tsiquenexano. ¹⁹Paponare daxita carepaya jiwitha xua daxita nacuantha. Jiwi pacana exande xua tana nejume cowuntsiwa tsane. Daxita pomonae tana nejume cowuntsiwi pabautisabare. Poxonae pabautisabame Taxa pewun pawun taibare, matautano pana newun taibare, ponxaein Nacom Pexanton, matautano Nacom pia Pejumope tunaxu tatsi pawun taibare xua barapo acoibi wunthabe painya paca nepaca yawenaenexa pia peayapusu itorobi coyenewatha. ²⁰Daxita barapomonae pacuidubare daxita xua xuan pocotsiwa bayatha paca itorobatsi. Matautano painya xoba pajuntemainame xua daxita maticabin bara ataya paca baru poponeibinchi beya poxonae tsane xua equeicha patopeicaein, jei Jesús pijimonaetha.

Baja Mateo.